




BIBLIOTHECA  
 14  
 11 M  
 24

Ex Bibliotheca  
 majori Coll. Rom.  
 Societ. Jesu  
 III. 13. a

14-7-E-9  
 E

693.16

IN  
 14  
 11  
 C







GERARDI DE VRIES,

Professoris Philosophi Ultrajectini;

# EXERCITATIONES RATIONALES

DE

DEO, DIVINISQUE PERFECTIONIBUS.


*Accedunt Ejusdem*

## DISSERTATIONES

DE

Infinito; Nullitate Spirituum; Homine Automatico; Contradictoriis  
Deo possibilibus; Sensuum in Philosophando Ufu; Cogitatione  
ipsa Mente; Operationibus Brutorum.

*In quibus passim quae de hisce philosophatur CARTESIUS  
cum recte Rationis dictamine conferuntur.*



TRAJECTI ad RHENUM,

Apud { JOANNEM vande WATER, } Bibliopol.  
{ JOANNEM RIBBIUM, }  
{ FRANCISCUM HALMA, }

clō Isc LXXXV.

(52

*Nobilissimis & Amplissimis Dominis ,*

D. P A U L O V O E T  
van W I N S S E N , J C<sup>to</sup>,

Supremi Fœderatorum Belgarum Senatus , qui Hagæ  
Comitis est , nuperrime membro ,

D. G U I L J E L M O  
van W E E D E ,  
CONSVLIBVS;

Nec non

I N C L Y T O

S E N A T U I

Reipublicæ U L T R A J E C T I N Æ ,  
ACADEMIÆ CURATORIBUS.



Uod fiat cum Vestra venia , ad  
Vos itur , Amplissimi Viri. Vo-  
bis enim , post Deum , primam  
reddere decet rationem otiorum , quæ  
nobis

## D E D I C A T I O.

nobis facit Vestra in Vestram Academiam munificentia. Munificentia, cujus tanto illustrior laus est, quanto in Vestri Ordinis Viris exempla ejus existunt insolentiora. Parisiensem suam primogenitam filiam dici gaudent Galliarum Reges. Atqui ad tantæ Majestatis amplitudinem comparatum eximium id habet nihil. Rara magis hac parte Vestra gloria, quando qui Urbis Rectores iidem salutamini Academiae Curatores. Heroicus is absque dubio Patrum fuit animus, quo tantæ molis operi excitando manum admoveere ausi fuerunt. Nihilo tamen inferior Filiorum virtus, qui nullos difficillimorum temporum, qui-

## D E D I C A T I O.

quibus ipsa tantum non oppressa jacuit  
 Respublica , calamitatibus absterreri po-  
 tuerunt ab ejus fortiter tuendi constan-  
 tia. Stetit , Statore Deo , providâ In-  
 cliti Senatûs Urbani curâ in mediis re-  
 rum omnium ruinis hoc Patriæque Eccle-  
 siæque Seminarium. Quin tam egistis  
 prolixè , ut nuperæ cladis quasi imme-  
 mor ad suas jam rediisse vires pristinum-  
 que recuperasse decus videri possit. Ex  
 qua recenti præteritorum memoria si  
 spem futurorum animo concipere fas est ,  
 nihil unquam desperandum fuerit Acade-  
 miæ , donèc Vestra in illam voluntas fuerit  
 eadem , perennaturæ. Ità hanc , Am-  
 plissimi Domini , Vestræ Civitati à Patri-

D E D I C A T I O.

bus partam , à Vobis auctam , ad feros  
Nepotes feliciter transmittite gloriam.  
Optimum Maximum Deum calidis votis  
veneror , esse Vos jubeat Reipublicæ ,  
Ecclesiæ , Academiae , Proceres , Nu-  
tricios , Curatores , Felices , Pios , Pru-  
dentes !

*Dabam Trajecti ad Rhenum*  
*Pridie Kalendari Februar.*  
A. CIO IDC LXXXV.

NN. AA. VV.

*Devotissimus*

GERARDUS de VRIES.

AD .



A D

# LECTOREM.

**Q**Uotquot fermè nostrâ ætate ad Libros seu conscribendos seu divulgandos animum adjiciunt suum, benè rem gessisse ac justam instituti rationem se reddidisse arbitrantur, amicorum precibus eo se adductos fuisse si in ipso limine Lectori, ut credat, persuaserint. Non amicorum ego, verùm omnibus illis chariorum mihi capitum, florentissimorum Juvenum quibus me quantus sum debeo, repetita decies vota extorsisse mihi quicquid hujus est operis, si dicerem, dicerem ex vero. Non dicam tamen; qui omnem illam tenuem valdè habeo tanti conaminis excusationem. Eant amicorum suasu, quibus ità visum est, in dubiam hanc publicæ laudis vel vituperii aleam! cujus infeliciter jactæ non illi suasores, sed ipsi qui in lucem prodeunt Auctores luunt imprudentiam. Et luunt jure meritissimo, qui plerique obsequiosi animi obtentu palliare nituntur quâ toti intus ardent scribendi libidinem. Epidemialis hic morbus est, cujus hodiè contagio adeò universum propè literatorum orbem infecit, ut qui vix satis eruditionis semina mente conceperunt parturiant illicò, nullam habituri doloris quietem, donec per calamum exierint fætus. Tametsi autem horum ne millesimus quidem tam fausto sydere nascitur, ut vel  
vixisse

vixisse constet, properant nihilominus, tam est delirans ista febris, ad id promiscuè omnes, à quo longè plurimos, si scaperent, absterrere debuissent vestigia. Et tu igitur, qui has edis Exercitationes, dicat quis, aliam ab ea, quam experitur pars maxima scripturientium, tibi promittere audes sortem? Fatuus equidem sim & stupidus nimium, si ulla talis meam mentem subierit unquam cogitatio. In hoc studii genere quid laudis consequi me posse si vel maximè persuasisset mihi philautia, haud tamen ità excæcasset, quin intellexissem facili, non id intendenti seligendum fuisse scriptionis argumentum, quod ipso sui intuitu plerisque, qui subtiliores hodiè audire volunt, improbandum fore, non potui non jam dudum præsentiscere. Tanta nimirum existit hisce diebus nominis Cartesiani existimatio, ut famæ prodigus videri queat, neque prudenter satis suis rebus consulere, quisquis non satius habet mutam secum excolere Philosophiam, quam mutire quicquam Viri Nobilis meditationibus non consonum: prorsus ut Avorum ætate nemo salutatus erat Philosophus, cujus non omnis ad Aristotelis modulum composita erat sapientia. Sic, personis mutatis, eadem sæpe numero agitur fabula. Et profectò, si quantum habet compendiosæ viæ ad comparandam sibi eruditionis haud vulgaris gloriam, tantum id haberet integri animi ac generosæ mentis, ad serviendum scenæ in hoc orbe Cartesiano cum cæteris me componerem, qui non adèò forsitan sum somnolenti ingenii, ut non facile mihi foret inter primos ad Galli cantum surgere. At verò antiquior mihi semper habita fuit candoris conscientia, quæ haud finit virum bonum, publicum præcipuè Doctorem, illa ceu vera profiteri, quorum certitudinem non efficaciter animo persuasit immotum rectæ rationis dictamen; cui uni sacramentum dixit quiscunque Philosophus est verè liber. Quod itaque de se alibi Cartesius, de me ipso hic dicam: „Cum ille homo (Aristotelem is innuit; Ipsum  
„ego)



## A D L E C T O R E M.

ego) tam felix extiterit, ut, quæcunque olim sive cogitans „sive incogitans scriptitavit, hodie à plerisque pro oraculis „habeantur, nihil magis optarem, quam ut à veritate non „recedendo ejus vestigia in omnibus sequi possem. Certè à Viri decretis nuspiam abscedere intendi, nisi sic ad veritatem propius accedere mihi viderer. Eà per omnia usus sum philosophandi libertate, ut quæ ab aliis verè dicta, non quia ab aliis dicta, sed quia vera, ratione confirmare; quæ ab aliis falsò dicta, non quia ab aliis dicta, sed quia falsa, ratione infirmare, laboraverim. Exulant mihi humana Nomina; qui solis Dei Oraculis hanc habeo reverentiam, ut mea iis submittam philosophemata. Istud Philosophi, hoc Christiani esse arbitror: quantoque digniorem hic præ illo sustinet personam, tanto religiosius illi cavendum censeo, ne quid suis ideis unquam vel minimum detrahat Fidei simplicitati, quæ unica hujus existit gloria. Si quid hac parte erro, lubens erro, qui sic philosophari laudi mihi duco. Ridebunt mea hæc, sat scio, primi omnium illi quorum spinosa meditata Sacra lucem refugiant, quia ei inimica. Sed & isti sciant, tantum à me abesse, ut talium vel sperem favorem vel metuam censuram, ut si meorum quicquam illis placitum scirem, id vel ideo suspectum haberem quam maximè; quippe qui abominor toto pectore impietatem, quæ in medio orbe Christiano palam profiteri non veretur Philosophiam gentilem planè atque omnis religionis expertem. Interim neque ignoro, munia toto cælo diversa esse demonstrare, atque dictare; quorum illud Philosophiæ, hoc Theologiæ est proprium. Indè quoties Fidei capita illustrandis Rationis conclusionibus adduxi, eà adduxi cautè, ut sui utrique disciplinæ salvi maneant limites. Peperit olim infelix alterius hujus cum altera confusio chimæram illam monstrificam Philosophiæ dicam, an Theologiæ, Scholasticæ; in qua cum Aristotele divisum habebat

imperium Divina Pagina. Explodunt eam jure merito qui sapientia sublimioris & non-vulgaris studia præ sese hodiè ferunt. Interim Scholastica illi novam ipsi substituunt compositionem Theologiae, condita ubique idearum Cartesianarum condimento: ipso licet Cartesio improbante, neque uno loco, confusaneam doctrinam. Ità per hos Philosopho licet in Christi scholam irrumpere impune, ejusque tunica latè qui splendeat pannum assuere; docente verò Philosopho, ne hiscere quidem Christo fas est. Sed jam dudum immemor mei videri potero, qui apologiam quasi parare incipio operi, quo nullius me venari velle applausum, ab initio monui. Quo ergò tandem instituto id prelo commiserim, roganti dicam, non penes me fuisse non-committere. Cum primùm, Academicæ Juventutis exercendæ gratiâ, has Exercitationes mente concepi, nihil sanè minus cogitavi, quam eas omnium oculis aliquandò fore subjiciendas. Quæ Auditorum votis suos debebant natales officio functas putabam intra Academicæ nostræ parietes, indeque omnem de eis cogitationem planè seposueram. Neque etiam hodiè consilium mutassem, nisi quosdam, qui in impetranda à me earundem editione frustra fuerant, id agitare intellexissem non semel, ut in unum collectæ alibi me inscio typis excuderentur. Quando itaque vidi prelo me amplius arcere non posse chartas, quæ in plurium versantes manibus ex mea exiverant potestate, lambere nonnihil ipse volui meos fœtus, potius quam ut in conspectum prodirent toti rubentes, quales olim diversissimis occupationibus, quas benè multas postulat quotidiani muneris ratio, distracta mens variis temporibus pepererat. Sic mecum inibam consilia: at quorum mox poenituit vehementer. Frustrà enim ritè recensendis cogitationibus, tumultuariâ operâ in chartam quondam conjectis, me accinxi, qui tantum pacis cum aliis negotiis habere non potui, ut sæpè subito eas resumere vix permit-

serit.

ferit in tanta otii penuria festinans prelum. Hinc emendare minimè licuit disparilem nonnihil conceptuum, diffusorum modo, modo contractorum magis seriem; multo minus dissimilem sibi hic illic orationis atque verborum texturam. Succinctæ magis sunt Cogitationes de Deo; quarum dedi duntaxat quoddam quasi compendium: cui apud pium Lectorem nihil detrahent quidam mei, plerique aliorum versiculi, quibus, pro eo quo ex divina contemplatione affectus erat modo, indulgit nonnunquam animus. Laxiores ferè sunt subnexæ Dissertationes, quarum totum argumentum quandoquidem est controversiosum, in tractandis rebus litigiosis veniam facile merebitur forma styli disputatrix. Non te pluribus morabor, Lector, si id unum me æquè ac te fuerim seriò obtestatus, ut eâ semper animi pietate ac reverentiâ ad meditando, quas nobis Deus manifestas fecit, Divinas perfectiones accedamus, ne unquam ἐν τοῖς ἀγλαγισμοῖς hisce nostris evanescamus, inveniendi aliquando inexcusabiles; quales inveniemur sine dubio, nisi quod cognovimus glorificaverimus summum Numen. Hoc age, atque Vale!



# E P O S

In Opus elegans

VIRI Clarissimi ,

D. M. GERARDI de VRIES,  
Philosophiæ in Academia Patria Doctoris  
& Professoris Ordinarii.



*L*umine naturæ naturam Numinis optas  
Nosse viâ facili plenè solideque? Revolve,  
Quæ tibi concedit FRISIUS, Meletemata; multum,  
Quod juvat, invenies. Nam quævis linea spirat  
Ingenium subtile Viri Mentemque subactam:  
Seu monstrèt verum, damnosave falsa refutet  
Dogmata, quæ Veteres docuere, Novique Sophistæ  
Fortiter inculcant ac ore manuque tuentur.  
Sæpius adspicies (reliquas si vertere Chartas  
Expetis) ingenuæ Libertatisque decoræ  
Signa, Probat reprobatque nihil, quod Nomina tantum  
Æstimet. Hoc servum deceat pecus! Unica flectunt  
Hunc Ratio, Divina Fides. His subdere Fasces  
Judicii Sapientis erit, quem cana loquetur  
Posteritas, quem Fama vebet super Ætheris Orbes.

Ita lusit Collegæ Philosopho,  
Philosophus Collega

JOHANNES LUYTS.

# In Messëm Philosophicam

*Clari Philosophi,*

M. GERARDI de VRIES,

Prof. Publ.

*Epidorpidum Ode.*



Lba dies, rumpunt quando granaria messëm,  
Et grata tellus insitum cum sœnore  
Reddit multijugo, conclamant Euge! coloni,  
Redit labori præmium dignum Deo.  
Non secus incoctum generoso pectus honesto  
Divina concipit, ferunt quæ sæculum  
Judiciumque Virum limatum, fæce rejectâ  
Vagæ, superbæ, turbidæ scientiæ.  
Assiduis volvit curis, altumque revolvit,  
Remotiora sensibus dictamina;  
Donec parturiens in dias luminis auras  
Laudanda promat pluribus Certamina.  
Applaudunt Docti, Studioaque densa corona  
Plaudit, beatam se videns fœtu novo.  
Ominor hoc fatum (nec sim tibi vanus Aruspex)  
Elucubrati & eruditi paginæ.  
Nec satis: in reliquum diffundet se labor orbem.  
Spe vanidâ vel circuitionibus  
Non avidum fallet Lectorem, sed melioris  
Veri replebit corda succo, sanguine:  
Doctior ut redeat, maturior Orbis Epoptes,  
Dei, Sui, Soli, Poli Consultior.

*Amico Veteri*

L. M. Q. Accinuit

A. BOSCHMAN, V.D.M.



Respondentium vicibus functi fuerunt

I N

# EXERCITAT. de DEO

*Juvenes Ornatisimi.*

- Tobias Coorn , *Zirizà-Zelandus*. S. M. C.
- M. Jacobus à Liender , *Ultrajectinus*. Ph.D. & V.D.M.  
Jacobus Oyee , *Goesà-Zelandus*. V.D.M.  
Jacobus Fruytier , *Medioburgo-Zelandus*. V.D.M.  
Simon Croonenburg , *Sardamo-Batavus*. V.D.M.  
Cornelius Snouk , *Medioburgo-Zelandus*. V.D.M.  
Abrahamus Ratel , *Goesà-Zelandus*. V.D.M.
- M. Petrus Lastdrager , *Tusikà-West-Frisius*. Ph.D. & V.D.M.  
Johannes Hulscher , *Rheno-Trajectinus*. V.D.M.  
Henricus Wagardus , *Vroonhovià-Brabant*. V.D.M.  
Jacobus Ravens , *J.F. Worcomio-Batavus*. V.D.M.  
Henricus à Sypesteyn , *Ultrajectinus*. V.D.M.  
Petrus vander Burgh , *Vesalià-Clivenfis*. V.D.M.  
Theodorus à Breen , *Ripà-Batavus*.  
Petrus Heyblom , *Amstelodamo-Batavus*.  
Fredericus Bootshaak , *Harlingà-Frisius*.  
Andreas Cameron , *Scoto-Britannus*.

Nico-

*Nomina Respondentium.*

- Nicolaus vande Velde , *Ultrajeſtinus*. S. M. C.  
Conradus van Galen , *Heerwaerdâ-Gelrus*. Piè defunctus.  
Jacobus van Stryen , *Goesâ-Zelandus*. S. M. C.  
Hemmo Hovius , *Suwerdano-Omlandus*. V. D. M.  
Petrus à Wallendal , *Medenblico-Weſt-Friſius*.  
Rudolphus van Nelleſteyn , *Ultrajeſtinus*.  
Rolandus ab Aken , *Ultrajeſtinus*.  
Georgius Flaminius , *Scoto-Britannus*.  
Johannes Guiljelmus Dukerus , *Bredâ-Brabant*.  
Petrus Bruynviſch , *Zirizeâ-Zelandus*. S. M. C.  
Cornelius Verlucht , *Martini-Aggere-Zelandus*.  
Hermannus Cocq , *Ultrajeſtinus*.  
• Samuel Beſt , *Schermerâ-Batavus*. S. M. C.  
Nicolaus Winckel , *Nardâ-Batavus*.

I N

EXERCITAT. MISCELLAN.

- Albertus Buytendijck , *Dordraco-Batavus*. V. D. M.  
Goſuinus Houtman , *Edâ-Gelrus*. V. D. M.  
Johannes Beſt , *Ultrajeſtinus*. V. D. M.  
Wilhelmus Munter , *Arenaco-Gelrus*. V. D. M.  
Simon Croonenburg , *Sardamo-Batavus*. V. D. M.  
Tobias Coorn , *Zirizeâ-Zelandus*. S. M. C.  
Jacobus Oyce , *Goesâ-Zelandus*. V. D. M.  
Jacobus Fruytier , *Medioburgo-Zelandus*. V. D. M.  
Iſaacus Ravensbergius , *Harlemo-Batavus*. V. D. M.  
Johannes Vechovius , *Gorcomio-Batavus*. V. D. M.  
Cornelius Demetrius , *Ravenſtenio-Brabant*. V. D. M.

Petrus:

*Nomina Respondentium.*

- Petrus Westwoude , *Hornâ-West-Frisius*. V. D. M.  
M. Lollius Lollides , *Frisius*. Ph. D. & V. D. M. Piè denatus.  
M. Petrus Roldanus , *Enchusâ-West-Frisius*. Ph. D. & V. D. M.,  
Antonius Arleboutius , *Boemelâ-Gelrus*. V. D. M.  
Cornelius ab Heycop , *Ultrajectinus*. V. D. M.  
Wilhelmus Munter , *Arenaco-Gelrus*. V. D. M.  
Nanningius Berckhout , *Hornâ-West-Frisius*. V. D. M.  
M. Johannes Luyts , *Hornâ-West-Frisius*. Ph. D. & P. P.  
Johannes Bonket , *Flissingâ-Zelandus*. J. U. D.  
Antonius Yfer , *Alcmariâ-Batavus*. V. D. M.  
Casparus ab Heymenbergh , *Ultrajectinus*. V. D. M. -  
Petrus Bortzenius , *Heemstedâ-Batavus*. M. D.  
Antonius Arleboutius , *Boemelâ-Gelrus*. V. D. M.  
Hermannus van Zurck , *Ultrajectinus*. V. D. M.  
Conradus van Galen , *Heerwaerdâ-Gelrus*. Piè defunctus.  
Henricus de Lact , *Boemelâ-Gelrus*. J. U. D.  
M. Gerardus Schalckenius , *Hornâ-West-Frisius*. Ph. D. & V. D. M.







EXERCITATIO PRIMA  
PRÆLIMINARIS,  
DE  
THEOLOGIA  
NATURALI.  
SUMMARIVM.

- I. *Theologia Naturalis studium præ aliis homine dignum.* II. *Menti humanæ in statu unionis difficillimum.* III. *Periculi quoque plenum; ideoque tractandum reverenter.* IV. *Naturalis de Deo notitia maximè practica est.* V. *Minimè tamen ad æternam beatitudinem sufficiens.* VI. *Non confundenda cum Fidei revelatione.* VII. *Interim hujus illi habenda ratio.* VIII. *Naturalis Theologia Revelatæ utilissima.* IX. *Ejus certitudo summa, si ritè tradatur.*



Uti rebus omnibus, ita imprimis ratione gaudentibus, is quo feruntur ad consequendam sibi maximam quam possunt sui perfectionem, congenitus est impetus. Partem ejus haud minimam absolvit in homine quâ is *omnis naturâ scire desiderat* cupiditas. Hanc itaque nisi pro viribus satiare labore, quanto hac parte existit negligentior, tanto magis indignis modis infra suam sortem semet ipsum abjice-

I.  
*Theologiæ  
Naturalis  
studium  
præ aliis ho-  
mine di-  
gnum.*

re habendus est. Summam nimirum humanæ mentis absolutionem optimo jure dixeris rerum scientiam; quando quo longius in ea animus progreditur, eo plus quasi rationis possidere videri quodammodo potest. Quod quamvis in omni cognitionis genere existat verissimum, verius tamen est nusquam, quam ubi mens erigitur ad contemplationem earum rerum, quarum cognoscendarum illi uni concessa sunt adminicula. Excellit hac parte præ omni alia quæ de Summo Numine philosophatur sapientia: in qua si felici mediatione datum fuerit attingere verum, majus utique ex hac quam alia quavis philosophatione & operæ & temporis feremus pretium. Nulla etenim existit contemplatio & utilior, & sublimior pariter ac nobis ipsis dignior, quam quæ Dei, indèque etiam Nostri, nobis pandit cognitionem; quâ unâ supremum sapientiæ humanæ apicem absolvi, jure merito dictum passim fuit atque creditum. Corpora qualicunque modo cognoscere etiam brutis animantibus indulsit natura; at verò Spirituum, nominatim Summi Numinis, noticia rerum ratione pollentium peculium est. Istæ quippe solæ aptæ natæ sunt illam, cujus gestant imaginem, contemplari Divinitatem: quâ meditatione supra semet ipsam, & quicquid caducum est atque terrenum, elevata mens, aditum sibi parat (quousque cum naturæ viribus invenire mortalius datum est) ad veram illam & minimè simulatam Philosophiam, quam *Mentis nostræ cum Deo assimilationem* scitè dixit Plato.

II.  
*Menti humanæ in  
statu unionis  
difficillimum.*

Interim, quum quod pulchrum est non soleat idem esse facile, nihil mirabimur, si arduum sit tantum negotium nobis hominibus, qui constamus mente non tantum, sed & corpore; atque illâ quidem tam arctè huic associatâ „ ut ipsa omnium „ difficillimè ad illa attendat, quæ nec sensibus, nec quidem „ imaginationi sunt præsentia: sive quia talem, ex eo quod „ corpori conjuncta sit, habeat naturam; sive quia in primis „ annis, cum tantum circa sensus & imaginationes occuparetur, „ majorem de ipsis, quam de cæteris rebus cogitandi usum & „ facilitatem acquisivit: uti alibi de hisce rectè philosophatur Cartesius. Tantum quas ipse disjunctivè narrat causarum difficultatis cognoscendi res spirituales, ego conjungere malim utramque.

que. Quicquid sit, experitur in scēe quilibet nostrum, pertinacioris meditationis circa res tam immensum à sensu remotas, in hoc rerum statu, adeo parum esse patientem hominis animum, ut meritò credendum sit, claram distinctamque earundem scientiam isti servari seculo, quo ipse corporis vinculis solutus, & existens *ιονύγελοε* liberiori contemplatione ista coram intuebitur, quæ nunc in speculo duntaxat videt & quasi in ænigmate. Quæ quisquis ut oportet attenderit, cum Seneca, *non mirabitur, tam tardè emi, quæ tam altè jacent.* Ut sæpè animum subeat mirari, quâ ratione quibusdam hodiè rerum immaterialium, maximè Dei, contemplatio tantæ dicatur & facilitatis & evidentix. Certè quotquot sic instituunt, eos meas cogitationes esse oportet: saltem non vulgares viros, quibus adèd facile sit hominem exuere; isti scilicet se assuefacere, quod & mentis cum corpore unioni, & tam longæ atque à teneris stabilitæ consuetudini planè adversatur.

At parum foret, si difficillima tantum, nisi simul solliciti timoris plenissima esset, hæc philosophatio. Quæ enim mens creata tantum sibi tribuat, neque suæ sibi imbecillitatis adèd hic existat conscia, ut non sæpius metuat vertiginem pati ex altissimarum ac nimium supra se positarum rerum cogitatione? At, qui quicumque hic labitur, tanto graviore lapsu ruit, quanto fastigium, ex quo decidit, est sublimius. Non enim in maximis erratur, nisi maximè: neque ullus levis esse potest error *de Deo*, de quo *etiam vera dicere periculosum est.* Quapropter qui nullis deviis plurimum hic falli cupit, ante omnia hanc sibi hic legem figat, ita reverenter *scrutamam Majestatem, ne opprimatur à gloria.* Præclare in hanc rem Seneca „ Nunquam „ nos verecundiores esse debemus quam cum de Diis (Deo) agitur. Si intramus templa compositi, si ad sacrificium accessuri vultum submittimus, togam adducimus, si in omne argumentum modestiæ fingimur; quanto hoc magis facere debemus, cum de Deorum (Dei) natura disputamus, nequid temerè, nequid impudenter, aut ignorantes affirmemus aut scientes mentiamur.

Neque tantum impingunt, qui indignas de Ente supremo suâ mente sœvent cogitationes; etiam isti devotionis rei existunt

III.  
Periculi  
quoque plenum; ideoque tractandum reverenter.

IV.  
Naturalis

de Deo notitia maxime Practica est,

quam maximè, qui quem Deum Optimum intelligunt & Maximum, eundem tamen tanquam talem minimè sibi venerandum proponunt. Damnanda profectò hac parte est temeritas (quid ni impietas?) plurimorum Scholasticorum, nobilissimam hanc Philosophiæ partem suis profusissimæ audaciæ conceptibus non tantum fœdè polluentium, verum etiam illam totam re ipsâ enervantium; dum, cæterum securi, satis habent aliquid otiosè de Deo speculari & garrire. Quasi de perfectissimo Numine quicquam cogitare fas sit, quod non singulari pietatis affectu animum commoveat! Gravissima certè Apostoli querela est de Gentilibus, quos *vanos falsos* pronunciat & *insatiabiles in suis ratiocinationibus*, quod, *quem noverant Deum, non tamen ut Deum glorificaverint*. Ut ipsa suâ naturâ tota practica sit hæc notitia: adcò quidem, ut nisi sit talis, universa Philosophia Moralis re verâ nulla sit; quippe quæ omnis quanta est, unicè pendet à practica notitia Dei, tanquam independentis Monarchæ ac supremi Legislatoris, in Regno naturæ rationalibus, & rationaliter à se pendentibus, creaturis jura dantis. Ex quo uno omnia honesti ac turpis discrimina, nec non quævis morum præcepta, petenda sunt.

V.  
Minimè tamen ad æternam beatitudinem beatitudinem sufficient.

Non tamen ita practicam volumus, quasi simul salutaris sit & ad æternam beatitudinem ducens hæc ex naturæ lumine hausta de Deo meditatio. Absit! Sic qui sentit, nondum gratiosam Evangelici Fœderis dispensationem intelligit, nec quantum Christiani debeamus gloriosissimi Servatoris meritis: quibus solis aditus patet ad Deum, tanquam benignum remuneratorem eorum qui ipsum quærunt; quibusque indignissimis modis nimium detrahunt, quotquot hac parte naturam gratiæ vel minimum æquare nituntur. Ad ἀναπλορησίαν saltem sufficiunt istæ, non quid possit, sed quid debeat officii præstare suo Creatori, hominem docentes rationis scintillæ: quarum tamen lumen, fa-teor, merito nullum ferè videbitur illis, quos longè lucidiores illustrarunt melioris Justitiæ Solis radii. Quos qui non fatisatendit, ecquid mirum, illum, dum ducem sequi mavult corruptæ rationis ignes fatuos, à veri via aberrare, in transversum agi, atque illas sæpè nectere fallaciratiocinio consequentias, quæ veritati Revelatæ existunt inimicæ, & periculosissimæ in rebus fidei

fidei sequela. Pleraque certè quæ & nunc & quondam Christianam Ecclesiam infestiarunt hæreses, non ex aliis seminibus ortum suum habuerunt, quam ex cœlestis doctrinæ cum pseudo-Theologiæ Naturalis dogmatibus mixtura: ob quam inspidam *negari* jam olim Ecclesiæ Doctores dixerunt Philosophos *Hæreticorum Patriarchas*, ipsamque Philosophiam *Hæresium quarumvis condimentum*.

Hos scopulos absque naufragio is solum præternavigabit incolumis, qui nec ab una parte confundit disciplinas distinctissimas, nec ab altera parte sic securus hic philosophatur, quasi nulla existat, cujus aliqua sit Philosopho habenda ratio, revelatæ religionis veritas. Dixi, non confundendas disciplinas; quippe quæ tantum distant, quantum à Ratione differt Revelatio, quantum à *scire* differt *credere*. Etenim (ut sileam hujus generis quæ alia huc adduci possent benè multa) nullas format Naturalis Theologia conclusiones, quam quæ ex principiis naturæ notis demonstrantur; nullas alias Theologia Revelata, quâ talis, quam quæ auctoritate Divinâ excipiende proponuntur piâ fidei simplicitate. Quæ quisquis cogitat, mirabitur, tantam differitatem non rectius observasse doctissimum Amesium, ut peritissimum Theologiæ Naturalis mystam, ita oppugnatorem ejusdem acerrimum.

Nos, fidem Christianam supponentes, ita quidem prudenti viro in hisce de Deo meditationibus versandum censemus, ut altero quidem oculo ducem sequatur rationem, altero interim semper respiciat & veneretur fidem. Neque frustra Revelationem hic suspiciat Philosophus: ea enim frequenter istas suppeditat pulcherrimos de Divinis perfectionibus conceptus formandi occasiones, absque quibus fuisset sæpè, ut nunquam fortè cogitassemus de elegantissimis veritatibus, quas nunc nostra ratio, fide elevata altius, in ipsis naturæ principiis latere, satis apertè videt. Ut, si uspiam, hic certè philosophandum fuerit, *Fide Magistra, Ratione Ministra*. Quam qui fastidiosè nimis improbant methodum, vera gloriæ animalia, nescio quam idearum innatarum suppellectilem importunè crepantes, vix satis Christiani axiomaticè se præstant dignos; quatenus in cæcæ rationis tenebris palpare malunt, quam istis gradibus, quos divina mon-

## VI.

*Non confundenda cum Fidei revelatione.*

## VII.

*Interim hujus illi habenda ratio.*

strat bonitas, eniti ad maximum nostrorum de Deo philosophematum perfectionem. Isti sunt, inter primos, qui se & alios abducunt *ἡς τῆς φιλοσοφίας καὶ κενῆς αἰπότης*; quos cavendos, graviter adedò monet alibi gentium Doctor.

VIII.  
*Naturalis  
Theologia  
Revelatæ  
utilissima.*

Ex adverbo in eandem de rebus maximis veritatem consensuens cum Christiana Religione Naturalis Theologia, non tantum plurimos Christianorum errores circa verum Dei cultum efficacissimè refutare apta nata est, verum etiam, si quæ aliâ, hac imprimis viâ inchoanda Gentilium ad saniores de Deo sensum conversio; quatenus hæc reos convincens vanæ superstitionis, istis eos evolvit præjudiciis, quibus imbutiavit erroribus mordicus adhærent, nec meliori sapientiæ revelatæ faciunt locum. Ut jam nihil dicam de stabilimento, quod Christianæ fidei accedit ex mirabili rationis & revelationis hac parte harmonia, alteriusque cum altera consensu. Non quod istis fulcimentis ipsa indigeat cœlestis doctrina, per se quâvis demonstratione immensum certior; sed quod infirmos nostros ac sæpè fluctuantes, cheu! nimium animos, ipsum rectæ rationis suffragium haud parum confirmare queat in immoto veritatis cœlitis patefactæ assensu.

IX.  
*Ejus certitudo summa, si rite tradatur.*

Istis legibus, non aliis, hic philosophari decretum est nobis; qui deducere conabimur alias veritates ex aliis, tantum ut ipsa rerum series, atque illis conveniens cogitationum connexio, postulabit. Quam methodum quia neglexerunt multi, omnia ad rigidiora systematis præcepta nimium cogentes, plurimum detraxerunt nobilissimæ disciplinæ & splendoris, & certitudinis. Hanc equidem tantam hic promittere ausim, ut mathematicæ demonstrationi nullâ parte quicquam cedat. Cujus rei daturus experimentum in animum primùm induxeram, more Geometrico, necessariis præmissis *Definitionibus*, *Postulatis*, atque *Axiomatibus*, continuâ serie per *Theoremata* omnia deducere. Verum mutavi consilium, quando attendi, plerosque, rebus geometricis minus assuetos, istius modi demonstrandi fore impatientes. Non tamen, si cui id volupe fuerit, nostra intelligenti arduum erit in istum ordinem hæc redigere. Sed jam dudum Præfaminis abundè est. Ad rem ipsam! Utinam verò Spirituum Pater adspiret Spiritu suo nostro huic de sese, Spiritu primo ac perfectissimo, labori! Imo,

*Da,*



*Da, Pater, angustam menti conscendere sedem!  
 Da fontem lustrare boni! Da luce repertâ  
 In Te conspicuos animi desigere visus!  
 Disjice terrena nebulas & pondera molis;  
 Atque Tuo splendore mica! Tu namque serenum:  
 Tu requies tranquilla piis: Te cernere finis,  
 Principium, veltor, dux, semita, terminus idem.*

## EXERCITATIO SECUNDA,

D E

# DEI EXISTENTIA,

ejusque per naturæ lumen cognoscendæ modis.

## S U M M A R I U M.

- I. *Artissimus inter notitiam Dei & Nostri nexus.*
- II. *Non, Ausit Deus, disputandum; Quod sit, tamen demonstrandum.*
- III. *Demonstratio pro Existentia Numinis à rerum obviarum dependentia sumpta.*
- IV. *Multiplex, quæ ex ea fluit pro eadem veritate, argumentandi ratio.*
- V. *Vis demonstrationis à gemina Cartesii exceptione vindicata.*
- VI. *Famosum Hujus ab Idea Dei petitum argumentum ad examen revocatum.*
- VII. *Alterum ab eadem Idea sumptum argumentum expensum.*
- VIII. *Tertia Cartesii demonstratio excussa.*
- IX. *Ex origine mentis humanæ, Deum esse, probatur.*
- X. *Solâ admiratione, in quam abripit*

*abripit Universalis contemplatio, idem anmo insinuari, docetur. XI. Innata menti de Existentia Dei persuasio explicatur. XII. Eam dari, ex Legis Naturalis conscientia evincitur. XIII. Demonstrationum omnium summa brevis & utilitas proponitur.*

## I.

*Arctissimus  
inter notitias  
am Dei &  
Nostri ne-  
xus.*



Am arcta Dei inter & Nostri notitiam intercedit cognatio, tamque nulla accurata alterius sine altero haberi potest scientia, ut quisquis ordine de Spiritu philosophari instituit, mox is in bivio dubius hæreat, utrum absolutissimam archetypi perfectionem, num admirandam ectypi pulchritudinem, prius meditari oporteat. Nemo enim in tantis ingenioli angustiis ritè Deum cogitet, nisi qui se satis diligenter cogitaverit antè; formaturus scilicet qualescunque pro modulò de incomprehensibili Numine notiones, ex analogia illorum quæ ipse in se ipso deprehendit. At neque ullus in distinctam sui notitiam devenerit, qui nesciverit principium sui; à quo res hæc omnis altius deducenda venit. Ut quidem ista contemplationis series creatæ mentis imbecillitati sit accommodatior; hæc verò & ipsi naturæ rei convenientior, & Ente primo dignior. Quamobrem & nos faciemus à *fove principium*: ita tamen, ut nonnulla quandoque simus assumpturi, ad instar Postulatorum, ut loquuntur Mathematici, quæ Mentis nostræ existentiam & quadam ejusdem attributa supponent, alibi demonstranda.

## II.

*Non, An sit  
Deus, di-  
sputandum;  
Quod sit, ta-  
men demon-  
strandum.*

Non lubet in limine disquirere, *An sit Deus?* quæ in aliis thematibus primas tenere solet disceptatio. Nec enim fas esse arbitror, in Problema dialecticum convertere veritatis per se notæ Axioma; quod uti omni luce existit clarius, omni explicatione notius, ita creaturæ cuivis rationali non tam anxie est probandum, quam nudè potius supponendum. Etenim quis neget pœnis potius compescendum esse, quam rationibus refellendum, si quis adeo nullam rationis rationem habeat, ut ipsam quoque primam rationem ejuret. Attamen ne hoc ipsum frustra



frustrà nos dixisse grunniat Atheorum furor , ante omnia clarè detegenda erit ferrea spirituum istorum fortium contumacia ; quâ , quam ipsi secum tremante animo sentiunt atque exhorrescunt veritatis vim , ore tenus nihilominus negare malunt , quam se agnoscere tales , quales etiam inviti quotidie sese deprehendunt , pendentes nimirum ex independenti supremæ cujusdam causæ influxu & arbitrio. Hujus teterrimi hominum generis vesaniam si argumentis ex naturæ lumine ductis manifestam fecerimus , consutatum eâdem operâ dederimus Faustum Senensem , aliosque qui cum illo omnem naturalem Dei notitiam solùm non penitus expungunt : quæ imprimis ferenda neutiquam est perversa impietas in homine , qui ipse nullam fermè aliam quam ex corruptæ rationis lumine haustam proficitur Theologiam.

Istis , omnibusque simul aliis τὸ αἰσῶντι quomodocunque litantibus , occurrimus nos unâ hac demonstratione prorsus Achilleâ. Quodcunque existit finitum & imperfectum (sive sensibus id obvium sit , sive intellectui duntaxat : ipsum se v. c. cogitet Atheus , si detur) hoc omne vel à se est , vel ab alio. Illud si eligas , id vel erit à se , uti loquuntur , positivè , id est , tanquam à causa effectrice sui ipsius ; vel negativè , quatenus usque adeo ad existendum sibi sufficit , ut nullius planè causæ sit indigum. Prius citra manifestam repugnantiam dici nequit , cum producere supponat fuisse , produci involvat non-fuisse. Quapropter si quid fuerit causa sui , fuisset id , nec tamen fuisset ; dependens foret , & independens ; se ipso prius simul esset , & posterius : verbo , idem foret , & tamen multis modis à se diversum. Quid ? quod unumquodque tendat in sui perfectionem quantum potest : ut , si quid sibi suam dedisset essentiam , non limitatam illam quam possidet sed omnibus numeris absolutam potius eam in se contulisset. At neque dici potest posterius ; quum , quod independens est , id finitæ perfectionis esse non posse , infrâ firmissimè simus demonstraturi. Nequit itaque res finita qualicunque modo à se esse : quapropter restat , ut sit producta ab alio quo à se distincto. De isto vero eadem redibit questio. Si à se esse admittas , utique , ut dixi , imperfectum id esse non potest : ut jam re ipsa sic pervenerimus

III.  
*Demonstratio pro Existentia Numinis à rerum dependentia sumpta.*

ad causam primam undiquaque perfectam; quæ ipsa Deus est. Sin & istud à superiori rursus principio fluxisse contendas, atque hoc itidem ab alio, licebit quidem seriem causarum concipere bene longam, infinitam autem statuere ratio neutiquam permittit. Etenim ubi una eademque res diverso respectu causa simul est & effectum, istic qualis est ordo in descensu per effecta, talis idem est in ascensu per causas. Jam verò effectorum seriem finitam esse, res ipsa clamat; ergò & causarum. Adde, augeri indies causarum numerum, quoties nova effecta procedunt à causis, quæ ipsæ nuper effecta ultima duntaxat erant, non causæ. Atqui id infinitati adversatur è diametro; quæ, uti est quid maximum, ita omne sui incrementum, non minus quam ipsos fines, prorsus respuit. Cogitur ergò, quisquis evidenti rationis lumini palam contradicere non vult, in omni rerum ab aliis pendendum subordinatione subsistere tandem in aliquo principio, quod quemadmodum est causa causarum, ita à nullo pendens sibi sufficit plenissimè ad existendum. Ast hoc ipsum Deus est; cujus existentia erat demonstranda.

## IV.

*Multiplex, quæ ex ea fuit pro eadem veritate arguendi ratio.*

Atque hoc unum argumentum nobis hîc erit instar omnium: tum, quod per se sit longè efficacissimum, nullam relinquens evasionis rimam; tum, quod quæ aliæ adferuntur pro adstruenda summi Numinis existentia rationes, huic ferè debeant certitudinis suæ fundamenta. Cæterum, intelligenti minimè arduum erit ex hac pharetra complures depromere sagittas Atheismum confodientes. V. G. Occurrat res quæpiam contingens; ea, cum ex se & per se non magis apta nata sit existere quam non-existere, utique à causa quadam processit, per quam sit potius, quam non-sit: eaque vel necessaria erit, vel contingens. Si hoc, redit eadem difficultas. Quumque, per antè dicta, nullarum causarum, adeoque nec contingentium, ordo infinitus dari queat, nunquam quis se hic expediet, qui non velit subsistere in causa absolutæ necessitatis in existendo; quæ Deus solus est, ut infrà docebitur. Pari modo, ex rebus possibilibus inferre licebit primam aliquam potentiam; ex mutabilibus, principium quodpiam immutabile; ex finitis, causam quandam infinitam; ex temporariis ens aliquod quod ante tempus fuit sine tempore. Verum ista jam tractare pro meritis non  
supit

finis præfixa brevitatis : quæ eadem vetat urgere pulcherrimas rationes , quæ pro confirmanda eadem hac prima veritate peti possunt ab admiranda dispositione , ordine , ac varietate rerum naturalium ; nec non ab earundem constanti tendentia , & quidem citra ullam ejus in se conscientiam , in suos fines ; item ab appetitu summi boni voluntati finitæ ingenito ; aliaque id genus plura , de quibus videndi scriptores , qui toti de hisce disseruerunt fufius.

Et ista quidem arma sunt , quibus victrix religio felicissimè hæctenus Atheismum triumphavit : ut eorum , qui illis , etiam Scripturarum calculo probatis , qualicunque modo quicquam detrahere nituntur , meritò prudentioribus suspecta sint consilia , nec admittenda quibus causa Dei ut facta testis maneat cordi est. Quapropter minimè ferenda hac parte pravaricatio quorundam , mirà temeritate istæc omnia amovendum , quo solidioribus , scilicet ! suis ab Idea quapiam Dei petitis demonstrationibus faciant locum. Neque enim censent hi , „ desumendum esse argumentum ex eo , quod videamus in sensibilibus esse ordinem , sive successionem quandam causarum „ efficientium : tum , quia Deum existere multo evidentius esse „ putant , quam ullas res sensibiles ; tum etiam , quia per istam „ causarum successionem non videntur aliò posse devenire , quam „ ad imperfectionem sui intellectus agnoscendam , quod nempe non possint comprehendere , quomodo infinitæ tales causas sibi mutuo ab æterno ita successerunt , ut nulla fuerit prima. Nam certè ex eo quod istud non possunt comprehendere , non sequitur , aliquam primam esse debere , &c. Si leo nunc quæ ista involvunt Scepticismi fundamenta ; gravius est ; quod causam Atheismi immane quantum juvent. Frustrà tamen. Nam , ut verbo dicam , non ideo infinitam causarum successionem negamus , quod eam non possimus comprehendere (quamvis & idèò neganda foret iis , qui , cum Cartesio , nullam aliam normam habent eorum quæ affirmare & negare debent , quam propriam perceptionem) ; sed quod illam à parte rei manifestam , nec unam , involvere contradictionem firmissimè doceat recta ratio : uti ostendimus. Sic quidem longè falsissimum est posterius. At simul & experientia adversum , & miris modis in auctoritatem Sacram contumeliosum , existit prius.

V.

*Vn demonstrationi à gemina Cartesii exceptione vindicatur.*

prius. Si namque Deum existerē multò evidentius sit, quam ulla res sensibiles, mirum profectò est, adeo hanc subtilitatem vel nescivisse, vel neglexisse, Apostolum gentium, quando tanta cum emphasi urget & inculcat, *invisibilia Dei, æternam videlicet potentiam & NB. Divinitatem, mente perpensa pervideri jam inde à mundo condito ex iis quæ fecit.* An verò qui sic instituit etiam habendus est putasse, *Deum existerē multò evidentius esse, quam ulla res sensibiles?* Ita qui putat, eum simul putare necessum est, Spiritum S. in hisce similibusque ratiociniis usum fuisse termino medio, qui multò minus erat evidens quam ipsa conclusio demonstranda. Quod uti palam arguit defectum iudicii, & modum argumentandi absurdissimum, ita quam istiusmodi cogitata bene conveniant cum debita Scripturarum reverentia, viderint isti qui neminem ante Aganemnona fortem vixisse sibi persuadere audent.

VI.  
Famosum  
Hujus ab  
Idea Dei  
positum ar-  
gumentum  
ad examen  
revocatur.

Imprimis verò non possunt non displicere conatus ejusmodi, quibus argumentorum ab omni ævo receptorum vim eludere conantur, si quinam hic nobis pro auro substituantur carbones, diligentius attendamus. Expendi volunt ante omnia Ideam quandam entis summè perfecti, quam sibi innatam ajunt; tum etiam causam quærunt, non à qua olim sint producti tanquam homines mente constantes & corpore, sed à qua tempore præ-senti tanquam meræ mentes conserventur. Ita opinantur se longè felicius, absque ulla aut rerum sensibilibus existentia, aut causarum subordinatione, demonstrationes pro existentia summi Numinis instruere posse. Operæ pretium erit, ob rei momentum, atque agitata hodiè de ea controversias, ista excutere; sed paucis, ne ab instituto nimium digrediamur. Sic ferè ex idea inferunt: Quæcunque attributa in clara alicujus rei idea continentur, ea ex vero ipsi illi rei à parte sui tribui possunt. Pergunt: At verò in entis summè perfecti clara idea inter cæteras perfectiones continetur necessaria existentia. Ex quibus concludunt: Potest ergò hæc illi ex vero tribui; consequenter, Deus quoque reipsa existit necessariò. Præterèò quæ de innatis rerum Ideis hic supponuntur; item, de Dei idea in nobis clara & distincta; quæ saltem Atheo concessa non sunt. Sed de illis alibi. Nunc id in quo cardo rei vertitur quanti

mo-

momenti sit in re præfenti, examinasse tribus verbis sufficit. Quæcunque, ajunt, in clara idea alicujus rei continentur, ea ex vero rei illi à parte sui possunt tribui. Claudicat verò ista propositio; quippe quæ tunc demum vera est, quando constat ideam, quam de re quapiam habemus, ipsi rei extra mentem existenti per omnia esse similem. Neque ad istam conformitatem evincendam quicquam juvat quæ ideæ illi ab his auditoribus tribuitur claritas; quamdiu enim certi non sunt, & Deum existere, & cum minimè fallacem esse, ne quidem secundum propriam methodum iis constare potest, omnia quæ clarè percipiuntur esse vera. Itaque totum quod hîc inferri poterat tantum hoc est: In cujus idea involvitur necessaria existentia, etiam, si quæ res isti ideæ similis existat extra mentem, de ea ex vero necessaria existentia potest affirmari. Quod si subsumas: Ast in idea Dei involvitur necessaria existentia; manifestum est nihil aliud legitimè sequelâ inferri posse, quam hoc: Ergo, si quæ res ideæ Dei similis existat extra mentem, de ea ex vero necessaria existentia potest affirmari. Vides? Non jam categoricè doces, Deum existere, quod negat Atheus; sed tantum concludis hypotheticè, Deum, si existat ideæ similis, existere necessariò. Verum hoc totum utrâque manu lubens dabit Atheus, nec quicquam ideò à sua opinione recedere necesse habebit, quatenus conditio, nondum demonstrata, nihil ponit in esse, ut vulgò dicunt. En argumentum apodicticum; quod ne leviter quidem adversarium ferit!

Verùm demonstrationum fertilior est ista Dei Idea, quam ut hac unâ omnis ejus latitudo sit exhausta. Audiamus alium, quo ex illa inferunt, modum! Quælibet, ajunt, ex nostris ideis requirit causam, in qua vel formaliter vel eminenter contineantur perfectiones, quæ in idea repræsentantur. Habemus autem ideam Dei, tanquam entis infinitè perfecti. Ergò aliqua ejus causa erit, in se vel formaliter vel eminenter perfectiones illas continens, quæ in idea tali repræsentantur. In nullo verò finito infinitæ perfectiones existunt. Ergò datur aliquod infinitè perfectum, in quo omnes illæ perfectiones contineantur, quodque sit illius ideæ causa: proinde existit Deus. Ad quæ notandum verbo, vim nostram concipiendi non posse esse ipsâ

VII.  
*Alterum  
 ab eadem  
 Idea sum-  
 ptum argu-  
 mentum ex-  
 penditur.*

mente majorem; quare, cum hæc finita sit, etiam illa talis erit. Undè conficitur, non posse mentem nostram finitam clarâ aliquâ ideâ sibi positivè repræsentare perfectiones infinitas, tanquam tales. Cognosci tamen, fateor, pro modulo infinitè perfectum; verum non aliter, quam perfectiones finitas multiplicando, iisque omnes limites ac imperfectiones detrahendo, ac denique judicando, id majus esse, quam quod à finita mente comprehendi queat. Quæ omnia cum à mente nostra satis commodè fieri possint, ideæ infiniti entis causam aliquam extra mentem quærere nil est necesse; nedum ut ea statuatur infinita. Hæc nunc paucis: de quibus deindè suis locis plura. Quicquid sit, planè ac plenè negabit Atheus, quemquam habere infinitarum perfectionum positivè menti repræsentatarum tanquam talium claram ideam. Quod sufficiet illi, ad declinandam omnem, si quæ sit, hujus ratio cinii vim. Ut nec hæc ex idea illatio efficax sit ad Atheum convincendum.

VIII.  
*Tertia Cartesii  
Demonstratio  
excutitur.*

Deniquè, ut ostendat Cartesius, se in demonstranda existentia primi Entis causarum subordinatione nil indigere, ipse, missâ causâ sui efficiente, conservantem duntaxat hîc attendi vult. Undè hanc instituit argumentationem. Non possum existere, quin conserve, quamdiu existo. At me ipsum conservandi vim non habeo; quapropter ab alio conservor. Is verò à quo conservor, necessariò in se habet id omne quod in me est; quumque in me existat infinitarum perfectionum perceptio, utique eadem quoque erit in causa me conservante. Verum hæc habere nequit perceptionem perfectionum quas in se non continet: quapropter cum talem perceptionem omninò habeat, etiam ea in se continebit perfectiones ipsas, quarum habet perceptionem, id est, infinitas: atque ita Deus erit. Verum, quid si quis regerat, illum qui te conservat, ipsum iterum ab alio conservari, non tamen infinitè perfectò: atque hunc alium iterum conservari ab alio, tertio, quarto, quinto, &c. neque adeo unquam perveniendum esse ad primam causam in ista conservantium successione. Certè de conservanti-  
bus causis idem dici potest, quod de producentibus: cum-  
que in harum serie primam aliquam necessariò admittendam non  
esse, putes tu, cur magis alter credat, in conservantium ordi-

ne



ne dari aliquod primum ? Tenue est , quod admiscetur de infinitarum perfectionum perceptione , quæ in nulla causa nos conservante esse queat , nisi in ea quæ illas perfectiones actu possideat ; jam enim ex antè dictis intelligitur , hanc qualem-cunque infinitarum perfectionum perceptionem , prout in mente nostra existit , esse posse ab ipsa mente finita , atque ita etiam potuisse existere in causa nos conservante ; sive hæc illam ideam ipsa consecerit , sive à sui causa conservante iterum acceperit . Ut nullum re verâ etiam hujus argumenti robur sit ad Atheum feliciter refellendum . Itaque , ut absolvam , quandoquidem liquet , & nullas justas rationes adferre Recentiores quibus doccatur , recedendum esse ab antiqua Divinæ existentiae demonstratione ex causarum subordinatione necessariò finita , & eos loco illius alia haud adducere , quibus Atheismus solidè queat debellari , meritò methodus talis cuilibet , universum rei pondus ritè expendenti , erit suspecta ; eique præferetur longissimè via hætenus tutò trita , quam qui sequitur non facillè errat , uti frequenter solent , qui , calcati tramitis fastidio , per avia & disrupta novos sibi ad sapientiam aditus parare laborant : quorum profectò conatus dubii magis sunt eventus , quam ut illi tantarum rerum momenta committat vir prudens .

Sic paucis , quantum fieri potuit , instruximus , ac simul vindicavimus , palmarium pro demonstranda & facillè , & evidenter , & firmiter , primi Entis existentia argumentum . Inquam , pro ea firmiter demonstranda , sic ut pertinaci Atheorum impietati os obturetur . Cæterùm enim piæ menti , & quæ rationi cedere paratior est quam sunt ista hominum portenta , nec aliæ desunt viæ ac modi , quibus de prima hac veritate reddatur certior certo . Ipsa se solam in se ipsa si satis diligenter attendat , inveniet , quæcunque non planè præfracta esse cupit , quo vincatur efficacissimè . Aliquam se sui agnoscere debere originem , docent eam abunde suæ imperfectiones & multiplex sufficientiæ defectus . At qualem illam ? Non certe formari potuit à causâ corporea ex corporeis elementis : talia respuit prorsus nobilissimæ substantiæ longissima à re omni materiali distantia . At simul indivisibilis rerum rationalium natura , ex substantia rei cujuspiam spiritualis decisam esse

## IX.

*Ex origine  
mentis hu-  
manæ ,  
Deum esse ,  
probatum.*

& pro-

& progenitam, evidenter negat. Itaque quid superest aliud, quam ut ipse spiritus noster ex se, per saltum quasi & immediatè, nos ducat ad illum agnoscendum spirituum Patrem, qui potentiae suae vi ex nihilo existere jussit rem tantis ornatam naturae dotibus, quantis nulla alia contemplationi nostrae obvia? Id verò stupendum Creationis opus, transitumque rei pulcherrimae ex nihilo ad istum perfectionis statum quem possidet, nemo ritè cogitaverit, qui non ilicò simul intellexerit, nullam virtutis finitae causam tanto negotio sufficere; atque adeò animae rationalis originem altiùs deducendam esse, à causa quadam spiritali infinitis modis & gradibus spiritu quovis finito potentiore, atque idè perfectione; qualis id ipsum Numen est, cujus existentiam adstruebamus. Quamvis autem hæc per se satis solida sit cogitatio, atque æquo animo satisfacere abundè apta, quando tamen cum homine res est, qui agitur studio contradicendi, quique nihil metuit quasvis veritates in dubium vocare in falsissimæ suae hypotheseos gratiam, non eam habet convictionis vim, ut illà contra Atheum primò utendum videatur. Is quippe haud pauca excipiet, & circa animæ nostræ naturam immaterialem; & circa opus creationis incomprehensibile, quæ non minùs illi negabuntur, quam ipsa Dei existentia. Dum itaque per ista nos latius diffundere cogemur, à proposita demonstratione nimium abducemur; nobisque ipsis assumptorum postulatum fati ardua erit contra negantem probatio, quamdiu & mentis nostræ naturam, & originem ejusdem, non rectius ex ipsa Dei cognitione habemus perspectam. Quapropter etiamnum inhærendum arbitror nostræ demonstrationi, petiæ à causarum subordinatione; cui & idcirco primas meritò dedimus.

## X.

*Solâ admiratione, in quam abripit Univer-  
si contemplatio, idem  
animo insi-  
nuari, docetur.*

Verùm non disputando tantùm elucescit hæc veritas. Certè quisquis longâ impietatis consuetudine non penitus animum obfirmavit, si vel leviter inspicere voluerit tantum opus, quantum se oculis ubique manifestat, sentiet, si quod res est fateri velit, admiratione se convictum de eo, quod rationibus sibi persuaderi non sinebat; esse videlicet Numen, quod modis imperscrutabilibus fecerit hæc omnia pondere, mensurâ, numero. Quis Cælum suspiciat, fornicatum illud mundi tectum, latissimè simul & æqualissimè huic terræ puncto circumvolutatum, mira-



mirâque actionis acrimoniâ defluviis suis intima telluris adyta penetrans ? Quis scintillantes cœlorum oculos Sydera , illustrissima mundi luminaria , tot miraculis quot radiis plena , immenso campo indiga , propter tot suas ambitiones & varia , certa nihilominus suisque definita periodis , itinera ? Quis Terræ sine pondere molem , & bases seipsis stabilitas , ac libratas quasi ad funiculi mensuram ? Quis Elementa , disparia illa surgentis mundi primordia , atque ultima omnis naturæ sublunaris , post variam metamorphosin , pugnam , ac cladem , diverticula ? Quis Meteora , admiranda illa mundi spectacula , quæ in orbe terrarum perpetuam dant tempestatum vicissitudinem ? Quis speciosum mundi antiquarium , Gemmas , pretiosa naturæ cimelia , & sparsa quasi per terrenum globum sydera ? Quis nata ad innumera hominis commoda Metalla , collectum gremio terræ atque reconditum ærarium mundi opulentissimum. Quis terram , ceu tessellatum pavementum , picturatam Plantis , amœnissimo mundi viridario , tam innumerâ sobole , nullisque aëris injuriis interruptâ serie , tot seculis propagato ? Quis Bruta , prolificum mundi vivarium , tam diverso partu , pastu opere , nullis artificum industriis imitando , varium ? Quis deniquè , qui quasi universis hisce præest , Hominem , illud pulchritudinis passim sparsæ compendium , usuarium mundi colonum & incolam locupletissimum ? Quis sexcenta maxima minimarum etiam naturarum miracula ; quæ quia videmus quotidie , attendimus minus. Quis , inquam , qui ad ista , uti oportet , altius introspectienda animum adjicit , quique , quod sapientis est , non tam insolita quam magna potius mirari consuevit , non tanto obruatur de tantis rebus admirationis stupore , ut nusquam exitum inveniatur , nisi in sapientissimo Numine , provido hujus Universi structore simul & custode. Ut re verâ nemo tanti operis elaboratissimum artificium , mirissimam structuram , venustissimum ornatum , sapientissimum ordinem , satis intelligat , qui non intelligat pariter , hanc publicam naturæ domum sanctissimè consecratam esse in visibile invisibilis Majestatis monumentum , divinâ omnipræsentia , undiquaque se obviâ exhibente , sanctificatum in Templum basilicum ; cui pro ara , humanus animus ; pro dedicandis muneribus , naturæ

opes, pro perpetuo liturgo, ipse homo, qui non tantum in ipsius Templi specie externa hæreat, sed ad interiora penetrando immortale Numen in tanta rerum utilitate Optimum, in tanta amplitudine Maximum, in tanto decore Pulcherrimum, in tanta varietate Ditissimum, in tanta earundem perpetuitate Constantissimum, investiget, miretur, agnoscat, colat, & adoret. Ut inter tot mira mirorum omnium mirissimum sit, reperiri posse homines, qui eo usque infra sensum omniæ & rationem se abjiciunt, ut augustissimum hoc Dei Optimi Maximi opificium, nullo artificis captu pervestigabile, nescio cui spontaneo corpusculorum concursui, & fortuitæ particularum minimarum coherentiæ, tribuere ausint. Quam ridiculæ suæ stultitiæ hereditatem magna ex parte Epicurus reliquisse videtur quibusdam nostræ ætatis Philosophis, mundum vorticosum solo mechanico materiæ motu formatum ita introducentibus, ut in tota ejus adornatione nulla fermè, saltem oppidò rara, Creatoris mentio. At verò si *scelus sit de creaturis agere, & opificem omittere*, ut Socrates jam olim censuit, & meritò, nulla Atheismo porta latior aperiri potest, quam hac philosophandi ratione; quæ imprimis mens à meditatione opificis sic abducitur, ut in contemplando opificio evanescat. Magis placet ista Regii Vatis altius animum elevans pia admiratio: *Iehova, Domine noster, quam magnificum nomen tuum in universa terra! Quando aspicio cælos tuos, opus digitorum tuorum; Lunam & stellæ quas statuisti: Quid mortalis, quod memor sis ejus; aut filius hominis, quod visites eum? Prefecisti eum operibus manuum tuarum; omnia posuisti sub pedibus ejus, &c. Iehova, Domine noster, quam magnificum nomen tuum in universa terra!*

## XI.

*Imata  
menti de  
Existentia  
Dei persuasio  
explicatur.*

Quod si nihilominus quis ferreus nec demonstrationis efficacità victum, nec admirationis stupore motum se fateatur, tamen etiam clausos cæco furore oculos sic perstringit splendidissimum hoc veritatis jubar, ut suâ coruscatione totam repleat animam, atque invitam quoque sentire faciat, quam inique laborat opprimere, Numinis notitiam: adeo quovis probationis genere efficaciora hac parte ad manum sunt rerum testimonia. Non enim dianoëtica duntaxat habetur Primi Entis cognitio, ex contemplatione & macrocosmi & microcosmi *Acquisita*

quisita ; sed & unicuique *Infra* existit supremi Dei conscientia , & noëtica certitudo : quæ animis hominum tam penitus infixæ hæret , inque iis tam altum est radicata ut in congressu cum homine sanæ mentis , cui hanc veritatem persuasum cupimus , non tam opus sit multâ ratiocinatione , quam solâ potius obtestatione ; quâ si id impetres , ut proprias mentis suæ tabulas seriò tantum inspicere dignetur , salva res est : adeò inveniet id , quod quidam cupiunt controversum , naturâ suâ esse per se notissimum. Quod , ne quis erret , non sic accipi velim , quasi vocum , quibus profertur hoc effatum , *Dens existit* , ac significationis earundem , notitia nobis citra ullam institutionem ab ipsa natura ingenita sit : neque etiam , quasi Entis perfectissimi necessariò existentis actualis idea quæpiam aut repræsentamen menti hominis jam inde à primo nativitatis momento obverfetur , & de factò percipiatur. Minime ! Istud ipsi signorum vocalium quibus res & conceptus nobis exprimuntur naturæ adversatur ; quatenus vocabula ex solo instituto significant res , quibus denotandis sunt imposita , ut eorundem nulla possit esse naturalis notitia , verum ea omnis necessariò sit acquisita ; postquam videlicet adultiori constat de arbitrio & usu hominum , qui in eadem societate viventes , hac significatione , non aliâ , voces inter sese valere voluerunt. Hoc verò nimium adversatur statui isti , in quo anima embryonis existit , tum in ipso utero materno , tum etiam mox à nativitate , quippe qui minimè actualis cogitationis , quapropter nec cognitionis istiusmodi aut repræsentaminis , existit capax : quòd alibi , in *Anima adversus omnes nostris in Narrationem de controversiis in Academiâ Ultrajectina motis* , fusè demonstravimus. Non etiam dixisse sufficit , innatam Dei notitiam esse facultatè quandam in nobis , quâ demonstrationis pro existentia Dei veritatem , & conclusionis istius certitudinem , levi negotio percipere , facilemque ei assensum præbere , apti natifumus : quantumvis enim hoc minimè sit negandum , non tamen , ut dixi , sufficit ; quoniam , quantumvis facilis , re verâ tamen acquisita est talis notitia & discursiva , non ingenita & per se nota. Quid ergo ? Id volumus , ut verbo dicam , hujus propositionis *Dens existit* , in ordine ad cognitionem nostram , eandem

esse conditionem, quæ est V. C. istius, *Totum est majus suâ parte*; aut similitum veritatum, quæ principiorum per se notorum, ac propositionum immediatarum nomine vulgò nobis venire solent. Videlicet, nemo sanæ mentis, cui facta est occasio intelligendi res vocibus *Totius*, *Partis*, *Majoris*, significatas, ambigit amplius, utrum Totum sit suâ parte majus, sed è vestigio hoc ipsum per sese verissimum esse ita certò percipit, ut mox sponte, nullâ expectatâ demonstratione, ruat in assensum. Pari modo contendimus, animum cujusvis hominis mentis compositis, oblata hac propositione, ac ritè intellectâ præviâ verborum explicatione, *Deus existit*, adeo per se in ejus assensum esse pronum, ut nullam, ad ejus certitudinem menti ingenerandam, necesse habeat quærere demonstrationem; dum majorem in hac ipsa veritate reperit convictionis vim, quam ab ullis argumentationibus queat expectare: ut non minus facilis & inclinata mens sit ad assentiendum huic effato sine ulla probatione, quam ad amplectendam cujusvis firmissimæ demonstrationis conclusionem.

XII.  
*Eam dari,  
ex Legis  
Naturalis  
conscientia  
evincitur.*

Talem aliquam *πείληψιν* sive anticipationem de Deo hominì à natura esse insitam, firmissimè demonstrat innata conscientia turpis & honesti. Nimirum, attendamus practica principia, qualia sunt, *Unicuique suum tribuendum*; *Alius non est ladendus*; &c. concessa quibusvis, qui rationalitatem, id est, humanitatem ipsam non planè exuerunt. Has veritates per se notas existere, earundemque sensum ab ipsa natura animis omnium esse insculptum, docet illarum maxima universalitas, & unanimis quarumvis gentium in hac placita consensus. Etenim in tanta ingeniorum varietate fieri nequaquam potest, ut omnes idem prorsus sentiant de iis rebus, quarum cognitionem ipsi nobis investigamus & aliundè acquirimus: earum imprimis quarum in vita nostra observatio ardua adedò est & molesta. Adde, quæ has veritates comitatur, vim obligatoriam, suâ sponte efficacissimè se exerentem in animis mortalium; ita ut homines etiam indomiti, nullumque quem metuant in terris agnoscences, scelerum, quamvis occultissimorum, furiisagitati, in mortis quoque articulo ista patiantur animi tormina, quæ clarè monstrant, harum veritatum transgressores hominum irâ majus aliquid meruisse.

ruisse. Ex quibus conficitur ingenitam esse horum principiorum notitiam: nec simpliciter tantum ingenitam, sed & naturâ notas esse has veritates sub forma legis, munitæ reverâ sanctione pœnali; cui subiecta sit omnis creatura rationalis cum obligatione ad pœnam, si sese ejus constituerit violatorem. Jam verò si sit à natura innata notitia Legis, utique etiam Legislatoris, à qua lex illa lata sit tanta cum obligandi potestate. Antecedentis membri veritas ex dictis manifesta est. De sequelæ necessitate nulli potest esse dubium, quandoquidem Lex & Legislator relata sunt, quorum natura est talis, ut cognitione existant simul, quatenus in notione unius per se includitur respectus ad aliud, atque adeo etiam ipsa notio illius alterius, ad quod hoc prius relationem dicit. Hunc autem Legislatorem cujus insitam notitiam arguit innatus Legis Naturalis sensus, esse Numen de quo nobis hic disquiritur, nullo negotio patescit. Etenim qui innotescit tanquam potestatem legislatoriam habens in conscientiam hominis, creaturæ omnium nobilissimæ, is simul cognoscitur tanquam supremus rerum Dominus, cui jus convenit suâ naturâ ἀνταρροπικόν & independens; imprimis cum simul is menti occurrat tanquam occultæ quoque impietatis testis κατὰ δυνάμειν & omnisfcius, ejusdemque etiam post hanc vitam vindex justissimus & quâvis creaturâ potentior: quæ ipsa prædicata Deitatem digito quasi monstrant clarissimè. Atque hæc ipsa illa ratiocinatio est, quâ alibi utitur tanta cum emphasi infallibilis Gentium Doctor Paulus, urgens vehementer τὸ ἔργον ἔχον ἡμῶν γὰρ ἐν ταῖς καρδίαις αὐτῶν, *Opus Legis scriptum in cordibus suis*; quod & ostendant Gentes, quoque impelluntur sic, ut φῶσι, *NATURA, ea faciant qua legis sunt*; cuique, pro bonè vel malè factis, *per excusatrices aut accusatrices cogitationes attestatur conscientia.*

Atque ita supremi Numinis Existentiam, simul & Naturalem ejusdem Notitiam, veritatem omnium quæ in universa Philosophia occurrunt primam facili ac longè præcipuam, suis adstruimus quantum satis est argumentis: quibus docuimus cognosci Deum, & argumentando, tum etiam admirando, tanquam Ens entium, & quo, ceu alterius cujusvis entitatis fonte & scaturigine, fluit & pendet quicquid ab eo diversum existit

XIII.  
*Demonstrationum omnium summa brevis et utilis proponitur.*

in tota hac rerum natura ; & immediato quoque conscientie testimonio , quo idem universi primum principium etiam invitis sese manifestat Regem & Dominum supremum , suo arbitrio jura ferentem , eisque suas creaturas auctoritate cui nemo refragari potest adstringentem , tum etiam secundum illa plenissimum in eadem imperium exercentem. Quibus duobus capitibus , quatenus ea arguunt creaturarum , speciatim rationalium , ab opifice suo absolutissimam dependentiam , non realem duntaxat , sed & moralem , comprehenduntur fundamenta omnis religionis ac cultus naturalis Deo debiti. Plurima eaque pulcherrima subjici possent hujus Demonstrationis Confectaria ; atqui suis quæque locis rectius deinceps ea tradentur , quando istuc inevitabit occasio , quam abundè ipsa rerum tradendarum series suppetabit.

## EXERCITATIO TERTIA

D E

A T H E I S M O  
S P E C U L A T I V O .

## S U M M A R I U M .

- I. *Atheismi summa & perniciofa absurditas.* II. *Controversiæ de Atheis Speculativis sensus aperitur.* III. *Ejus negativa compluribus adstruitur.* IV. *Pro affirmativa adductæ rationes diluuntur.* V. *Dubitatio de Dei Existentia , ut à Cartesio tradita & pallia-*

*palliata, proponitur. VI. Ejus cum summo periculo conjuncta absurditas detegitur.*



Proposita juxta se posita usque eò elucescere, ut eadem sit illorum scientia, non frustrà docent Logicorum filii. Quam ob rem, quum proximè disseruerimus de prima veritate, nimirum de Existentiæ Divinæ naturali notitia, & certitudinis illius fundamentis, ex ordinis lege transeundem nunc foret ad excutiendam contrariam ei falsitatem, Atheismum. Ejus num sit absurditas major, num impietas, merito dubites. Nullum profectò commentum æquè ac hoc existit sui eversum: quando qui agnoscere nolunt, absque quo tamen esse nequeunt, Deum, eò tandem abire coguntur, ut quam summo Numini detrahunt independentiam ac divinitatem, reclamante omni rationis & experientiæ sensu, ridiculâ non minus quam monstrificâ apotheosi, in hoc ipsum Universum transcribant. Quumque prima veritas eadem sit summa bonitas, quid mirum, si tanta, quâ tam protervè ab illa receditur, stultitia existat unica cujusvis in humano genere impietatis causâ & origo. Quod adeo verum, ut etiam optimus quisque quoties in via virtutis deficit ac labitur, si se satis attendat, alium nullum inveniat erroris fontem, quam animi ab intima supremi Numinis conscientia recessum. Scitè in hanc rem ille:

*Quilibet, ut peccet, (aliàs peccare timeret)*

*Esse sibi nullum fingit in orbe Deum.*

Deterrimam hanc pestem diligentius aliquanto reterege hujus loci foret: verum in ea quâ nostras has Exercitationes circumscripsimus brevitate nefarii dogmatis profunda anxie scrutari non licet. Atquè neque lubet; nec multum quoque attinet: dum satis huic monstro incisi sunt nervi, quamdiu stant adductæ à nobis pro Primi Entis existentia rationes. Neque opus est Iliada scribere post Homerum: adeo, pro more suo, plenè ac solidè quicquid hùc pertinet pertractavit, venerandæ nobis memoriæ Præceptor & Collega, Celeberrimus Gisbertus Voetius, *Part. 1. Select. Disp. de Atheismo.* Paucis unum duntaxat atque

I.  
*Atheismi  
summa et  
perniciosa  
absurditas.*



que alterum attingemus, quod hodiè magis controversum præcipuam præ aliis cum Theologia Naturali habet affinitatem.

II.  
*Controversiæ de Atheis Speculativis sensus aperitur.*

Edò præprimis spectat agitatissima quæstio, de Atheis Speculativis, utrum dentur? Sunt qui affirmant; etiam, quod merito mireris, ex eorum numero, qui quibusvis innatam Dei ideam, eamque omnium quæ in mente nostra existunt clarissimam ac distinctissimam, simul tradunt: quæ qui cohæreant dogmata, non satis me intelligere, lubens fateor. Sentiant nostro iudicio sanius, atque apti sunt Atheismum redarguere efficacius, qui negant. Loquimur autem, ne quis ex perperam intellecto quæstionis statu hallucinetur, de subiecto actualis de Deo cognitionis capaci, id est, de homine sanæ mentis, qui-que in aliis veritatibus cognoscendis ratione suâ rectè utitur: nè quis nobis infantes obijciat, aut mente captos, aut similes, quos ignorare posse veritatem, quam nondum actu queunt percipere, vel etiam fortè negare, quam non intelligunt, minimè est inficiandum. Neque quæritur, an sint, qui sic procul ab omni Numinis reverentia vivunt, quasi nullus existat Deus, qui sit scelerum testis simul & iudex? Non etiam, utrum reperiantur, qui, negando Dei Unitatem, Omniscientiam, Immutabilitatem, Providentiam, similesque perfectiones, re ipsa per legitimam sequelam è medio tollant Divinitatem? Neque tandem, num quis ore tenus negare queat primæ causæ existentiam, atque affirmantibus quoad verba contradicere? Clamat, prohi dolor: tristis experientia, omne hoc Atheorum genus existere abundè, ac nimium indies accrescere numerum eorum, qui variis modis veritatem injustè detinent, ac malitiâ suâ tantum non opprimunt. Id ergò πὸ γενόμηνον est, An quis detur mortali-um, uti ratione potens, qui ipsam Dei existentiam directè sic neget, ut ex interiori animi sententia securus acquiescat in falsissima hac falsitate, *Non existit Deus*, tanquam in theoremate, de cuius veritate certò se persuasum putet? Atque hunc talem Atheum non dari, neque etiam dari posse, nos credimus.

III.  
*Ejus negati-  
va complu-  
ribus ad-  
struitur.*

Fidem huic sententiæ facit totum quod de naturali Dei notitia, tum acquisita, tum innata, hætenus docuimus. Non tantum facili adedò diligentiâ supremi Entis existentiam in unaquaque creatura nobis obvia elucere, ut vix aliquo discursu indigea-

digeamus, evicimus; verum etiam, "si quoque ratiocinari hic lubeat, ostendimus, nullâ longâ ac operosâ demonstrationis serie hîc opus esse, sed totum hoc confici proximâ consequentiâ ex immotis principiis, tantâ certitudinis evidentiâ, ut nulla alia dianoëtica notitiâ sit facilior. Quapropter quicumque aliarum veritatum vim percipere aptus est, hujus etiam efficaciam non sentire non potest. Verum magis attendi velim, de qua antè diximus, noëticam atque omnibus ingenitam Dei notitiam. Certè, quæ secundum se simpliciter naturalia sunt, ea exui nequeunt, nisi exutâ pariter naturâ ipsâ; adeo quod congenitum est recurrit usque. Quid? quod ipsum rationis lumen (quo neminem ratione utentem destitui clarum est) non in alio consistat, quam in primarum & per se notarum veritatum cognitione; juncta cum facultate, eliciendi indè legitimâ sequelâ quæ in eis latent conclusiones. Jam verò anticipationibus istis insitis annumerandam quoque esse hanc propositionem, *Deus existit*, antè planum fecimus. Quumque primarum veritatum ratione necessitatis & certitudinis æqualis inter se sit conditio, utique, si nihil obstat quo minus unam quis ex animo ejicere queat, etiam omnes extirpare poterit: quod qui concedendum arbitratur, hominem re verâ ponit non-hominem; à quo scilicet id maximè alienum erit, quod ipsum hominem facit rationalem, id est, hominem. Adde, quod demonstravimus quoque, innatum hoc rationis dictamen, in quantum actiones nostras spectat, vim legis habere. Atqui omnem naturalis legis notitiam (cum qua pari passu ambulat notitiâ Legislatoris) ita radicitus exscindi posse, ut nullus omnino ejus maneat sensus, nemo, nisi ipse ab omni rationis lege remotus, dixerit. Saltem haud parum Gentium *ἀναπλομήσια* diminuitur, si tam debile ac parum efficax in iis statuatur opus Legis, ut quis suâ resistentiâ obligationis ejus sensum suffocare penitus queat. Quin characterem hujus legis vivum & indelebilem poscit inprimis gloriosa Legislatoris Majestas, quæ in hoc potissimum omni finitâ potestate apparet major, quod jura dicat ista cum imperii plenitudine atque efficacia, ut subditi conscientiam morales, atque adeo omnigenæ, dependentiæ à suo Rege exuere, etiamsi quam maximè velint, non tamen possint, sed quam suâ malitiâ no-

lunt, cogantur nihilominus tremente animo agnoscere Judicis auctoritatem. Hunc demum in modum plenè victrix est Dei potestas: cui & ipsi in malo confirmati Dæmones testimonium dicunt, quando quod exhorrescunt, existere tamen non credere non possunt, Numen. Atque inde factum arbitror (quod silentio prætermittere nequeo, cum maximi sit hoc loco momenti) egregium atque infallibilem Naturalis Theologiæ doctorem & assertorem Paulum, quando alienatum à verò Dei cultu Gentilium statum, ac deploratam eorum malitiam fusè describit, vanos quidem factos narrare in ratiocinationibus ac stultos per obtenebratum intelligentiâ carens cor, eo usque ut debitâ gratiarum actione non tantum Deum non glorificaverint, sed & crassâ idololatriâ incorruptibilis Dei gloriam adeo obscuraverint, ut veritatem Dei in mendacium transformaverint; nusquam tamen in isto scelerum catalogo quem subtexit quicquam hujus Atheismi, qui procul dubio inexcusabilis *ἀνομιος* existit argumentum, meminisse. *Οσφες Dei* inter alios numerat Apostolus; non existentia Divinæ abnegatores: minimè præteriturus crimen, quod, si detur, omnium cæterorum fastigium est ac quasi compendium. Quin ex adverso passim inculcat, in tanta malitia homines & *novisse Deum*, & *agnovisse δικαίωμα ἑοῦ*, & conscientia ac cogitationum testimonio ostendisse *opus legis scriptum in cordibus suis*. Tam nullus tradi potest *τις ἀδίκων ὄν*, ut definat in eo manifestum esse quod de Deo cognoscitur, quatenus id unicuique mortalium *Deus manifestavit*.

IV.  
Pro affirmativa addu-  
ctæ ratio-  
nes diluuntur.

Et hæc quidem præcipua sunt nostræ sententiæ firmamenta; quibuscum conferendum minimè censemus quicquid à quibusdam pro Atheismo Speculativo movetur. Adducunt ex Psalmo *Stultum, qui in corde dicat, non esse Deum*. Verum de Practico potius Atheo istic sermonem esse, ex textus totius compagine, ejusque cum parallelis collatione, jam dudum monstrârunt Theologi; quibus eum curatius expendendum relinquimus. Levius est, quod, testimonio Plutarchi ac Ciceronis, referunt de Diagona, Theodoro Cyrenensi, Evemero Tegeate, Euripide Tragico, pluribusque; qui Deos esse negaverint. Etenim quis est qui ignorat, apud Gentiles Atheos passim vocatos fuisse, non qui nullum credebant Deum, sed qui

qui non eadem quæ ipsi adittebant Numina. Socratem ipsum, virem certè sapientissimum, & omni vitæ instituto etiam à suspitione tantæ criminis remotissimum, istius quoque impietatis narrant accusatum à quadruplatoribus Atheniensibus; tantum quod non eosdem, quos concives, coleret Deos. Quicquid sit, istos enumeratos fuisse Speculativos Atheos, quales antè descripsimus, nondum ullâ rationis specie demonstratum vidi. Gravius urget, quem adserunt in medium, Atheismi Apostolus & pro eo Martyr Julius Cæsar Vaninus, qui præfractè Deum negans, postquam per pestilentissimos libros, *Æternæ providentiæ Divinæ theatrum*, item *Dialogos*, virus nefarii dogmatis testè in animos hominûm insinuare conatus fuerat, tandem convictus debitum pertinaci impietati supplicium Tholosæ igne exsolvit, etiam ad extremum usque nequicquam à blasphemia remittens. Non vacat disquirere, quibus modis & artibus in casses suos tam profundè trahere potuerit hominem diabolus? Theologici id fori est. Hæc aliaque prætermittens, id unum ajo, tot & tantis rationibus scelestam unius hominis vocem nihil detrahere: qui enim primam veritatem negare audet, quid non ausit? Quare, sic animo re verâ sensisse, uti verbis præ se tulit, prudentis non est credere ex solo impij ac mendacis oris testimonio. Tandem gentes integras in aciem educunt, quæ ex innata feritate nullum Numen agnoscant. Verum testimonium hoc negativum est; quatenus, si qui sunt qui sic narrant, potissimum narrant nihil cultus religiosi per istud tempus quo inter eas commorati fuerunt, se observare potuisse. Quod si tamen qui ista de gentibus quibusdam testantur scriptores, longiori ac familiari convictu populorum de quibus loquuntur & linguam & mores perspectos satis & cognitos habuissent, longè aliud, quam quod de iis tradiderunt, fuissent experti: uti & experti fuerunt alij, qui proprii indagine edocti contrarium de iisdem illis testati sunt; & communi consensu confirmarunt illud Ciceronis, quæ eadem nostra conclusio erit, *Nulla gens tam fera, nemo omnium tam immanis, quem non imbuerit Deorum (Dei) opinio.*

Verum ab aperta Atheismi professione (propter ipsam horridi dogmatis crudelitatem, cui digerendæ ferreus paucorum tantum

V.  
Dubitatio

de Dei Existentia, ut à Cartesio tradita & palliata, proponitur.

spirituum fortium ventriculus par est) non tam est metuendum veritati & pietati, quam potius ab istis artibus, quibus nonnulli, sive scientes, sive ignorantes, sub specioso veritatis inquirendæ prætextu, latam blasphemix portam aperiunt. Hæc inter (aliis nunc missis) primo loco collocandam censeo methodum illam, quâ Philosophaturo præcipitur, in acquirenda cognitione, uti aliarum rerum, ita quoque ipsius Dei, initium faciendum esse a dubitatione. Ergò pauca etiam de hac controversia, *Utrum de Dei Existentia naturaliter dubitare liceat?* Ita quæstionem proponit Cartesius, *Epist. x. Parr. II.* ubi & de ea differit pluribus; quorum summa hæc redit. Contendit, eos omnes, *qui existentiam Dei evidenter demonstrare nequeunt, posse (separatâ fide) naturali ratione examinare, an sit Deus aliquis? atque ita intellectu suo de Deo dubitare.* Quotquot autem sic de Deo dubitant, si sibi pro scopo non habeant in re tanti momenti velle pendere in dubio, sed hanc sibi *dubitationem proponant tanquam medium* ad clariorem veritatis cognitionem acquirendam, *rem facere omninò piam & honestam*; ut non peccet, qui propter hunc finem *totam quam de Deo habere potest cognitionem ad tempus ex animo summovet.* Quod nisi lubitum fuerit in re seria nugari, abutendo nimium voce dubitationis, sique quod res est dicere licet, nihil ista volunt aliud, quam omnes illos rem piam facere & honestam, qui ad tempus Athei fieri intendunt, ut deinceps Athei esse desinant. Nec enim video, quid re verâ differitatis intercedat inter Atheum, atque illum qui *totam quam de Deo habere potest cognitionem ex animo summovet.* Quod enim subjicit Auctor, etiam nos, quotiescunque dormimus, aut aliud quicquam agimus, sponere in id tempus totam cognitionem quam de Divinitate habere possumus, id uti falsum, ita oppidò ridiculum est, & merum *χρησφύχτων*, ad horridam sententiam, si quo colore fieri possit, palliandam. Certè, quicunque pius, aliud agens, de Deo non cogitat, is quidem actualement de Divina existentia cogitationem negative non elicit, quatenus plures diversarum rerum notiones in eadem mentis actione simul non subsistunt; attamen servat constantem animi propensionem ac habitualement aliquem assensum in hanc propositionem, *Deus existit*, tanquam verissi-

verissimam ac certissimam ; ut talis nequaquam omnem quàm de Deo habere potest cognitionem ex animo summoveat , nec positivo actu mentis circa ejus existentiam assensum suspendat , quod ad dubitationem Cartesianam omninò pertinet. Nisi dicendum sit , Cartesium , quando in mundo suo vorticoso digerendo laborabat , de Meditationibus suis earumque veritate dubitasse , quòd tum temporis de illis fortè non cogitaverit ? Pinguis ista profectò subtilitas est , & mysterium sapientiæ non vulgaris ! Verum tanti est ea cudere dogmata , quorum , dum candidum patrocinium apertè suscipere pudet , turpem nuditatem fictis tegere nugamentis tutius habetur. Et quis vel fando audivit , unquam fuisse controversum , an teneamur indefinenter cogitare , quod existat Deus ? Aliud ergò planè est , dubitare de re quapiam , id est , pendere in dubio (ut ipse hoc loco Auctor) aliud , de ea non cogitare : nisi velit nova methodus , quando jubet dubitare de omnibus , de iis tantum non esse cogitandum. Plura sunt in paucis illis lineis paris acuminis , aliàs fortè ex professo excutienda. Nunc quæ præ manibus est quæstio tribus verbis absolvenda.

Licetum est procul dubio argumenta quærere ad thesin hanc, *Existit Deus* , variis modis magis magisque stabiliendam : ità tamen ut conclusionis inferendæ veritas , tanquam dubia , ab argumentis adhuc investigandis minimè suspendatur , sed inquirenti argumenta supponatur tanquam certa , tantum aliis rationibus confirmanda. Itaque , sicuti in vita nostra quotidie res millenæ nobis occurrunt , quas ipsi certissimas atque indubias esse sumus persuasissimi , quasque nihilominus , si quis fortè negaverit , sine ulla certitudinis in mente nostra diminutione , alteri persuadere nitimur rationibus hunc in finem inquirendis ; ita quoque inquirentur argumenta ad confutandum Atheum , nobis tamen ipsis indubia interim semper sit & maneat , veritas hæc, *Existit Deus*. Etenim quicumque ab ejus certa persuasionem quicquam remittit (uti remittit omnis qui dubitat ; quatenus certum & dubium in mente nostra opposita sunt , quorum alterum alterius contagione imminui necesse est) tanto propius ad Atheismum accedit , quanto à certitudine hujus thesè recedit longius. Horret certè animus ac meminisse refugit , tanto co-

VI.

*Ejus cum  
summo peri-  
culo conjun-  
cta absurdi-  
tas delege-  
tur.*



natu commendari hodiè methodum, quâ inter Existentiæ Divinæ certam noticiam & ipsum Atheismum homo in isto ponitur bivio, in quò dubiam trahit sententia mentem, an sit alius quis Deus? Quid? quod qui de Deo dubitat, necesse habeat unâ dubitare de sua ab ipso dependentia, suæque ad legis naturalis dictamen obligatione; cujus diminutâ reverentiâ nulla rectior ad Atheismum datur via. Ad hæc, si de Dei existentia dubitare licuerit, etiam dubitationi subducenda non erunt quævis alia principia per se nota, quæ in eodém cum illa stant ordine. Quod si sic, invenit, de quo sibi gratuletur, Atheismus & Scepticismus propugnaculum inexpugnabile; quatenus hi non nisi benéficio quarundam immediatarum veritatum certò supponendarum everti queunt. Et quid ipsi Cartesianæ Philosophiæ eveniet, quæ hoc pacto omni nudatur certitudinis spè? Cum enim per ejus placita nihil cuiquam possit esse certum, nisi præcognitâ Dei minimè fallacis existentia, hac dubiâ datâ, nihil unquam in ea erit indubium: si enim omnia, cum Deo, dubia, quâ obsecro ratione, & ex quo principio, primum de Deo, mox etiam de rebus aliis, evademus certi? Adde & innatam esse hanc veritatem, quod antè docui: ut nec satis possibilis sit, nec utilis, de ea dubitatio; quatenus suæ certitudinis vi omnem eam sic excludit, ut antè se sentiri faciat, quam de dubitatione consilium capescere alicui licet. Quod si qui nihilominus ejus fulgentem certitudinem affectatâ dubitatione obscurare, & sic re verâ injustè detinere erumpentem veritatem nitantur, viderint tales, ne incidant in judicium gentium, quas, *quia visum non fuit eis Deum in noctia retinere, tradidit Ipse in mentem omnis judicii expertem.* Utinam nulli isti dubitatores id sint experti, nec existant inter eos, qui istis SPERNIS suffocati, non possint non parùm reverenter habere deinceps Numen, de quo præfractè primum dubitare voluerunt!



EXERCITATIO QUARTA  
DE  
DEO INDEPENDENTE.  
SUMMARIUM.

- I. *Primi alicujus & fundamentalis quasi conceptus de Deo formandi necessitas.* II. *Perperam ratione Independentiae Deum Cartesio dici esse à se positivè.* III. *Quid tamen positivi Independentia Divina includat?* IV. *Independentiam Deo competere, & hujus conceptum aliis omnibus in Deo esse præmittendum, ostenditur.* V. *Illi juncta Spiritualitas descriptionem quasi Dei conficit.* VI. *An, & quo sensu, ex natura Verus Deus cognosci dicendus sit?* VII. *Omnimoda Dei Independentia agnitio præcipua veræ Religionis basis.* VIII. *Ex notione Independentiae perperam concludi, unam tantum dari substantiam.* IX. *Sententiæ hujus Atheismus paucis detegitur.*



D formandum distinctiorem rei cujusslibet conceptum, tum etiam ad notitiam ejus acquirendam & certiolem & pleniorẽ, rectè præcipiunt Philosophi, inter omnia quæ menti occurrunt prædicata, unum aliquod esse investigandum ante alia, quod rei præ cæteris sit intrinsicum, ac rationem ejus formalem sive essentiam quasi constituat; in quò, ceu immoto fundamento, pedem figere liceat, atque undè, tanquam ex fonte aliquo, continuatà demonstrationis serie quævis alia ejusdem attributa deriventur. Quapropter, postquam summi Numinis *Existentiæ* naturali rationis lumine non uno modo innotescere proximè evicimus, non rectius, quantum capiunt ingenioli nostri angustiae, & *Quid* live

I.  
*Primi alicujus & fundamentalis quasi conceptus de Deo formandi necessitas.*

sive *Quis*, & *Qualis* Deus sit, intelligemus, quam si omnibus nostris de Deo cogitationibus primum aliquem &, ut ita dicam, essentialem conceptum substernamus. Id quotquot negligunt presenti gravissimorum errorum periculo sese exponunt, ista sæpiusculè Deo tribuentes, quæ à summæ perfectionis statu non tantum sunt alienissima, sed & quæ altius inspecta ipsam naturam Divinam penitus evertunt. Neque hîc satis juvat notio Dei confusè tantùm concepti tanquam Entis *infinisè perfecti* (in quam facile, quotquot Deum existere credunt, consentiunt) nili ad manum sit manifestum indicium, quo id quod re verâ perfectionem notat discriminetur ab eo quod imperfectum est; quodque adeo conceptibus quibuscvis de Deo formandis normam ponat ac mensuram primam & prorsus infallibilem. Tale prædicatum, nostro iudicio, *INDEPENDENTIA* est: quæ cum ipsa natura Divina, in quantum ea sub captum nostrum cadit, unum idemque notare videtur; & quam qui unicè sequitur tanquam cynosuram in formandis quibuscvis de Deo cogitatis, certus is esse poterit, se non falli, hanc quamdiu servat sartam tectamque.

II.  
Perperam  
ratione In-  
dependentiæ  
Deum Car-  
tesio dici  
esse à se  
positivè.

*Independentiam* cum appello, aliquid significatum volo tum negativum, tum etiam positivum. In mera negatione subsistendum, in quantum excluditur qualiscunque dependentia, sive passiva emanatio ab influxu cujuscunque causæ. Removetur ergò omnis omninò ratio causalitatis, sive intrinsecam eam quis cogitet, ratione Dei ipsius; sive extrinsecam, ratione alicujus principii extra Deum. Et hanc quidem manifestè excludit primitas in causarum subordinatarum serie, respuens omne superius, atque inferens principium sine principio. Illam verò ipsa notio causalitatis arguit contradictionis atque absurditatis; quatenus si quid sui ipsius causa foret, sibi id dedisset quod jam habuisset, nec tamen habuisset quod dedisset. Quæ cum sint evidentia, mirum, quid in mentem venerit Cartesio, quando iterùm iterùmque inculcat, Deum à se esse, non negativè, sed quam maximè positivè; sic ut, quia ille ipse est, qui se re verâ conservat, videatur non nimis improprie dici posse sui causa: quatenus ejus potentiam tam exsuperantem agnoscat, ut plane sit causa, cum ille esse perseveret; quippe qui, dum in eo tantum est po-  
tentia

sentie , ut rem extra se positam conservet , omninò tanto magis ipsum suâ propriâ potentia conservat. Ut nobis omninò liceat cogitare , illum quodammodo idem prestare respectu sui ipsius , quod causa efficiens respectu sui effectus : nec videat , cur nomen causæ tanopere sit fugiendum , cum potius illo uti perutile ac propemodum necessarium esse videatur. Quod si Viro placuisset paulò clarius ac distinctius philosophari , saltem , quid assereret diligentius attendere , videre faciliè potuisset , nihil istis inconcinnius dici posse. Quandoquidem enim notiones causæ ac causati indivisam ac reciprocaminvolvunt relationem eorum , quorum alterum naturâ prius est altero , utique nullus eis in hac materia relinquitur locus. Nisi concipere liceat quodammodo , ac dicere non nimis improprie , sed perutiliter ac propemodum necessario , essentiam Divinam naturâ priorem esse se ipsâ ; id est , eam id sibi dedisse , quod jam possidebat. Ut jam sciam istud longè crudius , quo ita Deum vult sui ipsius causam , ut eum se conservare dicat per eandem potentiam , per quam res extra se posita conservat. Quæ , si non nimis improprie accipiantur , quodammodo , quin planè necessario , inferunt , conceptum potentia Divinæ , uti aliarum rerum creaturarum essentiis , ita quoque existentia Dei , esse præmittendum : quod , qui potest , capiat ! Quin , cum conservatio sit quædam continuata creatio , per ista jam allegata cogitandum erit ac pronunciandum , nec nimis improprie , sed perutiliter ac propemodum necessario , Deum statuendum esse creatorem sui ipsius , uti est suarum creaturarum ; quarum esse , ut primum , sic quoque continuatum , ad potentia divinæ exsuperantem causalitatem est referendum. Quæ omnia cum sint quam maximè absurda & in Divinam perfectionem contumeliosa , certè ferendi sunt conceptus istiusmodi ac phraseologiæ nullo modo , nec proprie nec improprie , nedum perutiliter aut necessario , sed planè ac plenè ab hoc negotio removendi. Eoque sensu optimè hactenus dictum (quatenus respectus habetur alicujus , qualiscunque ea fuerit , causalitatis) Deum nullo modo esse à se positivè , sed tantum merè negativè , omne sui principium excludendo.

Interim , semoto omni omninò causalitatis conceptu , haud gravatim admittimus , Independentiam à parte rei esse aliquid

E

quam

III.

Quid tamen

*positivi Di-  
vina Inde-  
pendentia  
includat ?*

quam maximè positivum : quam ob rem quidam eam *Ascensivæ* nomine exprimere maluerunt. Etenim, cum ne viliissimæ atque imperfectissimæ quidem rei essentia in prædicato negativo consistat, imprimis cogitandum est, meram negationem debiliorem esse quam ut sufficiat ad ponendum primum & radicale prædicatum illius Entis, quod præ omni alio summè positivum est. Quid ? quod etiam ipsum purum putum nihil dici possit suo sensu negativè independens; quatenus nullius causæ influxui debet suum esse, quod nullum habet. Itaque, cum Deum Independentem asserimus, id volumus, illi ex se & per se convenire perfectissimam *Sufficientiam ad existendum*; adeo ut se ipso, modo eminentissimo & ab omni causalitate longè diverso, existentiam possideat, quam suam alia quævis entia suis debent causis. Attamen cum ista ratio existendi consummatissima, & à parte rei procul dubio maximè realis & positiva, à nobis tanquam positiva concipi non possit, nisi mox in alicujus causalitatis ideam incidamus (quæ tamen, uti docuimus, præprimis hic arcenda est) jure merito ac longè tutissimè mens nostra, suæ imperfectionis sibi conscia, ne quid cogitet Deo ipdignum, acquiescit in negativa Independentiæ notione, quatenus ea offert Dei essentiam nullius ad existendum indigam.

IV.  
*Independentiam Deo  
competere,  
& hujus  
conceptum  
aliis omni-  
bus in Deo  
esse præmit-  
tendum, o-  
stenditur.*

Non jam laborabo in demonstranda Dei Independentia, quum de ea ex antè dictis abundè constet. Quod enim in omni causarum ordine primum est (quale Deum esse evicimus antè, cum à finita causarum subordinatarum serie pro ejus existentia argumentabamur) id ab alterius influxu nihil planè accepisse potuit: quumque tamen existat, utique per se atque ex se id existere, est necesse. Cæterum, uti ab omni causa, ita quoque alio quovis modo Independentem esse Deum, eadem demonstratione conficitur. Quandoquidem enim omne aliud dependentiæ genus eam quæ à causa est supponere & involvere constat, utique in quod Ens hanc cadere non posse ostendimus, ab eodem omnem alterius ordinis dependentiam esse removen- dam, per sese manifestum est. Id ergò potius inquirendum, de quo lis moveri posset, utrum conceptus Independentiæ, pro modo cogitandi nostro, cæteris omnibus in Deo occurrentibus prædicatis præmittendus sit, tanquam maximè essentialis & in-  
trinse-

trinfecus? Nobis quidem sic omninò videtur: &, quia Independentia ex nullo priori deduci, sed duntaxat à posteriori de Deo probari, potest; &, quia quævis aliæ in Deo obviæ perfectiones ex ipsa Independentia, tanquam ex fonte, à priori quasi queunt demonstrari: uti de singulis docebit sequens noster tractatus. Cui verò prædicato duo ista requisita conveniunt, id rectè habetur pro ratione rei formali, distinguenda ab attributis, tanquam prædicatis illius, uti vulgò loquuntur, consecutivis. Nec obscurè Deus ipse nobis in hoc conceptu præiisse videtur, quando sese manifestavit nomine יהוה tanquam *Memorialis* suo. Videlicet, id uti derivatur ab יהוה *fait*, ita in nativa significatione notat aliquid quod *est absolutissime ex se ipso*: quapropter & illud Deo *essentiale* esse ac proprium, nec ulli alteri communicabile, docent Theologi & Philologi; ex quibus consuli potest facillimus harum rerum explanator, Præceptor ac Collega honorandus, Cl. Johannes Leusden, *Philolog. Hebr. Dissert. xxvii.*

Quamvis autem omnia quæ Deo conveniunt, ipsa etiam ejus *Spiritualitas*, sive Vita rationalis, essentiam notans ab omni materia remotam, & intelligendo ac volendo actuosam, facillè ex Independentia deduci queant, atque ideo solius hujus conceptus, ad Dei essentiam pro modulo repræsentandam, sufficere videatur; attamen, quoniam Rationalitas ista Dei sive Spiritualitas fermè pari passu cum Independentia ex creaturarum contemplatione, ut suprà vidimus, nobis innotescit, quumque etiam nos assueti sumus in concipienda aliarum rerum natura duò prædicata essentialia distinctè notare, quorum prius magis est commune, posterius rei magis proprium ac specificum; facillè admittimus, ne nimium à communi concipiendi modo recedamus, analogico quodam modo (excludendum enim omne imperfectionis fundamentum) conceptum nostrum de natura Divina comprehendi posse duabus notionibus, quarum altera ejus *Spiritualitatem* (cujus etiam suo modo participes existunt rationales creaturæ) altera conjunctam, quin identificatam cum illa, *Independentiam* offerat. Ut supremi Numinis brevis, & ad captum nostrum accommodata, talis esse queat descriptio: *Deus est Spiritus Independentens*. Aliæ, quæcunque circumferuntur de-

V.

*Illi juncta  
Spirituali-  
tas descri-  
ptionem  
quasi Dei  
conficit,*

finitiones, vel verbis tantum ab hac differunt, re ipsa conveniunt, ut cum Deus dicitur, v. c. *Essentia spiritualis se ipsa vivens*; aut, *Ens entium*; &c. vel minus existunt accuratæ, quòd non primum prædicatum, sed attributum aliquod, essentia divina pro modo concipiendi posterius, assumant; quales sunt quæ Deum describunt, v. c. *Ens necessario existens*; aut, *Ens infinite perfectum*; &c. Sed harum examen, servamus illis locis, quibus de Necessitate existendi, Infinitate perfectionum, &c. sumus acturi. Imprimis verò silenter hîc prætermittere non deberem præposteram philosophationem Neotericorum, omnem Divinam essentiam frigida solius *Cogitationis* ideâ circumscribentium; nisi ejus absurditatem pluribus detexissem, peculiari *Exercitatione de Cogitatione, quæ sit mens humana*. Quapropter & istud nunc missum facio.

## VI.

An, & quo sensu, ex natura Verus Deus cognosci dicendus sit?

Cæterum, ex dictis de Independentia, quæ eadem sit cum Essentia Divina, liquet, ni fallor, quid respondendum sit ad quæstionem, An ex natura cognoscatur verus Deus? Rationem dubitandi fecit quibusdam, cum S. Trinitatis per naturalis rationis lumen inscientia, tum profunda Gentilium idololatria; quarum illa veri Dei ignorantiam, hæc ejusdem quoque abnegationem inferre videtur. Nemo tamen, qui *axiomaticis* ratiocinari ac loqui hîc cupit, id simpliciter negaverit, nisi qui pariter neget, Ens Independentens, aut verum Deum esse, aut ex rationis lumine innotescere: quorum utrumlibet esse certissimum, jam demonstravimus. An verò quod de Deo cognosci potest, quodque Deus ipse Gentibus manifestum fecit, æterna videlicet DIVINITAS & potentia, non solius veri Dei characteres sunt, sed ficti quoque idoli elogia? Quasi *Ius Dei*, ac opus *Legis Gentium cordibus insculptum*, Deum aliquem non-verum, per cujus notitiam reddita sint inexcusabiles, conscientis earundem manifestaverit! Verbo, cum non-verus Deus re verâ sit nullus Deus, utique vel verus Deus ex natura cognosci potest, vel nullus planè cognoscitur. Id qui admittere non vult, hoc concedere cogitur: quo ipso omnis naturalis Dei notitia unâ liturâ expungitur. Fateor, Gentiles ex obænebrati cordis cœcitate turpissimè errasse, dum illum veri Dei conceptum, quem opus conscientiæ aequè ac creationis abundè suppeditabat, mirâ fatuitate

tate



tate applicuerunt istis rebus quæ naturâ Deus non erant, sicque inciderunt in crassissimam idololatriam; at indè non rectius conficitur, eos verum Deum non cognovisse, quam inferre licet, aurifabrum v. c. quempiam non cognoscere naturam veri auri, quia fortè in dubia luce per aliquam visus fallaciam oblatum aurichalcum verum aurum putat. Imò verò in hoc præcipuè sunt gentes inexcusabiles, quòd, cum verum Deum cognoverint, non tamen ut talem glorificaverint, sed ejus gloriam in fœdum idolum transformaverint. Etiam SS. Trinitatem ignorasse, largior; at non ideo ignorarunt verum illum Deum, qui re ipsa Triunus est, etsi hos in ipso subsistendi modos, atque indè dependentem totam salutis œconomiam, per ignorantiam puræ negationis nesciverint. Aliud enim est, notitiam, quam quis de Deo habet, imperfectam esse, nec salutarem; aliud, objectum imperfectæ talis cognitionis non esse verum Deum. Quapropter, si accurato loquendi modo sit inhærendum, nequaquam potest categoricè negari, verum Deum ex natura cognosci posse, nisi quis periculosa phrasi in extremum discrimen adducere velit universam Theologiam Naturalem; quippe quæ, nisi pro objecto habeat verum Deum, in merum phantasma chimærici alicujus idoli re verâ convertitur. Hoc cum nolint quotquot contra Socinianos istam tuentur rectè sentientes, crediderim facile, hanc, quatenus inter illos agitur, de nomine præcipuè esse controversiam: quamobrem nec latius eam prosequor.

Porro, hæc Dei, cujus essentia sit ipsa Independentia, notio, plurimas supeditat ac pulcherrimas observationes, quarum amplissimus in Theologia universa, tam Naturali quam Revelata, usus conceptus hujus elegantiam mirè commendat. Per omnes ac singulas ire curta pagina non permittit. Conabor hoc uno, quo absolvam, totum comprehendere: *Nihil quicquam tribuendum Deo, quod non sit omni ratione Independentis; quodque absolutè Independentis est, Illi soli id adscribendum.* Novâ demonstratione non indiget hæc veritas. Quandoquidem enim attributa quævis & operationes sequuntur conditionem rei à qua fluunt, utique etiam res ista, cujus solius tota natura est ipsa Independentia, sibi soli vindicat prædicata quæcunque Independentiam involventia, & alia quævis aliquid dependentiæ conno-

VII.  
Omnimodæ  
Dei Inde-  
pendentiæ  
agnitio præ-  
cipua veræ  
Religionis  
basis.



tantia , tanquam è diametro sibi adverſa , prorsus reſpuit. Ex hoc uno canone neglecto , uti nati ſunt omnes de Dei natura & perfectionibus errores , omniſque adeo idololatria ac hæreſis ; ita contrà hic idem unus accuratè obſervatus ſecuram reddit omnem noſtram de Deo ac Creatura cogitationem. Tribue Deo intrepidè quicquid viſum eſt , dummodo ſalvas independentiam , ex vero tribuis : De creatura in ordine ad Deum ut lubet philoſophare , tantum ſi per omnia agnoſcas dependentem , rectè philoſophaberis. Ex adverſo : Detrahe Deo quicquam quod ſpirat Independentiam ; aut tribue creaturæ vel minimam Independentiæ ſpeciem , mox blaſphemus es ſimul ac ſacrilegus. Atque hæc prima ac præcipua illa Reformatæ noſtræ Religionis laus eſt & gloria , quòd una præ cæteris tota ſit in eo , ut per omnia Deo ſua conſtet Independentia , ſua creaturis dependentia. Ut , ſi quid erret , in hoc ſolo erret , quod Deum nimium Deum , Creaturam nimium Creaturam agnoſcat. Hic verò cum errari neutiquam poſſit , nequit etiam ullo pacto fieri , ut hæc de Deo doctrina exiſtat falſa. Ita Reformatæ noſtræ fidei , atque uni noſtræ , plaudit ac teſtimonium efficaciffimum dicit ipſa recta ratio ; dum circa Deum ac res divinas modis indigniſſimis ſine ratione , ac contra rationem , delirat univerſa ſecus ſentientium cohors ; quorum omnis error fundamentalis , ac perpetuum *πῶτον ὁδοῦ* exiſtit , Deum ſolum non agnoſcere omnimodè Independentem. Cujus contrarium quoniam religioſè obſervant orthodoxi , illis per ſolam ſupremi Numinis Independentiam ſtat victrix Dei Gratiæ , cadit inimicus illi corruptæ naturæ typhus.

## VIII.

*Ex noſione  
Independentiæ  
perpetuam  
concludi,  
unam  
ſanctum dari  
ſubſtan-  
tiam.*

Etiſi verò ſoli Deo Independentiæ omnimodæ gloriam ſic aſſeruerimus , nihil tamen commune noſtram philoſophationem habere volumus cum conceptibus eorum , qui , longè alio modo inſtituentes , in rerum natura neque dari neque dari poſſe contendunt plures ſubſtantias quam unam , quæ neceſſariò exiſtat , & eſſentiam habeat infinītè perfectam atque inexhauſtam , quæque conſitet infinītis attributis , quorum quodlibet infinītam eſſentiam infinītè exprimat. Ut per Mundum intellectum velint *modum qui Dei attributum aliquod certo ac determinato modo exprimit* : per partes autem mundi , quas ipſi vocant *res particula-*

*res,*

res, nihil aliud nisi Dei attributorum affectiones sive modos, quibus Dei attributa certo atque determinatè exprimuntur: adeo ut quælibet res particularis sit *modificatio Dei*, utque, quatenus una res particularis ab alia re particulari differt, ita Deus aliter atque aliter modificetur. Quæ profecto verba, in quamcunque flectantur formam, si quem habent sensum, alium nullum dare possunt, quam, unam duntaxat esse substantiam, quæ sit solus Deus; multiplices interim esse unius illius substantiæ modos, qui sint res quælibet particulares in hoc universo nobis obviæ, v. c. cogitantes, extensæ, &c. quæ omnes in una illa substantia subsistentes cum ea faciant complexum quoddam, puta substantiam unam modis variis modificatam. Ut ex hac hypothese eadem res, si consideretur ratione substantiæ, omnes modos sustinentis, Deus dicatur, quæ eadem, spectata ratione modorum particularium, omnium simul ad absolvendum hoc Universum concurrentium, Natura vulgò appellari consuevit. Id est, ut verbo dicam, Mundi nullam esse substantiam præterquam quæ Dei ipsius est: ut Mundus & Deus non nisi considerandi modo differre videantur. Huc planè aurigantur, quæ de partis unius universi ab alia dependentia tradunt, nullà factâ mentione Dei. Nempe statuunt „quamlibet rem particularem quæ finita est & „determinatam habet existentiam, non posse existere nec ad operandum determinari, nisi ad existendum & operandum de- „terminetur ab alia re quæ etiam finita est & determinatam habet existentiam, & hæc rursus ab alia, quæ etiam finita est & „determinatam habet existentiam; & sic in infinitum. Num quid clarius pro Naturæ apotheosi dici potest?

Re ipsâ itaque universâ hæc philosophatio aliud nihil est, quam recoctus quidam Atheismus Plinii aliorumque, præter hunc nostrum mundum nullum Numen agnoscantium, hoc est, revera planè nullum. Tam enim nemo rationis compos sibi persuadere potest Deum esse quodcunque videmus, ut nulla in hoc universo res oculis obvia existat, quæ non, undecunque eam intueamur, omnibus atque singulis prædicatis suis reclamet, testeturque suâ dependentiâ, finitudine, mutabilitate, contingentiâ, insufficientiâ, &c. nihil sibi divinum inesse. Vide *Exercit. III. §. I.* Quumque jam centies confutata sit ista impietas, miror,

**IX.**  
*Sententiæ  
hujus Athe-  
ismus paucis  
detegitur.*

miror, Philosophiam, totam his fundamentis superstructam, eâ subtilitatis specie se hodiè posse commendare tanquam unice masculam: miror, desiderari toties viris etiam minimè indoctis & malis, ut prodeat tandem aliquis, qui accuratam det stupidi commenti refutationem; cum detexisse tantum rem hîc verè sit refutasse. Quod ipsum neque ignoravit sectæ princeps, quando tam ambiguus, obscuris, tortis phrasibus mentem involvit, ut religiosissimi quoque horum arcanorum interpretes fateantur, *obscurè & durè se virum illum explicuisse, per verba durissima, & primo aspectu incomprehensibilia.* Nimirum aliam evasionis rimam non inveniunt, ad declinandam hanc Atheismi notam; quâ notâ omnem ei perituram gratiam norunt. Interim ipsi cavent quoque sedulò, ne, missis verbis durissimis & incomprehensibilibus, ideoque merito hæcenus rejectis, per phrasas claras ac distinctas mentem suam hîc faciant planam; quod facere decebat omninò tantorum mysteriorum Sacerdotes, ut delinant tandem (quod conqueruntur passim) à paucissimis intelligi tam profundæ sapientiæ cogitationes. Has interim cui debeamus primo auctori vel inventori, forsan percipietur insipienti Cartesii *Princ. Part. 1. Art. 11.* ubi sic ille: „Per substantiam nihil aliud intelligere possumus, quam rem quæ ita existit, ut nullâ aliâ re indigeat ad existendum. Et quidem substantia quæ nullâ planè re indigeat, unica tantum potest intelligi, nempe Deus. Alias verò omnes non nisi ope cursus Dei existere posse percipimus. Atque ideo nomen substantiæ non convenit Deo & illis univocè, ut dici solet in scholis; hoc est, nulla ejus nominis significatio potest distinctè intelligi, quæ Deo & creaturis sit communis. Conferre hæc cum istis prioribus possunt queis vacat. Nos ad ea revertimur quæ ad institutam nostræ Meditationis seriem pertinent.

## EXERCITATIO QUINTA

D E

## DEI ATTRIBUTIS,

in communi.

## S U M M A R I U M.

I. *Pluribus & inadequatis conceptibus Divinae perfectiones nobis apprehendendae.* II. *Absurdè statuuntur duotantum Attribute Dei Interna, Intellectus & Voluntas.* III. *Attributorum Divinorum cum Accidentibus creaturarum collatio.* IV. *Objectionibus eorum, qui Accidentia esse contendunt, occurritur.* V. *Qualis inter essentiam & Attribute Dei intercedat distinctio, pressius exponitur.* VI. *Attribute Dei alia Independentiam, alia Spiritualitatem ejusdem, sequuntur.*



Rudentis Philosophi est, quoties cognoscenda occurrit res perfectionibus suis captum nimium excedens, eam, ne planè non intelligat, intelligere ut potest; atque adeo notiones de ea formare, si non re ipsà dignas, menti saltem suæ appropriatas. Sicubi, certè hîc, ubi de Deo sermo est, id locum habet: is enim tanto

I.  
Pluribus &  
inadequatis  
conceptibus  
Divinae per-  
fectiones nobis  
apprehendendae.

perfectionum splendore mentis finitæ aciem perstringit, ut pulchrè dixerit ille, habere se intellectum nostrum ad contemplationem primi Entis, ut se habet oculus noctuæ ad intuitum Solis. Quapropter, quicumque non cupit, quanto diutius considerat, tanto sibi Deum videri obscuriorem (quæ desperantis

in hoc negotio Simonidis vox est, apud Ciceronem) suæ imperfectioni ante omnia hic est consulendum; ut, quod uno mentis actu adæquatè comprehendere nequit, uti in se est, id pluribus conceptibus inadæquatè apprehendat saltem, uti ipse potest. Indè factum, ut, quamvis nihil existat in Deo quod non sit ipsissimum ejus Esse, nos tamen pro modulo Eum cogitaturi necesse habeamus, & plura in eo concipere prædicata, & illorum alia supponere quasi essentialia constitutiva, ut loquantur, alia ex illis deducere, quasi sint essentialia consecutiva. Atque ista quidem esse diximus *Spiritualitatem Independentem*, vel si mavis, *Independentiam Spiritualem*. Verùm, quantæ sit sufficientiæ & amplitudinis iste conceptus, tum demum intelligemus rectius, quando suo ordine ex fonte illo scaturientes Perfectiones lustraverimus; quippe quæ instar radiorum totidem manifestius nobis manifestabunt, *Quale* sit hoc Ens exsuperantissimum. Solent istæc omnia vulgò venire generali nomine ATTRIBUTORUM Divinorum: per quæ intelligimus, quilibet perfectiones, quæ conceptum Essentiæ Divinæ, ceu Spiritûs Independentis, necessariò sequuntur, quatenus de essentia illa, per ipsam essentiam, quasi à priori possunt demonstrari.

II.  
Absurdè  
duo tantum  
statuuntur  
Attributa  
Dei interna,  
Intellectus  
& Volun-  
tas.

Dicebam, Attributa esse *Perfectiones*; quatenus non tantum imperfectionem aliquam à Deo removent, sed & in ipso notant prædicata positiva ac realia; etsi sæpè, ex conceptuum nostrorum & vocabulorum penuria, negativâ notione repræsententur, negativâ voce exprimantur. Ut minimè rei hic satisfaciat tenuis illa philosophatio quorundam, qui contendunt duo duntaxat, propriè loquendo, esse Attributa Dei interna, Intellectum & Voluntatem; reliqua tantum denominationes externas esse, aut relationes, aut negationes, ad essentiam Dei internam propriè non spectantes, sed illi tantum tributas in ordine ad homines, aut alias quasdam res externas. Id quidem minimè negandum est, fateor, in concipiendis pro modulo Attributis Divinis mentem nostram frequenter de Deo cogitare cum relatione ad res quæ sunt extra ejus essentiam, uti id experimur, quoties nobis repræsentamus Æternitatem, Immensitatem, &c.: verum, quamvis hinc conficiatur, istiusmodi respectus ad res extra Deum juvare intellectum

tellectum nostrum in formandis notionibus Divinarum perfectionum, nullâ tamen legitimæ sequelæ specie hinc inferre licet, Attributa ista secundum suum formale in ipsa natura Divina purâ relatione aut negatione absolvi. Quasi quæ Deo simpliciter tanquam Spiritui conveniunt prædicata, magis illi sint interna, & plus dicant realitatis, quam quæ eidem quâ Independenti competunt! Cum tamen natura Spiritualis Deo & creaturis rationalibus analogico modo sit communis; Independentia verò imprimis propria illi existat atque essentialis, uti demonstravimus. Ex quibus sicuti conficitur, Deum maximè ratione suæ Independentiæ à creaturis distare, ita ex mente eorum qui sic philosophantur pariter sequi necesse est, Eundem à creaturis potissimum differre quibusdam relationibus, aut negationibus, aut denominationibus; id est, aliquibus non-entibus. An verò credendum, non existentibus creaturis, atque adeò cessantibus ejusmodi relationibus, denominationibus, negationibus, plerisque suis attributis exui naturam Divinam? Quin, cum Independentia prædicatum sit à parte sui non minus positivum, quam ipsa Spiritualitas, idque ipsum ante alios imprimis velint hi auctores, nescio quam ob causam illa Deo magis interna sint Attributa ac positiva, quæ Spiritualitatem comitantur, quam quæ fluunt ex Independentia. Scio, illos contendere, omnia quæ sunt in Deo esse meram cogitationem; cui per se nihil volunt esse intrinsecum, præter intellectum & voluntatem: verum de hypotheseos hujus falsitate alibi nobis actum est. Cæterum instantias hic adderem desumptas ab existendi Necessitate, Simplicitate, Immutabilitate, Æternitate, Immensitate, similibusque Perfectionibus, quas nec merum Intellectum esse aut Voluntatem, nec tamen meras negationes, aut denominationes, aut relationes, docerem, nisi id intelligendum foret rectius ex singularum explicatione, quæ infra tradenda erit suis locis. Conferatur interim EXERCITATIO nostra de *Cogitatione qua sit ipsa mens humana*; ubi & alia in hanc rem adduximus, assertionem istam confodientia.

Quandò dicimus, Perfectiones hæcæ *sequi conceptum essentia*

III.

*Divina*, cave sis, ne idcirco vera Accidentia esse cogites, aut dispositiones quasdam ab essentia verè distinctas, eandemque

*Attributo-  
rum divino-*

accessu

*rum cum  
Accidenti-  
bus creatu-  
rarum colla-  
tio.*

accessu sui modificantes ; uti id obtinet in creaturis , quæ recipiendo adjuncta quædam in sese , eo ipso majorem quasi perfectionis gradum consequuntur , dum acquirunt quod naturâ suâ in se ipsis non possidebant. Omnem istiusmodi pluralitatem , atque indè fluentem compositionem , respuit tum Independentia Dei , jam demonstrata , tum perfectionum in ipso Infinitas proximè demonstranda : de quibus quoniam agendum erit pluribus , ubi erit dicendum de Simplicitate Dei , nihil attinet ista hic loci antevertere. Interim hanc ipsam ob causam cautelæ ergò dicebam , Perfectiones hæc sequi , non ipsam Dei essentiam , sed potius essentiæ Divinæ conceptum : ut omnis tum pluralitas , tum prioritas ac posterioritas hic intelligenda duntaxat sit , uti loquuntur , in signo rationis , ac pro modo concipiendi nostro ; quatenus mens nostra ex pluribus prædicatis , quæ sese in Deo pro nostro captu offerunt , notionem unius alicujus præmittit , ex qua cætera à priori quasi demonstret : ad instar scilicet accidentium , quæ de creaturis , à quibus realiter distinguuntur , ex suis veris causis demonstrantur. Scitè hunc in sensum alibi præcæ Ecclesiæ Doctor : „ Sapienter dici-  
tur , nihil accidere substantiæ Dei , quoniam in se ipsa perfecta est : sed tamen cogimur nonnunquam quasi accidentia ,  
„ etiam si non omninò accidunt Deo , hæc dicere , & mente  
„ accidentium modo concipere.

**IV.**  
*Objectioni-  
bus eorum,  
qui Acci-  
dentia esse  
contendunt,  
occurritur.*

Neque objici potest , omnia rei alicujus Attributa esse debere ejusdem accidentia ab essentia distincta ; in quantum nihil de se ipso potest demonstrari. Quamvis enim idem , cogitatum quatenus prorsus idem , de se ipso demonstratur ; nihil tamen obstat , cur non idem de eodem queat demonstrari , si tantum sufficienti fundamento idem bis diversimodè concipiatur. Multæ profectò Disciplinæ instituunt demonstrationes affectionum à subjecto re ipsa non distinctarum. Pneumatica de Anima hominis demonstrat Intellectum ac Voluntatem ; cum tamen nec hæc facultas ab illa , nec alterutra à suo subjecto , realiter differre videatur. Quis asserat , Impenetrabilitatem , Divisibilitatem , Figurabilitatem , Mensurabilitatem , &c. à materia distincta accidentia esse ; demonstrat tamen hæc de eadem Physica. Ipsa Matheſis , speciatim Geometria , quæ me-  
thodum



thodum demonstrativam peculiari quodam quasi jure suam fecit, demonstrat v. c. de triangulo rectangulo, potentiam rectum angulum subtendentis cæterorum duorum laterum potentia esse æqualem; item, cujusvis trianguli rectilinei duo latera tertio esse majora; tres angulos internos æquivalere duobus rectis; &c. At quis, nisi ineptus nimium, ista trianguli prædicata totidem ejus accidentia, re vera ab essentia distincta, dixerit? Urgent quidam regulam Philosophi: *Quod in uno est accidens, id non est substantia in alio*. Quasi indè sequatur, ex. gr. Sapientiam, Justitiam, Misericordiam, aut in Deo non esse ipsam ejus substantiam; aut eadem illa in nobis non esse accidentia: quorum posterius esse falsissimum, est manifestum. Verum nulla hæc difficultas est, si cogitaverimus, effatum hoc verissimum esse de illis prædicatis, quæ in pluribus rebus sese habent eodem prorsus modo, Ergò, si Sapientia Dei & nostra in idem genus univocum, ut vocant, convenirent, stringeret; fateor, argumentatio: at nunc, cum non nisi ad similitudinem qualemcunque & modum valdè analogicum eadem Sapientia Deo tribuatur atque creaturis (ut deinceps videbimus) nihil utique obstat, cur non quæ Deo inest Sapientia sit ipsa ejus essentia, quippe quæ sine illa non esset talis; nostra verò sit accidens, ntpote quæ nobis inest planè contingenter.

Ut autem ista percipiantur melius, videamus paucis, quâ ratione, quo modo & fundamento, Attributa Dei ab ejus essentia distinguantur? Realem inter illa intercedere diversitatem, quâ sint verè plura, jam negavimus. Nec tamen à sola mente nostra unicè pendet discrimen, quasi ea pro mero lubitu de eadem re conceptus variet & multiplicet: sic enim Attributa hæc non tam aliquid quod fluit ex ipsa Divina natura, sed meri potius conceptus (quidni ingenii nostri lusus?) essent. Ergò ab intellectu nostro quidem est quod inter essentiam Dei & Attributa ejusdem intercedit discrimen; ita tamen, ut notiones illæ, quibus idem ens simplicissimum ac quam maximè indivisum pluribus dissimilibus atque inadæquatis concipiendi modis pro captu nostro à nobis apprehenditur, fundamentum suum habeant in re; quod distinctionis genus vulgò in scholis vocant rationis ratiocinata. Fundamentum verò, cujus memini, aliud

V.  
*Qualis inter  
Attributa  
& essentiam  
Dei interce-  
dat distin-  
ctio, præfius  
exponitur.*

nullum esse videtur, quam ipsa infinita Divinæ naturæ excellentia; quâ dum intellectus omnis creati angustias longissimè excedit, apta tamen est, pro vario ad res varias respectu, in eodem terminare varios ac multiplices concipiendi modos. Ut re verà sit ipsa Divina in ordine ad nostras cogitationes Incomprehensibilitas (de qua latius suo loco); quâ fit, ut quod unicâ notione simul ac semel menti nostræ præsens sistere non possumus, accommodatè ad captum nostrum id nobis repræsentemus iteratis mentis actibus, ac notionibus plurimum differentibus. Qui concipiendi modus in nobis, uti nullam ponit in Deo imperfectionem, verum potius supremam quandam ac verè Deo dignam perfectionis eminentiam; ita quoque idem, licet arguat mentis nostræ ad tantam rem cogitandam disproportionem, nullam infert in istiusmodi conceptibus falsitatem: & quia omnis abest notionum unio, quæ solâ falsitati subest; & quia talium conceptuum, uti dixi, sufficiens datur in re fundamentum & necessitas, quibus prorsus destituitur falsitas qua talis. Tantum id hic attendendum est, ut imperfecti istius atque analogici concipiendi modi probè nos semper nobis simus conscii, nec unquam qualescunque illas nostras de Deo cogitationes normam constituamus eorum, quæ de Deo ipso sint judicanda. Ex quo uno neglecto semè profluxit, quicquid plurimi circa Dei Attributa errant graviter; à quo periculo aberimus longissimè, si accurato semper judicio imbecilli nostræ perceptioni subveniamus.

## VI.

*Attributa  
Dei alia In-  
dependenti-  
am, alia  
Spirituali-  
tatem ejus-  
dem sequun-  
tur.*

Deniquè de Attributorum Divinorum ordine ac divisione multi multum solliciti sunt. Nobis ea tractasse sufficiet eâ serie, quâ quælibet eorum tum ex ipsa Dei natura, tum alia ex aliis, optimè deduci queunt. Non tamen displicet, si quis universa revocaverit ad duas classes; quarum altera sub se comprehendat perfectiones illas, quæ ex Independentia Dei qua tali fluunt; altera illas, quæ ex Spiritualitate ejusdem qua tali demonstrantur. Etenim quum jam antè ad ista duo capita ipsum Essentiæ Divinæ conceptum reduxerimus, ut Attributa (quæ essentiæ suæ conditionem sequi solent) pariter ad illa duo referantur, rectæ methodo consentaneum videtur. Quamvis autem istic conceptui Independentiæ eum qui est Spiritualitatis quasi

quasi communiorem substraverimus, hic tamen visum est præmittere tractationem Attributorum quæ sequuntur Independentiam qua talem, eis quæ comitantur Spiritualitatem. Etiam si enim & hoc verum sit, in Attributis Independentiæ concipiendis, etiam Spiritualitatis, in iis omnibus dominantis, accuratam semper habendam esse rationem, placet nihilominus inversus ordo: tum quia Spiritualitas sub ipsius Independentiæ conceptu quodammodo comprehenditur, non verò conceptus Independentiæ sub eo qui Spiritualitatis est; tum etiam, quia, quemadmodum solius Spiritualitatis notio, non Deum qua talem, sed abstractam potius rei cuiusvis spiritualis naturam offert, ita quoque attributa Spiritualitatis per se nimium in communi subsistunt, nec satis tanquam Divina agnoscuntur, nisi per Attributa quæ fluunt ex Independentia pro modo concipiendi nostro exaltentur quasi, donec Deo dignè cogitentur. Et hæc eadem ratio est, ob quam hætenus Theologi & Philosophi duas statuerunt Attributorum Divinorum series, quarum altera Incommunicabilem sit, Communicabilem altera. Rectè quidem: quatenus ut ipsius Spiritualitatis, ita perfectionum inde resultantium, expressio quædam analogica relucet in rationalibus creaturis; quo nomine etiam Dei imaginem gerere in Sacris dicuntur: at verò Independentiæ cum annexis nullum in eis vestigium; in quantum sufficientiæ talis ad existendum ex se citra cuiuscunque causæ influxum, eorumque quæ ex illa fluunt prædicatorum, nulla creata natura quocunque modo existit capax. Non nescio, obstrigillare hisce quosdam, claris suis ac distinctis ideis in omni scirpo nodum quærentes, ne quid scilicet existat in Theologia aut Philosophia, quod non sit Novæ sapientiæ lumine collustratum; verum tales sunt quas adferunt obiectiunculæ, ut ex dictis eis satisfiat facillimè, neque necesse videatur in præsentiarum pluribus super hac re cum illis congedi.

EXERCITATIO SEXTA  
DE  
DEO INFINITE PERFECTO.  
S U M M A R I U M.

*I. Infinitatis Perfectionis explicatio cæteris Dei Attributis cur præmittenda? II. Eam esse Attributum, Essentiam Dei consequens, ostenditur. III. Perfectio generatim spectata quid, & quotuplex. IV. Triplex modus Perfectiones continendi Deo applicatus. V. Perfectiones Divinas cognosci, non ex Idea innatæ intuitu, sed ex creaturarum contemplatione, probatur. VI. Quo pacto huic negotio subserviat triplex via, Causalitatis, Negationis, & Eminentiæ. VII. Perfectionis Infinitatem Deo, & quidem soli, convenire, demonstratur. VIII. Perfectionis Divinæ ritè cogitatæ in studio pietatis utilitas.*

**I.**  
*Infinitatis  
Perfectionis  
explicatio  
cæteris Dei  
Attributis  
cur præmit-  
tenda?*



Nter omnia prædicata, quæ ex natura Dei deducenda intellectui nostro sese offerunt, primum locum merito sibi vindicat INFINITA ejus PERFECTIO. Ea enim non tam est Attributum, quam potius quædam Attributorum omnium complexio; quâ mens nostra brevi quasi compendio, conceptu interim minus distincto ac satis obscuro, apprehendere nititur quicquid de Deo cogitandum venit. Cui accedit, quodd, quamvis ingens sit sententiarum divortium in concipiendis & Deo tribuendis his aut illis Attributis, in hoc unum tamen conveniant omnes, quotquot planè Athei non existunt, Dei nomine intelligi ens infinite perfectum; quo

quo scilicet majus atque excellentius existit nihil : undè trita ac recepta quibusvis elogia, quibus Deus agnoscitur ac prædicatur, *Optimus, Maximus*. Id quidem hominum errore contingit, ut ista quandoque à quibusdam Enti summo adscribantur, quæ re ipsâ imperfectionem arguunt ; nemo tamen Illi tribuit quicquam, quod non ipse perfectionem notare saltem putet. Adeò ut, quandò deinceps erit disputandum, nùm hoc vel illud prædicatum Deo conveniat, nec ne ? tantum fermè sit inquirendum, utrum id dicat perfectionem ? Si notare eviceris, quin in Deo locum habet, nemo ambiget.

Ajebam, omnimodam hanc Perfectionem esse quasi compagem omnium Attributorum, quippe quæ universa uno hoc titulo comprehenduntur. Quare minùs placet conceptus ; quo Perfectionum Infinitas statuitur primum ac radicale ipsius essentia Divinæ prædicatum ; quia scilicet ipsa quoque Independentia, ceu Perfectio quædam, sub Infinita Perfectione contineatur, & sic hæc illa pro modo concipiendi sit prior. Verum tamen eam Divinis Attributis rectius accenseri, facilè intelligemus, si attendamus, Perfectionis nomine, ex accurato loquendi modo, non rei illius, cujus esse dicitur perfectio, indicari essentiam ipsam, sed illa ejusdem prædicata, quæ addita essentia nihil illi deesse faciunt eorum, quorum ipsa est capax ; ut omnis Perfectio supponat naturam cujus perfectio dicitur. Imprimis hìc observandum venit, intellectum nostrum, quando existentiam summi Numinis demonstrat ex finita causarum subordinatarum serie, per eam primò ac directè duci ad Deum agnoscendum simpliciter tanquam causam primam, seu Ens Independentens. Simul quidem innotescit, fateor, tanquam rerum quarumvis à se dependentium perfectiones continens ; at non ilicò nobis hoc ipso offertur tanquam ens absolutè atque omni modo perfectum : quæ notio ex Independentia demùm quasi a priori eruitur, ut ex iis quæ mox sequentur manifestum fiet. At verò quodcumque ex alio priori demonstratur, id ipsam rei essentiam non constituere, evidens est. Si quis nihilominus malit voce Perfectionis intelligere omne prædicatum quod rei quomodocumque inest, sive essentiam constituat, sive sequatur (quo sensu liquet nomine Infinitæ Perfectionis etiam Independentiam comprehendi)

## II.

*Eam esse  
Attribu-  
tum, essen-  
tiam Dei  
consequens,  
ostenditur.*

cum tali, etsi minus accuratè philosophari videatur, multum litigandum non erit, quoniam nominalem controversiam hæcenus facere videtur.

III.  
*Perfectio ge-  
neratim spe-  
ctata quid,  
& quotu-  
plex.*

Per ipsam autem *Perfectionis Infinitatem* tale Dei prædicatum intelligimus, cujus ratione Essentia Divina omnes omninò Perfectiones possidet, modo sibi conveniente, id est, infinito ac consummatissimo. *Perfectionem* in genere vocant id omne quo secluditur aliquis defectus: undè Perfectum vulgò describunt, id cui nihil deest. Aliquid verò alicui deesse dicitur vel negativè, vel privativè. Negativè deest, quod quidem secundum se perfectionem notat, cujus tamen hoc aut illud subjectum non est capax: quo sensu lapidi v. c. deest perfectio intelligendi, loquendi, &c. Privativè alicui aliquid deest, quando abest aliquid prædicatum, cujus subjectum omninò erat capax: hoc pacto homini idiotæ deest perfectio eruditionis, aut muto loquela, &c. Saltem Perfectio propriè sic dicta semper notat aliquid positivum; ut hæcenus non malè definiatur: *Perfectio est qua in unoquoque est melior ipsa, quam non ipsa.* Videlicet, ex duobus terminis contradictoriis ille perfectionem notat, qui exprimit aliquid quod à parte rei est reale ac positivum; ille autem imperfectionem, qui reale ac positivum prædicatum removel ac tollit. Adeo ut, quantum unaquæque res habet Entitatis, tantumdem quoque habeat Perfectionis; cum Perfectio parum aut nihil differat ab ipsissima rei Bonitate, quam cum ente reciprocari, rectè docent Metaphysici. Cavendum interim, ne nostris conceptibus ac vocibus examinemus, utrùm aliquid positiva perfectio sit, nec ne? Frequenter enim mentis imbecillitas ac vocabulorum penuria, istic negativis notionibus ac signis uti cogit, ubi res ipsa est quam maximè positiva. Conferri possunt quæ hanc in rem antè diximus, occasione Independentiæ, *Exercit. IV. §. 111.* Præterea, neque hic negligenda est non inutilis distinctio Perfectionum, quæ aliæ earum dicuntur esse simpliciter simplices, sive absolutæ; aliæ tales tantum secundum quid, sive limitatæ. Illæ sunt, quæ, qua tales, in essentiali suo conceptu nullam supponunt, includunt, aut inferunt imperfectionem, sed ubicunque reperiuntur notant puram putam perfectionem, quales v. c. sunt, Scientia, Voluntas, Simplicitas, &c.

Hæ sunt, quæ quidem prout in certo subjecto existunt, perfectionem notant; in quantum illi subjecto tali prædicato gaudere conducibilis est, quam non gaudere; attamen vel adjunctum habent, vel supponunt saltem aliquid imperfectionis, in cuius remedium & levamen sint concessæ. Sic facultas discurrendi ex. gr. est Perfectio; sed in homine, quatenus is plurima ejus beneficio cognoscit, quæ absque ejus usu prorsus ignoraret. Nutritio pari modo perfectio est; sed in vivente corpore, in quantum absque ejus ope, ob continuam partium dissipationem, diu in suo esse perseverare non posset.

Et ista quidem si generatim benè percepta fuerint, rei quæ præ manibus est lumen affudent haud exiguum. Nimirum, quando diximus, Essentiam Divinam omnes omninò Perfectiones possidere, universas intelligimus conceptibiles & possibiles; qualescunque eæ fuerint, seu absolutæ, seu limitatæ. Quod tamen rectè intelligendum; neque enim eodem modo has possidet, quo illas. Id innuebamus, cum addebamus, Deum illas continere *modo sibi conveniente*; qui qualis sit? videndum jam est aliquanto propius. Tribus modis res quæpiam Perfectiones aliquas continere vulgò dicitur; quos suo more exprimunt Scholastici, cum ajunt rem aliquid in se habere Formaliter, Eminenter, Virtualiter. Scilicet, cui aliqua Perfectio inest simpliciter secundum propriam suam definitionem, illi ea inesse dicitur *Formaliter*; quasi dicas inesse secundum intrinsicam suam formam sive essentiam: quo modo intellectui humano inest v. c. facultas judicandi, aut discurrendi. Quod si Perfectio quædam, prout existit in hoc vel isto subjecto, adjunctam habeat aliquam imperfectionem, quæ tamen eadem, remotâ omnis imperfectionis notâ, gradu ac modo longè eminentiori, in alia re continetur, dicitur ea ab hac re contineri *Eminenter* (quamvis non eodem modo omnes hæc explicant): quo sensu v. c. Intellectus Divinus intellectum humanum in se continet. Deniquè, quæcunque Perfectio ab alio quo produci potest, etsi fortè nec formaliter nec eminenter in eo contineatur, dicitur in illo esse *Virtualiter*; quia scilicet virtute istius causæ actuari potest: atque ita v. c. Pictor perfectiones picturæ suæ, Architectus perfectiones domûs à se fabricatæ, in se continet. Quæ si

IV.  
*Triplex modus continendi Perfectionis, Deo applicatur.*



transferantur ad Deum, atque ejus omnimodam Perfectionem, sic paucis statuendum est. I. Quæ Perfectiones simpliciter & absolutè tales sunt, neque quicquam imperfectionis habent admixtum, eæ quoque simpliciter secundum definitionem suam, sive formaliter, Deo tribuendæ sunt. Sic Deus formaliter est *Æternus*, *Simplex*, *Intelligens*, *Volens*, &c. II. Quæcunque prædicata notant Perfectionem aliquam limitatam & secundum quid, ea, in quantum separatis imperfectionibus manent aliquid perfectionis, eminenter in Deo locum habent, quatenus, præcisâ omni imperfectione, gradu ac modo excellentissimo, ei tantum tribuuntur. Ita Deo competit v. c. *Ubi*, *Quando*, *Intellectus*, *Voluntas*, &c. rerum creaturarum; quatenus ab eis removetur omnis dependentia, finitudo, successio, divisio, mutabilitas, &c. III. Denique, quæcunque Perfectiones secundum quid ab omni adhærente imperfectione ita ut concipi possint *ἁπλοῦς* separari nequeunt, eæ duntaxat in Deo contineri dicuntur virtualiter, tanquam in causâ primâ, quæ eas uti sunt in creaturis extra se potest producere. Atque hoc modo in Deo sunt v. c. *Visus*, *Loquela*, *Motus*, *Figura*, & quælibet alia rerum corporearum attributa.

## V.

*Perfectiones  
divinas co-  
gnosci, non  
ex Ideâ in-  
natæ intui-  
tu, sed ex  
creaturarum  
contempla-  
tione, pro-  
batur.*

Ex quibus liquet, hos modos, quibus Deus Perfectiones quasvis possidere concipitur, relationem involvere ad perfectiones rerum creaturarum, ex quarum contemplatione Dei perfectiones cogitare discimus. Rident, sat scio, albis dentibus hanc omnem philosophationem hodierni quidam magistri, qui, explosis istis, scilicet! nugis, jam dudum se reperisse sibi imaginantur viam longè magis compendiosam, ad Infinitas Dei Perfectiones secundum sese cognoscendas, absque creaturarum ope, ex solo intuitu Entis infinitè perfecti ideæ, quam se mente sua circumgestare innatam jactitant claram & distinctam. Verum *μεγαλορρηματία* ista vel id abundè refellit, quod nihil illi attributorum Divinorum ex ista idea hætenus deprompserint, quod non jam olim de Deo demonstrarunt alii, qui ex creaturarum contemplatione occasiones sumpserunt philosophandi de primis entis Perfectionibus. Quin utinam illi, qui à trita via hic recesserunt, ideæ istius figmento non ita corrupissent plerarumque Divinarum perfectionum conceptus, ut, nisi tandem licen-  
tia:

tæ fiat finis, brevi Deus aliquis orbi hæcenus ignotus sit introducendus! Absit, quod ominantur prudentiores! Neque ominari immeritò, docebunt errores quos isti committunt circa plurimas perfectiones divinas, suis locis inferiùs notandi: uti quoque plenius de hac entis infiniti clara idea agendum erit, cum Incomprehensibilitatem sumus tractaturi. Nobis religio est, etiam hoc loco quicquam recedere ab ista methodo, quâ hæcenus ad Divinarum perfectionum conceptum ex creaturarum perpensione ascenderunt viri maximi. Atque illas in hisce, tanquam in speculo, relucere, nemo, nisi Atheisimo nimium velificans, negaverit. Ut nesciam, quid sibi velint, qui Attributorum Divinorum notitiam ex creaturarum consideratione hauriri neque posse, neque debere, hodiè contendunt. Aliaprofectò mens Regio Vati, cui hæc *enarrabant gloriam Dei fortis, ac magnificum per universam terram nomen*. Alia item Apostolo, qui ex *his minuat æternam Divinitatem & potentiam intelligi*, inculcat; Deumque beneficiis suis se *con amaretur* reliquisse, testatur. Cui veritati ratio quoque suffragatur & experientia; quippe quæ docet, nullas Dei perfectiones à nobis cognosci, quarum sciendarum occasio aliqua non sit facta ex contemplatione creaturarum: quod petenti per inductionem demonstrari posset facili negotio. Quin, ex illis Dei attributis quæ lumine naturæ cognoscimus, ea concipimus facilius & magis positivè, quorum præ aliis vestigium in creaturis exstat expressum. Nihil est, quod obijciunt, inter Perfectiones Infinitas Creatoris & finitas creaturæ nullam dari proportionem, atque idcò notitiam harum non posse suppeditare conceptum illarum. Hoc, inquam, nihil est, quandoquidem conceptum hunc analogicum duntaxat esse fatemur, non directè repræsentantem Perfectiones Dei prout in Deo sunt, sed tantum pro modulo, quo earum capax est mens creata: at verò ad talem conceptum fundandum, intercedente rationis usu, sufficiunt ipsæ etiam creaturarum rerum imperfectiones; cum nuspiam magis verum sit quam hic illud Logicorum, oppositorum eandem esse scientiam.

Ut hæc capiantur melius, non est hoc loco prætereunda via, quâ ex perceptis entium finitorum attributis, ad cognitionem perfectionum in infinito Deo assurgimus. Triplex illa est,

VI.  
*Quo pacto  
huic negotio*

*subjerviat  
triplex via,  
Causalita-  
tis, Nega-  
tionis, &  
Eminentiae.*

Dionysio Areopagitæ vulgò adscripta: puta, Causalitatis, Negationis, & Eminentiae. Nimirum, quoties rem creatam tanquam dependentem cogito, nihil in ea invenio perfectionis, quin statim per viam Causalitatis mens ducatur ad cogitationem, eandem saltem perfectiones contineri in causa ejusdem prima; cum perspicuum sit, nihile esse in effectu, quod idem non fuerit in causa. Inquirens porro, quo modo id sit in Creatore, quod suo modo video inesse creaturæ, mox percipio, in creatura id multas annexas habere imperfectiones, quæ cum Creatoris independentia prorsus pugnant: succurrit ergò via Negationis, id omne removens, ob quod tale prædicatum enti Independenti tribui propriè non poterat. Verum cum ex imperfectionis remotione sequatur oppositæ perfectionis positio, mox conatur mens nostra viâ Eminentiae eo usque amplificare istius perfectionis conceptum, donec aliquid cogitare videatur Deo dignum, quodque ei absque independentiæ præjudicio tribui queat. Observo (ut totum exemplo illustrem) durare creaturam: inde colligo per viam Causalitatis, etiam ergò durare Creatorem. Sed duratio creaturæ dependens est, finita, contingens: non ita, cogito per viam Negationis, durat independentens Creator. Quâ ergò ratione durat hic? Modo infinites perfectiore, quam qui à me concipi potest, addit via Eminentiae. Undè tandem perfectionis Divinæ, quæ Æternitas appellatur, resultat, qualis in mentem nostram cadit, conceptus. Ita mutuas sibi operas præstant hæ viæ; quas quò quis accuratius in suis de Dei perfectione cogitationibus formandis observat, eò puriores de ipsa habebit notiones.

## VII.

*Perfectionis  
Infinitatem  
Deo, &  
quidem soli,  
convenire,  
demonstratur.*

Cæterum, explicatâ sic omnimodâ Dei Perfectione, id superest, ut accedamus ad ejus demonstrationem, quæ facili negotio ex ipsius Independentia adstruitur hoc modo. Quod est independentens, tam perfectum est quam esse potest. Quod tam perfectum est, quam esse potest, infinitè perfectum est. Ergò, quod independentens est, infinitè perfectum est. Propositio certa est: nam quodcunque non tam perfectum est quam esse potest, id à perfectione possibili, quæ sibi addi potest, dependet; atque hæcenus non absolutè independentens est. Assumptio indubia existit; quoniam ideo aliquid finitè perfectum est, quia  
aliquid

aliquid majus ei addi potest : at quod tam perfectum est quam esse potest, ei quicquam addi nequit; necessarium itaque, quod tam perfectum est quam esse potest, id infinite perfectum est. Manet ergo Deum, quia Independens est, esse infinite perfectum : quod demonstrandum erat. Iterum : Omnis omnino perfectio possibilis vel dependens est, vel independens. Quæcunque independens est perfectio, ea, hoc ipso quia esse potest, etiam est : mera enim possibilitas, existentiam actualem excludens, est pura denominatio facta à potentia rei, in cujus sinu latet, & à qua produci potest; quod ipsum independentiæ è diametro adversatur. Jam verò si omnis independens perfectio ipso actu existat, non alibi quærenda erit quam in independenti essentia : ea enim quæ dependens est independentis perfectionis non est capax; cum nullum attributum excedat conditionem sui subjecti. Possidet ergo ens independens ipso facto in sese omnes omnino perfectiones independentes. Quod ad dependentes attinet, eæ vel ab aliquo dependenti dependent, vel ab independenti. Si hoc, ergo à Deo ipso, qui solus est independens, dependent; consequenter is eandem, tanquam causa, virtualiter in se continet. Sed & omnes illæ perfectiones quæ à dependenti principio pendent, per subordinationem rerum dependentium finitam (de qua antè) tandem reducendæ sunt ad omnis rei dependentis principium primum independens, quod ipse Deus est. Continet ergo Deus, quia Independens est, ipso facto omnes omnino perfectiones posibles; atque hoc ipso existit infinite perfectus: quod demonstrandum erat. Plura addere nihil attinet. Uti nec opus est, multis probare, hanc perfectionis infinitatem soli Deo convenire; nec ullam dari posse creaturam perfectissimam, de quo latè Scholastici. Constat de utroque abundè ex eo, quod demonstratum jam sit, Perfectionis Infinitatem indissolubilem nexum habere cum Independentia Divina; cujus nullam speciem alteri esse communicabilem, retrò docuimus.

Ex iis quæ de Perfectione Dei infinita hætenus disputavimus, hanc nobis figamus regulam, Nihil unquam præcipitanter de Deo esse effutendum, sed diligenter prius & seriò attendendum, num quod de Deo affirmamus aut negamus, infinita

VIII.  
*Perfectionis  
Divine  
ritè cogita-*

*et in studio  
pietatis uti-  
litas.*

tâ perfectione sit satis dignum, ne unquam deprehendamus in eam injurii. At non id sufficit. Etiam in illam injurii erimus, nisi quasvis rerum creatarum perfectiones finitas semper cogitemus ac dependentes; rivulos scilicet, uti deductos ex immenso divinarum perfectionum oceano, sic in eundem reducidos. Ita qui sublimare assuevit suas de perfectionibus rerum finitarum cogitationes, semper & ubique is Creatorem inveniet manifestatum in creaturis; quarum quot notat perfectiones, tot observat reflexos ab iis Divinæ bonitatis ac perfectionis radios. Hac dulci meditatione verè nobis

*Præsentem referet qualibet herba Deum;*

&c, secundum illud Senecæ, *Deus erit id quod videmus, & id quod non videmus.* Hac vilescet vel totius Universi imperfecta quævis perfectio; quæ sine Deo nulla, absque qua etiam Deus Perfectissimus.

*O hominum ReCTOR! quam latè nominis exit  
Fama Tui; & terras Virtus Tua sparsa per omnes  
In montis etiam loquitur de Numine rebus!*

## EXERCITATIO SEPTIMA,

D E

# DEO NECESSARIO EXISTENTE.

S U M M A R I U M.

- I. Inter Dei Attributa primum est Necessitas existendi.
- II. Eam perfectionem, Contingentiam imperfectionem esse, ostenditur.
- III. Deum esse Necessarium

*rium in existendo, demonstratur. IV. An pariter sit Necessarius in operando, & quo sensu, explicatur. V. Præter Deum nil esse in existendo absolute Necessarium, probatur.*



Ta quoque in compendio quasi, *Qualis* sit Deus, pro ingenioli nostri captu & modulo vidimus, Ens videlicet *Infinite perfectum*. Verum cum hic conceptus tantum sit confusa notio alicujus aggregati, puta collectionis cujuspiam quarumcunque quæ dari aut concipi possunt perfectionum, ad distinctionem hujus rei

I.  
*Inter Dei  
Attributa  
primum est  
Necessitas  
existendi.*

notitiam acquirendam omnino pertinet, lustrare sigillatim saltem aliquas earum Perfectionum, quæ pro modo concipiendi nostro istum immensæ perfectionis cumulum faciunt. Dico, saltem aliquas earum nobis esse considerandas: omnes enim atque singulas enumerare, nedum explicare, sphaeram finiti & creati intellectus excedit longissimè, ac solius infinitæ mentis, se incomprehensibilem comprehendentis, prærogativa est, sic uti suo loco videbimus. Inter eas quarum notitiam naturali rationis lumine manifestare nobis voluit Creator, numerandam primo loco censemus jure merito EXISTENDI NECESSITATEM. Ut enim primum cujuslibet rei prædicatum, quod in omnia alia ejusdem perfectione supponitur atque includitur, est ipsa Existentia, absque qua unumquodque nihil eorum est quæ est; ita ex cæteris Dei Attributis illa præmittenda videntur, quæ præ aliis Existentiam ejus proximè comitantur & sequuntur: qualis sine dubio est Existentiæ Necessitas. Atque hac ratione moti quidam hanc existendi Necessitatem numerarunt, non inter Attributa, sed inter illa prædicata, quæ sunt Essentiæ Divinæ constitutiva: ast perperam, quandoquidem ea ex Independentia Divina quasi à priori potest demonstrari; uti ex dicendis intellegitur.

Est verò Necessitas existendi in Deo, tale Ejus Attributum cujus ratione naturæ Divinæ absolute repugnat non-existere. Nimirum Necessitati opposita est Contingentia; quæ notat, rem

II.  
*Eam perfe-  
ctionem,*

H

existen-

*Contingen-  
tiam imper-  
fectionem  
esse, osten-  
ditur.*

existentem citra contradictionem posse non-esse. Ut quidem Contingens omne existat, atque hactenus sit aliquid reale (si enim existentiam non haberet, non jam Contingens propriè foret, sed merum duntaxat possibile, & non-ens) interim tamen eo usque sit affine nihilo, ut saltem repugnantiam non dicat ad id, ut nihil fieri possit. Hinc, quemadmodum citra controversiam perfectius est esse, quam non-esse (quum rectè notent Metaphysici, unumquamque rem tantum habere bonitatis & perfectionis, quantum habet entitatis) ita etiam procul dubio perfectius est non posse non-esse, quam posse non-esse: quo quid enim ab imperfecto longius distat, quòque illi magis ad-versatur, eo etiam perfectius id est habendum. Quum itaque *n* Aliquid perfectius sit *n* Nihilo, perfectior quoque erit ille existendi modus quo res quæpiam sic est Aliquid, ut Nihil esse planè non possit, quam si sic sit Aliquid; ut fieri interim possit purum Nihil; cujus uti nullæ sunt affectiones, ita nec ullæ perfectiones.

III.  
*Deum esse  
Necessari-  
um in exi-  
stendo, de-  
monstratur.*

Quibus perceptis, dubium esse nequit, quin Deus, propter Infinitatem suæ Perfectionis, sit Ens necessariò existens. Quum enim existendi Necessitatem esse simplicem & absolutam perfectionem, jam demonstraverimus, utique ex ipsis terminis & per se nota est hæc propositio, *Quod existit infinite perfectum, existit necessariò*: quoniam prædicatum hujus enunciationis in subiecto ejusdem includitur & continetur. Quod enim infinitas perfectiones possidet, ei unam earum, puta existendi Necessitatem, negari non posse, res ipsa clamat. Non istis tamen probamus methodum Recentiorum, concludentium necessariam Dei existentiam (non, uti nos, ex supposita vel demonstrata jam antè simplici ejusdem existentia) sed ex idea quæpiam entis infinite perfecti, quam se in sua mente reperire ajunt: de qua re vide *Exercu. II. §. VI.* Cæterum, etiam cum Dei Independentia immediatè coheret ejusdem in existendo Necessitas. Etenim omne Contingens secundum se indifferens est ad hoc, ut vel sit, vel non-sit. Si namque in se ipso aliquid contineret, quod faceret potius id esse, quam non-esse, utique, eo ipso quod aliquam talem existendi rationem in sua essentia contineret, Necessarium, non Contingens, foret. Itaque quando

Con-



Contingens existit, semper extra illud aliquid quæri potest, quod causa sit, cujus influxu res, ex sese indifferens ad utrumlibet, determinata sit ad existendum potius, quam non-existendum. Quam dependentiam à cujuscunque causæ influxu quum Independentia Divina prorsus respuat, respuit quoque eadem omnem pariter Contingentiam, dependentiam istiusmodi involventem: consequenter, oppositam illi Necessitatem existendi eam includere, manifestum est. Nec tantum omnimoda Dei Independentia & Perfectio Necessitatem ejusdem in existendo inferunt, sed & eam arguit efficaciter ipsa rerum creaturarum Contingentia. Ut enim plurimæ res contingentes nobis passim obviæ sunt, ita in earum causam, per quam existant, inquirere licet; cum, uti demonstratum, eæ ex se & per se existere non possint. Illam si contingentem assignaveris, & ipsa, per jam dicta, suam iterum habebit causam. Hæc si rursus detur contingens, eadem denuo redibit quæstio: quæ cum in infinitum (propter causarum subordinatarum seriem necessariò finitam, de qua antè) repeti non possit; utique oportet illud, in quo tanquam in prima rerum contingentium causa subsistimus, esse Necessarium in existendo. Ast hoc ipsum demonstrandum fuit.

Juvat hoc loco tribus verbis expedire huic materiæ affinem controversiam à variis variè definitam, An Deus, uti est ens absolute Necessarium in existendo, ita pariter absolute necessarius sit in operando? Facilis erit dubii solutio, si observemus, duobus modis à nobis spectari posse Dei actionem; vel absolute, prout se habet à parte Dei & secundum sese, nullâ habitâ ratione objectorum, effectorum, aut modi operandi; vel relative, quatenus includit respectum ad has vel istas res hac vel ista ratione existentes, in quibus actionem Dei terminari concipimus. Isto modo si consideretur, jubet Dei Simplicitas (infra demonstranda) credere, actionem Dei ab essentia ejus actuosa nullâ parte distinguui. Quapropter etiam tantum abest ut essentia sine actione hic esse queat, ut quæ essentiæ, eadem quoque actioni cum essentia identificatæ conveniat absolutissima Necessitas. At verò, si spectemus Dei actionem cum relatione ad has aut istas creaturas, hoc vel istoc modo ab actuosa Dei essentia fluentes, certum est, eam omnem esse non-necessariam, sed indifferenter liberam, sive

## I V.

*An pariter  
Deus Necessarius sit in  
operando,  
& quo sensu  
expli-  
catur.*

objectum actionis spectes, sive modum operandi. Talis enim agendi modus cum sit perfectissimus, ut maximè etiam congruus tum Independentiæ Creatoris, tum dependentiæ omnimodæ creaturarum, enti perfectissimo & independenti planè tribuendus est. Atque ita verissimum illud tritum Theologorum: *Actiones Dei ad extra sunt indifferenter libere*. Sed de hisce alibi plura.

V.

*Præter Deum nil esse in existendo absolute Necessarium, probatur.*

Nunc ex dictis abundè intelligitur, absolutam talem existendi Necessitatem solius Dei attributum esse, nec ulli communicabile. Nam ut Ipsi uni convenit Independentia, absque qua Necessitas ejuscemodi non consistit, ita omne quod existit præter Deum ab influxu ipsius procreante & conservante pendet; qui cum sit, ut dixi, in egressu suo indifferenter liber, etiam res quæcunque ab eo procedentes suâ naturâ indifferentes erunt ad existendum vel non existendum; id est, erunt prorsus contingentes. Convenit quidem suo modo quibusdam creaturis aliqua Necessitas, vel potius Immutabilitas quædam, ratione quorundam prædicatorum; sed non ideo illa prædicata absolute & secundum se necessariò existunt, cum quod sint, id vel fluat indè, quod aliquod aliud prædicatum Deus in rebus posuerit, quod illa sibi habet connexa tanquam non realiter à se distincta; quo sensu substantia aliqua necessariò est divisibilis, figurabilis, &c. posito Deum eam creasse extensam: vel fluit à lege quæpiam naturæ, quam Deus rebus tulit, ut secundum eam innato impetu agant; quo pacto Sol necessariò movetur: vel deniquè indè procedit, quod Deus certitudinem connexionis fecerit inter duas res, ut si earum una sit, altera sequatur; quâ ratione, positâ corporis humani totali indispositione, necesse est animam à corpore separari. Itaque cum omnis ejusmodi Necessitatis ratio derivanda veniat ab aliquo extrinseco, puta à Deo, qui tales naturas creare, tales leges ferre, talem antecedentis cum suo consequente concatenationem facere, liberrimè voluit, cum, si placuisset, eorum omnium nihil planè ponere potuisset, facile liquet, ab omnibus istis qualiscunque Necessitatibus speciebus toto cœlo distare illam, quam Deo asseruimus, absolutam existendi Necessitatem. Verùm de istis quoque uberius dicendi alibi locus est.

## EXERCITATIO OCTAVA,

D E

## DEO ÆTERNO.

## S U M M A R I U M.

- I. *Inter Necessitatem existendi & Æternitatem quæ sit respectu durationis distinctio.* II. *Æternitatis à Tempore, ratione carentiæ terminorum, discrimen.* III. *Altera Æternitatis, ratione carentiæ successionis, à Tempore differentia.* VI. *Dei Æternitatem esse interminabilem, docetur.* V. *Eandem esse successionis expertem, demonstratur.* VI. *Neque obstat ejus cum nostris temporibus successivis coexistentia.* VII. *Relatio ad temporalia spatia, seu vera, seu possibilia, quæ juvet nostrum Æternitatis conceptum?* VIII. *Æternitatem esse Dei solius prærogativam, ex demonstratis conficitur.*



IC, Deum existere necessariò, ostensum satis. Porro videndum, an, & quâ ratione existat *Alicubi & Aliquando?* Nam etiam hæc duo Attributa cum ipsa rei cujusvis Existentiâ immediatè cohærere videntur. Istud nobis explicabit conceptus *Immensitatis*; hoc, ÆTERNITATIS. Quibusdam quidem Æternitas confunditur cum ipsa Necessitate existendi, quasi hæc idem sonent; rectius tamen ista duo distinguuntur. Non quidem nego, quemadmodum contingens, hoc ipso quod tale est, est temporarium, ita quoque omne absolutè Necessarium in existendo,

I.  
Inter Necessitatem existendi & Æternitatem quæ sit respectu durationis distinctio.

do, ideo quod tale est, esse Æternum: attamen conceptus Necessariæ existentiae competit Deo simpliciter tanquam existenti; Æternitas verò eidem potius tribuitur tanquam duranti, seu permanenti in ista sua existentia. Indè & hæc à quibusdam definitur, Infinita Dei duratio. Non est autem quod quem in hoc negotio offendat vox *durationis*, quasi hîc minus accurata sit. Id enim uti lubens concedo, si peream præcisè indigetur continuatio alicujus existentiae successivæ, qualis est nostra duratio, per lapsum annorum, mensium, &c. ita ex adverso nil video, ob quod vocem hanc fugere hîc debeamus, si abstractè sumatur, eaque simpliciter intelligatur qualiscunque rei in existendo perseverantia. Hoc sensu, quatenus *non durare* opponitur *non cessare in existendo*, non capio, quomodo quis durationem de Deo negare possit, qui non oppositum ejus, defectum puta in existendo, de eodem absurdissimè affirmet.

## II.

*Æternitatem  
à Tempore,  
ratione car-  
rentiæ ter-  
minorum,  
discrimen.*

Describunt alii Æternitatem negativè, Durationem principio, fine, & successione carentem; alii positivè, durationem quæ tota & perfectæ sit simul. Nobis non displicet nota omnibus ac celebris definitio Boëtii, utramque explicationem miscentis, quando ait: *Æternitas est interminabilis vita tota simul & perfectæ possessio*. Minutatim eam non jam excutiam. Nostro instituto faciet satis duo in ea observasse, per quæ Æternitas à spatiis nostris temporalibus longissimè distat. Primò, *Interminabilis* dicitur Æternitas; non tantum quia re ipsâ terminos quoscunque, sive principium & finem, excludit ac removet, sed & quia illos omnes conceptibiles sic excedit, ut ne quidem terminos istiusmodi pati possit, quatenus ens Æternum sic Sempiternum est, ut nunquam cogitari queat posse aliquando vel non-fuisse, vel non-fore. Aliter res temporariæ, quæ, quia suos ortus habent & interitus, duratione gaudent certis terminis circumscriptâ. Dantur quidem earum quædam (v. c. animæ rationales) quarum existentia nunquam deficiet; quo sensu Ævum, tempori strictè dicto oppositum, à quibusdam eis adscribitur: attamen eæ, quamvis durationem de factò terminatam non habeant, habent saltem citra contradictionem terminabilem, in quantum ex natura rei præsens durationis momentum cum futura adeo nullam connexionem habet, ut

ut quovis temporis articulo finem ei imponere, si velit, possit Deus. Quin, si paulò diligentius hæc introspicere lubet, deprehendemus, etiã has ipsas res in suo esse permanere duratione quovis existentia momento ipso factò terminatâ; quatenus per fluxum instabilis suæ existentia, ac labentem quandam sui innovationem, perpetuò amittunt illum durationis articulum, quem modò possidebant; acquirunt alium, quo modò carebant: atque ita, tametsi duratio earundem in infinitum sit producenda, ea tamen quam actu habent, vel habuerunt unquam, præsentî momento in quo jam versantur ipso factò finitur, dum quas adhuc in futuro habituræ sunt durationis partes, necdum eis in præsentî gaudent.

Sed & secundò, durationem suam omnem *simul totam ac perfectam possidet* quod est Æternum: id est, durat invariabilî quâdam existentia perseveratione, absque ulla minutorum sibi succedentium lapsu. Aliter res temporaria, quæ singulis momentis novum quasi incipiunt esse; quippe quæ tempori subiectæ, quemadmodum ipsa tempora, cum temporibus mutantur, nec unquam omnem illam habent durationem, quam habere possunt. Sequitur hîc quod elapsum est præteritum præsens, sed non nisi istud fuerit elapsum; hoc excipiet mox futurum, at non nisi eo ipso evanescat præsens. Neque, quia res olim fuit, ideo jam est; aut non, quia jam est, aliquanto post erit; dum hic fuisse esse potest sine esse, esse stare potest sine fore. Quod verò absolutâ Æternitate gaudet, dum perfectissimâ exilit duratione, gaudet necessariò eâ tantâ, quantâ gaudere potest: quæ durationis perfectio cum in nullum succellivum cadat, utique ab Æternitate secundum se penitus removendum omne fuisse, omne fore, quod non sit ipsum esse. Ut per Æternitatem res durans ponatur in momento eodem & perpetuo, quod quasi semper stat, partibus caret, in fluxum nunquam progreditur, in se ipso manet: undè quidam non ineleganter eam dixerunt, *Nunc semper stans*. Scitè hanc temporis strictè dicti ab Æternitate propriè sumpta differentiam (cujus accurata observatio unica ad Æternitatem ritè concipendam via est) paucis expressit magnus Augustinus, cujus hæc verba ex Enarrat. in Psalm. ci. huc transcribere non pigebit. Ita

III.  
*Altera Æternitatis, ratione carentia successione, à Tempore differentia.*

com-

commentatur Doctor in verba hæc Vatis : *In generatione generationum anni tui.* „Sed qui anni tui ? Qui , nisi qui non venient ut transeant ? Qui , nisi qui non ideo veniunt ut non sint ? Omnis enim dies in hoc tempore ideo venit , ut non sit , omnis hora , omnis mensis , omnis annus : nihil horum stat , antequam veniat erit , cum venerit non erit. Illi ergò anni tui æterni , anni tui qui non mutantur , in generatione generationum erunt .... Non enim aliud anni Dei , & aliud ipse Deus ; sed anni Dei , Æternitas Dei est. Æternitas ipsa Dei substantia est , quæ nihil habet mutabile. Ibi nihil est præteritum , quasi jam non sit ; nihil est futurum , quasi nondum sit. Sed non est ibi nisi *est* ; non est ibi *fuit* , & *erit* : quia & quod fuit , jam non *est* ; & quod erit , non *dum est* : sed quicquid ibi est , non nisi *est*.

IV.  
*Æternitatem Dei esse  
interminabilem , do-  
cetur.*

Verùm ad horum demonstrationem accedamus propius. Prius quidem nostræ descriptionis membrum , quo Æternitatem asseruimus *Interminabilem* , admisit haud gravatim quotquot unquam veram Deitatem agnoverunt sapientiores. Certè ipsis fanioribus Ethnicis ridicula visa fuit , quam quidam eorum vates tradiderunt , *Θεογονία*. *Dei semper fuerunt , nati nunquam sunt , æterni sunt futuri* , alibi Cicero. Nec difficile est adstruere , quod clamant quævis Dei prædicata ; adeo se undique rationes offerunt , sive Independentiam ejus spectes , sive Perfectionis infinitatem , sive existendi Necessitatem. Hanc si consideres , prohibet ea à Deo omnes existentiae limites ; dum ab ipso removet omne non-existere. Etenim ubi est aliqua durationis extremitas , ibidem ipsum non-existere habet locum. Itaque ubi non-existere locum habere nequit , ibi nec ullum existentiae principium ; quod quicquid agnoscit , aliquando non fuit : neque ejusdem finis ; quem quicquid expectat , aliquando non erit. Præterea , cum omnis duratio æstimanda sit ex natura entium quæ durare dicuntur , ea nulla Enti perfectissimo nisi perfectissima est adscribenda. Jam verò unamquamque durationem eo magis perfectam esse quo minus angustis terminis est circumscripta , per se claret. Ea ergò demùm Deo summè perfecto erit digna , quæ nullo modo limitata. Deniquè , aut jam semper Deus extitit , aut ne nunc quidem existit. Si enim aliquando non-

non-fuerit, undè obsecro esse cœpit? Num ex sese? At quod non est, non magis se actuare potest, quam idem esse simul potest & non-esse. An ab alio vis productum? Verùm sictotam tollis Independentiam; hoc est, omnem re ipsâ Deitatem. Pari ratione, si nunc Deus est, semper quoque erit: cum nec intrinsecâ aliquâ indigentiâ deficiat Perfectissimum; nec extrinsecâ vi aboleatur Independentens. Ng addam, causas subordinatas finitæ durationis reduci debere vel ad seriem aliquam earundem in qua primam invenire non detur (quam implicare, antè ostendimus); vel ad aliquod earum principium primum, quod existit semper sine principio, &, quia sine principio, etiam sine fine.

Sed desino probare quod minùs controversum. Potiùs ad alteram nostræ descriptionis partem progredior, quâ *Simultaneam* esse Æternitatis durationem, diximus. Eam impugnare laborant Socini & Vorstii sectatores; qui, dum nimie sibi plaudunt in quibusdam quas hic urgent argutiis, re ipsâ parùm se subtiles probant in hoc negotio, quando non attendunt, quam malè cohæreat, eandem durationem affirmare infinitam, & tamen per temporum intervalla successivè fluentem: quo nihil dici potest crassius atque ineptius. Id enim manifestissimum est, omnem successivam durationem partibus constare; ob ipsum enim partium sibi succedentium lapsum successiva est & dicitur. Ergò rogare lubet, quas illi infinitæ assignare velis partes, quos annos, quæ secula; aut saltem (ne de vocibus laboremus) quas spatii temporalis partes illis æquipollentes? Vis eas finitas? At sic clarè negas totius durationis infinitatem. An verò infinitas? Sume ergò v. c. secula infinita. At jam quos annos statues? Etiam, opinor, infinitos. Fuerit itaque infinitorum annorum numerus numero infinitorum seculorum vel major, vel æqualis, vel minor. Majorem non dixeris, nisi infinitum negaveris numerum seculorum: quandoquidem infinitum omne majus suâ naturâ respuit. Æqualem si volueris, vel etiam minorem, omnibus, quantum à ratione recedas, palam facies nimium. Nullius ergò successionis capax est quæ infinita existit duratio. His adde, permanentiam rei successivam, quemadmodum includit fuisse & fore, ita quoque involvere non-esse. Quod enim fuit, quâ tale haud amplius est; quod erit, nondum est; quod

V.  
Eandem esse  
successionis  
expertem,  
demonstratur.



jam est, mox non erit. Successionem ergò talem comitatur contingentia: hanc verò planè nullam patitur omnimoda Necessitas existendi, de Deo jam demonstrata. Quid? quod duratio per temporum articulos fluens nunquam sit infinitè perfectà, adeoque nec perfectionis Divinæ infinitati congrua. Quæ enim duratio est in continuo fluxu, dum singulis momentis sumit incrementa, nunquam dici potest esse tanta, quanta esse potest: quæ tamen infinitatis proprietas est. Confer quæ hanc in rem jam attulimus, §. III. Deniquè, quodcunque continuè est actuandum id Independentens esse nequit, neque cadit in rem cujus ipsa intrinseca natura est pura puta Independentia. Hæc in extrema semper est actualitate, cum quantum in unoquoque ente est potentia, tantundem in eo sit dependentia. Actuandum autem esse de novo omne successivum, patet, quia quod succedet, nondum est, sed, quatenus aliquando erit, nunc in præsentì tantum esse potest. Liquet ergò ex dictis, cui durationi nec origo dedit initium, nec casus dabit finem, eidem neque tempora dare incrementum. Liquet, quæ momentaneum & quotidie orientem nobis fingit Deum alium & eundem, Æternitatem, quam verbis ponit, re ipsà tollere opinionem. Quod demonstrandum erat.

VI.  
Neque ob-  
stat ejus cum  
nostris tem-  
poribus suc-  
cessivis co-  
existèntia.

Ita facilè hujus veritatis certitudo ostenditur: at non ideo perindè claram ejus habemus per omnia ideam. Sic enim fermè nobiscum comparatum est, ut quæ à finitis creaturarum perfectionibus recedunt nimium, vix ea nisi negativè & conceptu satis confuso concipiamus. Quapropter ne quicquam curabimus prævaricationem inferentium, simultaneam Dei durationem haud esse, eo quod sic neutiquam nostræ successivæ durationi coexistere posset, nisi hoc ipso admittatur, nostrum præsens, præteritum, & futurum existere simul, quippe quæ eidem indivisæ Æternitati pariter coexistant. Verum reddere isti debebant necessitatis rationem, ob quam nequeant coexistere sibi duæ res disparis naturæ, & quarum altera se aliò habeat modo ac altera. Speciem haberet objectio, si assereremus, Deo convenire verum aliquod præteritum & futurum, quod cum præsentì ejusdem sit idem. Sequeretur enim tunc, uti Dei præteritum coincidit cum præsentì, ita quoque nostrum præteritum, quod

quod coëxistit præterito divino, coincidere debere cum nostro præsentī. Atqui cum jam dudum omnes istas temporum differentias, quæ in nostra duratione dominantur, penitus ab Æternitate Dei secluserimus, nulla est in hac illatione sequela. Habent interim hic recentiores Doctores nodum, quem claris suis & distinctis ideis solvent nunquam: imprimis quando ipsi pari argumentandi modo tam vehementer in Immenſitatis divinæ negotio urgent, non posse Deum per essentiam suam rebus extensis præsentem esse, nisi hæc ipsa pariter sit extensa. An verò statuent quoque, non posse coëxistere Deum nostræ durationi successivæ, nisi pariter ipse successivè duret? Sumant Viri acetum, & istis se expediant, si possint! Si nequeant, videant tandem famosæ suæ illationis imbecillitatem.

Etſi verò Divina duratio adæo nostræ sit dispar, atque co-existētia illius cum hac nihil planè faciat ad ipsam Æternitatis secundum se consideratæ naturam (nihil enim illa existit imperfectior ante conditum hoc universum, cum nulla ei co-existit, vel adexistit potius, creatura) non tamen nego, quin, ad juvandum nostrum qualemcunque de Æternitate conceptum, utile sit eam cogitare per relationem aliquam ad spatia rerum temporalium: ita ut mens nostra sibi facilius illam repræsentet, nec incommodè, tanquam durationem excedentem omnia spatia, non tantum quibus creaturæ aliquæ durarent, sed & quibus durare quodocunque vel potuerunt, vel poterunt. In quo repræsentamine includitur successio (absque qua durationem aliquam concipere difficile nobis est, si non impossibile) at non à parte Æternitatis, sed à parte rerum quæ Æternitati adexistere saltem potuisse concipiuntur. Ita, si velim mihi repræsentare Deum secundum Æternitatem suam ante mundi primordia existentem, non potero distinctius, quam si concepero, tam perfectam esse Divinam durationem, ut si qualiscunque conceptibilis duratio successiva ante initium hujus Universi extitisset, illi simultaneâ suâ Æternitate coëxistisset Deus. Et hæc sunt spatia illa imaginaria temporalia, tanto hodiè conatu impugnata à multis; qui procul dubio metuant, ne sint satis subtiles, nisi ipsum quoque nihil sibi sumant impugnandum.

An verò mallet illis realia spatia temporalia substituere? Sic

VII.  
*Relatio ad  
temporalia  
spatia, seu  
vera, seu  
possibilia,  
qui juxta  
nostrum Æ-  
ternitatis  
conceptum.*

VIII.  
*Æternita-*

videtur;

*tem Solius  
Dei præro-  
gativam ef-  
fe, ex de-  
monstratis  
conficitur.*

videtur: ne scilicet mundum, qui iis nullos extensionis suæ fines habet, duratione non satis amplum nobis imaginemur. Saltem hinc non multum abesse mihi videntur, qui possibilem mundi Æternitatem asserunt difficulter refelli posse; tantum si statuatur Æternitas mundi alterius generis, quam illa Dei. Verum, cujuscunque generis statuatur mundi duratio, semper saltem successiva est; sic prorsus exigente ejusdem in existendo contingentia. Talem autem Æternam esse non posse, §. v. firmissimè jam demonstravimus. Alia, quæ ipsa Creaturæ notio suppeditat, argumenta hinc transeo, infra forsan urgenda suo loco.

*Exemptus nostri sic solus ab ordine secli,  
Temporibus leges qui das & Tibi tempora leges  
Nulla dabunt, nullam ponunt cui tempora metam.  
Nostra quidem assiduo labuntur tempora motu,  
Dum nova sunt semper, tacitisque senescimus annis:  
Tu verò Tibi semper eras, Tibi semper es idem;  
Cui mors exactos veniens non suppuat annos.  
Ut semel ergò Tibi sapiamus, lubrica vite  
Tu nos fata doce, & quo se mora porrigat ævi;  
Ut mens juncta Deo studiis det tempora sacris!*

## EXERCITATIO NONA,

D E

## DEO IMMENSO.

## S U M M A R I U M.

- I. Immensitas Divina quæ; & quâ ratione ab Omnipræsentia distincta? II. Spatia Imaginaria quid; & quis eorum in Immensitate Dei concipienda usus?

III. Car-

III. *Cartesianorum de Omnipræsentia Dei philosophatio; & quædam in eam animæ diversiones.* IV. *Immensitatis Divinæ contra Vorstium & Socinianos demonstratio.* V. *Omnipræsentia Divinæ essentialis contra Cartesianos assertio.* VI. *Difficultatibus quibusdam horum obviam itur.* VII. *Immensitatem, non Ubiquitatem strictè dictam, solius Dei esse, probatur.*



Idimus, quo modo se habeat Deus in ordine ad nostrum tempus per Æternitatem; videndum quæ se habeat Numen in ordine ad spatia localia per IMMENSITATEM. Quæ duo cum valde sint analogæ, quanto rectius perspecta fuerit natura illius, tanto facilius erit meditatio hujus. Eâ notamus supereminentiam illam di-

I.  
*Immensitas  
Divina  
quæ; & quâ  
ratione ab  
Omnipræ-  
sentia di-  
stineta?*

vinæ perfectionis, quæ per essentiam suam, modo tamen perfectissimo ac sibi convenienti, existit Deus ubicunque corpus est, vel esse potest. Observandum imprimis, cum dixi existere Deum, ubi existit, modo perfectissimo ac sibi convenienti, ante omnia me velle hic remotissimum habere conceptum cujuscunque propriè dictæ diffusionis aut extensionis; quæ, uti partes involvit, ita naturæ spirituali atque independenti planè repugnat. *Magnus* Deus noster est, *sed sine quantitate*, atque *ideo Immensus*: uti scitè alibi Augustinus. Absit ergò, ut hoc loco Deum nobis imaginemur per modum subtilissimi corporis cuncta pervadentis; quod quidam non sine calumnia objiciunt. Dico, non sine calumnia: nam jam olim vetus schola asseruit, Deum ità totum esse in toto mundo, ut totus pariter sit in singulis ejus partibus; i. e. ut mundo divisibili ac partes habenti ipse coexistat quidem, verum absque partibus sui, ac modo prorsus indivisibili. Sed & illud attendendum est in antecessum, non tantum hic notari *Omnipræsentiam* vel *Ubiquitatem* strictè dictam, quatenus dicit relationem veræ præsentia ad corpora de facto existentia. Latius patet Immensitatis conceptus; quippe qui, & Ubiquitatem includit, & insuper ponit, etiam istic

existere Deum, ubi quidem jam corpus non est, attamen per potentiam Divinam esse saltem potest. In quantum ergo vera præsentia, per actualement creaturæ cujuspiam coexistentialitatem, ad Immenstatem per sese nihil pertinet, facile intelligimus, quomodo Immenstatem extiterit Deus, nullo etiam existente corpore; & quâ ratione ipse sibi dicatur esse locus. Hoc sensu rectè ille:

*Dic ubi tunc esset, cum prater eum nihil esset?*

*Tunc, ubi nunc; in se: sibi metum sufficit ipse.*

II.  
Spatia Imaginaria  
quid; &  
quis eorum  
in Immenstatem  
Dei  
conciipienda  
usus?

Interim, uti antè dixi Aeternitatem, etsi nihil nostri temporis involvit, rectè tamen, ad conceptum nostrum juvandum, cogitari cum respectu ad nostra tempora; ita quoque Immenstatem per modum alicujus præsentialitatis, etsi eam actualement non necessariò includat, non incommodè nobis representatur. Ita enim Deus absolutissimè existit in se ipso, etiam illic ubi nunc nullum existit corpus, ut tamen, si istic, ubi nunc nihil est, per potentiam divinam poneretur aliquod corpus, illi etiam essentia sua Deus intimè coexistere præsens: quemadmodum scilicet ante hujus Universi productionem in se ipso sic extitit ubi nunc est mundus, ut, simulac hic existere coepit, mox ei verè coextiterit præsentialissimus Deus. Et hic est conceptus ille, nimium à quibusdam hodiè vexatus, qui vulgò venit nomine Spatorum Imaginariorum: quem quomodo citra contradictionem rejicere possint, quotquot mundi nostri extensionem non agnoscunt infinitam, haud equidem video. Certè, admissis aliquibus Universi hujus limitibus, evidentissimum est, extra illos, ubicunque demum fuerint, per inexhaustam Dei vim corpus aliquod poni posse. Etiam per mox demonstranda patebit, non posse tale corpus poni, nisi Deus vi infinitæ suæ perfectionis eidem coexistat præsens. At dum ista cogito, eo ipso & spatia imaginaria, id est, corpora quædam possibilis, & pariter Immenstatem divinam per relationem aliquam ad ista spatia, concipio. Quapropter, cum hujus conceptus fundamenta sint, & mundi finitudo ab una parte, & exsuperantia tum perfectissimæ Infinitatis tum etiam incomprehensæ Potentiæ divinæ ab altera parte, mirum mihi semper visum fuit, res adeo claras & distinctas capere non posse, vel potius non velle, illos qui  
tanto

tanto conatu hæc spatia exagitant, tanquam nescio quæ absurditatum portenta & chimæras. Sed hinc illæ lacrymæ! Vorticofum suum mundum re verâ infinitum ponere necessum habent; atque inde nullum corpori possibili relinquunt extra eum locum: imò (si quod res est dicere liceat) dum duo immensa repugnant, quam mundo affingunt infinitatem Immensitatis, Deo re ipsâ derogant.

Leve enim fuisset de Imaginariis Spatiis controversiam movere, nisi quoque in discrimen adduceretur vera Dei *Πανχρυσία*, & essentialis Omnipræsentia. Socino ac Vorstio jam olim placuit, Deum essentiâ suâ omni mundo præsentem esse, negare. Riserunt quoque alii præsentiam Dei *atomicam* & *atopicam*, ut ipsi ajunt. Impia verò hæc semper visa fuerunt, & in Dei Immensitatem injuria quam maximè, rectum sentientibus; qui omnibus illis semper opposuerê illud vulgare,

*Enter, Præsent, Deus hic & ubique, Potenter.*

Istorum tamen insignia qui sibi aptent hodiè deesse minimè videntur. Non meis hæc dicam verbis, sed Cl. Vogelsangii, qui ità hac de re alibi disserit. „Cartesius è tripode veluti pronunciat, *Deum ubique non existere: sed ubique tamen esse ratione sua potentia*. Quia scilicet *in Deo nulla sit extensio substantia, sed potentia duntaxat, &c.* Ita visum Cartesio fuit sive vaticinari, sive incassum furere. Quem tota armenta sequuntur. Itaque nuperi quidam Theologi, etiam Reformatae communionis, abnegatâ Numinis Immensitate, prorsus ad gustum pravitatis, hæreticæ Vorstianorum, Socinianorum, & Remonstrantium, definiunt, *Omnipræsentiam Dei nihil aliud esse, quam extrinsecam denominationem, natam ex operatione Dei, qua in omnibus rebus corporeis operatur, & propter illam operationem iis præsens esse dicitur*. Vel, *Omnipræsentiam Dei nihil aliud esse, quam efficacissimam Dei voluntatem, qua omnia sustentat & gubernat, explicandam ab operatione, qua extra se aliud producit*. Immensitatem essentia, quâ Deus excedat mundi terminos, quaque citra dimensionum interstitia limitetve Deus ante mundum conditum incola fui fuerit, uti neque potuerit ullum creaturam producere, cui non adforet intimè per essentiam suam sine ulla mutatione fui, planè tollunt: atque fundamentum „Omni-

### III.

*Cartesiano-  
rum de  
Omnipræ-  
sentia Dei  
philosophat-  
io, & quæ-  
dam in eam  
animadver-  
siones.*

„Omnipræsentia Divina nullum aliud faciunt, quam Dei potentiam, sive potentissimam illius operationem. Neve tamen „Deum toto mundo veluti proscribere videantur, commenti „sunt, essentiam Dei, prout nempe *creaturis illa præsens intelligi „debet*, nihil aliud esse, quam *cogitationem Dei secundam, cæli „terraque creatricem, conservatricem, atque gubernatricem*. Hæc ille Theologus eruditissimus. Egregiam verò laudem referre merentur, qui in gratiam unius Cartesii sic hoc loco philosophari amant, ut nihil tandem reliquum faciant, quo rectum sententium sententia à Socini ac Vorstii errore distinguatur. Neque enim putandum est, quod quidam velint, omnem hanc litteram meram tandem logomachiam fore, quum iidem auctores passim etiam largiri videantur, Deum quoque per essentiam creaturis suis esse præsentem. Nam ignota non sunt artificia, quibus quod mentem aperit apertius mox interpretatione in speciem meliori palliatur. Si nihil sibi cum istorum sententia commune velint Cartesii affectæ, candidè repudium mittant crudis istiusmodi phrasibus. Id quamdiu non palam faciunt, nunquam credendum, viros sapientes in re ardua lusus velle facere in mera voce, recedendo citra ullam necessitatem à communi loquendi modo, mox tamen ad eum revertendo. Laudandus mihi hic est candor saltem Poireti; cujus viri vix unquam sine præfatione honoris mentionem faciunt Novatores. Is clariùs ista mysteria nobis revelat, cum dicit rotundo ore, Cartesium, Wittichium, Forgræum, aliosque Cartesianos, quando dixerunt, Deum omnibus rebus præsentem esse *essentia, essentialiter, ratione essentie, difficultatum quarundam causa, usos fuisse vocibus deceptricibus*, ex usu ordinario *non significantibus verum*, sed *ipsi verborum significationi reluctantibus*. Et quidem dum hoc pronunciat, Cartesium rectè philosophantem se sequi profitetur. *Cogit. Rat. Pag. 31.* Ecquis istas logomachias habeat? Ecquis fidem adhibeat amplius viris utentibus, *difficultatum quarundam causa, vocibus deceptricibus, nec significantibus verum*? Cavendum profectò iis, qui *vocibus deceptricibus* decipi hæc nolunt; nec credendum facilè Viris qui quando *difficultatibus* urgentur, confugere non metuunt ad *voces non significantes verum!*

## IV.

Immensitas

Nos candor delectat: atque ideo simpliciter probamus communem



munem orthodoxorum sententiam, quæ semper contra quosvis definit, summum Numen ratione Immensitatis existere & in omni mundo, & extra eundem in infinitum; nec tantum ἐπερχομένης, sive quoad operationes & potentiam, sed & ἐν τῷ κόσμῳ, per ipsam essentiam suam & naturam. Id nullo negotio demonstratur adversus eos, qui Deo ratione essentiae aliquod saltem Ubi tribuunt; quales qui cum Socino faciunt Vorstius aliique. Definiunt hi, cælum cælorum locum esse in quo sic habitet Divina natura, ut inde per providam tantum operationem suis adsit creaturis: haud aliter ac Sol essentia suâ in medio cæli positus vim suam inde per omnem mundum diffundit; vel, uti Rex in palatio habitans curam suam per omnes regni partes extendit. Sed quam nihil Deo dignum istiusmodi comprehendant cogitata, facili illi intelligunt, qui, quis Deus sit, satis tantum attendunt. Certè quodcunque ab aliquo limitatur quomodocunque, etiam ratione sui Ubi, id pendet ab eo quod in causa existit, cur ipsum sit limitatum, & tanto Ubi, non majori, quasi circumscriptum. Si quod ergo Ubi Independenti Dei essentiae tribuendum est, id ei assignandum, quod sit omnino independens; nullisque adeò arctatum limitibus, nullis definitum terminis. Tale verò neque cæli ambitu, neque ipsius mundi finitis spatiis comprehenditur, sed omnia illa excedit infinities. Porro, cum in Ens perfectissimum nil cadat nisi quod perfectio sit, etiam in Ubi, quod essentiae Divinae tribuitur, erit perfectio. Quæcunque autem Deo tribuitur perfectio, ea prorsus infinita est. Ubi ergo essentiae Divinae congruum tantum id est, quod est infinitum & ἀπείρον. Quid? quod in locis hisce inferioribus Deum saltem actuali operatione & providentiæ præsentem largiantur adversarii. Ubi autem operatur Deus, ibidem essentia suâ existit præsens. Nam, ut agere supponit esse, ita hic agere supponit hic esse; cum nihil agere in distans sit certissimum. Stringit efficaciter imprimis hæc ratio, si Deum non nisi immediatè per essentiam operari posse cogitemus. Nec enim ejusdem patitur Independentia, ut causarum intermediarum, seu instrumentorum, ad effectum sit in effectu quopiam producendo ministerio. Talem tamen alienæ opis indigum Deum necesse habent statuere, qui essen-

*tis Divinae  
contra Vor-  
stium & So-  
cinianos de-  
monstratio.*

tiam cœlo includunt, operari tamen in terris, locis tantum à cœlo remotis, largiuntur. Postremum, dicant isti, obsecrò, quid respondendum censeant, si rogavero, num totum cœlum essentia Divina occupet, num aliquam tantum ejus inhabitet partem? Si modicam cœli regionem Deo habitaculum assignent, nisi ei affixum velint Numen, cogitare licebit expatiari ipsum subindè, ac mutare domicilium. Si toti cœlo præsentem malint Dei essentiam, scire lubet, cur istis tantum mundi spatiis sese incluserit ille, cui omnis hæc ingens machina quasi nihilum est? Quæve tandem istæ sint causæ, quibus tantum Numen à cæteris mundi regionibus secludatur? Nimis crassum est ac insipidum, quod hic metuunt, ne Deo malè sita vicinia rerum foedidatur. Sordida profectò cogitatio, nec responsione digna! Cum enim ne creatus quidem spiritus sordibus leprosi corporis inquinetur, quanto minus essentia supereminentissimæ quicquam labis affricabit corporum terrestrium immundities? Quidque ineptius cogitari queat nescio, quam longâ locorum intercapedine sibi consulere necesse habere Numen, ne puritati immineat periculum à rebus, quas ipsum liberrimè condidit atque conservat. Hæc firmiores cum non sint quæ pro opposita sententia aliæ militant rationes, frustra iis refellendis immorarer. Demonstrasse sufficit, essentia Divinæ aut nullum esse tribuendum Ubi; aut, si quod tribuendum sit, aliud tribui non posse, quam quod nullis limitibus existit terminatum; adeoque nec cœlo, nec mundo, nec ulli finito spatio affixum. Quod demonstrandum erat.

V.  
*Omni præ-  
 sentia Di-  
 vine essen-  
 tialis contra  
 Cartesianos  
 assertio.*

Id cum satis capiant Cartesiani, Socinianis longè hîc subtilius se philosophaturos autumant, si Deum ratione essentia plene nullibi esse pronuntiaverint. Ita quod cœlum hi volunt esse Dei habitaculum, ne quidem isti ei faciunt reliquum. Quid sibi ista velint, quis satis intelligat? Quid monstri alant, quove tandem sint abitura? forsân dies dabit. Profectò, nisi planam viam struere cupiant ad Atheismum, haud gravatim, si vel leviter attendere velint, intelligere possunt qui sic instituunt, quam re ipsâ vel nihil dicant, vel sibi aptè contradicant. Etenim quando Deum ratione operationis ubique, ratione essentia nullibi esse asserunt, dicant mihi, quo sensu contendant Deum

rati-

ratione operationum esse alicubi? Voluntne operationem illam, cujus intuitu Deus alicubi esse dicitur, considerandam esse ratione Dei ipsius operantis; an potius ratione rei creatæ, in quam operatio illa terminatur? Posteriori modo sumta Dei operatio non Deus est, aut aliquod Dei attributum, sed re verâ existit ipsissima creaturæ essentia, à Deo operante producta & fluens. Hoc itaque sensu non Deus erit alicubi, sed Dei duntaxat effectum; quod cum essentiam habeat & attributa ab essentia & attributis Dei prorsus distincta, nequit id Ubi quod creaturæ competit Creatori tribui, nisi impropriissimè, per aliquam tantum denominationem, quæ Rhetoribus dicitur metonymia; in qua latebras quærere haud decet virum sapientem. Quod si operationem Dei spectandam velint à parte Dei ipsius operantis, eam ab essentia Dei distinctam non esse, largiri coguntur quotquot tuerentur simplicitatem divinam. Ex quo conficitur, eadem quæ operationi, essentiæ quoque, tribuenda esse prædicata. Ut, quoties essentiæ denegatur, quod operationibus Divinis conceditur, Ubi, mirifica sint ænigmata, quorum mysteria fortè clarius evolvant isti Auctores temporibus magis opportunis, quibus necesse non habebunt, *difficultatibus quarundam causâ*, mundo imponere *vocibus decepticibus*, & *non significantiis verum*; ut audivimus loquentem Poretum. Verbo, cum Deus operetur modo simplicissimo & maximè independenti, id est, per essentiam, absque evidenti contradictione dici nequit, Deum alicubi operari, nec tamen ibi, ubi operatur, per essentiam existere. Imprimis nequeunt non nobiscum sentire, quos aliqua tangit Mysteriorum Fidei cura. Credimus, quotquot confitemur Dominum Jesum, secundam S. S. Trinitatis personam naturam humanam assumisse in plenitudine temporis. Hanc assumptionem factam esse per unionem substantialem, uno ore docent orthodoxi: nam *per solam operationem Divina nature in humanam unionem hanc esse factam*, Nestorianum est, & à tota veteri Ecclesia condemnatum. Sic alicubi Doctissimus Walæus. Id verò certum est, rem aliquam cum altera uniri non posse alio modò, quam quo illi coexistit præsens: quandoquidem omnis unio præsentiam supponit. Eligendum ergò alterutrum: vel unionem duarum naturarum in

Christo Mediatore factam esse, non ratione essentiae, sed per denominationem duntaxat externam ab operationibus desumptam; vel naturam divinam cum humana unitam esse verè secundum essentiam. Prius hæreticum pronunciat Fidei analogia. Posterius infert, etiam ergò Divinam naturam verè secundum essentiam saltem Alicubi esse. Hoc si detur, facilè probatur eo quo diximus modo Immensa; idque iisdem prorsus rationibus, quibus articulo præcedenti contra Vorstium ac Socinum fuimus usi.

VI.  
Difficultati-  
bus quibus-  
dam horum  
obviatur.

Manifestat quidem Deus suam nobis præsentiam per opera creationis & providentiæ; at non ideo Immensitas ipsa ejus Providentia est: quæ duo, hætenus distincta habita, inaudita absurditate confundunt Novatores. Etenim, seposito omni providentiæ conceptu, ex ipsa perfectissima Dei natura per se fluit, eam existere ubicunque corpus esse potest. Quapropter merito Theologi & Philosophi faniore ab omni ævo Immensitatem ad attributa Dei retulerunt, Providentiam ad operationes ejusdem: quæ duæ notiones quantum distent, nemo nisi ignorantissimus ignorare potest. Deus Immensus, fateor, omnia sustentat & gubernat: verum, neque ipsâ Immensitate suâ, formaliter & propriè loquendo, omnia sustentat; neque ideo Immensus existit, quia res sustentat. Omnem enim operationis transeuntis conceptum notio Immensitatis antecedit, quatenus, ut jam dixi, operari supponit esse; non contrà: ergò & ubique operari supponit ubique esse; non contrà. Nec metuentum, ne, quando essentiam Dei rebus extensis coexistere asserimus, aliquid ideo extensionis eidem tribuamus: quæ cogitatio, etsi mirè placeat Recentioribus, re verà non minus ridicula est, quam istud nugamentum, quod essentiam Dei sordidis locis adesse non vult, ne ipsa sordescat. Verum de hisce, aliisque quæ similia huc quandoque adferuntur, toti pluribus egimus *Exercitar. de Nullitate Spirituum*: quapropter istic dicta hic repetere nil necesse est. Conferantur quoque quæ adduximus, *Exercitar. de Cogitatione, quæ sit ipsa Mens humana*. Concludo ex hætenus disputatis, non posse phrasi magis convenienti exprimi excellentiam Divinæ Immensitatis, quam quâ usi sunt antiquiores, quando Deum celebrarunt *Ἐννέσιμον, Περσικέσιμον,*

ἡς ὧν, Ὑπερέσμιον, Ὑπερεσμίον: quasi dicas, *In-mundanum, Circa-mundanum, Supra-mundanum, Supra-caelestem.*

Cæterum, Immenfitatem unius Dei prærogativam esse, liquet eo quod actualem ratione & Alicubi includat infinitatem. At nulla cujuscunque infinitatis species locum habere potest in essentia finita; qualem esse illam omnem, quæ à Deo distincta & dependens est, jam antè ostendimus. Specialius, nùm corpus quodpiam, v. c. hic noster Mundus, sit aut esse possit mole infinitum, adeoque suo quoque modo Immensum? excussimus; ac negativam compluribus rationibus evidenter demonstravimus, *Exercitatione de Infinito*: quapropter nunc ista transimus. Longè tamen alia quæstio est, an res creata possit esse Ubique, vel Omnipræsens? Explicui jam suprà, §. 1. quâ ratione, & vi vocum, & significationis usu, plurimum distent à se vocabula Immenfitatis & Ubiquitatis. Id quicumque attendit, nemo, nisi quæstionem de nomine facere malit, negare potest, Universum nostrum ipso facto existere Ubique; id est, occupare omne spatium de facto corpore repletum, etsi non occupet omne omninò spatium possibile: quod postremum uti propriè est Immenfitatis, non strictè dictæ Ubiquitatis, ita ad præsentem quæstionem nihil pertinet. Verùm jam dudum Immenfitas præfixam brevitatis nostræ mensuram excurrit. At sic jussit rei momentum satis grave. Nunc de aliis; & brevius!

VII.  
*Immenfitatem, non Ubiquitatem strictè dictam, solius Dei esse, probatur.*

## EXERCITATIO DECIMA.

D E

## D E O U N O.

## S U M M A R I U M.

- I. *Unitas Dei demonstratur, & illi soli vindicatur.*  
 II. *SS. Trinitatis mysterium ex rationis naturalis lumine non innotescere, ostenditur.*

I.  
*Unitas Dei  
 demonstra-  
 tur, & illi  
 soli vindica-  
 tur.*



Um *ms* *Alicubi & Aliquando* pari passu ambulat  
 UNITAS; quum & hæc & ista sint communis-  
 simæ quædam affectiones, quæ enti simpliciter  
 quâ enti spectato conveniunt. Multa quæ re  
 ipsâ plura sunt, Unum quid esse quandoque  
 dicuntur, quatenus ea in ejusdem generis vel  
 speciei conceptu convenire apta sunt. Verum  
 uti hæc Unitas est ficta tantum per mentis cogitationem, sic re  
 ipsâ id demum modo quodam excellenti ac perfectissimo est  
 Unum, quod ita suâ naturâ existit Singulare, ut absolutè nihil  
 planè admittat sibi simile, quodque sit ejusdem communis essen-  
 tiæ secum. Et hanc talem, quando eam Deo tribuimus, in-  
 nuimus Unitatem. Verbo, nec esse, nec esse posse, plures Deos,  
 contendimus. Cujus veritatis tanta existit evidentia, ut nec  
 ipsi gentiles in suis sibi Deastris satisfacere potuerint, nisi redu-  
 ctâ tandem omni illâ pluralitate ad Unum aliquem, qui pariter  
 sit *θεὸς πᾶσι καὶ ἑαυτῷ*. Sed more nostro philosophemur  
 potius! Vel solam cogitemus divinæ perfectionis, antè demon-  
 stratam, infinitatem. Hanc absolutam istiusmodi Unitatem se-  
 cum trahere dico. Demonstro. Sunt, si ita vis, duo pluresve  
 Dii, Jupiter v. c. & Mars. Neutrum horum Deum agnoveris,  
 nisi pariter agnoveris utrumque infinitè perfectum, id est,

re verâ possidentem id ipsum quodcunque modo qualicunque perfectionis nomine venire potest. Nunc scire lubet, an eadem numero perfectiones Jupiter contineat, quas ipsas continet Mars; nec ne? Si neges, utique Jovem infinitè perfectum non agnoscis; cum extra eum dentur aliæ adhuc infinitæ perfectiones in Marte, quibus ipsis non gaudet Jupiter: at verò extra infinitum nihil dari potest aut concipi. Necesse ergo erit, ut Jupiter, si Deus sit, in se omnes omninò contineat perfectiones, adeoque & eas quæ Martis sunt. At quì poterit? nisi, vel cum Marte fuerit idem numero Numen; adeoque non duo: vel, nisi Martis perfectiones Jupiter, tanquam causa, in se complectatur, easque Marti communicaverit. Ast hoc ipso Martis destruitur planè, uti Independentia, ita Deitas. Ex quibus apparet, non minus contradictoria esse duo entia infinitè perfectà, quam sunt duæ extensiones undiquaque infinitæ. Ut enim nemo has sibi imaginatus fuerit, nisi eas se mutuo penetrare, id est, vel utramque re ipsa unam, vel neutram earum veram esse extensionem, cogitaverit; sic nemo mente apprehenderit duo entia infinitè perfectà, nisi alterius perfectiones sub altero contineri, atque ita illa revera vel duo non esse, vel infinitè perfectà non esse, conceperit. Quamobrem duo pluresve Dii nec sunt, nec esse possunt: adeo *πλὴνότης* est re ipsa quædam veræ Deitatis abnegatio, & crassa *ἀθεΐα*. Atque hoc argumentum unum nobis instar omnium erit: nam, quæ alii urgente desumpta ab unitate mundi, ab harmonia universi, à plurium Deorum pûgna, ab omnipotentia eorundem, aliaque istis similia, nostro iudicio, vel tantum probant, uti loquuntur, ad hominem; vel illustrationes potius quædam sunt & allegorix, quam solidæ probationes; vel talia denique, quorum vis omnis à nostra hac demonstratione pendet. Porro, Deo soli attributum hoc esse proprium, docet dependens & finitarum quarumvis ab infinito principio pendentium natura; quæ uti augmentum sui in infinitum pati potest, ita nihil continet, quod adversetur productioni alterius similis sibi naturæ individui. Quumque mundo æquè hæc possint applicari, ac cuivis alteri rei creatæ, patet, errare eos, qui plurium mundorum possibilitatem negantes, eo ipso absolutam Unitatem non solius Dei privilegium



vilegium esse, profitentur. Etiam liquet ex traditis, quid respondendum ad quaestionem à quibusdam motam: Num Deus sit thema universale, num singulare? Hoc nimirum eligendum est. Cui non obstat Personarum in eadem essentia pluralitas: non enim ea notat, naturam Divinam pluribus essentis numero distinctis esse communem; quod ad universalem naturam requiritur.

II.  
*SS. Trinitatis mysterium ex rationis naturalis lumine non innotescere, ostenditur.*

Dum plurium in Deo Personarum mentionem facio, huc pertinere videtur, ut verbo tangam controversiam, An, uti essentiae Divinae Unitas, ita Personarum in ea Trinitas ex naturali rationis lumine sciri queat? Affirmantes frustra mihi hic esse videntur. In ipsa saltem Dei Optimi Maximi essentia, quatenus naturam innotescit, nihil occurrit, quod talem Personarum pluralitatem inferat. Contemplatio quoque creaturarum ea tantum de Deo nobis cognoscenda praebet, quae essentiae qua tali, omnibusque adeo Personis in communi, conveniunt. Qui dissentiunt, hac palmariam utuntur ratione. Constat, ajunt, Deum se intelligere; at hoc ipso generat imaginem sibi simillimam; quae Filius est. Pergunt: Deus Pater amat Filium; at per hunc actum amandi ab utroque procedit Spiritus Sanctus. Non desunt, scio, viri etiam Doctissimi, quibus haud displicent hae Scholasticorum subtilitates. Sed qui stare queant, non video. Certè intelligere se & amare actus Dei sunt, non personales, sed essentiales; atque ideo à parte Dei nec ab essentia Divina simplicissima, nec inter se distinguuntur, uti suo modo distinguuntur personae. Quin, quia essentiales sunt, si quid ab intelligente & amante distinctum producerent; non personam producerent, sed essentiam. Et si vel maximè personam, cum unaquaque persona tum se tum alias intelligat ac velit, personarum processus hoc pacto multiplicari posset in infinitum. Alii saltem inestimabile arcanum per similia de creatis quibusdam rebus adducta conantur illustrare. Ast neque horum institutum probandum videtur: tanta enim per omnia elucet disparitas, ut extraneis non sine ludibrii periculo istiusmodi picturae proponantur. Adferunt alii, ut ostendant hoc dogma lumine naturae gentilibus fuisse familiare, priscos eorum Philosophos ac Poetas. Verum de multorum testimoniorum fide vix constat

constat satis : plerorumque etiam verba trahuntur in sensum à mente auctorum manifestò diversum : ad summum nil produnt, nisi reliquias quasdam valdè corruptas doctrinæ Hebræorum, ut ipsis illis scriptoribus non satis intellectas, ita tam rudi modo expressas, ut hæreticis deinceps occasionem præbuerint blasphemandi. Constat equidem non aliundè natas esse hæreses tum Tritheitarum tum Antitrinitariorum, quam quòd naturæ lumine rimari voluerint venerabile mysterium, quod humili tantum pietate mirari debuissent. Hujus temeritatis infelicitissimo successu admoneri nos decet, ut de hisce aliundè non sciscitemur quam ex verbo Dei; utque fidei docilitate, non rationis acumine, in hanc meditationem incumbere curæ sit.

## EXERCITATIO UNDECIMA,

DE

## DEO SIMPLICI.

## SUMMARIVM.

- I. *Simplicitatis Divinæ notio quid inferat?* II. *Divinæ Simplitatis per varias rationes adstruclio.* III. *Difficultatum quarundam hic occurrentium amotio.* IV. *Divinæ Simplitatis persuasio quam multis modis utilis?* V. *Simplicitatem inter Dei, & quidem solius, Attributa esse numerandam.*



Nitatem cujusvis entis ejusdem sequitur Identitas; quatenus quod indivisum est in se, quia est indivisum in se, divisum est ab alio quovis. Undè conficitur, omne absolutè unum & idem etiam esse summè simplex. Quod enim compositum est, non tantum hoc unum, verum etiam aliud est, quod cum illo priori idem

I.  
*Simplicitatis Divinæ notio quid inferat?*

non est , sed ex cujus cum illo unione hoc qua compositum resultat. Merito itaque , postquam contemplati sumus Deum ceu Unum , meditationem nostram proximè convertimus ad cogitandum Eum tanquam SIMPLICEM. Hac notione notatam volumus quorumcunque quæ Divinæ essentiz tribuuntur prædicatorum cum ea ipsa perfectissimam quandam identitatem. Ut in Deo Essentia & Attributum , vel Attributum & Attributum , non sint (quemadmodum sæpè sunt in creatis) ἀλλο γὰρ ἀλλο ; sed quæcunque hìc intercedit diversitas solius duntaxat sit rationis , orta ex intellectus finiti imperfectione , quæ quod idem est tanquam tale non valet concipere , sed potius dissimilibus id sibi conceptibus repræsentat. Verbo , id contendimus , nil adeò realis discriminis inter ea quæ Deo essentialia sunt intercedere , ut quicquid hoc modo in Deo est sit ipsa ejus essentia ; per quam est quicquid est , citra ullam plurium verè distinctorum aggregationem. Quod acutè expressit alibi Augustinus , cum Deum simplicem esse asserit , *quoniam quod habet , hoc est*. Longè diversum sentiunt , qui volunt , per Attributa , quibus nobis concipitur Deus , intelligenda esse accidentia quadam seu qualitates realiter ab essentia cui tribuuntur distinctas. Contrà , rectè docent saniores , removendum esse penitus à Deo omnem omnino compositionis modum : ut non tantum Deus ex pluribus verè diversis coadunatus non sit ; verum nec cum alio à se distincto ad compositum cum eo constituendum concurrere possit.

## II.

*Divinæ  
Simplicitatis  
per varias  
rationes  
adstruendo.*

Prius hoc indubitabile facit summi Numinis & Independentia & Perfectionis infinitas. Profectò , quicquid compositum est ex pluribus , id quæ tale posterius est iis rebus ex quibus tanquam partibus componitur , atque ab iisdem tanquam naturâ prioribus dependet. Quin & pars altera compositi pendet ab altera , in quantum illa perfectionem hujus ex sese non habet , sed eam acceptam ferre debet unioni cum hac , additâ sibi & à se distinctâ. Verum omne quod modo qualicunque aliquam vel minimam dicit dependentiam , è diametro id Deitati adversari , jam dudum demonstravimus. Quapropter , vel Deus per omnia Deus , id est , ens Independentens , non est : vel Ipse habet id quod habet , aut potius est id omne quod est , planè in-

independentem; hoc est, citra ullam sui ex pluribus compositionem. Adeo ἀνάγκη τὸ πρῶτον καὶ ἀπαλυσάμενον εἶναι: ut rectè alibi in Epictetum ipse Simplicius. Et quis neget, perfectiorem esse essentiam, quæ sic per se ipsam existit perfectissima, ut nullis ad perfectionem suam consummandam indigeat accidentium appendicibus, quam est illa, quæ non sui, sed additarum qualitatuum beneficio, perfectiones possidet quas possidet. Si autem prius illud perfectius quid sonet quam hoc, utique non hic, sed ille, perfectiones possidendi modus Deo enti perfectissimo tribuendus erit. Et quæ at quales, obsecro, illæ erunt perfectiones essentia Divinae superaddita? Nunquid eas in se continebit essentia Dei? Si non: non etiam hæc erit infinitè perfecta; quare nec Divina. Si contineat: quid ergo attinget eas essentia per sese illas possidenti superaddere? Demum, quæ illa esse poterit ab essentia Divina realiter distincta perfectio? An finita erit; an infinita? dependens; an independens? creata; an increata? Si finita, dependens, creata, nil continet Deo dignum. Si infinita, independens, increata, & tamen entitatem habens ab essentia Dei reapse distinctam, qui non secundum rem plures statuatur Dii? non video. Quibus omnibus quandoquidem per adversariorum hypothèses exitus dari planè nequit, liquet, omninò esse concludendum, quod concludendum erat, Deum actum purissimum ac simplicissimum esse, nec ullo modo capacem attributorum ab essentia sua, aut ab invicem, realiter diversorum. Alit neque eadem Dei essentia ad instar partis cum alio in idem compositum coalescere potest: jam enim ostensum, in taliplurium rerum ad compositum propriè dictum constituendum concursu conspicuam esse mutuam quandam partium dependentiam, ac, ut ita loquar, perfectibilitatem; quatenus ipsa notio partis per se & suâ naturâ notione totius inferior est, dum defectum involvit per istam sui ad unum totum compositum constituendum ordinationem & habitudinem. Neque ergò ex partibus componi, neque pars ipsa esse, potest Deus.

Fatendum omninò, magnam esse in Divinorum Attributorum conceptu varietatem. Sed tantum in conceptu, sive, ut

III.  
Difficultas  
sum quarum-  
dam hic oc-  
mente

*currentium  
motio.*

mente, per distinctionem rationis ratiocinata; non à parte rei per diversitatem realem. Confer, quæ jam suprà hanc in rem diximus, *Exercit. v. §. III. IV. v.* Nec putandum Decretorum divinorum obstare tum pluralitatem, tum indifferentem libertatem; quasi clarum sit, talia cum una essentia, eaque maxime necessaria, non posse esse eadem. Non enim qui sic arguunt satis *θεωρητικῶς* concipere rationem Divinæ Voluntatis, evincunt clarissimè quæ dicenda erunt infrà, ubi de Decretis Dei erit agendum. Solutum difficilius est, quod adserunt de Trium Personarum in eadem Essentia Divina subsistentia. Has ante mentis operam ab essentia & inter sese distinctos esse *τρεῖς ὑπάρξεις*; verè tamen unitas in eadem essentia, sic ut sint *τὰ ἐμῶστον*, docet nos Christiana fides. Haud diffiteor, me non clarè & distinctè capere, quo modo cum absoluta Simplicitate triplex talis subsistendi modus consistat: at neutiquam indè sequitur, hunc cum ista reverà consistere planè non posset. Nullus dubito, quin facilè ista concilianda nobis forent, si, & quid formaliter sint istæ Personalitates, & quâ ratione ab invicem & ab Essentia propriè distinguantur, & quo modo in eadem singulari Natura subsistant, intimè & satis evidenter haberemus perspectum. Nunc ea, quæ tantum captum nostrum excedunt, adducere Fidei arcana, ad apertam veritatem naturâ notam impugnandam, nimium est præposterum & intempestivum. Mihi sufficit, quâ Philosopho scire, Deum esse Simplicem, quia sic exigit divina perfectio; quâ Christiano credere, Deum esse personis Trinum, quia sic testatur exertim Dei verbum: si quæ in istis conciliandis occurrit difficultas, ingenii tenuitas, non alterutrius dogmatis falsitas, indè evincitur. Et sic in tantarum rerum meditatione meritò acquiescit modestia sapientis in certitudine veritatis utriusque agnitæ, non in evidentia alterius cum altera connexæ. Paria dicenda sunt de altero illo magno pietatis Mysterio, quo Deus Filius manifestatus est in carne, per sui cum hac unionem hypostaticam. Sed nos hæc Theologis relinquimus explicanda, quæ tantum naturæ sphaeram excedunt, ut fortè beati cœlites, quorū privilegium est Dominum Jesum videre sicuti est, illis ritè concipiendis soli existant pares.

Quum

Quum autem quæ antè de Dei Simplicitate demonstrata sunt, deducantur & fluant ex ipsa Divina natura, valdè perperam pulcherrima hæc doctrina quibusdam habetur subtilitas quæpiam Scholastica, absque necessitate inducta. Frigidum imprimis est, quod Apologistæ alibi, adulatorij Socinianis, eam *arenâ steriliorem* pronunciant. An verò arenâ sterilius dogma, citra quod Deo sua nequit esse salva Independentia, Perfectio, Unitas? Quid? quod Simplicitas hæc fundamentum sit immotum Divinæ Immutabilitatis: quæ, uti purioris Religiónis est palladium, ita caput existit præcipuum, à quo pendet bona pars Theologiæ inter nos & illos controversæ: ut minus mirum, eos niti tantopere rei hujus momentum extenuare. Et quæ cogitatio dulci consolatione & piâ reverentiâ fecundior esse queat, quam quæ Deum, quicum nobis res est, menti repræsentat esse, hinc quidem ipsam infinitam Sanctitatem, Justitiam, &c. indè verò ipsam infinitam Misericordiam, Bonitatem, Sapientiam, Potentiam, &c. Certè cui hæ, similesque quas notio Simplicитatis suppeditat, cogitationes arenâ steriliores sunt, ejus pectus esse oportet sterilis valdè affectûs erga supremum Numen. Deniquè, quis nisi hospes planè in hisce, ignoret, quanti usus sit in re Theologica novisse, An, & quo sensu, quicquid est in Deo sit ipse Deus? An de essentia & de se invicem prædicari possint Attributa, non in concreto tantum, sed & in abstracto? An nulla Attributa intendantur aut remittantur? Deo magis & minus sint essentialia? Alia aliis priora & posteriora? quæque iis affinia ex hoc dogmate de Simplicitate tum confirmanda sunt, tum illustranda.

Dubium quibusdam visum fuit, num inter Quid Attributa rectè numeretur Simplicitas? Frustrâ autem quidam negant. Quamvis enim largiamur lubentes, eam respicere omnes omnino Divinas perfectiones, quatenus earumdem notat intimam identitatem: non tamen pro modo concipiendi nostro Simplicitas est prima perfectionum Divinarum scaturigo; quippe quæ ipsa ex Independentia,\* & Infinitate perfectionis firmissimè, quasi à priori, potest demonstrari, ut jam docuimus. Cæterum, solum Deum absolutè simplicem, seu, ut loquuntur, actum purum esse, tum hoc quod dixi evincit; tum illud quo-

## IV.

*Divinæ  
Simplicitatis  
persuasio  
quam multis  
modis utilis?*

## V.

*Simplicitatem inter  
Dei, &  
quidem soli-  
lius, Attributa  
esse num-  
merandam.*

que , quod omnis quæ præter Deum existit essentia , ut limitata , ita dependens sit. Quapropter nil obstat , cur non ei semper arbitrio primi entis à quo pendet nova addi queat perfectio : quæ si addatur (quandoquidem à præexistente subiecto realiter distinguitur , idque sui accessu perficit) necessariò cum illa faciet compositum. Et sic dicat experientia , etiam creaturas omnium simplicissimas , quales procul dubio sunt Angeli & Animæ rationales , multa possidere attributa , quibus absolutè carere possent : adeoque & illas ex subiecto & accidentibus modisque esse compositas. Quamòbrem & nulla earum dici potest *Actus purus modificabilis* : quod mirificum quorundam hodiè de mente humana vaticinium est.

## EXERCITATIO DUODECIMA ,

DE

## DEO IMMUTABILI.

## SUMMARIUM.

- I. *Immutabilitas Deo adscripta ratione Essentiæ , Attributorum , & Operationum.*
- II. *Immutabilitatis Divinæ respectu Attributorum demonstratio.*
- III. *Deus solus , in rerum omnium mutationibus , Immutabilis.*

**I.**  
*Immutabi-*  
*litas Deo*  
*adscripta*  
*ratione Es-*  
*sentiæ , At-*  
*tributorum ,*



Implicitati cohæret IMMUTABILITAS ; quâin-  
 nuimus , naturæ Divinæ repugnare , ut , ejus  
 aliquo remanente , illi aliquid quo antè caruit  
 de novo accedat , vel etiam quicquam quod  
 antè habuit decedat : sic quidem , ut qui se-  
 mel est , is idem semper maneat nullâ sui parte  
 alius



alius quam olim aut fuit aut erit. Tribus considerandi modis quibusdam spectatur hæc Immutabilitas : tum ratione Essentiæ Divinæ, tum ratione Proprietatum, tum etiam ratione Operationum. At censent alii, non nisi Attributorum & Operationum respectu Deo Immutabilitatem tribui debere. Non quod Essentiam Dei hi velint mutabilem ; sed quod perfectionem, quam illi Immutabilitatem Essentiæ vocant, malint hi vocare Necessitatem existendi : nam, ajunt, ipsa essentia, ut aliarum rerum, ita Dei, quemadmodum in indivisibili consistit, sic nullam variationem ratione sui potest subire. Per annihilationem quædam essentiæ interire possunt, verum cum nullum tali casu relinquatur mutationis subjectum, etiam totalis rei interitus non ; nisi satis improprie, mutatio dicenda est. Unde concludunt, sicuti id, cujus essentia ipsa destrui potest ut non amplius sit, rectius dicitur contingens quam mutabile ; ita ex adverso id, cujus essentia ipsa destrui non potest, rectius dici Necessarium quam Immutabile. Quæ ut accuratius dici largior, sic de nomine tamen contendere nolim. Cæterum de essentiæ Divinæ Immutabilitate, vel potius existendi Necessitate, dictum est, quantum sufficit, supra. Tantum de Immutabilitate Dei ratione Attributorum hic agemus. Quamvis perceptâ, quæ Immutabilitas operationum Deo tribuenda sit, facile intelligitur. Sed de hac aptius agemus infra, quando dicendum erit de Dei Intellectu & Voluntate.

Nullam verò essentiam Divinam subire, aut subire posse, mutationem ratione hujus vel illius attributi, evincunt pariter ista omnia quæ continuatâ serie de Deo hætenus demonstrata fuerunt. Quamvis certè mutabilitatem supponere plurium prædicatorum veram distinctionem, earundemque possibilem inter se unionem, aut ab invicem disunionem, per se evidens adeo est & certum, ut mutabile nemo, nisi compositum, aut saltem, ut ita dicam, componibile simul, fingat Numen. Verum Simplicem jam demonstravimus Deum ; qui quemadmodum essentiam habet, nil admittentem quod ipsa essentia non sit, ita nihil in eo concipi potest quod maneat altero recedente, nihil cui existenti alterum queat accedere. Et quis perfectissimum modo id Unum esse dixerit, quod usque eo in se divisum est,

ut

*et operationum.*

II.

*Immutabilitatis Divinæ respectu Attributorum demonstratio.*

ut aliquid ejus absque altero existere queat? Nec saltem ratione loci mutabile est quod Immensitate suâ existit ipso facto, ubicunque aliquid unquam existere potest. Nec temporibus ille variatur, qui secundum perfectissimam Æternitatem sic simultaneè durat, ut

*Tempus ab ævo*

*Ire jubens, stabilisque manens, det cunctis moveri.*

Non etiam patitur talem, qualis in omni mutatione includitur, hujus aut istius entis & non-entis successionem ipsa existendi Necessitas. Procul dubio qualis est rei cujuscumque essentia, talia existunt ejusdem attributa; quippe quæ ejus ex quo fluunt induunt naturam: quapropter qui in essentia, is in singulis quoque prædicatis essentialibus conspicuus erit idem necessitatis gradus. Et quæ quæso ratione mutabitur Numen infinitæ perfectionis? cui nihil addas, nihil detrahas, quin pariter agnoscas, tantas non esse in eo perfectionum divitias, quantæ rei verâ gaudentis infinitate; cujus natura omnem diminutionem & augmentum respuit. An verò quod accedet ad Deum, aut recedet ab eo, nil ad infinitas ejus perfectiones pertinere dices? At sic nihil quoque ad Deum ipsum pertinet. Erit nimirum quod Deo de novo adveniet vel creatum, vel increatum; vel dependens, vel independens; vel finitum, vel infinitum. Priora illa enti increato, independenti, infinito addi non posse, res ipsa clamat. Posteriora non magis Deo addi possunt, quam Deus addi potest sibi; dum præter Deum nil increatum, independens, infinitum existere, suis locis docuimus. Verbo, si subeat mutationem Deus, vel in parem transibit statum, vel in melius mutabitur, vel in deterius. Istud ridiculum est. Horum quicquid dixeris, imperfectionem id notat vel præteritam, vel præsentem, vel futuram. Denique, quid esse mutabile est aliud, quam esse in potentia ad perfectionem aliquam vel recipiendam vel amittendam? Quod quæ cadere queat in ens Independens, quis concipiat? Et quid tandem istud erit, quod Numen mutari faciat? Num quid extrinsecum? Non id finit primi entis Ascitas. Nec ipse se mutat propter aliquid in se; cum nihil in se quod secum pugnet contineat. Neque etiam mutat se propter aliquid extra se; cum

extra

extra se nihil habeat, quod non sit à se, ut dependens, ita nullo negotio, si velit, mutandum. Luce meridianâ hæc omnia sunt lucidiora. Quapropter hinc facessant, qui obfirmatâ mentis cæcitate Deum inducunt, qui in horas sit alius & idem. Sanctius de istis philosophatur Apostolus, quando tam magnificè de Deo testatur, apud eum ne quidem esse *πρωτὴς ἀποσχίασμα*. Scilicet ipse Sol in eclypsi sui luminis, si non mutationem, obumbrationem saltem patitur: at ne sic quidem Pater luminum, in quo ne minimum mutationis simulacrum.

Semotâ sic omni Mutabilitate à Deo, nil opus erit ire per singulas mutationum species, & docere, Deum esse *Incorruptibilem*, &c. ex dictis enim ista faciliè eruuntur. Etiam solius Dei hanc esse prærogativam, multâ jam demonstratione non indiget. Id evincit, tum hujus cum aliis Divinis perfectionibus concatenatio, jam ostensâ; tum quoque dependens & finita rerum creaturarum natura, quæ, quemadmodum probat illam omnem esse compositionis capacem, ita pariter evincit, eandem esse mutationi obnoxiam, casu quo quicquam perfectionis ei addere vel demere voluerit Deus. Nec si id fecerit, Immutabilitati ejus hoc quodammodo præjudicare credendum est: quum operis vicissitudo Opificis constantiæ nil detrahat. Mira hinc mihi visa fuit semper ista Cartesii philosophatio, & tanto ingenio parùm digna, quando alibi ex Immutabilitate Dei, eandem semper motûs quantitatem in universo hoc conservari concludit, ne quæ, si secus fiat, inconstantia indè in Numine arguatur. Ineptè profecto! Etiam judicio divini Vatis; cui alia planè mens, quando in maximis quas facit Divina providentia vicissitudinibus imprimis Immutabilem agnoscit & celebrat Deum, cum canit:

III.  
Deus solus,  
in rerum  
omnium mu-  
tationibus,  
Immuta-  
bilis.

*Tu, Deus! usque manes, nullo mutabilis ævo,  
Victurumque omni tempore nomen habes.  
Principio solida fundasti pondera terra,  
Atque sunt digiris sidera factatius;*

*Cælorum series motâ compage peribit,  
 Ut per longa peris tempora vestis honor;  
 Hosque laborum tanquam mutabis amictum,  
 Nec speciem poterunt usque tenere suam:  
 Semper ar es, nullo casu mutabilis, idem,  
 Invadetque annos nulla senectâ rnos.*

## EXERCITATIO DECIMA-TERTIA,

D E

## DEO OMNISUFFICIENTE.

## S U M M A R I U M.

- I. *Sufficientiæ Divinæ varia consideratio.* II. *Omni-suffici-  
 cientiæ Dei, quæ hujus est loci, explicatio.* III. *Ejus-  
 dem plenior demonstratio.* IV. *Summum bonum nul-  
 lum, nisi unus Deus Omnisufficiens.*

I.  
*Sufficientiæ  
 Divinæ va-  
 ria consi-  
 deratio.*



Tà quædam consideravimus prædicata, quo-  
 rum ratione Deus in se ipso sibi perfectissimus  
 est, & tanquam talis nobis innotescit. Nunc  
 ea proximè expendenda veniunt, quæ propio-  
 rem dicunt habitudinem ad creaturas, tum  
 omnes, tum rationales imprimis. In istoc ge-  
 nere princeps Dei Attributum est SUFFICIENTIA, tam undi-  
 quaque absoluta, ut meritò dicatur *Omni-sufficientia*. Spectari  
 ea potest, vel quatenus ad Deum ipsum refertur, vel quatenus  
 respicit res existentes extra Deum. Si Sufficientem Deum cogi-  
 taveris ratione suæ existentiae, in quantum nullâ re extra se ad  
 hoc ut existat indiget, sic occurrit ipsa primi Entis Independ-  
 entia, seu Aseitas; de qua antè. Si Sufficientiam eandem at-  
 tendas,

tendas, quatenus eâ notatur, Ens independens sic plenissimè abundare omni perfectionum genere, ut nulla earum species aut gradus ei desit, sic ipsa Perfectionis Infinitas est; de qua etiam dictum suo loco. Quod si Sufficienciam conceperis, quatenus perfectissimum Numen sibi suæ istius immensæ perfectionis intimè est conscium, ejusque amplitudinem ita perfectè intelligit, ut in ea summa cum tranquillitate acquiescat, sic erit Beatitude Dei, quâ ipse perfectissimus perfectionibus suis fruatur perfectissimè: quod prædicatum rectius infrà tractabitur, ubi præmissa fuerit consideratio Divini Intellectûs & Voluntatis.

Ergò hujusduntaxat loci erit ista plenitudo perfectionis, quâ *II. Omnisufficiencie Dei, quæ hujus loci est, explicatio.* Deus ex se & per se omni alteri à se esse potest omnia in omnibus. Tantam nimirum bonitatis in Deo abundantiam notat, ut nihil excogitari queat in omni bonorum genere, seu honestum id fuerit, seu utile, seu jucundum, quo non quolibet in casu satiari queat quamlibet creaturam. Sua etiam rebus quibusdam creatis convenit Sufficiencia, sed tantum ratione hujus aut illius defectûs, quem excludere possunt aut compensare suâ præsentia; nulla eis competit talis, quâ in omni indigentia esse queant omnia in omnibus. Sufficit v. c. Cibus ad satiandum famelicum; verum idoneus non est reficere sitientem. Respondet Honor appetitui ambitiosi: alii idem non explet desideria avari. Satisfacit sensibus Voluptas corporis; sed valetudinem conservare nequit eadem. Hæc similiaque aliquid sunt alicui; nihil eorum est omnibus omnia. Quin ne quidem in isto perfectionis genere, in quo quædam Sufficiencie species creaturæ competit, tantum præstat alicui, ut non plerumque majora desiderare & capere possit. Longè aliter se habet Sufficiencia entis perfectissimi; quæ si se exerat ut potest, id rebus dabit, ultra quod ne quicquam cogitare queant, cujus appetant fruitionem. Et talis Deus ex sese est. Non alterius gratiâ, uti creaturæ; quarum qualiscunque Sufficiencia rivulus est duntaxat profluens ex oceani istius abundantia, qui si suum inhibuerit influxum, exarescet is penitus, nullamque per se, dum per se nihil est, compensare valebit indigentiam.

Atque istæ omnia talia sunt, ut operosa demonstratione *III. Eiusdem* minime indigeant. Conferatur duntaxat rerum quarumcunque

*plenior demonstratio.*

natura finita & deprehendens, cum Independentia & Infinitate Divinæ perfectionis; ac mox intelligitur, & Omnisufficientem esse Deum, & solum illum esse talem. Id certum est, finiti ad infinitum nullam esse proportionem; contrā, infiniti supra finitum immensum esse excessum. Excedit ergo infinities infinita Dei perfectio finitam cujusvis rei finitæ indigentiam. Quod si tantum excedat, utique si se infinitum finito communicaverit Deus, saltem omnem in eo defectum plenè ac planè supplere poterit: sive id fecerit mediātè, unius creaturæ defectum alterius substitutione compensando; sive etiam immediato suavissimæ fruitionis sui ipsius sensu, qui tanto est jucundior, quanto sunt dulciores quæ ex ipso fonte bibuntur aquæ. Verbo, vel nihil quicquam Sufficientiæ habet in rerum natura, vel quicquid Sufficientiæ universis inest creaturis, in Deo tanquam in causa earundem suprema continetur, modo Deo conveniente, id est, infinitè perfectio: consequenter, quod universæ creaturæ esse possunt earundem alicui uni, id solus Deus multò magis esse potest iis universis. Fateor, non quidem illa efficit semper, quibus sufficit, Deus. At abundantia bonitatis in causa mensura idonea non est effectus. Ut non hoc arguat aliqualem Sufficientiæ defectum, sed independentis tantum arbitrii liberissimam dispensationem; quā non ad instar causæ brutæ seipsum communicat quo usque potest, sed unicuique suarum creaturarum sapientissimo voluntatis consilio tantum sui largitur quantum visum est. Neque eidem Sufficientiæ quid detrahit quæ conspicua est in obviis causis secundis qualiscumque, uti efficientia, ita Sufficientia: quanto enim hæc est major, tanto illustrius manifestat plenitudinem fontis, ex quo scaturit. Deus itaque, quemadmodum per se sibi satis est, ita per se sufficit ad id, ut sit omnia in omnibus.

#### IV.

*Summum bonum nullum, nisi unicus Deus Omnisufficiens.*

Verum quid ista cogitasse juvat, si tantum cogitentur, nec alius in pectus descendant? Quid Sufficientem Deum scimus, factis tamen abnegamus? Quid tam anxie Voluptates, Opes, Honores venamur, tantamque in iis locamus Sufficientiam; quæ sicuti omnia in omnibus non sunt, ita satis esse minime queunt appetitui, cujus desideria infinitum spirant & æternum. Saltem, si querimus, quid ita querimus, ut quæ subordinata sunt

sunt turpi sacrilegio divellamus ? Facimus id , quoties stulti creaturis secundum se aliquam tribuimus Sufficienciam ; quasi eæ sejunctæ à principio suo , cujus influxui suam qualemque debent Sufficienciam , non omni re ipsâ exuantur Sufficienciâ. Imò quid adeo infinitis dolorum , metuum , curarum , affectibus torquemur , quòties deficit insufficientissima Sufficiencia creata ? Scilicet , ut inania captamus , ita quoties eis destituimur , nimium dolemus , quia non animo satis obversatur יְהוָה אֱלֹהֵינוּ , *Jehova, Deus sufficiens* : quo qui fruitur , beatus ille nactus est statum omni bonorum genere affluentem , cui nihil detrahit creaturæ cujuscunque recessus , nihil addit vel totius Universi additamentum ; quippe quod absque Omnisufficiente sufficit nihil , absque quo Omnisufficiens solus ipse est omnia in omnibus. Facessant ergò , cum trecentis illis de Summo Bono gentilium ineptiis , nostra pariter perversa hac parte vitæ studia !

*Sat jam saepe tulit vaga per divortia mentem  
Hinc Theris, hinc Tellus, arduus inde Polus.  
Vel totum injectis mundum si metiar ulnis,  
Non tamen hec ulnis par erit ulna meis.  
Quod neque siderci claudunt amplexibus orbes,  
Id voto spes est resque petita meo.  
Hactenus, heu fateor ! vacuas dum prendimus auras,  
Semper ab amplexu mens male lusa suo est.  
Sis mihi Terra, Deus; mihi Tu Mare; Tu mihi Cælum!  
Sis Tu cuncta mihi; Te sine, cuncta nihil!*



## EXERCITATIO DECIMA-QUARTA,

D E

## D E O INCOMPREHENSIBILI.

## S U M M A R I U M.

- I. Nullius Sensitivæ perceptionis unquam Deus esse potest objectum. II. Humanæ menti Deum, & solum quidem, esse Incomprehensibilem, docetur. III. Etiam beatis Cælitibus Deus incomprehensibilis existit. IV. Perperam in intellectu finito claram ac distinctam Dei ideam statui, ostenditur. V. Non nisi modestissimè de Incomprehensibili Numine philosophandam. VI. Deus, quia Incomprehensibilis, etiam Ineffabilis.

I,  
Nullius Sensitivæ perceptionis unquam Deus esse potest objectum.



Ic quidem Deus Omnisufficiens est. At talem tantum esse haud sufficit, nisi quoque tantum talem cognoscendum sese & agnoscendum exhibuerit istis, qui ejus pro modulo sunt capaces. Nunc itaque videndum, quo pacto se habeat tanta perfectionis plenitudo in ordine ad duplicem istam facultatem, quâ præ omnia alia pollet rationalis, creatura, Intellectum puta & Voluntatem. Vim nostram percipientem quod attinet, notandum hîc in antecessum diligenter, puram huc adferendam esse mentem atque elevatam longissimè supra id omne quod Sensus afficit: INSENSIBILIS namque Deus est. Neque tantum isto communiori modo, quo, ob extensionis & corporærum qualitatum, quæ organa afficere aptæ natæ sunt, carentiam, quivis Spiritus sensum fugit; verum ratione quâdam peculiari ac Deo propriâ, quatenus sentiri posse con-

consistere nequit cum perfectionis Infinitate, neque cum Immenfitate, neque cum Simplicitate. Non ergò *Imaginabilis* est interiori sensui, cujus nullum fingi potest phantasma, quod tanquam ectypon aliquam Dei, seu archetypi sui, referat similitudinem. Neque eandem ob causam *Effigibile* esse potest Numen; quandoquidem nemo vel statuâ quapiam vel picturâ exprimere valet, cujus vel in cerebello suo delineatam nequit habere imaginem. Ut nimium contra ipsum luminis naturalis dictamen antropomorphiticis idolis sacra sua polluant, qui incorruptibilis Dei gloriam fœdissimum in modum mutant in similitudinem imaginis corruptibilis hominis, puta v. c. Senis, aut Juvenis: nec tantum hominis, sed & quadrupedis ac volucris, Agni videlicet, Columbæ, &c. Cæterum, qui sensûs interni objectum esse nequit, idem nec externo Visu aut Tactu percipi potest. Tangitur id duntaxat, quod molis suæ resistentiâ obvium nostrum corpus potest afficere: quapropter absque palpabili errore nemo Deum neget *Impalpabilem*. Neque minus idem *Invisibilis*: quippe qui neque lumine suo neque colore oculo materiali se manifestare potest, dum essentiam possidet simplicissimam, nullos luminis radios aut emittentem aut remittentem. Quumque ista per se atque immediatè fluent ex ipsa Entis perfectissimi natura, tum etiam ex propria atque nativa sensuum nostrorum constitutione, absurdissimè opinantur nonnulli, beatos saltem cœlites corporeo oculo essentiam Dei intueri posse; elevato scilicet (ajunt) Sensu per potentiam Divinam ad actum istiusmodi eliciendum, quem viribus ipse suis naturalibus elicere non valet. Verum hoc qui contendere volunt, dicant illi pari cum subtilitatis acumine, visum elevari posse, ut percipiat sapes; aut auditum, ut sentiat colores: quæ certè minus sunt absurda, quam videri quod est absolutè & per naturam invisibile; quippe quod evidentem notat contradictionem.

Non ergò corporeis organis quoquo modo sentiendum sese dare potest Deus. Et nos tamen, dum animâ constamus pariter & corpore, usque adeo sensationibus adfucti sumus in hac vita, ut absque earum adminiculo vix quicquam cogitemus, difficillimè saltem attendamus ad ea, quæ imaginationi præsentia

II.

*Humanæ  
menti Deum,  
& solum  
quidem, esse  
Incompre-  
tia*

*incomprehensibilem,  
docetur.*

tia non sunt. An verò idcirco quoque Dominus alibi, *Non me videbit homo, & vivet?* Imò, non videbit Numen propius, qui non attulerit intellectum à sensuum inquinamentis puriorem, quam qui nobis in hoc unionis statu obtingit. Quin, vel si sola mens, eaque purissima, huc accedat, ne ea quidem huic contemplationi par est: tanta Numinis est INCOMPREHENSIBILITAS. Tot scilicet & tantarum cuilibet intellectus aciem huc intendenti sese offert perfectionum cumulus, ut ei sicuti in se est plenè intelligendo nullum unquam ingenium creatum sufficiat. Elegans istæ est metaphora, quâ cognitionem nostram vel Comprehensivam, vel Apprehensivam, dixerunt Philosophi. Nimirum, quemadmodum manus corpora se minora sic tangit, ut omni parte ambiens & excedens illa tota circumplectatur; se autem majora aliquâ quidem parte tenet, ita tamen ut aliâ portione ab eis excedatur: sic Intellectus noster rem dicitur comprehendere, quàm plenè & perfectè cognoscit per ideam ipsi objecto adæquatam, atque omnia ac singula ejus prædicata intimè penetrantem; à qua cognitionis plenitudine quoties intellectus deficit, non omnia ut in se sunt, sed quædam duntaxat attributa rei, & qualicunque modo, sibi repræsentans, toties aliquid tantùm apprehendere dicitur. Atque ex hoc posteriori cognitionis genere est omnis creaturarum, quam de Deo habent, notitia. Quod faciliè demonstratur. Videlicet, de natura finiti est, ut nulla planè inter ipsum & infinitum existat proportio; neque istud, quantumvis amplum, huic æquari unquam queat. Itaque cum indè perfectiones in Deo cognoscibiles sint omni modo infinitæ, hinc verò vis cognoscens in omni creatura sit finita, utique illæ quascunque cogitationes hujus longissimo intervallo post se relinquent, neque vel omnium simul creaturarum captu plenè ac perfectè intelligentur: eritque adeo Deus verè secundum excessum suarum perfectionum cuivis finito intellectui Incomprehensibilis. Quod idem de nulla creaturarum affirmari potest: quarum etsi forte pleræque à nulla mente creata secundum omnia sui prædicata comprehendantur, absolutè tamen, etiam à finito captu, comprehendi saltem possunt; sine dubio quoque ipso factò à Divino intellectu comprehenduntur. Cæterùm, hoc Attributum ad creatam

mentem

mentem totum retuli. Quandoquidem enim perfecta sui cognitio non minima perfectio est, ambiguum esse nequit, quin Ens infinitè perfectum se ipsum intelligat plenissimè, perfectissimè. An verò hæc plena sui notitia Comprehensio dici debeat (de quo quidam contendunt) mera lis de voce esse videtur.

Quamvis autem ista ignorari nequeant vel leviter rem attendentibus, dissentiant tamen multi Doctores Scholastici, distinguentes inter illam Dei cognitionem quam hic in via habemus, atque eam quam olim habituri sumus in patria. Viatoribus quidem haud aliam quam imperfectam & apprehensivam Dei notitiam reliquam faciunt; ast qui vivunt in cœlis beatos Comprehensores ipsi appellant. Absurdè! Non nego, inconceptibilibus modis Theologiam Visionis, quæ per lumen Gloriæ cœlitibus obtingit, superare illam nostram quam habemus in hujus vitæ stadio per lumen Naturæ, vel etiam Gratiæ. Etenim quas nos in speculo quasi relucens contemplamur primi entis perfectiones, easdem illi, absque istis imbecillis naturæ nostræ adminiculis, familiariori revelatione propius, ceu de facie ad faciem, teste S. Paginâ, intuentur. Verumtamen quæcunque etiam fuerit immediata magis illa Divinarum perfectionum manifestatio, nunquam ea creatæ mentis captum sic elevabit, ut appropinquatum reddat perfectè concipiendæ immensæ illi infinitorum prædicatorum latitudini: neque enim aut finitam mentem infinitate donabit, aut infinitum Deum intra finitudinis limites coarctabit; absque quorum altero creatum intellectum nullam comprehensivam Dei notionem habere posse, ostendimus. Neque cœlitum consummatæ felicitati quicquam obstat inadæquata Dei notitia, quandoquidem perfecta satis est, quæ omnem subjecti capacitatem replet, etsi non omnem objecti amplitudinem exhaurit. Summus potius ille videtur beatitudinis gradus, si quis ne mente quidem suâ satis capere valeat excellentiam boni, quo frui se sentit. Quin ipsa hac ratione optimè cœlestis gaudii æterna esse potest sine fastidio satiata.

Istoc Scholasticorum errore minus tolerabilis est hac parte opinio Cartesii, in hac ipsa vita omnium mortalium, tantum citra præjudicium propriæ mentis tabulas intuentium, animis

III.  
*Etiam beatis cœlitibus Deus Incomprehensibilis existit.*

IV.  
*Perperam in intellectu finito statui*

*claram ac  
distinctam  
Dei ideam,  
ostenditur.*

obversari afferentis insculptam quandam ideam Dei talem, quâ quamvis summas ejus perfectiones non comprehendamus, nihilominus tamen ipsas clarius & distinctius, quam ulla res corporeas, intelligere possimus. Quid ista sibi velint mysteria, jam dudum me haud satis intelligere, lubens fateor. Constat equidem rerum corporearum attributa omnia, sic ut in se sunt, à finito intellectu comprehendi saltem posse. Constat pariter ex antè dictis, rei infinitè perfectæ omnia ac singula prædicata, uti in se sunt, à finito intellectu comprehendi omnino non posse. Etiam deniquè per se manifestum est, eo clariorem ac distinctiorem esse cognitionem, quo magis est perfecta, quòque altius rem cognoscendam penetrat. Quæ si sint vera, uti sunt, quâ, obsecro, ratione dici potest, omni aliâ re clarius à nobis cognosci Deum, quem omnium minimè secundum omnia ac singula prædicata, prout in se sunt, mens sibi sistere potest præsentem? Non ista sententia stetit Apostolo, quando universam nostram de Deo in his terris notitiam, etiam illam quam revelationis supernaturalis gratia cordibus fidelium infundit, similem pronunciat ænigmati; cujus totam rationem in ipsa obscuritate consistere, notum est. Cogitationem nostram, fateor, magis implent Divinæ perfectiones, quam ullæ aliæ. Sed vel ideo intelliguntur obscurius, quia usque adeò mentem implent, ut totam obruant. Scilicet, non ea tantum confusa nobis sunt & inevidentia, quæ infra vim percipiendi subsistunt, eamque non satis afficiunt; verum & illa quæ longius eam excedunt, ac plus justo in eandem agunt. Æquè hic peccat nimium, atque parum; dum utroque modo receditur ab ista proportionem, quæ inter subiectum percipiens & objectum percipiendum necessariò requiritur, ad id ut perceptio clara sit ac distincta. Scitè hoc innuit Philosophus, quando mentem nostram ad contemplationem rerum nimis excellentium se habere dixit, uti se habet oculus noctuæ ad intuitum luminis meridiani. Et quis est, qui non sit expertus ardentis facis flammam longè clarius videri quam Solis splendorem; etsi hic oculum lumine multo magis impleat, quam illa? Plura qui cupit, conferat nostram *Exercitat. de Infinito*, ubi de hisce, quæque iis affinia sunt, actum est fufius.

Plus.

Plus modestiæ est in illa cautela, quâ Cartesius philosophaturum alibi monet utendum, ut tutò & sine errandi periculo rem aggrediatur, quæque, cum mirè huc pertineat, silentio prætereunda hoc loco non videtur. Vult, ut semper „quam maximè recordemur, & Deum auctorem rerum esse „infinitum, & nos omninò finitos. Ità si fortè nobis Deus de „se ipso vel aliis aliquid revelet, quod naturales ingenii nostri „vires excedat, qualia jam sunt mysteria Incarnationis & „Trinitatis, non recusabimus illa credere, quamvis non clarè „intelligamus: nec ullo modo mirabimur, multa esse, tum in „immemsa ejus natura, tum etiam in rebus ab eo creatis, quæ „captum nostrum excedant. Aurea regula! Cujus si aliquanto diligentius recordatus fuisset ipse ejus Auctor & sequaces, in tractandis Sacris plus reverentiæ, in Philosophicis plus modestiæ, conspicuum foret. Non illorum majestatem profanasset impius ex hac caveat *Philosophus*, *Scripturæ Interpres infallibilis*; non horum latifundia arctasset Cartesius intra angustos propriæ suæ perceptionis terminos. Quid addam de Scholasticorum audacia, atque Hæreticorum petulantia? qui quasi non sit Incomprehensibilis Deus, divina quæque ad caput sui pedem metiri passim nihil metuunt. O! quanto rectius, dum isti suâ sibi temeritate cruces figunt, acquiescit hic sæpè mens sobriè sapientis, non in evidentia rei introspectæ, sed in altitudine veritatis occultæ! Ita qui capi cupit ab eo, quem capere se non posse capit, reverenter is habebit Incomprehensibilem majestatem, à gloria nunquam opprimendus, nisi gloriosè.

Cætèrùm, præter Sensum, tum etiam Intellectum, aliud adhuc in homine occurrit, referendum ad ejus perceptionem, tanquam ejusdem interpretis atque nuncius, Sermo puta externus; ad quem quomodo se habeat Deus, idcirco obiter quoque hîc erit attingendum. Verbo: quandoquidem voces sunt signa conceptuum, neque signo plus exprimi potest, quam in signato continetur, tanta existit inter λόγον ἐνδιάθετον & λόγον προφορικόν convenientia, ut quod intellectus capere nequit, idem lingua efferre non valeat; utque quod verbo mentis est Incomprehensibile, idem verbo oris sit Ineffabile. Quumque

V.  
Non nisi  
modestissimè  
de Incom-  
prehensibili  
Numine  
philosophan-  
dum.

VI.  
Deus, quia  
Incompre-  
hensibilis,  
etiam In-  
effabilis.

prius jam de Deo sit demonstratum, de posteriori quoque dubium esse haud potest. INEFFABILE dico Numen; non quod planè nihil de eo dicere liceat, nam sic ne Ineffabile quidem à nobis jam prædicari posset: verùm quatenus nulum tantum sermonis apparatus excogitare datur, qui quid exprimat, quod infinitis Dei perfectionibus plenè exprimendis dignum sit ac sufficiens, & cujus etiam amplissimâ significatione non infinities amplior sit res significata. Nomen יהוה non absque multis fabulis αἰετῶντων perperam contendunt Judæi: quam litem Philologicam præclarè excussam vide à Venerando Collega Cl. Leusdeno, *Phil. Hebr. Dissert. xxviii. & seqq.* Quamvis verò erret, qui non de re ipsa potius quam de Nomine sic sentit, multo tamen tolerabilior est ista superstitio, quam multorum hodiè profani & inanes garritus de Deo Ineffabili; de quo sine timore ac tremore nemo unquam balbutire incipit, qui debitâ tangitur Numinis reverentiâ: usque aded etiam vera de Ineffabili effari res est sollicitudinis atque periculi plena.





## EXERCITATIO DECIMA-QUINTA,

D E

## DEO ADMIRABILI,

E T

A M A B I L I.

S U M M A R I U M.

- I. *Animo finito Numen infinitum existit summè Admirabile.* II. *Uerior ejus rei confirmatio & illustratio.* III. *Amabilitatis Divinæ consideratio.* IV. *Ea tanta, ut nihil amandum non propter Deum.*



Tque ità quidem se habet Deus ad creaturæ Mentis perceptionem. Nunc, quâ ratione se habeat ad finitæ Voluntatis appetitum, paucis quoque videamus! Missis, quæ in hanc rem adferri possent, aliis plurimis, unam duntaxat atque alteram attendemus voluntatis nostræ motionem facile principem, Admirationem puta, atque Amorem; quæ duæ junctæ præcipuum existunt genuinæ, quam Numini debemus, Reverentiæ ac Cultus fundamentum. ADMIRABILIS Deus est, quatenus animum cuiusvis creaturæ, se diligentius contemplantis, repentinâ quâdam occupatione sic afficit, ut totus in Ipso hæreat, tanquam in re rarissima, & præ aliis maximâ consideratione digna. Multa quidem mirabilia occurrunt in natura rerum; ea scilicet, quæ intrinsicâ suâ essentiâ aliquid continent, quod latens & reconditum non omninò assequimur, inque cujus intuitu animus

I.  
*Animo finito  
Numen  
infinitum  
existit sum-  
mè Admi-  
rabile.*

hæret suspensus, ulteriori sciendi desiderio flagrans: verum nihil eorum omnium est, quod cuivis necessario & semper admirandum videatur; quatenus absolute saltem unumquodque finitum à finito intellectu sic penetrari potest, ut nulla superfit stuporis causa. Oritur enim omnis Admiratio ex quadam rei novæ ignorantia, conjuncta cum desiderio eam plenius cognoscendi: ut, quamvis ignorantia filia sit Admiratio, excitet ea tamen sciendi cupiditatem. Undè maximè Philosophi esse hunc affectum, nec aliud esse Philosophiæ principium, quam ipsam Admirationem, meritò censuit Plato: uti non minus rectè Pythagoras, se ex Philosophia id parasse aiebat, ne quid admiraretur. Scilicet, qui rerum omnium adeo omnibus numeris perfectam notitiam sibi habet, ut nihil quod in ea continetur ipsum fugiat, nil is miratur: quæ res, judice Poeta, prope una est,

*Solaque, qua possis facere & servare beatum.*

Atque hæc ratio est, cur hoc Dei attributum restrinxerim ad animum creatum. Ens enim infinitum, quemadmodum sese plenissimè intelligit, & modo quodam perfectissimo se ipso fruitur, ita in intelligentia, ut aliarum rerum, sic quoque sui, nihil habet obivium, quod rarum videatur nec satis plenè cognitum, quodque idèò repentinâ commotione ad ulteriorem sui considerationem incitet.

II.  
*Uberior ejus  
rei confir-  
matio &  
illustratio.*

Sola creatura rationalis est, eaque omnis, cui attendenti non potest non continuè aliquid rari in Numine occurrere & admirandi. Quod non in hoc tantum rerum statu obtinet, sed & in maxima ejusdem, quantam obtinere potest, perfectione. Quandoquidem enim jam antè satis docuimus, usque adèò Divinas perfectiones omnem finitæ mentis captum excedere, ut nunquam non ei sint & mancant Incomprehensibiles, etiam non potest non tanta altitudo veritatis occultæ plurima semper in recessu habere, quæ sedulo inquirenti nova occurrant, animumque creatum in admirationem raptant & stupore percellant. Quin, quum in aliarum rerum notitia quo magis proficimus, eo miremur minus, hic ex adverso tanto stupemus magis, quanto plus cognoscimus: in quo vel uno maximè mirandum existit Numen. Et quid demonstratione opus est? Sive essentiam divi-

divinam species, sive perfectiones, sive actiones, offerunt sese ubique rerum admirandarum thesauri inexplicabiles. Quis, nisi fordus nimium Numinis contemplator, absque animi hæsitacione cogitet Deum existentem sine causa; sine successione præteriti ac futuri durantem; sine situ, sine loco, sine extensione, universa implentem; sine compositione omnia in uno possidentem; sine mutatione omnia mutantem; uno mentis ictu infallibiliter contingentia prævidentem; immutabili voluntatis actu quævis libera decernentem; irresistibili potentia determinatione voluntates indifferentes flectentem; creantem omnia sine indigentia; conservantem omnia sine labore; gubernantem omnia sine molestia; poenitentem sine dolore; irascentem sine motu? Ut jam de mirabili Mundi structura nil addam, in qua quisquis mirabilia Opificis non stupet, stupet ille profecto nimium. Sux ætatis sapientissimus habitus Socrates orientem Solem immotis membris eisdemque vestigiis stans attonitus mirabatur sapius. Ast quæ nos abriperet sanctæ admirationis ἔκστασις, si ut fas est ad tantum Numen meditandum animum adjiceremus satis! Unica certè votorum nostrorum summa foret, ut ab eo, quem capere non possumus, caperemur; quam quidam narrant fuisse ultimam vocem Philosophi, cum dispendio vitæ, alternos rapidi maris cursus nimium admirantis.

Sic Deus, quatenus tanquam Maximus ab intellectu nostro non comprehenditur, animo Admirabilis est; qui idem interim, quatenus tanquam Optimus à mente apprehenditur, voluntati occurrit ceu summè Amabilis. AMABILIS, inquam; & quidem modo quodam peculiari ac sibi proprio, in quantum dignus existit, quem unum præ aliis quibuscunque, tantum propter se, quantà potest virium intentione summo votorum studio prosequatur creatura rationalis. Bonum id esse, jam olim dixit Philosophus, quod omnia appetunt. Et jure merito. Quod enim sibi congruum est, non potest non appetere voluntas, tendens semper in maximam, quantam obtinere valet, sui perfectionem; atque ided annitens, bono, quo semetipsam in se ipsa sentit destitui, ex alterius secum unione frui. Indè qui ex rationis præscripto agit, mensuram sui amoris ponit ipsam objecti bonitatem; quam ultra citrave quoties fertur affectus, to-

III.  
*Amabilitatis Divinæ consideratio.*

ties errantis iudicii ductum inordinato motu sequitur voluntas. Ut in omni amore peccare semper queat, tum nimium, tum parum. Tantum hic amor nimium non patitur. Quin parum est, quicquid hoc loco minus est maximo. Perfectissimum namque Optimum pariter existit; quod, quæ in re quapiam secundum se spectata est Perfectio, eadem relata ad appetitum sit Bonitas. Numen itaque infinite perfectum, hoc ipso infinite bonum est. Ast, ut jam ostendi, quo quid bonum magis, eo magis amabile. Quod ergo infinito bonitatis excessu finito quovis bono melius est, quanto est illo melius, tanto dignius existit omni sinceræ charitatis affectu. Dignus idcirco Optimus Deus tanto amore, quanti ne quidem res finita capax est.

IV.  
*Ea tanta, ut  
nihil aman-  
dum non  
propter  
Deum.*

Ut revera, quotquot animum adjiciunt ad aliquid amandum non in ordine ad Deum, amanti perfectissimo debito tantum detrahant, quantum ejus in creaturam transfundunt. Stulti profectò, qui umbratica veris, inania solidis, modica infinitis præferunt. Adeò præter Deum rationali appetitui non potest quicquam ambile esse non propter Deum: in quo uno quemadmodum est omne bonum, omne pulcrum, omne delectabile, ita solus amandus est propter se. Nec aliud ad ipsam nostram beatitudinem pertinet; quum unus Deus plus possideat, quam nos finiti in æternum, ut nobis benè sit, concupiscere possumus. Quamobrem in hoc solo amore desiderium est cum satietate, & satietas cum desiderio; in quo nèc desiderium dolo-rem generat, nec satietas fastidium. Cæterum, referebam iterum hoc Attributum ad voluntatem creatam: etsi negandum minimè sit, ut suo loco videbimus, etiam Deum infinitum amare se ipsum infinite. Atquæ alterius prorsus ordinis hic amor est ab eo, quo fertur creatura in Deum; quippe qui, remotus ab omni concupiscentia & desiderio, solà absolvitur complacentiâ; ideoque non est, quemadmodum iste, motus quidam in bonum à se diversum, sed potius mera tranquillitas, quæ mens perfectissima in suis perfectionibus sibi placet & acquiescit.

## EXERCITATIO DECIMA-SEXTA,

D E

## DEO ADORABILI.

## S U M M A R I U M.

*I. Cultus cupisvis, ejusque fundamenti, generalis consideratio. II. Deus Adorabilis tantum ob infinitam Sufficientiæ excellentiam. III. Actus & Signa divini cultus paucis notati. IV. Deus & solus & semper Adorabilis existit. V. Religiosus cultus neque gradus patitur, neque vi Dei irresistibili nititur.*



X utroque affectu, tum Admirationis, tum Amoris, nasci solet alius, qui Existimatio dicitur; notatque inclinationem animi in rem quam miratur aut amat, ortam ex opinione quam habemus de excellentia magnitudinis & bonitatis in re mira aut amata. Quod si Existimatio rei cujuscumque tanta fuerit, ut judice-

mus dignam cui nos vel nostra subiciamus, abit ea in Venerationem sive Cultum: qui, si summus sit, omnimodamque submissionem involvat, religiosus dicitur, seu Divinus; atque à primario quodam ejus exercitio, tanquam à principali parte, Adoratio nuncupatur, indeque Deus ipse ADORABILIS; id est, dignus ob summam excellentiam à creatura rationali honorari cultu religioso. Hic autem quo pacto conveniat Deo, cum satis intelligi nequeat, nisi perspectâ naturâ Cultus sive Honoris, pauca de illo prænotanda veniunt in antecessum. Omnis Cultus aliquam dicit honorantis subjectionem; appropriatam scilicet rei honoratæ dignitati atque excellentiæ. Etenim

Q

quis-

I.  
Cultus cu-  
jusvis, ejus-  
que funda-  
menti, gene-  
ralis consi-  
deratio.

quisquis major est & præstantior nunquam quàm talis minorem propriè dicto cultu prosequitur : minor verò qua talis , quoties rem se majorem cognoscit , non potest non , si ex ratione agat , tanto se facere inferiorem , quanto illam agnoscit superiorem. Ex quibus intelligitur , genuinum omnis cultus fundamentum esse sufficientiam ac præstantiam rei quam colimus : ut accuratissimè dixerit alibi Cicero , *Habet venerationem justam quicquid excelsis*. Quod aded verum est , ut inter homines quisquis perfectione aliqua eminet , quantum eà eminere creditur , tantæ quoque existimationis & venerationis sit apud alios. Undè & quæcunque hominem exornant dotes fundamentum existunt civilis alicujus honoris : uti manifestum est , & in bonis animi , qualia sunt , mentis perspicacitas , judicii dexteritas , sapientia , fortitudo , mansuetudo , &c. & corporis , uti sunt , robur , pulchritudo , &c. & denique , ut vocant , fortunæ , quo pertinent , nobilitas , divitiæ , ætas provectior , &c. Quæ omnia , quanto præstantiora sunt in aliquo , tanto magis existimationem intendunt. Etiam quidem , fateor , rerum gestarum magnitudo honorem meretur ; sed non per se , verum duntaxat quatenus opus virum indicat , atque argumentum existit sufficientiæ quæ in agente latet : qua de causâ quæcunque fortuitò , etiamsi feliciter , accidunt , quatenus nullam arguunt agentis sapientiam & industriam , nullam etiam erga illum excitare solent venerationem. Neque eis quæ de honore dixi obstat , quod etiam homines nequissimi , ob scelera ipsa , v. c. strenuam compositionem , scortationem , &c. nonnunquam honorentur à quibusdam ; non enim id fit , nisi ab eis , qui depravato judicio aliquid excellentiæ in ejusmodi quoque flagitiis se reperire autumant : ut quidem in speciem honorentur tales , attamen re verà honorandi minimè sint. Caterùm , cum ipso cultu minimè confundendum est ejus signum externum ; quippe quod ad essentiam illius per se non pertinet : etsi necessarium existat inter eos , quibus de interna animi veneratione non aliter , quam per adhibita istiusmodi testimoniis externa , constare potest. Mitto plura , quæ pro dignitate hujus rei dicenda præsens pagina non capit. Nunc pro nostro instituto satis erit hæc de Honore prænotasse : quippe quæ ad Religiosum Cultum translata , illi explicando sufficient.

Est

Est itaque Cultus Religiosus, Veneratio Entis sufficientissimi, per omnimodam sui submissionem. Quando objectum religiosi cultus assigno Ens sufficientissimum, pariter ejusdem indico fundamentum; quod est absoluta sufficientia, omnes omnino perfectiones involvens. Quandoquidem enim jam ostendimus, venerationis cujuscunque fundamentum esse rei honoratæ præstantiam, etiam supremi honoris, qualis religiosus est, fundamentum aliud nullum esse potest, quam summa perfectionis excellentia. Quo sensu præclare Epicurus, apud Cicero-  
nem, *tam eximiam esse, ait, & præstantem naturam Deorum* (Dei), *ut ea debeat ipsa per se ad se colendam allicere sapientem.* Atque hinc rectè observarunt quidam Theologi, non satis accuratè dici, Deum *quà* Creatorem, Christum *quà* Mediatorem, esse adorandum. Quamvis enim verissimum sit, Deum, *qui* Creator est, Christum, *qui* Mediator est, adorandum esse; imò etiam, Deum, *quia* Creator est, Christum, *quia* Mediator est, esse adorandum (quatenus Creationis ac Redemptionis consideratio efficacissimè nos impellit ad cultum Deo debitum, tanquam gratitudinis officium, præstandum) minus tamen istæ phrasæ probandæ videntur, quatenus in speciem præ se ferunt, ac si Dei Adorabilitas fundetur in beneficio Creationis aut Redemptionis, & non potius in sola atque unica intrinseca Dei præstantia. Hæc (ut pergam) cum jam antè demonstrata sit infinita, omnisque honor, quemadmodum ostendi, suo fundamento debeat esse appropriatus, per sese liquet, nullum cultum Deo infinite perfectò dignum à creatura finita præstari posse, qui non sit quousque esse potest quasi infinitus, id est, conjunctus cum totali atque omnimoda sui submissione.

Et in hoc uno essentia ac anima Religiosi Honoris consistit; absque quo quicquid præstatur venerationis, nihil habet divini cultus. Ex adverso quicquid à nobis fit ex istius subjectionis conscientia, etsi pro objecto immediato habeat res hujus vitæ, totum tamen reverà divinus cultus est. Neque enim ullo pacto Deo nosmet magis submittere possumus, quam si ipsum agnoscamus actionum nostrarum quarumcunque (etiam quarum ipsi quodammodo, per arbitrii libertatem, videri poteramus domini) arbitrum unicum ac supremum. Estque hic conceptus

## II.

*Deus Adorabilis tantum ob infinitam Sufficientiæ excellentiam.*

## III.

*Actus & Signa divini cultus paucis notati.*



primarium genuinæ ac masculæ Ethicæ fundamentum; quatenus ex Regno Dei morali, quod in creaturas suas rationales Is exercet, fluit quicquid æqui & boni in actionibus humanis reperire datur. Quod fusiùs aliquando demonstrare, si Deus vitam dederit & vires, conabimur, deducturi Moralem Philosophiam ex primis Juris Naturalis elementis: cujus rei neglectus nobilissimam disciplinam mirè reddidit sterilem. Nunc istum occanum ingredi non sinunt præfixi huic tractatui brevitatis termini. Illis iisdem prohibemur excutere singulos actus, quibus religiosa hæc submissio absolvitur, quales sunt, Numinis Invocatio, Gratiarum actio, Fiducia, &c. quæ ut Pietatis partes sunt, & veræ Probitatis bases, ita ex professo in Ethica tractanda veniunt. Quo eodem pertinet disquisitio de Signis, per quæ interiorum animi venerationem coram Deo & hominibus testatam facimus. Verbo, ipsa rei natura docet, ea debere esse humillima, quatenus, talia sola satis congrua sunt, ad exhibendam debitam animi Deo devoti submissionem.

## IV.

*Deus & solus & semper Adorabilis existit.*

Cæterùm eo, quem jam explicuimus, modo Adorabilis est Deus & solus, & semper. Semper Adorabilis Deus est. Etsi enim ipso facto ab æterno, nullo existente præter se, adoratus non fuerit; erat nihilominus etiam tunc dignus, quem, casu quo existeret, re ipsa religioso cultu veneraretur rationalis creatura. Quod tamen nullam arguit mutabilitatem in Numine, dum se honorari vult, tantùm quia dignus est; non quod sibi à nostro quicquam perfectionis accedat æstimo. Solus quoque imprimis Adorabilis existit Deus, quoniam nusquam extra eum reperire datur Omni-sufficientiam, unicum Religiosi cultûs fundamentum. Ut quisvis alius alterius rei cultus religiosæ venerationi subordinandus sit: nullâ parte ei æquandus; multo minus præferendus. Imò verò sic pari passu ambulant Adorabilitas & Deitas, ut omne Adorabile meritò concludatur esse verum Deum; quodque naturâ Deus non est, id neque Adorabile sit aut haberi debeat. Nulli enim, ut dixi, præterquam Deo religioso cultûs fundamentum competere potest. Quapropter mirè contumeliosi sunt in Deum, atque abominabili læsæ Majestatis Divinæ crimine sese polluunt, qui Angelos, aliasve creaturas, quantumvis Sanctas & excellentes, religiosè adorandas esse contendunt

dunt: cum tamen nihil habeant, ut Divinitatis, ita Adorabilitatis. Quo eodem fundamento ipsa ratio Idololatriæ reos arguit quoque illos, qui Christum Dominum nudum hominem credentes, religiosè tamen Adorandum contendunt. Quæ omnia uti reipsa πολυθεϊσμός inducunt, ita mirum est patronos invenire posse inter eos, qui pro uno Numine agnoscendo præ aliis stare videri cupiunt.

Adhæc, concidit ex traditis inepta & frivola distinctio inter Latrîam & Duliam, tanquam diversas cultûs religiosi species; excogitata quibusdam ad turpem suam idololatriam palliandam. Cum enim ostensum sit, nullam venerationem esse religiosam, nisi quæ sit tanta, quanta esse potest, conjuncta scilicet cum omnimoda animi submissione, facile intelligimus, Duliam, si sit cultus verè religiosus, Latrîæ debere esse æqualem; aut, si æqualis non sit, sed aliquâ parte minor, ne quidem cultum religiosum esse. Porro liquet ex demonstratis, errare Hobbesium vehementer; quando Religiosæ venerationis fundamentum revocat ad solam irresistibilem Dei potentiam. Quo ipso omnis genuinæ pictatis basis penitus subvertit. Etenim si in solius potentia exultatione consistat honor, utique servilis metus fuerit unica & vera religio; qui tamen poenæ tantum formidinem, non virtutis amorem, generare aptus est. Nisi fortè pessimi quique, ipsique adeo Diaboli, Deum, quoque ritè honorare credendi sint; quippe qui non possunt non agnoscere & æstimare vim irresistibilem Numinis, cujus potentem manum sentiunt atque experiuntur. Excusandi saltem in tantum, juxta hanc hypothesein, Indi, quando se cultum Diabolo deferre profitentur eo fine, ne noceat. Absit à nobis, ut probemus, quod per hanc sententiam probatur, illud Poetæ, *Primus in orbē Deos fecit timor*. Deniquè apparet, Naturalem Theologiam esse quam maxime Practicam, dum non tantum cognoscendum Deum explicat, sed & religiosè colendum monstrat: etsi in his naturæ nostræ tenebris ignoret prorsus salutarem istius cultûs modum. Quem dum frustra quæsierunt gentiles, ceperunt ἐπιθεωρεῖν, mixtis imperfectis Theologiæ Naturalis reliquiis depravatis Revelatæ Theologiæ traditionibus: undè malè compositæ Religionis insipida κατὰ κράτος, longissimè recedens ab isto cultu, quo qui clariori lumine ducuntur, per Dominum Jesum Unitatem in Trinitate, ac Trinitatem in Unitate supplices adorant.

V.

*Religiosus  
cultus neque  
gradus pati-  
tur, neque  
vi Dei irre-  
sistibili niti-  
tur.*

## EXERCITATIO DECIMA-SEPTIMA,

D E

## DEO VIVENTE.

## S U M M A R I U M.

- I. *Vita Dei ipsa ejus essentia rationaliter actiuosa.*  
 II. *Esse hoc modo Deum Viventem demonstratur.*  
 III. *Vita Dei Independens & Immortalis.* IV. *Vita Dei quot modis actiuosa?*

I.  
*Vita Dei  
 ipsa ejus  
 essentia ra-  
 tionaliter  
 actiuosa.*



Idimus præcipuas quasdam, quæ cum Independetia Dei immediatè connexæ sunt, Perfectiones; quarumque idèd, quæ talium, nullum in rebus finitis deprehendere datur vestigium. Nunc ad illas contemplandas nos convertimus, quæ communioem Spiritualitatis conceptum sequuntur, quibusque hætenus simile quid & analogum reperitur in quibusdam creaturis: etsi modus eas possidendi sit dissimillimus; dùm quod in Deo existit ratione quâdam simplicissimâ, infinitâ, essentiali, idem datur in rebus creatis mixtum, imperfectum, adventitium. Suntque hæc potissimum, Intellectus, Voluntas, Potentia; & si quæ alia ista comitentur. Supponunt illa VITAM Dei *Spiritualem*: quapropter de ea pauca dicemus in antecessum. Notamus illâ ipsam Divinam essentiam, ex se ipsa modo rationali absolutissimè actuosam. Num quid ab essentia verè distinctum dicat creaturarum vita? quibusdam disquiritur. Rectius, nostro judicio, sentiunt, qui negant. Verum hoc loco de eo disputare, parùm attinet; quandoquidem, quicquid etiam istius statuatur, in Deo saltem Vitam inter & essentiam nullum reapse discrimen esse admittendum,

dum, evincit abundè demonstratà antè Simplicitas : quâ Deus Vivens ipsa sua Vita est, & vitalis operatio; ipse nimirum sua intellectio, suus amor, suum gaudium, sua beatitâs. Cæterum, etsi unaquæque vita in suo genere tam sit nobilis, ut non dubitet Paræmiales canem vivum leoni mortuo præferre, cum tamen non ejusdem ordinis sit quorumvis viventium Vita, quæ illa Deo digna hujus loci sit, examinandum. Scilicet, quæ essentia perfectissima ipsa Vita est, ejusdem, ut essentia, ita Vita, non potest non esse perfectissima. Semota ergò plurimum existit à Vita ista materiali & corporea, quam vivunt suo quodam modo, vegetativo Plantæ, sensitivo Animantia. Nihil cum istis imperfectionibus commune habet ens perfectissimum, cujus sublimioris ordinis Vita est, totaque actuosâ quâdam rationalitate absolvitur : cujusque quatenus ectypon quoddam pro suo modulo expriment mentes creatæ, etiam, inter alia, hoc sensu ipsæ solæ Imaginem Dei referre dicuntur.

Et vel ob hoc unum dubium esse nequit, quin rationaliter vivat Spirituum, rationaliter viventium, Pater & causa unica. Nisi vitâ careat origo & scatebra illa, ex qua quæcunque vivunt vitam hauriunt, & vitales facultates motusque arcescunt. Neque profectò perfectionis divinæ infinitas patitur, ut iners & torpidum sit ens optimum, coque careat prædicato, quod omnium cæterorum quasi anima est, & absque quo foret, ut ne suis quidem beatitatibus frui valeret Deus. Quin ipse res inanimæ testimonium dicunt huic veritati, quando mirissimo sui artificio, ipsoque bruto quo in suos quæque fines tendunt impetu, sui Creatorem ac Gubernatorem arguunt sapientissimè viventem, isto eas moventem vitali influxu, ut & quæ non vivunt vivere tamen videantur. Quapropter gentiliū etiam sapientissimi adeò non Viventis Moderatoris imperio ea omnia quæ nobis obvia sunt subducere potuerunt, ut Divinam mentem mundi animam fingere maluerint, cujus auræ particulam possideat unaquæque pars universi; dum

*Spiritus intus alit, totamque insusa per artus*

*Mens agit atq; molem, magno se corpore miscens.*

Viventem ergò cogitet Deum oportet, quicunque rerum omnium causam primam ritè intelligere cupit, quæ citra vitalem

II.

*Esse hoc modo Deum Viventem, demonstratur.*

lem influxum nihil eorum facit, quæ facit. Atque hinc gravissima subest ratio, cur in Sacris passim promissionibus suis atque comminationibus Dominus adjiciat emphaticum illud, *וְאֵנִי* *Vivo ego*. Vivit videlicet qui ista annunciat, manu suâ certò perfecturus, quod jam mente suâ ab æterno formaverat consilium semper actuosus Deus. De quibus infra plura.

## III.

*Vita Dei  
Independentis  
& Immortalis.*

Nunc adhuc præteritundum hoc loco haudquaquam est, etiam prorsus Independentem vivere Numen; quod quam diligentissimè observasse, usûs erit in sequentibus longè maximi. Nimirum actio unaquæque conditionem sui principii refert, & unumquodque eo modo est actuosum, quo existit: quare non potest non independentem vivere id, cujus prima & essentialis perfectio ipsa Independentia est. Adeo ut, quemadmodum peculiari quodam suo jure *דְּאֵוִי*, ita etiam *דֵּשִׁוּ*; nec minus *דֵּשִׁוּ*, quam *דֵּשִׁוּ*, dici queat Deus: qui ut primum *Ens*, ita primum pariter *Vivens* est; dum, non uti cætera, vitam possidet mutuatiâ ac precariam, sed vitam suam habet in se ipso ex se ipso. Atque hoc demùm eminentissimam facit in Deo vivendi rationem, eam largiens absolutissimam perennis vitæ possessionem, quam neque intrinsecus defectus, neque extrinseca vis, ullâ unquam morâ interrompere, ullo unquam fine terminare, potest: quo nomine, cum Vita, *Immortalitatem* in se ipso habet solus. Sed de hisce jam satis.

## IV.

*Vita Dei  
quos modis  
actiosa?*

Porro, quâ ratione actiosa sit vivens illa Dei natura, expendamus! Et quâ aliâ, quam quæ maximè est rationalis? Secum videlicet Intelligendo & Volendo quæcunque; tum etiam Potentiæ suæ efficaci exercitio extra sese ponendo, quicquid sapientissimo consilio præter se existere vult. Ut non malè jam pridem hic notaverint eruditi, quemadmodum duplex Actionum genus, Immanentium videlicet & Transcuntium, ita quoque tres quasi Facultates, tanquam totidem operum divinorum principia; Dirigens primum, quod Intellectus est; Imperans alterum, quod Voluntas; Exequens tertium, quod Potentia. Quorum quomodo nullum cum altero in signo rationis sit confundendum, sequens hujus rei docebit pertractatio. Dixi, ne quis erret, in signo rationis: neque enim re-  
verâ

verâ alterum hic ab altero diversum est, sed omnia à parte Dei actus idem purissimus. Quæ eadem causa erat, ob quam quasi Facultates eas appellavi, ne quis hic actum primum cogitet, qui ipsâ re alius sit quam actus secundus. De quibus plura suis locis.

## EXERCITATIO DECIMA-OCTAVA,

D E

## DEO INTELLIGENTE.

## S U M M A R I U M.

- I. *Intellectus Dei explicatus & demonstratus.* II. *Modus intelligendi in Deo perfectissimus.* III. *Et nominatum quidem, Independens.* IV. *Imò etiam Simplicissimus, & Immutabilis.* V. *Denique, Æternus quoque, Infallibilis, & Adequatus.* VI. *Modi nostri cognoscendi imperfecti à Numinis Intellectu removendi.* VII. *Deus sese intelligit; & quo modo?* VIII. *Res quasvis à se alias Deum perfectè cognititas habere, demonstratur.* IX. *Possibilium Scientia in Deo datur per eorundem Ideas.* X. *Idque citra Divinæ Voluntatis decretum.* XI. *Futurorum, etiam contingentium, certa est in mente Divina Præscientia.* XII. *Existencia quælibet Deus plenissimè cognoscit.* XIII. *Etiam minima quæque ac vilissima.* XIV. *Scientiæ Divinæ in Necessariam & Liberam divisio.* XV. *Media Scientia quid, & quo fine à suis inventoribus excogitata?* XVI. *Ab-*

P

sur-



*surditas ejus pluribus instantiis detecta. XVII. Difficultatum in hoc negotio præcipuarum solutio. XVIII. Sapientiæ Divinæ mysteria reverenter agnoscenda.*

I.  
Intellectus  
Dei expli-  
catus & de-  
monstratus.



Primo orsurus, non immoror vocibus INTELLECTUS & Cognitionis; quarum illa ex usu vulgari intelligendi vim, hæc ipsum ejus exercitium magis exprimit, quemadmodum vocabulis Scientiæ, Intelligentiæ, Sapientiæ, similibusque hic utimur, semè ad variam cognitionis divinæ excellentiam pressius exhibendam. Nobis promiscuus erit ferè harum omnium vocum usus, per eas intelligentibus, Actum Dei Viventis perfectissimum, quo omnis omnino scibilis intijnè sibi existit conscius. Conscium sibi dico Deum, quatenus mente suâ comprehendit sibi præsentissima, quæcunque intelligit. Quæ ut clarius perciperentur nobis, qui vix satis distinctè alios intelligendi actus quam qui sunt nostri concipimus, conferendæ hic forent nostræ perceptiones cum divina scientia: verum post pauca rectius id fiet. Intelligere Deum, prius demonstrandum est: si multum sit necesse. Rectè enim Philosophus: *Si mens divina nihil intelligat, sed ita se habeat ut dormiens, quodnam præcellens erit?* Scilicet quis causam primam eâ exuat perfectione, quæ inter alias una etiam princeps est. Neque agere potest ullo modo nisi rationaliter, quod neque casu agit aut bruto impetu, neque ad certos fines ab alio dirigitur: quorum utrumlibet respuit planè tum independens Divinæ vitæ perfectio, tum omnis hæc Universi constitutio, istis librata, exasciata, perfecta, ponderibus, mensuris, numeris, ut nox nocti quoque indicet scientiam Opificis tantam, quantæ nullus existit numerus. Et quid conscientiæ testimonio efficacius? Numen quis agnoscat, quod non adoret? Quis verò, nisi idololatra nimium *ἀσέβης*, adoret, quod intelligentiâ non præditum arbitretur? Sed mitto rem nimium manifestam. Potius, quo modo Deus cognoscat quæ cognoscit? quantum cognoscere poterimus, examinemus.



Ex antè dictis jam satis intelligitur, cum non posse non esse perfectissimum. Neque enim minus quam perfectissimum esse potest, quicquid ad consummatam entis perfectissimi perfectionem pertinet; præter quod ad Deum nihil pertinet. Ut haud rite Dei Intelligentiam æstimet, qui tantam non agnoscit, quantum est ipse Deus. Atque evidentior generalis hæc veritas est, quam ut cujuscumque patiatur contradictionem: ut si tam facilis esset omnium consensus in ea, quæ perfectissimus ille sciendi modus re verâ involvit, nulla ulteriori disquisitione hic opus foret. At nunc febriculosa quorundam philosophemata de Scientiâ media, quâ Numen speculetur suarum creaturarum actiones liberas; vel etiam de conjectura, quâ divinæ futura contingentia, necessitatem imponunt cogitationibus nostris in rebus cæterum satis certis nonnihil hærendi, atque universæ hujus impietatis fundamenta hic suffodiendi. Non autem rectius tantarum rerum pro modulo nostro formabimus conceptum, quam si probè in mentem revocaverimus ea, quæ antehac de singulis perfectionibus Dei essentialibus notavimus; quibus conformis agnosci debet Divina scientia: nisi ens primum naturæ suæ non convenienter agere statuendum sit absurdissimè. Tum etiam diligenter advertendum erit, quid imperfectionis adhæreat nostris cognoscendi modis, à Divinis procul dubio removendum: nisi antropomorphiticas cogitationes de Deo nimium fovere velimus; quas fovent re verâ, quotquot unquam hac parte errarunt.

Istis accuratè observatis, intelligemus primum, scire Deum quicquid scit Independentem. Certè, quod ens per Independentiam est id ipsum quod est, non potest id quicquam scire modo sibi congruo, nisi eo quò existit, id est, independenti: quemadmodum & jam dudum demonstravimus, nihil esse Divinum, quod non sit independentens. An verò quod sibi sufficit ad existendum, non pariter sibi sufficiet ad intelligendum? Et quis non intelligit, qui intellectu non caret, longè perfectius esse independentem scire, quam dependentem? Si sic, utique, si dependens esset, perfectissima non esset, Divina scientia. Et quid, obsecrò, tandem istud erit, à quo pendeat prima Intelligentia? Non saltem, ut in nobis, vim percipien-

II.

*Modus intelligendi in Deo perfectissimus.*

III.

*Et nominativum quidem Independentens.*

tem movent oblata objecta ; cum ista omnia processerint à causa prima tanquam ab agente , non bruto , sed maximè rationali ; atque adeò universa ista sui ideis jam mente divinà comprehensa fuerunt , antequam extiterunt. Ut non ex opere suo formato notionem ejus haurire necesse habeat supremus *Τεχνης* ; sed contrà res quævis mensuram sui habeat Divinum Intellectum , tanquam causam exemplarem ad cujus amussim producta est. Easdemque ob causas ex nullis cognoscendi principiis genita esse potest vis Dei intelligendi præstantissima ; nullius idèò indiga sensationis , experientiæ , ratiocinationis , similibumque imbecillium humanæ cognitionis adminiculorum. Nihil ergò vel dari vel concipi potest extra Deum , à quo ejusdem Intellectus ortum haberet quomodocunque. Cui minimè repugnât Dei Decretum , quod infrà Præscientiæ futurorum basin sumus posaturi : non enim sic inducitur aliquid à Deo diversum , scientiam ejus præcedens , sed ordo tantum aliquis concipitur inter ea , quæ diversimodè à nobis cogitata , re ipsa idem sunt. Ordo verò noster concipiendi nullam infert dependentiam ; cum nihil à se ipso dependere dici possit.

IV.  
*Imò etiam  
Simplicissimus,  
& Immutabilis.*

Cæterum , quemadmodum ex Independentia divinæ naturæ omnes ejusdem perfectiones fluunt , sic quoque ex independentia divini Intellectus alia ejusdem attributa faciliè innotescunt. Videlicet , quia independens , etiam Simplicissimus est in Deo cognoscendi modus ; ut nec pluribus actibus verò distinctis intelligat , nec ipse intelligendi actus ab intelligentis essentia quid diversum existat. Si enim alterius eorum ab altero aliqualis hic foret divisio , etiam , ut ista divisa in unum conveniant , parilis eorundem inter se requireretur compositio. Verum omnem compositionis speciem absolutæ independentiæ prorsus repugnare , ubi de primi entis simplicitate egimus , probavimus sat multis : ut illa hic repetere nil sit necesse. Sufficit , rerum omnium causam supremam semet ipsum scire per semet ipsum , eodemque mentis in ictu cernere quæ sint , quæ fuerint , veniantque ; quatenus in ipso continentur quæcunque unquam sunt vel esse possunt , ut nulla ei opus sit , ad alia à se cognoscenda , notionum à se distinctarum formatione vel multiplicatione. Atque hoc est , quod vulgò dicunt , Deum intelligere per essentiam :

tiam : cujus eminentissimæ perfectionis nimum in mentes creatas hodiè transfundunt , qui actionem cogitandi ab essentia earundem neutiquam distinctam arbitrantur : de quo alibi plura. Sed & Immutabilis est Dei scientia , ab objectis independens , ideoque nec eorum mutationibus subjecta , quæ ipsa potius constans est rerum mutabilium mensura. Planè ut oculus citra ullam sui vertiginem rotulæ circumactæ varios gyros intuetur ; ita mens divina , ullius mutationis ignara , nullam patitur à rebus mutationibus infestis mutationem.

Ex quibus Æternam , omnisque etiam successionis expertem , eandem esse , nullo negotio conficitur ; quatenus quod Ens sapientiæ suæ thesauros independenter possidet in se ipso ex se ipso , nulliusque rei ignotæ novam adipisci potest notitiam , ob immutabilitatem , id ante tempora seculorum , absque principio ullo , scivisse quod scit , manifestum est. Eâdem sequelâ summa & infallibilis Certitudo Divino Intellectui convenit. Quæ enim cognitio neutiquam pendet à rebus ipsis incertis , nec ullâ novâ certioris mediû luce confirmari potest , nequit in eadem aliquem locum habere dubitatio , aut ulla oppositi formido. Tandem Adæquatâ concipiendi perfectione novit Deus quicquid novit ; intimè penetrans omnem rerum essentiam , ac funditus exhauriens qualiacunque earundem attributa. Ut absolutissimè Deus sciat quidlibet quod scibile est , & quousque scibile est ; adeo ut quod ipse non scit (si sit fas ita loqui) quemadmodum prorsus nihil est , ita sciri nullâ ratione unquam possit. Etenim quod quædam quandoque non plenè & clarè percipiuntur , tantum oritur ex dependentia cognitionis ab objecto ; quod quoties secundum se totum vim perceptivam non satis vividè afficit , conceptum sui parit imperfectum & obscurum. Quod itaque per independentiam suam objectis neutiquam subijcitur , etiam nullas istiusmodi patitur imperfectæ cognitionis causas. Alia quæ huc pertinent infrâ. Nunc liquet , quam jure merito Deus cognoscere dicatur Comprehensive , dum quâdam mentis suæ quasi comprehensione rem omnem complectitur ; item Intuitivè , claro scilicet & distincto quasi intuitu totum quod in re cognosci potest pervidendo. Non aliæ defunt rationes , quibus amplius confirmari queat multiplex illa , quam jam demonstravimus , mentis

V.  
Denique,  
Æternus  
quoque, In-  
fallibilis, &  
Adæqua-  
tus.

Divinæ in modo cognoscendi eminentia. Verum & ista sufficiunt quæ attulimus, & mox quoque occasio dabitur alia quædam attingendi.

## VI.

*Modi nostri  
cognoscendi  
imperfecti à  
Nominis  
Intellectu  
removendi.*

Nunc operæ pretium erit attendisse diligentius (quod suprà obiter tangebamus) immensam differentiam, quâ ratio cognoscendi Divina distat à nostra. Tribus verbis præcipua quædam hujus rei capita recensere; ex quibus lumen longè clarissimum tractatui nostro sequenti affulgebit. Nimirum, Nulla est in Deo scientia habitualis, quiescens quandoque, quandoque in actum transiens. Nullis indiget mens Divina cognoscendi instrumentis aut occasionibus. Nullas propriè loquendo format rerum notiones, nullas fingit imagines, quibus suæ intelligentiæ res sistat præsentem. Nulla hic rei ignotæ comparatur scientia; nulla rei notæ inducitur oblivio, nulla oblitteratæ notitiæ excitatur reminiscencia. Nulla in præscientia futurorum locum habet sagax conjectura; nulla præsentium vel præteritorum per experientiam acquisita certitudo. Nulla extra Deum datur conditio, à qua scientia divina suspendatur. Nunquam componit aut dividit mens Divina; neque ullos abstractos habet rerum conceptus. Nullas ex rerum convenientia ac discrepantia rationes conferit; nullas ex causis conclusiones necit. Hi omnes, & si qui plures his similes, nostri cognoscendi modi, quemadmodum facillimè demonstrantur Scientiæ Independenti, Simplicissimæ, Immutabili, Æternæ, Certissimæ, ac Comprehensivæ in plurimis adversari, tanquam perfectissimâ intelligentiâ prorsus indigni, diligentissimâ curâ ab ea sunt removendi. Si quis conqueratur, istis omnibus abjectis, tenue superesse quod de Divina mente cogitet; regeo ego illi, superesse infinita; sed, quia infinita, conceptibus finitis altiora: cujus enim cogitationes non sunt sicuti nostræ cogitationes, ejusdem modus cognoscendi nostro sublimior est, quantum cælum altius est terrâ. Quam sublimitatem qui conscendere non potest (ut nulla potest creatura) potius quam temerario scrutinio vertiginem patiat, humili eam modestiâ miretur: quæ via in tam nobis inviis longè tutissima.

## VII.

*Deus sese in-*

Enitendum tamen quousque finit nostra imbecillitas. Conducet huc plurimum, considerare sigillatim res circa quas Divina

vina Scientia modis jam recensitis actiuosa est; tum etiam varias *relligit; & quomodo?* hujus, pro illarum vario statu, divisiones. Jam antè monuimus, extendi eam ad omne omninò scibile, ut verè sit & dici debeat *Omni-Scientia*. De eo constabit clarissimè, si per partes agamus. Primarium primæ Intelligentiæ objectum absque dubio Numen ipsum est. Quandoquidem enim sui ipsius cognitio secundum se spectata perfectio est, nullaque cognitionis perfectio à perfectissimo cognoscente potest abesse, etiam ea Deo denegari nequit. Neque finit, Deum sufficientissimum se ignorare, ejusdem (de qua suo loco plenius) Beatitudo. Etenim qui virtutum suarum plenitudinem haud intelligit, si neque in eisdem rationaliter potest acquiescere; quatenus, sicuti ignoti boni nulla est cupido, ita quoque felicitatis non intellectæ, quantumvis magnæ, nulla esse potest cum complacentia fruitio. Et quod, obsecrò, perfectissimâ scientiâ dignius objectum esse aut cogitari potest, quam ipsum ens perfectissimum? Pulchrè Philosophus: *Manifestum est, mentem divinam intelligere quod divinissimum & honorabilissimum est; quo fit ut se ipsum intelligat.* Et profectò, se nisi cognoscat Deus, cognoscit nihil planè: quippe qui, propter independentem ac simplicissimum cognoscendi modum, suprà Deo vindicatum, extra se nihil cognoscere potest, nisi ex se & per se. Adde, res omnes à Deo diversas esse ab eodem prorsus dependentes; ut tanquam tales cognosci nequeant, nisi cognito ipso principio à quo pendent. Sed jam dudum nimius sum in re manifesta. Non interim, ut nos Deum, sic ipse se intelligit: qui enim quæcunque novit novit adæquatè, etiam non potest is non consummatâ concipiendi perfectione penitus intimèque sibi esse notissimus. Quin ne actu quidem reflexo ad se penetrandum indiget, qui ipse simplicissimus idem est & cognoscens, & cognitio, & cognoscibile. Estque hæc sublimis illa Dei ipsius Theologia: cujus quidam in mente creata relucens radii existunt Eclypon, referens pro subiecti capacitate qualicunque modo Archetypi sui perfectiones.

Præter se novit Deus alia quævis à se, q ualiacunquea fuerint, & in quocunque statu. Si enim vel minimum quicquam suggeret Divinam Scientiam, non jam hoc ipso foret præstantissima;

VIII.  
*Res quasvis  
à se alias*

*Deum per-  
fectè cogni-  
tis habere,  
demonstra-  
tur.*

tissima; quatenus negari nequit, perfectiorem esse notitiam quæ nihil prorsus ignorat, quam cui quædam subducuntur. Quin tantæ necessitatis hæc veritas est, ut si quid rerum ali- quando Deum lateat, id nunquam Ipsum scire posse, dicen- dum sit. Tam omnem sciendi novitatem excludit scientiæ inde- pendentis simplicitas, immutabilitas, & æternitas. Et quid est, cujuscunque fuerit conditionis, quod non totum Deo tanquam causæ primæ subordinetur? Quæcunque verò Deo subordinantur, principium sui cum agnoscunt, non brutum, sed maximè rationale: quod arguit tum agentis primi vita per- fectissima, tum varii in rebus productis perfectionum gradus; qui nulli forent, si ad extremum virium (quod est. causæ ra- tione destitutæ) ac non certo potius selectu atque ex rationis præscripto, operaretur Numen. Nihil itaque est eorum quæ quocunque modo à causâ prima dependent, quod non per omnia quo usque à se pendet, Deus habeat exploratissimum. Quæ rationes omnes quum non minus spectent possibilia, quam præsentia; futura, quam præterita; contingentia, quam ne- cessaria; voluntaria, quam naturalia; cogitata, quam patrata; con- ditionata, quam absoluta; singularia, quam universalia; minima, quam maxima; etiam nihil eorum omnium agnoscimus, quod non æquali necessitate à mente divina plenissimè cognosci, sit statuendum. Neque profectò metuendum est, ne (quod no- bis frequenter accidit) tot tantarumque rerum vel varietate dis- trahatur, vel multitudine confundatur, vel magnitudine ob- ruatur, vel exilitate fatigetur Intellectus Dei. Ita qui cogitat, non se satis attendere ostendit modum intelligendi divinum, tum independentem esse, ut nullâ opus sit sciendorum investigatione; tum etiam simplicissimum, quo fit ut eodem actu parilique facilitate omnia ac unum intelligat. Quarum perfectionum à nostra cognitione absentia, tantum in ea parit defectum & mo- lestiam, ut præstantissimarum quoque rerum scientiam sapien- tum, scientissimus Salomon pronunciare non dubitaverit oc- cupationem malam, quam qui multiplicat multiplicet dolo- rem.

IX.  
*Possibilem  
Scientiam in*

Atque, ne ullum supersit in hoc negotio dubium, ea- rum rerum quas recensuimus præcipuas quasdam species bre- viter



viter percurreremus, eas imprimis in quibus aliqua sese offert difficultas; ostensuri, & illas Deo cognosci, & simul, quo fundamento: utriusque enim hujus consideratio ad alterutrum intelligentiam, ut claram, ita certam, plurimum confert. Possibilia, quæ talia, puram denominationem dicere à potentia aliqua activa, quæ eis in actum deducendis sufficit, cujusque ideo tanquam objecta considerantur, notum est. Indè quicumque perfectè intelligit causæ cujuspiam potentiam, nihil is eorum possibilium ignorare potest, quæ in perfectione istius causæ virtualiter continentur. Ex quo conficitur, nihil saltem illorum Deum latere posse, quæ in ipso, tanquam in causa, existunt; qualia sunt quævis Possibilia. Neque putandum est, præter ista quæ ratione Divinæ virtutis Possibilia dicuntur, quædam etiam esse quæ sint potentiæ alicujus alterius objecta; atque ideo Deo per cognitam suam potentiam non ilicò perspecta. Quum enim cujusvis rei creatæ virtus absolutissimè à Deo dependens sit, nihil certè à causa secunda produci verè potest, quod non priori quodam jure possibile sit causæ primæ; atque ideo illi tanquam tale exploratissimum. Et quid possit Deus, quod non intelligat? Nisi absurdissimè dicendus sit aliquid posse ad instar causæ brutæ. Quoties enim agenti rationali aliquid possibile esse cogitamus, tantumque attendimus vim exsequentem, nil cogitantes de Intellectu tanquam de principio dirigente, mox id tanquam agens rationale cogitare desinimus. Quæ veritas tantæ evidentiæ est, ut non minus rerum omnium producibilium Ideas, quam virtutem eas extra se ponendi, in Deo admiserint Gentium sapientiores. Verum de sublimi illa materia, in qua Philosophiæ Platonice cardo vertitur, brevitatis causâ satis hoc loco dicere non possumus; quare nec parùm dicere volumus. Verbo tantum moneo, per has rerum possibilium in mente divina Ideas nos nihil aliud intelligere, quam ipsam essentiam Divinam, à se ipsa perfectissimè cognitam, tanquam sufficientem ad suas quasdam perfectiones modo analogico & infinitè vario extra sese exprimendas.

Nullam in toto hoc negotio mentionem feci divinæ Voluntatis: quam uti recentiores Philosophi genuinum statuunt possibilitatis fundamentum, ita, Deum possibilia non cognoscere

*Deo datur,  
per eorundem Ideas.*

X.  
*Idque citra  
Divinæ Vo-*



*luntatis de-  
cretion.*

nisi vi decreti sui, contendunt. Perperam certè. Uti enim Deus suæ sibi perfectionis intimè conscius existit, absque ullo actu voluntatis intercedente, ita quoque & se intelligit sufficientissimum, & simul illa omnia quæ cum sufficientia ista immediato nexu cohærent, qualia sunt possibilia, absque ulla voluntatis liberæ determinatione: à qua non magis suspendi potest possibilitas rerum, quam ipsa Dei Potentia, quæ re vera est ipsa ejusdem Sufficientia. De quibus plenius constabit infrà, ubi de Potentia Dei dixerimus: quo loco etiam hujus opinionis fundamenta erunt refellenda, nimirum, Potentiam Dei à Voluntate ejusdem nullà ratione differre; item, Deum posse etiam efficere, ut contradictoria existant. Cæterum, quid de Impossibilibus hic sit sentiendum, quæ de Possibilibus tradita sunt satis docent. Scilicet, nihil est absolutè Impossibile, quod idem non sit contradictorium; id est, tale cujus alterum prædicatum sic alterum evertit, ut ne cogitatione quidem, ob mutuam destructionem, simul uniri queant. Cognoscit ergò Deus Impossibile, quousque id cognosci potest. Extrema scilicet quæ in Impossibili occurrunt, seorsim spectata, cognoscit plenissimè. Etiam unionem inter illa fieri non posse, id est, eandem cum suis perfectionibus non consistere, intelligit; qui quicquid suæ sufficientiæ adversatur non minus intelligit, quam quod ex eadem fluit. Extrema ergò tanquam inter sese unita non concipit, qui nihil concipit quod non suis perfectionibus continetur; ob quod ipsum neque ea unita producere potest. Nec ullus hinc sequitur scientiæ defectus, sed maxima potius ejusdem perfectio: cum enim quod absolutè est impossibile sit purum putum nihil, utique qui impossibile non scit, nihil non scit. Et quid est nihil non scire, aliud, quam omnia scire?

# XI.

*Futurorum,  
etiam con-  
tingentium,  
certa est in  
mente Divi-  
na Pra-  
sciencia.*

Possibilitatem rerum excipit earundem Futuritio & Non-futuritio. Atque hanc non minus quam illam penetrat divina mens, distinctissimè & perfectissimè cognoscendo tum ipsas creaturas futuras, tum etiam quænam re ipsâ fierent à singulis secundum omnem statum, quem toto temporis successu habebunt, quâvis hypothefi factâ, quâvis occasione oblata. Quæ occasiones cum sint infinities infinitæ, omnium maximè immensam vastitatem, amplitudinem, ac profunditatem Divi-

næ Sapientiæ declarant ; nobis quidem incomprehensibilem , non tamen minus veram. Sileo , quæ tot futurorum contingentium eventus præcesserunt , illustria Vaticinia , totidem hujus Præscientiæ testes locupletissimos. Nobis ratione agendum est. Quando Futurum dicimus , rem denotamus , quæ , cum nondum sit , ad hoc tamen est definita , ut existat aliquandò : si enim ad hoc definita non sit , non magis futura dici potest , quam non-futura. Jam verò manifestum est , non posse quicquam suæ futuritionis esse causam : etenim quod ex se hæcenus merum nihil est , nullam etiam sibi determinationem tribuere potest ad hoc , ut aliquandò , potius quam nunquam , existat. Causam ergò aliquam suæ futuritionis requirit quodvis futurum extra se. Nec eam qualemcunque ; sed istam , quæ fecerit , ut de futuro nunquam verè dici poterit , fuisse aliquandò non-futurum. Quæ enim res aliquando futura est , jam ab æterno fuit talis ; cum , si nunc verum sit rem hanc aliquandò fore , idem ab æterno etiam verum fuerit. Æterna itaque futuritio æternum sui fundamentum exigit ; quale nullum excogitare datur , nullumque aliud patitur divina independentia , præter æternam Æterni entis voluntatem , cujus æternâ definitione quod unquam futurum dici potest , jam ab æterno futurum fuit. Quumque Voluntatis suæ perfectissimo actu non possit non conscium sibi esse ens perfectissimum ; utique futura quæcunque ignorare non potest , qui id per & propter quod singula futura sunt , quæ futura sunt , habet exploratissimum. Quid ? quod rerum existentium nulla esse possit certa ac sapienter ordinata connexio ( qualem esse , tum res ipsæ clamant , tum Primæ causæ sapientia postulat ) nisi earundem seriem jam antè digesserit mens divina. At qui potuit , nî ea sic futura , non aliter , uti ordinaverit , ita præsenferit. Ut nulla re verâ agnosci possit Numinis Providentiæ , nisi quanta ejusdem agnoscitur Prævidentiæ. Estque rerum Non-futurarum , ex opposito ; similis ratio. Neque futurorum contingentium contingentia quicquam obstat hæc Præscientiæ divinæ , in Dei decreto fundata , certitudo. Ipsum enim præinitione suâ rei cuique suas quidem aptavit causas ; sed non omnes secundum naturam suam necessarias & immutabiles : quare , si eæ secundum se variabiles sint , nulloque

certo nexu per se cum effectu coherentes, meritò hic illarum intuitu dicitur contingens. Aliam enim contingentiam fingere quam quæ tota ad causas secundas veniat referenda, non permittit necessaria causæ primæ & in intelligendo perfectio, & in causando independentia.

XII.  
*Existèntia  
quælibet  
Deus plenif-  
simè cognos-  
cit,*

Tandem, quemadmodum quæ futura olim erant juxta Decretum Dei, suo tempore per actualem ejusdem Providentiam existunt Præsentia; sic etiam quemadmodum Deus illa futura prævidet vi decreti, donec tempus advenerit quo producantur, ita actu eodem immutabili eadem pervidet Præsentia vi actualis providentiæ, simulatque hoc tempus affulserit. Hac de re dubitare non sinit totalis cujusvis creaturæ secundum omnia sui prædicata à Creatoris sui influxu dependentia; quæ non patitur quicquam in ea existere, quod non, quantum habet entitatis, tantundem habeat dependentiæ. At jam antè probavimus, quicquid à Deo pendet pendere ab eo rationali modo: quapropter nihil quoque ab eo productum est, nisi cum influxus sui, tum præcreantis, tum conservantis, tum gubernantis, intimâ conscientiâ. Ex quo rursùm infero, vel nullam esse Numinis Providentiam; vel, si sit Providentia circa res creatas, non minorem esse earundem penes Deum, ita loquar, Pervidentiam. Scitè de hoc negotio Augustinus: „Non multæ, sed una sapientia est, in qua sunt immensi quidem atque infiniti thesauri rerum intelligibilium; in quibus sunt omnes invisibiles atque incommutabiles rationes rerum, etiam visibilium & mutabilium, quæ per istam factæ sunt: quoniam Deus non aliquid, nesciens fecit, quod nec de quolibet homine artifice rectè dici potest. Porro, si sciens fecit omnia, ea utique fecit quæ noverat. Ex quo occurrit animo quiddam mirum, sed tamen verum, quod iste mundus nobis notus esse non posset, nisi esset: Deo autem nisi notus esset, esse non posset.

XIII.  
*Etiam mi-  
nima quæ-  
que ac vi-  
sissima.*

Turpissimus itaque error est plurimorum Scholasticorum, quando ad Singularia scientiam Dei extendi debere negant; æstimantes nimirum divinum intellectum ex inopia propriæ mentis, in difficilibus suis de Universalibus nugis miserè sese torquentis. Quin, validissimis istis rationibus moti, nil nos metumimus affirmare, Divinam mentem in numero habere omnes ac singulos

vermiculos, omnes muscas, animalia omnia & partes singulorum, omnes pilos animantium, omnes arenas littoris, omnes guttas maris, omnes pluviarum stillas; omnes omnium figuras, qualitates, conditiones, situs, motiunculas, momenta, modos, habitudines, tempora, loca; omnes omnium hominum cogitationes, affectus, & intentiones. Hæc omnia & singula ut à Deo absolutissimè pendent, ita eadem adeo clarè & perfectè ipse intuetur, penetrat, & comprehendit, ac si tota vis mentis illius in unum duntaxat illorum intenta foret. Neque ullam ista sciendo sibi conciliat ignominiam Deus magis quam faciendo; cum vel minima quoque creando suam propalaverit Omnipotentiam. Et quis ignoret minima, qui non pariter ignorare dicendus sit maxima; quorum momenta à minimis haud rarè pendent? Neque eadem causæ laborare nos hic sinunt de malis, falsis, imperfectis; quæ, uti eveniunt permittente Numine, & permittente ista non minus rationaliter, quam bona, vera, perfecta producente, etiam non magis quam hæc illi possunt ignorari. Adde, & ista frequenter rerum optimarum ac perfectissimarum esse occasiones; neutiquam ergò ignoranda illi, qui hæc habet sine dubio perspectas. Ut absolvam, quod Numen demonstravimus cognoscere se ipsum infinitum infinitè per se ipsum; & in perfectissima sua Potentia, Possibilia omnia; in liberrimo Voluntatis suæ decreto, Futura omnia; in efficaci sua Providentia, Actualia omnia; id ipsum meritò dicitur perfectissimo sciendi modo cognoscere omninò omnia. Atqui hoc ipsum est quod de Deo demonstrandum ab initio sumebamus.

Caterum ex hoc vario objectorum genere varia resultat Scientiæ Divinæ consideratio, & non una ejusdem, etsi in se simplicissimæ, divisio. Missis nunc præ brevitate aliis, celeberrima ac receptissima ejus est distinctio in Scientiam Necessariam & Liberam. Illa est, quâ Deus ea cognoscit, quæ in alio statu, quam quo cognoscuntur, cognosci ab ipso absolute non possunt; qualia sunt, tum Deus ipse; tum, quæ ex Divina Sufficiencia per se immediatè fluunt, Possibilia. Hæc est, quâ Deus intelligit ea, quæ, si aliud decreto suo definire voluisset, etiam sub alio statu menti Divinæ obijci potuissent.

XIV.  
*Scientiæ  
Divinæ in  
Necessariam & Li-  
beram di-  
visio.*

sent, quam quo de facto nunc obijciuntur : qualia sunt omnia omninò tum Futura, tum Non-futura. Prior illa nullam decreti Divini determinationem supponit, sed fundatur in ipsa perfectissima Dei natura ; undè & Naturalis dici solet : etiam simplicis Intelligentiæ ; etsi quidam hanc sumant strictius, pro Scientia Naturali restricta ad objectum suum secundarium, videlicet Possibilia : etiam Theoretica, vel Abstractiva, quibusdam nuncupatur, quatenus cogitatur abstractè ipsas possibiles rerum essentias considerare, nullà habità ratione futuritionis. Posterior hæc, sive Libera Dei Scientia, in signo rationis, sequitur actum divinæ voluntatis decernentem de rerum futuritione aut non-futuritione ; undè etiam Visionis appellatur, quatenus eà Deus ab æterno prævidet res in quacunque temporis differentia vi decreti extituras, vel absolutè non-extituras : Practicam quoque alii vocant, quandoquidem objectum ejus sunt res, quatenus aliquando sunt in actum deducendæ, vel in perpetuum ab omni actuali existentia excludendæ. Ex quibus distributionis hujus non sensus tantum intelligitur, verum etiam sufficientia. Nihil enim tanquam scibile potest cogitari, quod non sit vel ipse Deus, vel quid à Deo dependens ; atque hoc iterum vel fluens ex ipsa Dei natura, vel ex indifferenti voluntatis placito. Quorum illud & istud Scientiæ Necessariæ, hoc Visionis, objectum est.

## XV.

*Media  
Scientia  
quid, &  
quo sine à  
suis invento-  
ribus exco-  
gitata ?*

Non tamen ista veritatis simplicitas satisfacit, quibus indifferens voluntatis suæ libertas, quam elegerunt propugnandam, unica philosophandi regula est, quique potius quascunque veritates divinas turbare volunt, quam ut huic idolo quicquam decedere patiantur. *Ευενημα* invenerunt superiori seculo Jesuitæ ; foverunt dein quivis liberi arbitrii patroni diligenter. Nimirum, hinc quidem pudebat certam futurorum liberorum præscientiam Deo detrahere, cum Socinianis : indè tamen cum ea conciliare desperabant supremam illam, quam ipsi fingunt, creaturarum rationalium *ἀνθρώπων*. Quid ergo ? Quo tutius tantis de rebus nugarentur, tertiam quandam placuit fingere Dei Scientiam, eamque inter istas duas interponere *MEDIAM* ; sic dictam, quod sit mixtæ quasi conditionis, conveniens scilicet partim cum scientia Naturali, quòd omnem divinæ vo-  
luntatis

luntatis actum antecedit; partim cum Libera, quia (ut Auctores illi loquuntur) sicut Deus per scientiam Liberam potuisset res futuras non-cognoscere, si statuisset eas non-producere, ita etiam per scientiam Mediam potuisset non-præscire, quæ creaturæ re verâ facturæ sunt, si pro sua libertate non ea fuissent facturæ, sed aliquid aliud. Itaque eam versari volunt circa actiones liberas creaturarum rationalium, quatenus quid ipsæ, si quando in his vel illis circumstantiis ponerentur, facturæ sint secundum liberam voluntatis suæ inclinationem, prævidet Deus; idque (in quo rei cardo vertitur) ante ullum suæ voluntatis hac de re decretum. Qui rerum eventus quoniam à certa conditione sunt suspensi, atque sub conditione à Deo cognosci statuuntur, etiam scientiam hanc inde vocant Conditionatam. Ubi & hoc observandum est, ejusmodi contingentium conditionatorum tam antecedens quam consequens actu in certa temporis differentia hætenus non poni; sed de hoc definiendum esse per decretum, post istam per scientiam Mediam prævisionem. Atque hoc pacto unice salvari posse jactant & agentis creaturæ libertatem, & scientis Creatoris certitudinem. Postquam enim prævidit Deus, quod creaturæ liberum arbitrium, in his vel istis circumstantiis collocatum, sese sit inclinaturum, jam demùm pro re nata decernit; atque ita prævisæ causæ aliquis creatæ volentæ suam dein quoque adjicit voluntatem.

At nostro judicio nullum unquam fingi potuit commentum stultius atque absurdius. Primum quidem ipsam rerum sciendarum naturam hanc scientiam prorsus respuere, satis evincunt, quæ §. xiv. in hanc rem allata sunt. Gravius est, quod in Divinas perfectiones non uno modo arietet hoc dogma. Enimverò quis ferendam putet in causâ primâ scientiam, quæ primitatem ejusdem ac independentiam prorsus evertit? Nimirum præit, ex se ipsa determinando suo quodam jure semet ipsam, causâ creatâ. Mox illam creaturæ prædefinitionem, suâ tum scientiâ, tum voluntate, sequitur Creator. Imò sequitur vix passibus æquis. Nullus enim excogitari potest circumstantiarum ordo, qui sufficiat fundandæ vel probabili conjecturæ, nedum certæ scientiæ, de electione liberi arbitrii; siquidem (quod contendunt adversarii) natura ejus in hoc sita est, quod  
fit

XVI.  
*Absurditas  
ejus pluribus  
instantiis  
detegetur.*



fit facultas quæ, positis etiam omnibus ad agendum requisitis, agere possit vel non-agere. De Fato verò quid dicemus; cuius omnium fortissimos se destructores gloriantur isti? Certè id fatuissimum inducitur, & plus quam Stoicum; quatenus citra Divinæ voluntatis præfinitionem aliquid statuitur futurum, idque tanquam tale à Deo cognosci, proptereaue ab ipso decerni. Etiam de Divinæ voluntatis libertate quid fiet? Hanc nullam citra indifferentiam consistere volunt. Ne quid ergò ea in homine patiatur detrimenti, fingunt prævideri determinationem voluntatis creatæ, antequam definiat voluntas Creatoris. At nullam hoc pacto huic relinqui libertatem, quatenus ipsa nil determinare potest, nisi id præcisè quod jam antè electuram præcitat creaturam, quis non videt? Et quâ obsecro ratione futurum id sciri potest, in quo nullum planè fundamentum reperire datur, ob quod futurum potius credatur, quam non-futurum? quandoquidem præter ipsum Dei decretum (quod totum quam anxie possunt hinc remotum volunt isti) nihil unquam cogitare datur, cuius vi ab æterno aliquid scientiæ divinæ objiciatur tanquam futurum: cui difficultati nemo dederit exitum. Adde, quem hæc scientia insert, discursum, ac successivum cognoscendimodum, Deo jam dudum negatum. Videlicet, nihil determinandum est Numini, quod non se, facere oportere collegerit ex prævisa actione suæ creaturæ. Pudeat profectò tueri tantum sacrilegium, Dei pariter ac creaturæ naturam penitus subvertens, tamque mille modis in illam contumeliosum!

**XVII.**  
*Difficultas  
 tum in hoc  
 negotio præ-  
 cipuarum  
 solutio.*

Non tamen hujus patronis suæ desunt subtilitates, quibus ceu rationibus eam commendent. Multum adferunt Logicorum effatum, quo duorum contradictoriorum alterum semper verum, alterum falsum, pronuntiatur. Undè sequi putant, cum futurum & non-futurum contradictoria sint, etiam ab æterno, antecedenter quoque ad Dei decretum, alterutrum eorum suam habuisse veritatem; consequenter Intellectui Divino (quem nulla latet veritas) ante voluntatis determinationem, per scientiam hanc Mediam, cognitam. Verum, si quod res est attenderent satis, intelligerent nullo negotio, antè Dei decretum rebus competere posse affectionem nullam, præter meram



meram possibilitatem : ut hæcenus omnia sint & à Deo cognoscantur non alio modo , quam tanquam ( si ita vis ) non-futura : sed merè negativè ; id est , tanquam talia , de quorum positivo ac definito statu , sive futuritionis , sive non-futuritionis , hæcenus nil certi sit , aut sciri possit . Etiam in ore habent frequenter enunciationes hypotheticas , quibus rerum , earum quoque quæ nunquam evenerunt , conditionata passim in Sacris prædicitur futuritio : undè & Scientiam Dei , cuius per enunciationem aliquam talem conditionatam sit manifestatio , conditionatam esse concludunt . Sed errant longissimè . Potest enim absolutæ scientiæ signum esse enunciationi conditionalis . Quod facillè intelligitur , si attendamus , duarum rerum possibilitum per voluntatem Dei factam esse potuisse ab æterno connexionem , ut tamen neutram earum unquam futuram decreverit & præviderit . Atque hæc talis duarum rerum connexio ad fundandam conditionatæ enunciationis veritatem sufficit , etsi nulla sit ipsius consequentis tanquam futuri per scientiam Mediam prævisio . Exemplis parcere jubet brevitatis . Etiam cognitio hujus rei facilior erit , ubi actum fuerit suo loco de Decretis Divinis . Imprimis verò , per absolutam Dei prævisionem , citra Mediam scientiam , libertati nostræ vim inferri , vociferantur . Et fatemur lubentes eam inferri illi , non quam nos habemus , sed quam ipsi nos habere fingunt ; junctam scilicet cum absoluta quadam *αὐτεξουσία* atque omnimoda istiusmodi indifferentia , quâ quis , positus etiam omnibus ad agendum requisitis , agere potest vel non-agere . Hanc libertatem uti non patitur dependens creaturarum natura , ita eandem destrui per independentem Creatoris præscientiam , ipsa veritas est . Quid ? quod facillè sit demonstrare , ne quidem stante hac Scientiâ Mediâ , salvam esse posse talem voluntatis nostræ *αὐτονομίαν* . Id sufficit , si rationali complacentiæ ( quæ vera libertatis anima est ) nihil obstat futurarum nostrarum actionum certa ac definita per Scientiam Visionis cognitio ; quæ aliquam quidem arguit rei prævisæ necessitatem , nullam interim ei infert vim coactivam , quam libertati adversari uti damus , ita longissimè distare dicimus ab ea quam tuemur scientiâ . Sed & hæc ex infra dicendis clariora evadent .

At verò , detur etiam in hisce aliquid menti nostræ occurrere , XVIII.  
quod non sit ei satis perspicuum . Non unum hoc est in infinita *Sapientiæ*  
R Dei *divinæ my-*

*storia reve-  
renter ag-  
noscenda.*

Dei Sapientia mysterium. Singula quæ de ea hæcenus tradidimus maximam merentur Admirationem, pari cum Veneratione conjunctam. Hæc piam mentem docet, satius esse suam agnoscere in hisce ritè cogitandis curtam supellestem, quam temerario ausu immensæ profunditatis tentare fundum: quippe quæ novit, non alibi magis quam in hac ipsa sublimitate sese commendare tantarum rerum majestatem. Eadem illa filere jubet, quoties scientiarum Deus, vel naturali rationis lumine docet, vel sublimiori revelatione dictat veritates, cogitatione nostrâ altiores, ingeniolo nostro impervestigabiles. Qui mutit hîc quicquam, tantum sapientiæ infinitati detrahit, quantum eâ rationis decempoda minor est. Beatus ille unus, qui in istum oceanum mentem suam totam transfundit atque immergit! Sed & quam hinc discimus Modestiam in pervestigandis tam sapientis Dei operibus! quorum summam exploratam habere, atque ipsorum perfectissimas in mente divina ideas ad plenitudinem usque cognoscere, idem profectò est. Jactent ergò alii suam hîc quandam quasi omniscientiam; putent nihil sibi occultum ex tot naturæ mirabilibus; definiant audaciter de singularum rerum ortu atque constitutione, haud aliter ac si supremo Artifici fuissent à consiliis! Nobis tutius erit, curiosos nimium animi motus inhibere: quippe quibus persuadet tanta Creatoris sapientia, plurima esse, *quæ nos nescire voluit maximus Magister*, quæque etiam *scire non velle, erudita inscitia sit*. Deniquè, quid animi nobis esset omnibus, si continuò obversaretur Numen Omniscium, quod quæ nos gerimus auditque videtque, ipsisque animis nostris interest, mediisque cogitationibus intervenit testis *καταλογωμένης*? Quem non ista vel cogitasse dispudet, dum ad eò nullam sentit esse suam sub oculis tanti Domini humilem reverentiam!

*Hæc mente tacita cogitanti mihi stupor  
Torporque sensus alligat;  
Animus labascit, quum Tua miracula  
Perpendit hæc Scientia:  
Citius inibo numerum arene in litore,  
Quot voluat æstus corpora,  
Quamvis ocellis pervigil nunquam meis  
Dulcem soporem indulsit.*

EXER-

## EXERCITATIO DECIMA-NONA,

D E

## DEO VOLENTE.

## SUMMARIUM.

- I. *Voluntas Dei paucis explicata & asserta.* II. *Voluntas Divina non nisi perfectissimo modo actiosa.* III. *Voluntas Dei agnoscenda prorsus Independens.* IV. *Eadem Liberrima est; & quo sensu Indifferens quoque?* V. *Dei Voluntas Simplicissima, Immutabilis, Aeterna.* VI. *Affectus omnes à perfectissima Voluntate removendi.* VII. *Deus semet ipsum vult perfectâ quadam complacentiâ.* VIII. *Alia quævis à se vult Deus; Possibilia nominatim, & futura.* IX. *Præsentia quæque Deus vult; etiam Mala, & quo modo?* X. *Distributio Voluntatis Divinæ in Beneplaciti & Signi.* XI. *Alia ejusdem in Occultam & Revelatam distinctio.* XII. *Pro concilianda altera illarum cum altera, monita duo observanda.* XIII. *Voluntas Dei Decernens vel Approbans; & hæc quæ?* XIV. *Decretum Divinum quid; & circa quæ versetur?* XV. *Decreti Divini existentia rationibus adstrueta.* XVI. *Decretum Dei nullum multiplex, mutabile, suspensum.* XVII. *Difficultates hic occurrentes breviter discussæ.* XVIII. *Quâ modestiæ cautelâ*

*arcana hæc Dei cogitanda. XIX. Problematis, de Decreto Dei positivo etiam circa Non-futura, brevis consideratio.*

I.  
Voluntas  
Dei paucis  
explicata &  
asserta.



D alterum Actionum Divinarum Principium progredimur, *scilicet* VOLUNTATEM; Actum illum Dei Viventis perfectissimum quo sibi placet in se ipso, atque etiam, propter se, in omnibus aliis à se. Non moneo, actum volendi primum cum actu secundo in Deo prorsus coincidere, neque adeò hoc loco de eisdem ab invicem distinguendis quicquam esse laborandum; cum id ex iis quæ de Simplicitate Dei jam antè dicta sunt intelligatur abundè. Nil interim id obstat, quò minus Voluntas hic à nobis concipiatur ad instar Facultatis, indefinente exercitio volendi perpetim operosæ: talis enim notio distinctius pro modulo concipiendi ac pressius permanentem Deiperfectionem, non tanquam Actionem, sed Attributum, actionis principium, nobis repræsentat. Pleniorem rei hujus intelligentiam dabunt sequentia. Dari verò in Deo Voluntatem, multis in antecessum demonstrare operæ pretium vix videtur; tantæ ea veritatis necessitatis atque evidentæ existit. Certè præcipuum rationalitatis prædicatum Voluntas est, atque indiviso nexu cum Intellectu cohærens: ut neutiquam eâ carere queat, cui jam antè Intellectum asseruimus, summa Ratio. Quid? quod sit perfectio inter alias quâvis facilè prima, dominum esse suarum actionum per supremam quandam ἀντιστάσαν; quam qui in Deo non concipit, non jam is Numen concipit, sed brutum prorsus idolum. Et quæ possit esse rei Adorabilitas, penes quam nulla secundum Voluntatem boni malive est dispensatio. Adde pulcherrimum hunc Universi ordinem, ac miram illam totius naturæ in tanta partium vicissitudine constantiam: quæ resunderet velle vel in Epicuri oberrantem vago casu fortunam, vel in Porticûs ferream fatorum seriem (ut ea hodiè vulgò explicatur) insanientis stultitiæ est, non sanæ mentis Philosophi; qui quocunque oculos circumfert, ista cumulatim obvia habet  
ubi-

ubiquè, quæ ne cogitari quidem queunt, absque dominio sapientissimi Numinis, definito quodam perfectissimæ Voluntatis consilio istæ omnia producentis, conservantis, gubernantis. Et quæ esse queat Voluntas in creatura, cujus non exsuperans plenitudo, modo Ipsi convenienti, existat in Creatore? Desino alia adserre, ne nimius sim in re obvia.

Altioris indaginis est, & quænam Deus velit; & quo modo? Posterius hoc totum complector verbo unico, si dixero, actum volendi Divinum esse Perfectissimum. Neque, opinor, erit, quisquis Numen ens perfectissimum agnoscit, qui expressè assertioni nimium manifestæ ausit contradicere. Contradicunt tamen reverà plurimi, haud aliam ferè formantes notionem de entis primi Voluntate, quam qualem suppeditat suæ propriæ voluntatis imperfectissimæ conscientia: nil attendentes immensum discrimen, quod est inter Voluntatem quæ ipsa subiecta est rebus, qualis est hæc nostra, atque eam cui subjiuntur res ipsæ, qualis est illa Dei. Hic spiritus ille est, atque, ut ita dicam, quintessentia istius veneni, quo universam penè Divinorum Mysteriorum doctrinam virulenta Pelagianismi hydra foeditissimum in modum conspurcavit; hæc una radix tot sacrilegorum dogmatum, ac contumeliosissimorum in supremum Numen errorum, quibus, quæ verbis asseritur, re ipsa subvertitur, Divinæ Voluntatis perfectio. Distinctius ergò notare juvabit quædam capita, in quibus cardo huius rei potissimum vertitur; sed pro instituta brevitate paucis tangenda potius, quam pertractanda.

Ac primò quidem loco firmiter tenendum est, omni omnino modo Independentem esse Divinam Voluntatem. Etenim, si communi quodam omnium sensu (eorum imprinis quibuscum hic agimus) rerum creaturarum unaquæque eo cæteris creditur præstantior, quo pleniori quodam suo jure fruatur, minusque alterius arbitrio obnoxia utitur voluntate; utique manifestum est, tantum cuique voluntati deesse perfectionis, quantum illi detrahatur Independentiæ: ut quæ perfectissima agnoscenda est Voluntas, hoc ipso ab omni dependentiæ specie prorsus sit absolvenda. Etiam unumquodque naturæ suæ convenienter operatur quicquid operatur. Itaque cujus entis esse

## II.

*Voluntas  
Divina non  
nisi perfectissimo  
modo actiosa.*

## III.

*Voluntas  
Dei agnoscenda  
aprioris  
Inde-  
pendens.*

est ipsum Independentem esse, illius quoque activitas in volendo non potest non per omnia paralem cum essentia involvere Independentiam. Et à quo, obsecro, pendeat arbitrium entis independentis, nisi ab aliquo à se independenti? Tale verò præter Deum cogitare, meram esse contradictionem, jam antè demonstravimus. Ergò, si præter Deum nihil independentem, utique nec quicquam existit, quod non pendeat ab eo qui solus est independentem. Verum, non quovis modo à Deo pendet, quod ab ipso pendet, sed maximè rationali; ut nihil sit quod non sit ab Ipso productum, uti scienter, ita volenter, ut ita dicam. Ex quibus luce meridianà clarius est, unumquemque qui non cupit fingere ens extra Deum à Deo independentem (id est, aliquid præter Deum Deo æquale, aut majus) fateri debere, nihil omninò cogitari posse à quo pendeat Voluntas illius, qui nihil extra se agnoscit, quod ipsum à sua non pendeat Voluntate. Quæ cum ita sint, frustrà sunt quicunque aliquid concipiunt, à quo, vel tanquam ab objecto, vel tanquam à causa procatartica, vel ratione quâvis aliâ, suspendatur qualicumque modo actus volendi in ente primo; quod tanquam prima ratio neutiquam agnoscitur, nisi sic suo singula disposuerit arbitrio, ut non independentis consilii mensura sit res volita, sic loquar, sed rei volitæ norma unica sit consilium Numinis independentem.

## IV.

*Eadem Libertas  
berrima est;  
et quo sensu  
Indifferens  
quoque?*

Atque hanc Voluntatis Divinæ independentiam comitatur omnimoda ejusdem Libertas. Coactio saltem nulla cadit in ens quod non alterius lege, sed à se agit, independenti quâdam sui arbitrii complacentiâ. Scilicet, Spontaneitatem in agendo poscit Independentia; Rationalitatem, Intellectus Dei: hæc illi juncta ipsa Libertas est. Non tamen eâ solâ absolvitur quicquid in voluntate Divina existit libertatis: Indifferentiam quoque ad utrumlibet oppositorum eidem tribuimus. Tantum ne ad quævis eam extendamus, cavendum est. Etiam (quod docebimus infra) semet ipsum vult Deus, & quicquid perfectissimam suam naturam indiviso nexu comitatur, qualia esse possibilia suo loco ostendemus: verum minimè indifferenter; quandoquidem summa complacentia in summo bono summa quædam perfectio est, atque ideo ab ente perfectissimo omninò indivisa.



indivisa. Ex quo eodem principio fluit, ad ipsum actus volendi exercitium minimè quoque indifferenter sese habere naturam Divinam. Neque enim planè non-velle potest, quod se saltem non-velle non potest. Quin & actus volendi secundum sese perfectio si sit (uti est; citra hoc enim ne unquam quidem in ens perfectissimum cadere posset) inseparabilis existit ab illa natura, quæ in se comprehendit consummatà plenitudine quodvis perfectionum genus. Imò, non potest non indifferenter velle, quod à nullo externo, propter independentiam, vel in volendo impediri, vel ad volendum excitari potest. Quid ergò? Eadem illa voluntatis independentia, quæ non finit Deum non-velle, arguit cum hoc vel illud præter se velle summâ cum *ἀδιαφορίᾳ*; quum nihil eorum quæ extrâ Deum sunt, quicquam necessariæ connexionis habeat cum natura Divina perfectissima. Vult ergò Deus rerum quarumcunque extra se contingentes status, affectiones, nexus, indifferenti prorsus voluntatis suæ determinatione ad hoc ut sint vel non-sint, tales vel aliæ sint, sic vel aliter cohæreant, &c. Atque hinc naturæ axiomata, Actiones Dei ad extra esse indifferenter liberas; de quo suo loco plura.

Insuper Simplicissima Divina Voluntas est: actus scilicet unus idemque, quantacunque etiam fuerit multiplicis objecti varietas; imò nec ab essentia Volentis Dei divertus. Neque enim finit retrò demonstrata Dei Simplicitas, quicquam, quod ipse non sit, in Deo dari. Ut omnis quæ hîc concipitur distinctio merè rationis sit. Quod obijciunt de volitione Dei, ab essentia ejusdem necessariò reapse diversa, quòd hæc libera non sit, ut illa, sed necessaria, nullius id momenti esse, evincunt modo dicta de necessaria ipsius actus volendi in Deo existentia; etsi libera sit & indifferens actus istius necessari in hoc aut illo objecto, secundum se contingente, terminatio. Ex quibus Volitionis hujus in Deo Immutabilitas sponte suâ sequitur. Quod enim perfectè simplex est, ac cum essentia immutabili unum idemque, id, manente eadem essentiâ, non posse non manere idem & immotum, necessum est. Et quæ causa excogitabitur, quæ Numen perfectissimum & independens nolle faciat, quod voluit; aut velle, quod noluit? Omnis pro-

V.  
*Voluntas  
Dei Simplicissima, Immutabilis,  
Æterna.*

fecto



fectò consilii mutatio aut ex merà animi levitate oritur ; aut ex quadam vel imprudentia vel impotentia , quandò videlicet improvisi casus intercedentes . quos vel avertere vel mutare in manu non est , ea capere cogunt nova consilia , quæ apta sunt novis atque inopinatis mutatarum rerum circumstantiis. Eum verò fingere in Numine aut sapientiæ aut potentiæ defectum , ut rebus à se pendentibus suum subijcere arbitrium habeat necesse , stoliditatis profectò est ac stultitiæ omnem modum superantis. Absit itaque à Numine mutanda voluisse ! quod , ut scitè ille , Majestatis diminutio est , & erroris confessio. Denique , si entis independentis atque infinitè perfecti perfectio sit immutabilis & simplex voluntas ( uti esse ostendimus ) dubium esse nequit , quin eadem quoque sit ac esse debeat Æterna , expers principii , carens fine , nullique obnoxia successioni : de quibus quandoquidem ex dictis constat , quicquam addere non est necesse.

VI.  
*Affectus  
omnes à per-  
fectissima  
voluntate  
removendi.*

Quæ omnia cum ità sint , neque per independentis naturæ absolutam perfectionem aliter sese habere possint , liquet , quam jure merito suprà audacissimæ temeritatis reos egerimus homunciones , quos non pudet , ad suæ qualiscunque voluntatis modulum revocare tam stupenda supereminens illius quæ in Numine existit mysteria. Eo usque tamen quidam eorum processerunt antropomorphiticæ insanix , ut Deum suis etiam laborare Affectibus contendant , affectu profectò nimium stolido ac perverso. Quasi scilicet in tranquillissima mente leves isti ac parum stabiles dominantur animi motus ! quibus jactatur humana voluntas , ex hoc uno , quod sibi ex se ipsa stabilitatem promittere non valeat , sed indigentix ac votorum suorum complementum ab extrinseco arcessere debeat , sæque illis plerumque rebus affigat , quas in potestate sua nequaquam habet , & quæ , si vel maximè haberet , tamen , dum ipsæ instabiles sunt ac aurà leviores , se ipsis firmiora quietis fundamenta animo præstare neutiquam possunt. Cæcutit profectò planè , quin non ex dictis videt clarissimè , longè aliam esse debere volendi rationem , & ab istis mutationibus atque imperfectionibus remotissimam , in eo , qui nullas suæ voluntatis causas extra se à quibus impellatur , agnoscere potest , sed qui ipso suæ voluntatis

tatis imperio sibi subicit universa. Sunt animi Passiones perfectiones in illis, in quibus perfectio est appetere quod deest, fugere quod obest! non tamen sunt in illo, cujus voluntas sui solius sufficientiâ satiatur usque adeo, ut ne cogitare quidem detur, quod ullam Ei adferre possit vel intensiorem vel remissionem: dum nihil aliundè boni potest accipere, quod desideret; nihil Ei imminere mali, quod metuat; nihil idcirco objici, cujus impulsu immoto suo statu moveatur. Et certè quicumque Numen sibi fingunt admodò variabile, æstivans odio, percitum ira, amans, dolens, gaudens, pœnitens, sperans, desiderans, optans, ineptissimè ne istas quidem perfectiones in Deo agnoscunt, quas in suo Sapiente requirebant Stoici. Hunc sibi constare, in se divitem esse, non pœnitere, &c. affirmabant. Et affirmabant verè de perfectò sapiente; qualis cum sit nemo mortalium, illa quidem grandiloquentia statum delineat qui supra hominum esse videtur imbecillitatem, at qui dignissimus tamen est solo sapiente Deo. Tribuunt passim Numini Affectus Auctores sacri pariter ac profani, fateor; at cavendum, ne quid istis verbis innui putemus, quod sit præter voluntatis infinitè perfectæ decentiam. Quid ergò? Humano loquendi modo ea Deo tribuuntur ob similitudinem tantum effectûs, quæ in nobis existunt secundum proprietatem Affectûs. Nos v. c. Pœnitentiâ ducti, eum ipso consilio mutamus opus; quodque antè & fecimus, & facere volumus, dein quantum in nobis est destruimus, dum jam id esse nolumus. Deum pœnitere alicujus rei dicimus, quoties destruit quod fecerat; etiamsi nulla accadat ei voluntatis mutatio. Sufficienti interim illa in opere externo convenientia ad fundandum de imparibus rebus parem loquendi modum. Cæterum re ipsâ is, quem nec mœsta perturbant, nec læta demulcent (ut alibi sci-tè Augustinus) *amat, nec æstuat; zelat, & securus est; pœnitet enim, & non dolet; irascitur, & tranquillus est*: nimirum, *opera mutat, sed non consilium.*

Transco ad illa expendenda circa quæ Divina Voluntas suâ actuositate versatur. Ea sunt omnia omninò, quousque secundum rationis dictamen volibilia esse possunt. Non enim ea perfectissima Voluntas esset, quæ non velit quæcunque velle potest.

*quādam  
complacen-  
tia.*

test. Si namque ei subducas aliquid, quod non velit actu, velle tamen posset Deus, detrahis revera ejusdem infinitæ amplitudini, independentiæ, immutabilitati, atque æternitati: quæ omnia à Divina voluntate non magis separari posse, quam ipsa voluntas separari potest à Deo, jam firmiter demonstravimus. Sed de singulis verbo! Inter ea quæ vult Deus, primum objectum Ipse sibi est. Quum enim & summè perfectus existat, & adæquatà concipiendi ratione istius suæ perfectionis intimè sibi sit conscius, non potest non complacentia summè rationalis planè in eo acquiescere, in quo intellectus nihil reperit, quod displicere queat. Ut objectum perfectissimæ voluntate dignissimum sit ens perfectissimum, in quo prorsus acquiescat: quæ ipsa in se ipso sine motu quies Beatissimæ illa Dei est; de qua deinceps. Imo reverà nihil vellet Deus, aut velle posset, nisi vellet id, propter quod vult quicquid velle potest, quatenus ob aliud, quam quod ipse est, nihil velle potest, qui dependenter ab alio velle non potest. At non ideo cogitandum, ac si Dei voluntas, quæ alia à Deo esse facit, etiam ipsum existere facit, aut in esse perseverare, per modum causæ efficientis; ut hac ratione Numen dici deberet esse à sese quam maximè positivè: id enim quam sit absolum, dudum ostendimus, ubi de Dei Independentia ac Sufficiencia fuit agendi locus. Quapropter nudà duntaxat complacentià quicquid Dei circa se Voluntatis est absolvitur.

# VIII.

*Alia quævis  
à se vult  
Deus; Possi-  
bilia nomi-  
natisimè,  
& Futura.*

Etiam quævis alia à se Deus vult; ut quanta in eis est entitas, tanta sit Dei circa illa complacentia. Quicquid enim præter Deum est, quemcunque id habuerit statum, eum omnem dependenter habet ab illo qui solus est independens. At quicquid pendet à Deo, pendet ab ipso summā cum ejusdem complacentiā; quatenus non minus hæc, quam ipsa conscientia, in modo operandi qui rationalis est involvitur: cum nihil rationaliter aliquid producat, in quo sibi displicet, dum id producit. Si quid ergò esset nolente Deo, id à Deo non foret; sine quo tamen eorum quæ sunt nihil esse potest. Sed per partes! Possibilia Deus non potest non velle, qui suam Sufficienciam, quæ possibilitium radix, non velle non potest. Nolim tamen Possibilia ad Voluntatem Dei sic referre, quasi hæc, determi-  
nando

nando illa ad statum possibilitatis, eorundem esset causa. Nullo tali voluntatis actu hic opus esse, ad hoc ut res sit merè possibilis, palàm fiet ex iis quæ de Potentia Dei suo loco venient dicenda. Conferantur & ea quæ jam in hanc rem dicta sunt, *Exercitat.* XVIII. §. x. Suffecerit, simpliciter sibi placere Deum in sua Sufficientia, concepta ab intellectu suo ut est expressibilis extra se modis infinitè multis ac variis. Alia verò Futurorum ratio est. Futuratio enim, cum sit determinatio rei possibilis ad hoc ut aliquando transeat à non-esse ad esse, aliquam sui causam necessariò requirit. Eam in futuro ipso non-existente reperire non datur, quoniam antequam est merum nihil est, nec magis suâ naturâ definitum ad hoc ut aliquando, quam ut nunquam, sit. At neque, ut possibilia, ita Futura indivisim fluunt ex essentiali aliqua ac necessaria Dei perfectione. Non alibi ergò Futuritionis causam reperire datur quam in solo Entis Primi arbitrio, cui, hæc vel ista olim esse futura, ab omni æternitate secum definire placuit. Quæ determinatio cum sit actio Voluntatis, etiam Deum Futura velle, dicendum est: de quibus post pauca plura.

De Præsentibus nihil laborandum; cum tota eorum existentia ab actuali Dei influxu pendeat: quem quum non nisi liberè exerat Deus, patet nihil existere, quod non existere velit. Major de actionibus moraliter malis, sive de Peccatis, difficultas esse videtur. Non tamen de malitiæ istius subjecto, sive physica actione; quippe quæ secundum se positiva, adeoque bona est, & in tantum voluntate Dei comprobata. Verum de ipsa *avopuq*, sive actionis malitia morali quid dicemus? Ea procul dubio boni privatio est; atque hæctenus rationalis complacentiæ, quæ tantum in bono est, objectum esse nequit. Et tamen eam accidere nolente prorsus Deo, etiam dici non potest; cum multiplex Numinis circa mala istiusmodi Providentia (infrà probanda) efficaciter evincat, ea Voluntati Divinæ haud planè subduci: uti neque ullus esset defectus, si boni absentis præsentiam efficaci voluntate ponere, uti potest, ita vellet, Deus. Nunc ergò, cum non ponat eam, vult procul dubio non producere bonum, ad quod producendum non tenetur. Quorum illud voluntatem Dei permittentem circa

IX.  
*Præsentia  
quæque  
Deus vult,  
etiam Mala,  
et quo  
modo?*

mala versari evincit; hoc tamen ista voluntatis permissione nihil labis Deo affricari, docet. Quæ difficultia videri possent in hoc negotio, ea intelligentur rectius, ubi suo loco dixerimus de Dei circa peccata creaturarum rationalium Providentia actuali; quæ aeterni hujus consilii est quasi executio.

X.  
*Distributio  
Voluntatis  
Divinæ in  
Beneplaciti  
& Signi.*

Expendenda sequitur varia Divinæ Voluntatis, pro varia objectorum diversitate, ac vario nostro considerandi modo, distributio; nihil ejusdem secundum se spectata detrahens tum simplicitati, tum immutabilitati, tum independentiæ. Vulgaris illa est, quâ alia *Signi* dicitur, *Beneplaciti* alia. Hæc significat ipsum volendi actum prout is in Deo est: Illa notat eundem illum volendi actum, quatenus eum nobis manifestavit Deus signo qualicunque. Non lubet disquirere, Num, quæ dicitur Voluntas Signi, appellari potius debeat Signum Voluntatis? Ubi enim de re constat, de voce litigare nihil attinet. Imprimis quandoquidem appellatio illa hoc loco nequaquam incongrua videtur, propterea quod nullum signum inane hic occurrit, sed id omne suum signatum certò connotat atque includit. Signa verò præcipua quibus Numen suam voluntatem rationalibus creaturis plerumquæ patefacere consuevit, haud malè ad quinque referuntur, comprehensa versiculo: *Prædicat, Prohibet, Permittit, Præcipit, Implet.* Ex quo liquet, non omnem manifestationis modum pertinere præcisè ad Mandata; etsi synecdochicâ locutione voluntas Signi etiam *Mandati* dici solet. Excellens nimirum voluntatis Signi species est voluntas Mandati, quâ Deus creaturis rationalibus præscribit legem, cui ceu normæ adstrictas vult earundem actiones: quam ob rem quidam hanc voluntatem etiam dixerunt Moralem; cujus usus longè maximus est in Philosophia Practica, ubi de Regno morali quod Deus exercet in homines agitur.

XI.  
*Altera  
ejusdem in  
Occultam  
& Revela-  
tam distin-  
ctio.*

Cæterum, quandoquidem existunt plurima, de quibus definivit quidem Deus secum, nihil tamen nobis aut per prophetias, aut per præcepta, aut per eventum, aut alio quocunque modo manifestavit, haud de nihilo in ordine ad nos Voluntas Dei dispescitur in *Occultam & Revelatam*, distinctione illi priori affini, si non ferè eadem. Ridicula quidem visa ea fuit quibusdam; sed sine ratione. Etenim, non omnia saltem

nos

nos latere quæ Deus vult, palam est, ipsæque docent res præteritæ, quas ut extitisse, ita non sine voluntate Dei extitisse, omnes novimus. Ab altera parte, plurima eorum nobis occulta esse, quæ jam voluntate Dei definita sunt, arguunt, tum immensa Divinæ Voluntatis cum intellectus nostri angustis comparatæ amplitudo, tum etiam qui quotidie accidunt, non sine æterna supremi Numinis providentiâ, inopinati nobis rerum casus. Quid hîc carpat infortia? Duntaxat cavendum est sedulò (quod neglectum ansum dedit cavillandi) ne unquam voluntatem Revelatam, sive Signi, illi quæ est Occulta, sive Beneplaciti, opponamus: quasi nimirum Deus voluntate Revelatâ aliquid velit, cujus oppositum placeat ac decreverit voluntate Occulta; vel contrâ. Non ferre istiusmodi pugnam inter voluntatis suæ signum & beneplacitum, veracissimum Dei candorem, infravidebimus.

Quid ergò? dicat quis. Nonne præcipere potest Deus creaturæ, ut faciat, quod tamen facere re verâ non vult? Nonne prædicere peccata, quæ vult non fieri? Potest ista Deus: sed non ideo signum suo signato vel minimùm erit difforme. Etenim Præceptum signum est, non istius quod Deus re verâ aliquandò evenire vult, verum obligationis tantùm ad officium, cui creaturam suam adstrictam se velle, præcepto manifestat. Iterùm, Prædictio signum est, manifestans Dei voluntatem, non de obligatione creaturæ imposita ad hoc faciendum quod prædicatur; sed de eo, quod simpliciter, etiam sæpissimè præter debitum creaturæ rationalis officium, aliquandò est futurum. Conferatur ergò Præceptum cum voluntate Dei obligante, cujus est signum; Prophetia cum voluntate Dei decernente, cujus est signum; &c. nec quicquam in hoc toto negotio esse poterit difficultatis. Maximè, si id quoque observemus, non alio sensu signa à nobis debere accipi, quam quo ex intentione Dei offeruntur. Potest tacitâ conditione ex mente Dei restringi signum, quod parum attendenti videri potest absolutum; potest quandoque (quod potest quisque, sine veritatis dispendio, imò cum laude prudentiæ, vir bonus) ex parte suam voluntatem manifestare Deus, quam totam manifestasse putabit imperitus. His similibusque casibus diligenter cavendum, ne extendamus signum latius, quam quousque id extendi voluit

## XII.

*Pro concilianda altera illarum cum altera, monita duo observanda.*

Deus, ipse signorum à sedatorum interpretis omnium optimus. Exemplis hæc non illustramus, brevitatis causâ. Interim si hæc ipsa, lumine naturæ de Divina voluntate notissima, satis accuratè attendisset eximius cæterum Theologus pariter ac Philosophus, nunquam ei excidisset, quod excidisse merito nolent viri doctissimi, Fidei Divinæ posse subesse falsum. De quo agendum alibi ex professo.

XIII.  
*Voluntas  
 Dei Decer-  
 nens vel  
 Appro-  
 bans; &  
 hæc quæ?*

Non desunt, quibus voluntas Beneplaciti eadem statuitur cum voluntate Decernente. Sed minus accuratè. Etsi enim verissimum est, Decretum Dei esse ipsum beneplacitum ejusdem circa rerum futuritionem, non tamen hæc duo æquè latè patent. Etiam circa se ipsum ac merè possibilia versatur Deus suo Beneplacito; non tamen id, uti docebunt sequentia, Decretum dici debet. Ut fileam res præteritas & præsentis; quæ, quæ tales, & in quantum futuræ esse desierunt, rigidè loquendo, Decreti non quidem, Beneplaciti nihilominus, objecta sunt. Accuratiùs itaque dicemus voluntatem Beneplaciti, vel *Decernentem* esse, vel *Approbantem*: quarum quemadmodum illa insert rei nondum existentis futuritionem, ita hæc entis cujuscunque existentis comitatur prædicata realia qualiacunque. Ut reverà quæ ante rei existentiam dicebatur voluntas decernens, eadem illa, re jam existente, vocetur approbans. Undè componere licebit controversiam, an & quo sensu dicere liceat, Decreta Dei habere finem? Sed de Decreto plura, ubi aliquid de Approbante voluntate præmiserimus. Notat ea summam illam complacentiam, quâ Numen & in se ipso, & in omnibus aliis à se diversis, in quantum à se sunt, tanquam voluntati perfectissimæ conformibus, acquiescit. Quæ quomodo intelligenda sint, satis jam est explicatum §. VII. VIII. IX. ut ea hoc loco repetere non sit necesse. Idinterim hic prætereundum minimè est, unamquamque rem, quemadmodum ea existit vera, quia refert perfectiones quas complectitur exemplar ejus in mente divina, ita quoque pariter esse metaphysicè bonam, hoc ipso quòd approbante Divina voluntate existat. Non interim putandum est, hanc voluntatem approbantem re productâ verè esse posteriorem. Neutiquam: sed simul sunt, rem produci à Deo, & comprobari; cum causæ rationalis sit, nihil



hil agere, in quo non sibi, dum id agit, placeat; imo &, in cuius idea in sua mente, etiam ante rem productam, non perfectissimâ complacentiâ acquieverit. Sed de voluntate Dei Decernente, sive Decreto, philosophandum est aliquanto diligentius.

DECRETUM quandò dicimus, intelligimus actum Divinæ voluntatis perfectissimum, quo possibile quævis determinata sunt ad hoc, ut futura sint, vel non-futura. Huic actui quatenus summa veluti præluce sapientia, Consilii nomine frequenter is venire solet: remoto tamen à voce metaphorica omni isto, qui in nostris consiliis habet locum, deliberandi modo, juncto scilicet cum multiplici ignorantia ac longa inquirendi mora, nec non addubitatione molesta, quâ animus sæpe huc illuc dividitur; quæ omnia Intellectum Dei perfectissimum prorsus respuere, docent quæ hac de re suo loco dicta fuerunt. Præcognitio etiam nonnunquam dicitur: verum metonymicè; quatenus ipsum decernendi actum practica futurorum scientia indivisum comitatur. Sed rem prosequamur! Ea omnis absolvitur determinatione possibilem ad statum (liceat & nunc & deinceps ita loqui) futuritionis vel non-futuritionis. Quandoquidem autem futuritio non nisi rebus non-existentibus convenit, atque non-entis nullæ sunt affectiones, liquet hunc actum Dei immanentem esse, qui quæ talis nihil ponit extra Deum, sed denominationem futuritionis duntaxat infert in ipso fundatam. Decretum notabam versari circa possible; id est, circa ipsas perfectiones Divinas, mente Divinâ conceptas tanquam expressibiles extra Deum per potentiam. Harum quasdam futuras esse, facit Decretum. Id verò sciendum, nomine Futurorum etiam tum Præsentia tum Præterita comprehendere hoc loco: ut n. m. ista omnia aliquando non-extiterunt, ita quoque antequam extiterunt æterno Decreto objecta fuerunt, tanquam futura, etsi postquam extiterunt futura esse desierint; quod idem in omni futuro, quando actu existet, obtinebit. Dixi, Decretum finita esse possible, ad hoc ut sint futura; potius quæ Deo sint producenda: futuritio enim suo sensu communis, quæ ad efficientiam Divinam referri potest, quæ qualia sunt mala turpia, sive peccata.

XIV.  
*Decretum  
Divinum  
quid, &  
circa quæ  
versetur?*

Decreti Divini in Effectivum, & Permissivum : quorum illud notat voluntatem Dei de rebus bonis in tempore efficaciter producendis; hoc voluntatem ejusdem de malis turpibus in creaturis rationalibus permittendis, sive non-impediendis.

## XV.

*Decreti Divini existentia rationibus adstruenda.*

Dari in Deo Decretum circa res futuras, admittunt facile quotquot Providentiam dari admittunt : undè & sine dubio æternæ Providentiæ nomine idem passim venire solet. Et profectò, quum manifestum sit, non esse sapientis quicquam agere, cujus secum non antè iniverit certas rationes, deque quo intentionis scopum ac ordinem non formaverit, utique de Numine sapientissimo minimè dubitare fas est, quin id universa operetur secundum consilium illud voluntatis, quod jam antè rerum productionem secum constituit. Imò, nisi vi Decreti, nequicquam ut futurum præscire potest Deus. Undè enim sciet obsecro, nisi ex se, qui scire nihil potest dependenter ab alio à se? Ex se ergò si scit quod futurum est, in se utique fundamentum futuritionis ipsum continere oportet. Verum nullum tale excogitare datur, præter hoc divinæ voluntatis beneplacitum, cujusvi, hæc vel ista, quæ futura scit, idèò futura sciat, quia se illa ad futuritionem ordinasse novit. Pari ergò passu ambulant in Deo futurorum præscientia, atque eorundem per Decretum ad istum statum præordinatio : quapropter etiam hanc Præcognitionis vocabulo insigniri, jam ab initio notavimus. Et certè ipsa futuritionis vox involvit connotationem alicujus causæ causæ quæ aliquando erit, quod hætenus non-est. Si sic, utique in causam causarum tandem illa resolvi debet; à qua uti res futuræ pendent rationaliter, ita omninò scienter volenter. Etiam, nisi sit aliquod dominans primæ voluntatis in futura imperium, ac certus eorundem selectus, quid causæ est cur non quot possibilia, totidem sint futura? Et, cur non jam quondam fuerint, quæ olim erunt, aut unquam esse possunt? Datur ergò Decretum, si detur Deus à quo pendeant

causa.

Quam tantà hujus veritatis vis est, ut negare non tam conentur  
 etum, quam tale potius fingere quale possunt præ-  
 turis opiniones, exigentes iniquissimâ temeri-  
 supereminentiam ad volutiunculæ nostræ  
 finitæ

finitæ simulacrum. Isti bene multa ei subducere mallent, si *mutabile*, auderent: dum ejus supputet, inducunt saltem nobis Decretum, quod causas morales habeat extra Deum & temporariam originem; quod multiplex sit & diversum; quod ambulatorium sit & mutabile; & quid non? Tale nimirum, quod verbis ne quidem ponit, re ipsâ penitus tollit, dignum voluntate optimâ maximâ Consilium. Nos omnibus istis simul & semel viam jam præclusimus unâ istâ voce *perfectissimi*. Perfectissimam enim voluntatem esse non posse, nisi sit absolutè independens, liberrima, simplicissima, immutabilis, æterna, invictis rationibus planum fecimus §. II. III. IV. quæ istic dicta, cum hûc imprimis pertineant, non jam denuò inculcabitur. Concident iisdem argumentis, quas tantopere depereunt hodierni liberi arbitrii patroni, plenæ absurditatis distinctiones, quibus ipsum decernendi actum adversarii (non enim eos nostros notamus, qui commodum, objectorum ratione, vocabulis quibusdam istis tribuunt significatum) alium Efficacem faciunt, Inefficacem alium; alium Absolutum, Conditionatum alium; alium Antecedentem, Consequentem alium; alium Generalem, Specialem alium. Nos verò, secundum antè demonstrata, non minimam partem pii istius sensûs ac religionis, quam creatura rationalis Deo suo debet, in eo consistere credimus, ut nullum Decretum agnoscat Divinum, quod non à parte sui & Efficax sit, & Absolutum, & Antecedens, & Speciale.

Neque ad admittenda in Deo ista multiplicium, ac suspensionum, ac mutabilium Decretorum commenta nos cogunt illa, quæ obmurmurat corruptæ rationis immodestia ac malefana subtilitas. Fatum Stoicum hac sententiâ induci, importunè vociferantur. Sed re verà fati fatuè. Quid enim commune habet series causarum per sese ex invicem fluentium, ipsumque Deum involventium (ita enim Stoicos sensisse volunt. An bene? vel unus Seneca meritò dubitare facit) cum catena rerum, quæ nullam per se connexionem habere, sed omnem illam unicè debere asseritur liberrimo folius Dei concatenantis placito? Quin potius, quantum à Stoicismo pariter ac Epicureismo (uniuntur enim in hac chimæra duo hæc contradictoria) isti absint,

XVII.  
*Difficultates hinc occurrentes breviter discussæ.*

qui aliquam rebus ex sese tribuunt futuritionem, citra disponentis Dei arbitrium? equidem non video. Urgent, nostram thesin abolere omnem contingentiam. Sed frustra. Ut enim res unaquæque in hoc contingens est, quod intrinsicam nullam habeat necessitatem, vel etiam nullam ex natura rei cum causis secundis & proximis connexionem, ita nihil ei detrahit absoluta Dei voluntas. Interim ratione decernentis Dei nihil dici aut cogitari debere contingens, tam asserimus intrepidè, quam sumus certi, nullam posse ponitalem contingentiam, quæ non tantundem secum trahat independentiæ; cujus vel speciem creatura nulla admittit. Neque etiam mediorum usum hoc pacto è medio tollimus. Non enim minus de mediis, eorumque cum fine connexionem, ordinatum dicimus per Decretum, ac de fine ipso. An verò medii tollitur necessitas, quando docetur, tantum per illud, juxta decretum, obtineri posse finem? Gravius est, quod objiciunt, absoluto Decreto inferri necessitatem peccandi; eaque positâ, peccati culpam transferri ex creatura in Deum. Verùm omnis necessitas hæc extrinseca duntaxat est, quæ non tollit spontaneitatem illam intrinsicam, quâ creatura facere non vult, quæ sui officii esse novit, idque consilio deliberato, ex propria malitia, nihil intuens divinum decretum. Nec denique naufragium patitur nostra libertas. Non enim illa consistit in indifferenti contingentia respectu Dei, quæ reverà supremæ cujusdam independentiæ est, sed in rationali complacentia: at hæc magis stabiliri non potest, quam si immutabili decreto statuatur definitum esse, non nisi cum tali complacentia hoc vel istud acturam fore creaturam rationalem.

XVIII.  
*Quâ modestiæ  
 cautelâ hæc arcana  
 Dei cogitan-  
 da.*

Acquiescet istis facilè devota Deo mens, cui arridet maxime sobria sapientia in illis quæ sine timore atque tremore etiam cogitasse summum existit nefas. Suam voluntatem divinæ pedissequam mavult humiliter agnoscere, quam absurdo ludibrio Numini affingere voluntatem, quæ aliundè præstoletur determinationem. Polluant non uno modo tantarum rerum mysteria sophistæ; irrumpant in hæc adyta importunâ curiositate temerarii; metiantur ad sui sensûs hebetudinem infinitam volendi vim stolidi: ipsa humi repere habet tutius, quam altius assurgendo

gendo pennas amittere in sublimi, gravissimoque lapsu Icarii conatus debitas luere pœnas. Nondum, quantum quæ sunt Dei excedant humana, intelligunt fati, qui non id unice satagunt, ut quâ parte acies oculi caligat ad tantum splendorem, istic imprimis attendant, ne quam decernendi vilitatem transcribant Numini perfectissimo. Cæterum utilior cura est, vias suas humili reverentiâ, &, quæ indè nascitur, piâ quâdam, ut ita dicam, securitate, commendare arbitrio Illius, à cujus nutu pendet quicquid rerum existit. Et satisfacit sibi hic facillè, qui revelatæ voluntatis legem religiosâ observantiâ unicam agnoscit & habet agendorum normam; quippe qui certus est, talibus non nisi faventissima esse occultæ voluntatis consilia. Plura scire, ut sua nihil refert, ita ea tutè mirari, quam cum periculo rimari, mavult. Confer *Exercit. xvii. §. xviii.*

Coronidis loco verbo tangendum nobilissimum Problema: Num Deusabilia Non-futura tantum negativè non voluerit esse talia; an verò ea non-futura decreverit actu voluntatis non minus positivo, quam quo versatur circa ea quæ sunt futura? Nobis posterior sententia habetur verior, quippe quæ Decreti Divini perfectioni magis videtur congrua. Quandoquidem enim constat,abilia quævis suâ naturâ esse (venia sit voci) decernibilia, quumque sit de conceptu Decreti perfectissimi ad omnia quæ objectum ejus esse queunt sese extendere, res ipsâ loqui videtur, partem possibilitium longè maximam, Non-futura puta, ab infiniti Decreti amplitudine minimè esse removendam. Et profectò, uti non-futurum plus dicit quam merum possibile, ita quoque aliquod non-futuritionis fundamentum, ultra id quod meræ possibilitatis est, venit agnoscendum. Id verò non sufficit sola decernendi non-actio; ea enim rem merè possibilem à non-futura qua tali non discernit, cum & antecederet ad decretum in signo rationis circa purèabilia considerari queat actionis decernendi negatio. Et quid si nil unquam extra se producere voluisset Deus; num idè ab eo removendum foret omne decretum? Utique foret, nisi de non-futuris quoque id esse statuendum sit. Quumque indubium existat, Deum scire non-futura, quid aptius dicemus, quam cum illa scire vi decreti, quo ea talia voluit? Certè

XIX.  
*Problematis, de Decreto Dei positivo circa non-futura brevis consideratio.*

nisi sic, id tandem cogitandum erit, necessum habere Deum lustrare quasi rerum vi decreti futurarum seriem, ut inde demum, quid non futurum sit, ex opposito concludat. Atqui à perfectissima scientia nimium alienus est talis cognoscendi modus. Adde, nullam dari viam compendiosiore ad exitum dandum plerisque, iisque gravissimis, difficultatibus pro adstruenda Scientia Media adferri solitis, quam si cogitemus rerum non-futararum, uti ipsam non-futuritionem, ita quoque nexus quosvis possibiles Deo vi sui Decreti existere exploratos. Quo dato, ridiculum prorsus est quicquid ex enunciationibus conditionatis res non-futuras spectantibus in hanc rem operosè adserunt Molinistæ, eorumque sequaces. Confer. *Exercitat. precedent. §. XVII.*

## EXERCITATIO VIGESIMA,

D E

## DEO SANCTO.

## SUMMARIUM.

- I. *Virtutes quo sensu Deo tribuendæ; & earum à nostris discrimen.* II. *Sanctitatis Divinæ notio quid involvat?* III. *Dei Benignitas, Gratia, Misericordia, Amor.* IV. *Veracitas Divina explicata & asserta.* V. *Deum fallere posse, si velit; vel verbale mendacium proferre, absurdè dici, ostenditur.* VI. *Iustitiæ Divinæ, nominatim Vindictivæ, brevis consideratio.* VII. *Deum, vi Iustitiæ, non posse non punire peccata, monstratur.* VIII. *Palmarie difficultati paucis obviam itur.*

I.  
Virtutes quo  
sensu Deo  
tribuendæ;  
& earum à  
nostris dis-  
crimen.



Uemadmodum ad creatæ Voluntatis debitam perfectionem pertinent VIRTUTES MORALES, ad promptam observantiam illius quod ex rectæ rationis dictamine bonum est atque honestum animum disponentes, ita nequaquam suprema hæc rationalis entis ornamenta Divinæ

Vo.

Voluntati sunt deneganda. Nimirum, dictaminis rationis sive aeternæ legis, auctor atque conditor ipse Deus est; quippe qui unus ipse summa ratio est. Quod itaque Numen necessariò sibi placet in se ipso, id in nullo sibi placere potest, quod non sibi ipsi, tanquam summæ rationi, sit congruum. Scilicet, sibi placere in eis quæ sibi adversantur nequit, qui ipsi sibi simplicissimo adversari nequit. Interim quales sunt nostræ, tales etiam primi entis Virtutes esse, nequaquam cogitandum est. In creatura rationali ex accessoriarum quædam qualitates sunt; quæ uti abesse quandoque prorsus possunt, sic quoque suam patiuntur per gradus intensiorem ac remissionem. In Deo Virtus occurrit, quæ sit, non adventitium accidens, sed ipsa perfectissima Numinis voluntas, quatenus constantissimè ea vult quæ sibi existunt conformia. Vexata non minus atque celebris illa est Jurisconsultorum definitio, quæ ipsis describitur Justitia, Constans voluntas jus suum cuique tribuendi. Haud perperam qui accuratius philosophantur eruditi complures jam olim in ea notarunt, Virtutem nullam nostram, si exactè loqui velimus, dici posse ipsam nostram voluntatem, quandoquidem ea omnis quoddam illius existit adjunctum; ac tale, cujus haud illa est constantia, ut non sæpissimè in suo exercitio, etiam in optimo quoque, deficiat. De Deo secundum exactam verborum proprietatem solummodo dixeris, Virtutem ejus esse ipsam constantem ejusdem voluntatem. Tollit enim simplicitas Divina virtutem inter & essentiam discrimen; respuit immutabilitas ejusdem vel minimam inconstantiam. Quamobrem, qui non tam virtute præditum, quam potius nil nisi Virtutem Deum esse dixerit, Deo dignè loqueretur. Ad hanc collata nostra virtus ejus vix umbram assequitur; dum quæ maxima nostra perfectio est, ut in nobis est, in Deum ne quidem cadere potest. Etiam quam dissimile Numen suis existit creaturis, in illis ipsis quoque, quorum ratione hæ imaginem illius gerere dicuntur! Ut virtutes intelligant neque suas, neque Dei, quos nostrarum, ita loquar, semi-virtutum imperfectiones Deo adscribere non pudet.

Ceterum, universum Bonitatis istius Moralls in Numine complexum rectè unico SANCTITATIS nomine comprehenditur;



sio quid  
involvat?

quo aliud nihil intelligimus, quam ipsissimam illam constantem Divinæ voluntatis cum sua natura conformitatem, de qua jam diximus. Tantum notandum, non duntaxat ipsum in se Sanctum esse Deum, sed & hanc Entis primi Sanctitatem alterius cujusvis Sanctitatis in rebus creatis normam primam existere, atque exemplar perfectissimum, in exacta affectuum conformatione cum illa divinæ rationis rectitudine imitandum. Quæ una in re quemadmodum consistit creaturarum rationalium puritas omnis ac moralis integritas, ita imprimis hoc pacto quanta possunt assimilatione infinitæ bonitatis referunt imaginem, suamque summam obtinent perfectionem atque pulchritudinem. Sed de hisce alibi plura: nunc ad ipsius Dei Sanctitatem redeo. Ea variè sese exerens circa varia objecta variam plurium Virtutum subit denominationem. De earum in nobis diversitate disputant Ethici: sed ista contentio parum utilis visa fuit quibusdam, qui non absque ratione arbitrati fuerunt veram virtutem non nisi unam in homine reperiri. Ejus quicquid fuerit, hoc saltem loco de virtutum numero nil erit laborandum, ubi omnem veram pluralitatem secludit indivisa simplicissimi entis per omnia sui identitas. Atque inde distinctarum virtutum tantum Deo tribuendam dixi denominationem. Omnem illam pertransire nec mentis nostræ est, nec hujus chartæ.

III.  
Dei Ben-  
ignitas, Gra-  
tia, Miseri-  
cordia,  
Amor.

Paucis itaque tantum attingemus nobilissimum illud par, Veracitatem scilicet, & Justitiam; duo illa omnis genuinæ pietatis ac cultus Deo debiti columnina firmissima & longè præcipua: nisi tertium adjungere velis, BENIGNITATEM. Est hæc, constans illa voluntas, quæ creaturis suis, in quantum à se sunt ac sibi conformes, benevult Deus. Quæ Benevolentia etiam GRATIA quandoque dicitur, etiam MISERICORDIA, etiam AMOR; ad indigitandam scilicet ejusdem vehementiam, simul & objectorum circa quæ se exerit varium statum. Sensus ejus fugere nequit aliquem, quem non planè fugit sua omnimoda à supremi Numinis liberrima dispensatione dependentia. Testis ejus locupletissimus ista Dei beneficentia, quæ, etsi suis contentus existeret opibus nostrique nihil indigus, suas tamen perfectiones, nullâ adactus naturæ necessitate, nullo obligatus meriti debito, ex pura bonitatis abundantia, modis tam infini-

tè variis, voluit liberalissimâ munificentâ communicare rebus extra sese, homini præ omnibus illis. Sed cum magis ardua tractanda præ manu sint, non prosequimur rem facilioris studii, cujusque nimis quam manifesta in quovis Dei opere obvia sunt vestigia.

Ad VERACITATEM itaque Dei ! Notat hæc constantem illam Dei voluntatem, quâ homini nihil unquam manifestat aut manifestare potest, quod non suæ menti simul ac rebus ipsis ad amissum sit conforme. Perindè vero est, num immediatè Deus aliquid manifestet, num in ista manifestatione certis quibusdam utatur signis. Quòdenim Veracitas nostra in signis potissimum eorumque cum mente nostra conformitate locum habeat, indè est, quod aliis nihil nos persuadere queamus absque signorum adminiculo. Eisdem frequenter utitur Deus; & quando utitur, signa semper exactè sunt conformia tum animi sensui, tum rebus ipsis: ut utramque veritatem & Ethicam & Logicam hac Veracitate comprehendi velimus. Et si de priori constiterit, nullum de posteriori poterit esse dubium reputanti animo suo ea, quæ de exacta rerum omnium cum intellectu divino congruentia diximus, quando de Intellectu divino diximus? Nunc ergò, numquid quod sit contra animi sensum Deus revelare queat? videndum est. An verò dubitari potest, utrum simplicissimus Deus loquens sibi eidem sentienti queat adversari? Manifesta certè ista foret Dei secum ipso pugna. Et qui possit summa ratio rationalem creaturam ad id credendum obligare, quod alienum est à rei veritate (quæ cum mente Dei pari passu ambulat) id est, quod alienum est à recta ratione, sive quod contrariatur lumini intelligendi quod Deus ipse rationali creaturæ indidit? Juberet ergò rationem à se conditam abnegare, si quod reverâ falsum est credere juberet. At tale quid juberet, si falsa revelaret: cum omnis revelatio Divina, simulac nobis patefit, vim obligandi ad credendum quod revelatur secum ferat. Imò, quæcunque excogitari queunt mendacitatis causæ, omnes ex absunt longissimè ab ente perfectissimo. Nos Insipientiâ nostrâ atque Imprudentiâ ipsi falsum pro vero amplectentes uti haud rarò erramus, sic sæpè incauti alios nobiscum in errores trahimus: tale nihil pati Omniscientiam Dei,

IV.

*Veracitas  
Divina ex-  
plicata &  
asserta.*

cla-

clarum est. Etiam Malitia sua atque veritatis odium ad falsum dicendum hominem nonnunquam impellunt; nec non invidia, jactantia, simileque pravi affectus: quos omnes procul habere primam Veritatem, Bonitatem, Sanctitatem, manifestum est. Denique Impotentia nostra, quâ sit ut scopum sæpè obtinere nequeamus, nisi dolo circumveniat quicum nobis res est, mendacii saltem officiosi usum nobis commendare videtur, si non ut licitum, tamen ut quasi necessarium: sed neque istiusmodi necessitas urget Omnipotentem rerum gubernatorem, qui nutu suo flectit quarumcunque creaturarum voluntatem ad sibi præstitutos fines & scopos. Respuit itaque prorsus perfectissima natura divina, uti omnes falsiloquii causas, ita ipsam quoque, quamcunque fingas, mendacitatem.

## V.

*Deum fallere posse, si velis; vel verbale mendacium proferre, absurdè dici, ostenditur.*

Quæ cum ita sint, mirandum profectò est, inveniri posse hodiè, qui tanquam sapientiæ haud vulgaris arcanum persuasissimum esse cupiunt, id pertinere ad suam Numini asserendam tum sapientiæ tum potentiæ infinitatem, ut credamus, nihil illi deesse ad struendam fallaciam, satisque cum habere sagacitatis ad consuendas artificiose fraudes, ut Deus *fallere, si velis, possit*. Assertio certè cruda, neque assensum impretratura ullius, cujus non in dictata Cartesii sit obsequiosus magis affectus, quam pia ad Sanctissimi Dei Veracitatem attentio. Is (ut alia præteream ipsius hac parte placita) quando benè *negaras, Deum mentiri, vel esse deceptorem*, mox, quasi nimium dixisset, sese correcturus, ineptâ limitatione thesin universim verissimam absurdè restringit. Se enim, ait, *ibi de mendacio quod verbis exprimitur non fuisse locutum, &c.* Ut „nolit reprehendere illos, qui „concedunt Deum per Prophetas verbale aliquod mendacium „(qualia sunt illa Medicorum, quibus ægrotos decipiunt ut ipsos curent, hoc est, in quo desit omnis malitia deceptionis) „proferre posse. Hoc si sit verum, nullum unquam Divinum lumen sive naturæ, sive gratiæ, sive gloriæ, certam animis persuasionem ingenerare poterit, de infallibili rei patefactæ veritate. Si enim verbale mendacium, ad instar Medici, proferre possit Deus, quis, non id passim eum fecisse in plurimis, de quibus Rationis & Scripturarum lumine constare putamus, evicerit? Ad mendacium præcisè *verbale* hic recurrere nil juvat; quan-

quandoquidem qui verbis manifestare potest falsum, etiam quovis alio modo id potest. An vero ille hic fortè lateret (quod absit!) Atheismus, posse quidem Deum mentiri in Sacra Pagina, in qua signis *verbalibus* utitur; non autem in naturali ratione, in qua nobis res manifestat, ut illi volunt, per innatas ideas, sine verbali sermone? Horret animus tantæ blasphemix rimari mysteria. Interim, quid aliud quam hoc ipsum reverâ contendat ex illa cavea doctores, qui rotundè profitentur, S. Scripturam in rebus naturalibus sapius loqui secundum erroneam vulgi opinionem? vix video. Verbis enim erroneis id proferre quod neque menti dicentis est conforme, neque rei consonum, quodque eo sine profertur ne quis in suo errore turbetur, est formaliter mentiri, sive *verbale mendacium* proferre; quum præter ista tria ad mendacium qualificatum, ut ita loquar, nihil amplius requiri videatur. Quantum enim ad damnum attinet, quod quis in mendacio alicui adferre intendit (in quo omnem mendacii malitiam ponere videtur Cartesius, uti docet exemplum Medici ab eo allatum) id ad mendacium quatale nil pertinet: cum hoc idem etiam per veritatem quis intendere quandoque possit. Quam pulchrè interim de fide nostra mercantur, qui Divinis oraculis *verbalium mendaciorum* nubem istam offendunt, clarioribus scilicet Cartesii ideis dissipandam, viderint Theologi, quæ istarum rerum custodia imprimis commissæ est. Nos intrepidè asserimus, de nulla re naturali (alia alterius loci sunt) in tota Sacra Pagina extare enunciationem vel unicam, quæ non exactissimè cum accurata & Philosophica rei veritate queat conciliari. Verùm tanti est, reclamante Deo naturæ auctore, ista cudere pseudo-philosophemata, quæ sua constare nequit veritas, nisi divina cadat auctoritas. Ajunt quidem isti (ut ad primam assertionem redeam) se duntaxat dicere, Deum fallere posse, si velit; at nunquam velle, nunquam velle posse. Verùm, etiam plus dicere, jam audivimus. Et, si vel hoc tantum dicerent, num ergò concipiendam in Deo potentiam arbitrantur, quæ voluntatis fræno coerceatur, ne in mendaciorum sagittas prorumpat? Apage impietatem! Planè non potest quod velle non potest, qui quod potest, non nisi rationaliter potest; id est, non nisi præeunte, ut intelle-

ctū, sic voluntate. Et quid dicis, posse, si velit, quem vel-  
le non posse constat, quod dicis posse? Pari jure dixeris, v.c.  
arborem posse loqui, si velit; quam id per naturam suam velle  
non posse, intelligis. Pudeat nugacissimæ vanitatis in re gra-  
vissima! cujus momentum aliquanto diutius hic nos detinuit:  
quapropter alia quæ hujus loci sunt præterimus in præsens.

## VI.

*Justitiæ  
Divinæ,  
nominatim  
Vindicati-  
væ, brevis  
considera-  
tio.*

Ad JUSTITIAM Dei progredior, Constantem illam volunta-  
tem id retribuendi creaturæ rationali, quod ipsius est secun-  
dum legem: nimirum, vel, post consummatam omnem ejus  
obedientiam, remunerando bonum, ex liberali pacto secun-  
dum gratuitam promissionem, quâ, supereminenti suæ boni-  
tati convenienter, unicuique se tanquam summum bonum quæ-  
renti pollicitus est beatam sui fruitionem ac communionem; vel  
etiam, propter sanctissimæ legis violationem, pœnas irrogando;  
ex merito, secundum sanctionis pœnalis, legi adversus immo-  
rigeros ejus transgressores adjectæ; formulam. Ad debitam  
tantæ rei discussionem plura spectant, ardua non minus ac uti-  
lia, quàm quæ capit angustia hujus nostri tractatus. Quapro-  
pter de posteriori hac Justitia, quæ *Vindicativa* appellari con-  
suevit, pauca dixisse erimus contenti. Objectum ejus duntaxat  
est creatura rationalis; quippe quæ una & legis argumentum,  
& legislatoris potestatem, & suam ad illum subjectionem, &  
denique qui ex transgressione resultat reatum, intelligere potest  
atque agnoscere. Neutiquam ergo, uti quibusdam visum fuit,  
huc pertinent bruta, quæ per ipsam suam naturam mentis exper-  
tem, uti non legis, sic nec pœnæ propriè dictæ, existunt ca-  
pacita. Quin & jus infligendi pœnas ad solam creaturam pecca-  
tricem restringendum esse, clamat notio pœnæ, demeritum pec-  
cati evidenter supponens. Ut ad oppositam sententiam nimium  
forsan accedere videantur, qui, jure quodam dominiū, innocen-  
tem etiam creaturam malis tristibus affligere posse Deum, con-  
tendunt. Quasi id ferat conformitas cum beatissimo Numine!  
quasi infinitæ bonitati congruum sit, odisse opera manuum sua-  
rum! quasi deceat justissimum judicem adeo non dispari modo  
habere hæcenus fidelem suæ Majestatis cultorem atque impro-  
bum perduellem! Cæterum jus pœnas sumendi à legis suæ trans-  
gressoribus Deo competere, nemo negare potest, qui non vo-  
lucrit

luerit planè tollere è medio dominium Dei in creaturam rationalem, atque huius ab illo moralem dependentiam. Etenim quæ cogitari potest suprema potestas legislatoria, quæ non armata sit pari potestate legis executoriâ? Sine hac nullam veram vim obligandi illa haberet: absque ea enim liberum foret unicuique ei sese subducere impunè, atque ita re verâ à legis observantia sese suo arbitrio, ut ita dicam, dispensare. Quàm itaque evidens est creaturarum rationalium dependentia in genere moris, tam per se clarum est jus hoc Dei, tanquam dependentiæ istius vinculum necessarium atque insolubile.

Ita quidem facilè intelligitur ex natura τὸ δικαιοῦμα ἡ Θεῷ, quo qui æternam legem transgrediuntur approporionatâ tanto delicto pœnâ existunt digni. An verò tales aliquando ipso facto, sic exigente naturâ divina, sint necessariò puniendi? quæstio gravis est ac tremenda. Istuc redit res omnis: An ex libera voluntatis indifferentia, per absolutam potentiam, Deus remittere queat peccata citra satisfactionem; an verò, posito peccato, Justitiæ Vindicativæ exercitium per naturam Dei sit prorsus necessarium? De absoluta potentia sermo est: non de ordinata, juxta decretum; de qua lis nulla esse potest inter orthodoxos. Iterùm, de ipsâ pœnâ quæstio est: non de ejusdem vel modo, vel gradu, vel tempore; in quibus omnibus ex æquo atque sapienter dispensandis plurimam valere Dei tum Clementiam, tum Dominium, omnes etiam lubenter agnoscunt. Istis suppositis restrictionibus, propositæ quæstionis partem posteriorem tenendam arbitramur, utpote maximè congruam & sanctissimæ naturæ divinæ, & omnimodæ creaturarum dependentiæ, & denique nostræ fidei mysteriis. Rejctis benè multis quæ huc pertinent in aliam occasionem, unam breviter adferam rationem, quæ quidem nobis invicta esse videtur atque instar omnium. Non posse esse creaturam rationalem absque obligatione ad colendum Deum tanquam talem, per se claret. Obligationem hanc derivandam esse haud aliundè quam à lege, non minus manifestum est. Legem absque sanctione pœnali legem non esse, sed potius consilium, liquet, quia eâ non additâ impunè licet vivere arbitrio, non legis, sed suo. Jam ergò commisso peccato, eoque sine satisfactione re-

VII.

*Deum vi  
Justitiæ  
non posse  
non punire  
peccata,  
monstratur.*

missio, quærere lubet, quod emùm pacto tali in casu peccatrix creatura maneat sublex? Non certè ratione obedientiæ activæ; ab ea enim peccator peccando defecit, & factum infectum fieri nequit. Non etiam ratione obedientiæ passivæ; reatum enim cum pœna remissum supponimus. Ecce! renunciat creatura obligationi legis quod ad observantiam activam, peccando; renunciat Deus obligationi legis quoad pœnam, remittendo: soluto itaque utroque hoc obligationis vinculo, præter quod tertium non datur, solvitur re verâ actus aliquis moralis alicujus creaturæ ab omni obligatione legis divinæ. Hoc cum fieri nequeat citra abnegationem divinæ excellentiæ, manifestum est, etiam peccata impunita remittere, Deo haud esse possibile.

VIII.  
*Palmarie  
 difficultati  
 paucis  
 obviam  
 itur.*

Ad quæ quod regeri possit, ego quidem nihil planè video. Objectiones omnes sigillatim excutere, non sinit brevitas. Interim hoc ipso nostro argumento jam suppeditavimus, quo facile prosternitur fortissimus ille pro adversa sententia Hercules. Actiones Dei, ajunt, ad extra, quas inter est punitio, sunt indifferenter liberæ. Verum abusus canonis verbo detegitur. Etiam legislatio procul dubio actio Dei ad extra est. An ergò indifferenter quoque libera? Imò libera: sed quo pacto? Ab æterno indifferenter liberum erat Deo hominem condere, aut non-condere; consequenter etiam, legem ferre, aut non-ferre. Verum, posito jam conditum esse, neutiquam moralis ejus dependentia Deo relinquit indifferenter liberam legislationem. Pari ratione, peccatum permittere, aut non-permittere, Deo ab æterno fuit indifferens; atque hæcenus etiam punire, aut non-punire. Sed, posito peccato, non jam quod per se liberum erat Deo, scilicet punire, indifferens ei relinquit moralis creaturæ rationalis à Deo dependentia: uti demonstravimus. Alia & plura qui cupit, consulendus illi Gisbertus Voetius, Præceptor quondam noster & Collega memoriæ perquam venerandæ, qui egregium hac parte accuratioris experimentum dedit in sua Diatriba de Jure & Justitia Dei, quæ extat Select. Disp. Part. Primâ. Absolvo isto Virgiliano:

*Discite Justitiam moniti, & non temnere Numen!*



## EXERCITATIO VIGESIMA-PRIMA,

D E

## DEO POTENTE.

## S U M M A R I U M.

- I. *Potentia cum Intellectu & Voluntate Dei connexa demonstratio.* II. *Ejus interim à Voluntate Divina distinctiorationibus adstrueta.* III. *Atque à difficultatibus quibusdam vindicata.* IV. *Potentia Deo asserta Simplex, Independens, Infinita, Irresistibilis.* V. *Divinam Potentiam nulli posse fieri communem.* VI. *Objectum Divinae virtutis neque Deus ipse, neque contradictoria.* VII. *Possibilitas rei quâ talis nihil reale est, sed denominatio tantum externa.* VIII. *Radix proxima Possibilium est Dei Potentia; prima, Intellectus ejusdem.* IX. *Potentia Divina in Absolutam & Ordinatam divisio explicata & asserta.*



D considerandam supremi Numinis POTENTIAM progredimur: Sufficienciam istam viventis Dei, quâ extra sese ponere quæcunque perfectissimæ rationi haud repugnant ei est promptissimum. Tantam videlicet possidet Ens perfectissimum Sufficiencie abundantiam, ut non duntaxat ipsi sibi infinito sufficiat, sed &, quia sibi infinito, producendæ cuius alteri finitæ entitati, quæ præter ipsum vel concipi potest. Quæ tamen, nequis erret, ratione plurimum dispari intelligenda veniunt. Etenim quæcunque possibilis est præter Deum bonitas, per omnia dependentiam

I.  
Potentie  
cum Intellectu  
& Voluntate Dei  
connexa demonstratio.

notat ab ista prima Sufficiencia, tanquam à fonte suo ac causa suprema: quâ verò sibi Numen sufficit Sufficiencia, propter ipsam suam independentiam, omnem cujuscunque causalitatis notionem atque vel umbram removet à sese quam longissimè. Commodum autem hujus Attributi tractationem ei quæ fuit Divinæ Voluntatis subijcimus, quando nihil unquam ipso facto extra Deum ponit Potentia, de quo non jam antè æterno Voluntatis decreto penes Deum exactè fuerit prædefinitum. Quid? quod efficax atque independens sui que juris intelligi nequeat voluntas, quæ non comitem habere cogitatur tantam in exequendo virtutis facilitatem, quantam habet in formando consilio tum sapientiam tum constantiam. Aded cum Intellectu & Voluntate perfectissima connexa est Potentia, ut priora ritè in Deo non agnoscat, qui de posteriori quoquo modo dubitat. Quin, quisquis non Deum negat, Potentem Deum neget nemo: tam existit manifestum, independentiam id nequaquam possidere atque perfectionis infinitatem, quod non sibi suâ virtute quidvis subijcere valet, potentique efficientiâ quicquid extra se perfectionis esse potest ex sui ipsius perfectione derivare sufficiens est. Et quæ ulla dependentium causarum dari queat Potentia, quæ non ultimâ analysi in causam causarum primam & independentem debeat tandem resolvi? Non id nesciverunt Gentiles; quando quem supremum hominumque Deumque Patrem finxerunt, eundem passim *Omnipotentem* celebrarunt.

## II.

*Ejus interim à Voluntate divina distinctionis rationibus adstruenda:*

Et si verò cõhæreat indivisim cum perfectissimo Intellectu & Voluntate Potentia perfectissima, attendendum tamen est quam diligentissimè, ne pro modo concipiendi nostro conceptus hujus cum notione alterutrius illorum confundatur. Perperam id agunt, cum Scholasticis quibusdam, novellæ sapientiæ antistites. Quando scilicet ex præconcepta opinione istam Dei formarunt ideam, quæ nihil menti exhibeat præter meram cogitationem perfectissimam, quæque omnis intelligendo ac volendo absolvatur, non nisi alterutro modo Deum extra se actuosum esse posse, sequitur: quamobrem & quævis actio Dei transiens eisdem nihil esse dicitur, præter efficacem ejusdem voluntatem. Verùm non unam hæc sententia involvit absurditatem. Dictum jam est Divinæ Potentiæ conceptum adeum qui

qui Omnisufficientiæ est prorsus pertinere. Hanc autem à Voluntate Dei distinctum attributum esse, nemo inficias igit potest, cui non lubitum fuerit mirâ confusione universam Divinæ perfectionis infinitatem, quæ Omnisufficientiæ existit basis, solius voluntatis notione absolvere. Adde, quòd jam ab æterno voluerit quæcunque sunt aut erunt, etiam cum non-fuerunt, omnisque adeò volentia actio immanens sit, per se nihil actu constituens extra Deum; cum contrà actuale Potentiæ exercitium rem ponat ipso facto existentem: qui modus operandi ratione effectorum diversissimus nisi sufficiat fundandæ distinctioni rationis ratiocinatæ, ut vocant, Potentiam inter & Voluntatem, haud scio, quid tandem remansurum sit cujus intuitu attributa Divina ab invicem distinguere licuerit. Neque hoc tantum: etiam actiosa Dei voluntas circa non-entia versatur; illa quoque quæ nullam unquam habitura sunt actualem existentiam, qualia sunt non-futura, quippe quæ idèd talia, quia ad hunc statum positivo decreto sunt determinata. Jam verò quærere lubet, num asserendum etiam videatur, Deum ab æterno actuosâ suâ Omnipotentia id fecisse, ut eorum multa, quæ esse possunt, sint non-futura? Ita scilicet actuale Omnipotentia exercitium in nihilum tandem terminari poterit, nisi à Voluntate distinguatur. Porro, in Sacris sæpius ea Deus posse dicitur expressè, quæ tamen haud eum voluisse experientia constat. Quis huic rei, sine Voluntatis à Potentia distinctione, dabitur exitus? Imò, & sese velle Deum modo perfectissimo, jam demonstravimus. Quumque potuisset Deus, si ita visum fuisset, pro liberrimo placito, se tantum velle, nec quicquam præter se, potuisset utique actiosa esse Voluntas citra exercitium Potentiæ. Nisi quoque hæc philosophatio contendere velit, Numen haud minus sese posse ac velle. Sileo monstrificorum conceptuum syrma, quod ista Potentiæ divinæ cum Voluntate confusio secum trahit insolubili nexu; qualia sunt, v. c. Omne possibile esse futurum; quodque futurum non est neque idem possibile esse. Adeoque &, possibile potuisse fieri impossibile, atque impossibile possibile. Hinc, potuisse etiam Deum efficere ut duo contradictoria sint vera. Cum, ante decretum nihil debeat dici possibile.

bile. Sic ut, omnis Dei scientia visionis dici debeat, quatenus ad res extra Deum refertur. Ista similiaque multa, quibus universa rei Theologicæ facies immutatur, tueri necesse habent, atque reipsâ etiam hodiè tuentur, qui Potentiam Dei à Voluntate nullâ parte distinctam esse contendunt. Deniquè, nisi quæ sit inter illa duo differentia, haud equidem capio, quo demùm pacto isti Doctores asserant, Deum posse facere ut contradictoria sint vera, si velit; fallere posse, si velit; &c. An verò musteâ subtilitate dicendum erit, Deum velle ista, si velit; aut, posse, si possit? Num potius inaudita absurditate contendunt, Deum etiam velle facere contradictoria, etiam velle fallere? Utique; si dicendus sit ea posse, atque inter posse ac velle Dei distinguendum non veniat.

III.  
*Atque à  
difficultati-  
bus quibus-  
dam vindi-  
cata.*

Neque metuendum est, ne, si admittatur inter divinam Voluntatem & Potentiam quam urgemus differentia, sequatur, voluntatem Dei inefficacem esse; quippe quæ per se nihil ponat, sed à Potentia ad agendum debeat applicari. Uti enim Intellectus non idèò inefficax dici debet, quòd Deus tantum intelligendo nullum opus externum efficit, ita nullo majori jure id de Voluntate cogitare licet. Est sua, ut Intellectus divini, ita quoque Voluntatis, si sic loqui lubet, efficacia in hoc, quòd nullâ unquam parte aut iste in præcognita rerum certitudine fallatur, aut hæc in prædeterminata earundem futuritione frustretur: idque eo ipso, quòd omnia per insuperabilem infinitæ Potentiæ actuositatem talia reipsâ suo tempore constituentur extra Deum, qualia ab æterno ea, quemadmodum decrevit, ita præcivit. Quod si inefficacem quis idcirco Voluntatem divinam appellare voluerit, quòd non ipsa immediatè ponat rerum existentiam simpliciter volendo, viderit is, ne pari sequelâ eandem insipientem arguat, propterea quòd non Voluntas res præsciat, formaliter loquendo, sed Intellectus. Fortior non est objectiuncula, quâ inferunt, omnia Dei opera passim referri ad ejusdem Voluntatem, tanquam ad causam suam & fontem. Hoc enim ut concedimus, ita nullam videmus rationem, ob quam opponi debeant hoc loco, quæ re verâ subordinata quasi sunt. Uti què per Voluntatem suam res producit, quicquid ejus decretum nil producit; quique cum volentiæ suæ nutu conjungit effi-

efficientiam suæ manûs. Scilicet, etiam Sapientiâ suâ Numen agere quicquid agit haud absurdè dixeris, quatenus *cuncta superno ducit ab exemplo*. Sit ergò imperansrerum omnium principium Voluntas divina! Sed non id obstat, quo minùs exsequens principium statuatur Potentia: uti dirigens principium Intellectus est. Neque multùm moramur difficultatem, quam occurrere ajunt in concipienda aliqua actuositate causæ primæ, quæ non sit ipsa volitio. Ut enim nos minimè ii sumus, qui rerum omnium, etiam divinarum, claras ac distinctas jactamus ideas, ita facilè damus, modum operandi infinitè perfectum à finito ingeniolo exhauriri non posse. Quo tamen minimè compellimur, ad ea confundenda, quæ suo modo distinguenda esse, non una ratio efficaciter evincit. Imprimis, cum nec ipsi adversarii satis explicare queant, quo pacto tantùm volendo Deus res extra sese constituat. Verùm desino addere plura, cum jam dudum in his sim prolixior. Sed aliquanto diligentius confutandus erat error, cui multi alii haud levis momenti suam debent originem.

Itaque posse Deum, constat; & sic quidem, ut posse ejusdem non sit ipsum velle. Quod tamen accipiendum tantùm est pro eo concipiendi modo, quo sese ista duo menti nostræ offerunt. A parte rei enim adeo respuit divina simplicitas omnium plurium verè distinctorum diversitatem, ut fatendum sit, Potentiam Dei esse ipsam actuosam ejus essentiam, quatenus ea sufficit coëxistentem sibi ponere creaturam quaecunque. Absit ergò ut perfici concipiatur ab ullo superaddente actu; quales sunt vel habitus in operando facilitantes, vel actus secundi quibus ab otio ad exercitium transit agendi facultas, vel qualescunque modificationes aut determinationes undecunque oriundæ. Estque ea haud minima Numinis perfectio, quòd etiam in operando actus purus sit, atque agens per essentiam; quam qui quocunque modo ad creaturas transferre conaretur, in entis simplicissimi eminentiam injurius is nimium foret. Et si enim cum quibusdam sentiam, nullâ sufficienti ratione demonstrari posse, potentias rerum creaturarum ab essentiis earundem reapse differre; ipsæ tamen haud exeunt in actum absque multiplici mutatione, dum in operatione ab habitibus juvantur, ab obje-

IV.  
Potentia  
Deo asserta  
Simplex,  
Independens, Inflexibilis.

ctis moventur, ac deniquè quiescunt modo, pro re nata, modo operantur. Quod discrimen inter illam Dei Potentiam ac nostram accuratè notandum, ut quod subindè humano modo de Deo cogitamus, non nisi Deo dignè huic tribuendum esse, probè discamus. Interim non simplicissima tantum sed imprimis quoque independens agnoscenda est divina virtus; ut nullum sibi hìc locum vendicet vel ratio motiva quâ ad agendum extrinsecus excitetur, vel causarum instrumentalium in efficiendo necessitas. Supervacaneum foret id hoc loco adstruere, quando jam antè pluribus evicimus, nihil divinum dici debere, quod non omni modo sit independens. Cumque pariter demonstratum sit, indivisim connexa esse independentiam & infinitatem, non minus infinita quam independens Dei virtus æstimanda est. Infinita scilicet omni modo, sive ipsam ejus perfectionem inexhaustam spectes secundum se, sive modum operandi impervestigabilem, sive immensam rerum producibilium amplitudinem. Testis existit hæc ipsa *visibilis creatura, jam inde à mundo condito manifestans æternam sui Creatoris ut Divinitatem sic Potentiam*: quemadmodum alibi instituit Gentium Doctor. Quæ cum ita sint, nullam excogitare datur resistantiam, quæ Deo, exerere volenti eam quâ pollet independentis virtutis infinitatem, obicem ponere, vel moram ullam injicere queat aut difficultatem. Estque hæc victricis Potentiæ divinæ irresistibilitas, juncta cum æterno immutabilis Voluntatis consilio, atque absoluta infallibilis Præscientiæ certitudine, unicum omnis sanioris Theologiæ palladium: quo salvo, salva demum sua existit primæ causæ independens activitas, atque intemperata sua primo motori potestas atque gloria.

V.  
*Divinam  
 Potentiam  
 nulli posse  
 fieri com-  
 munitatem.*

Quandoquidem verò talis est Divina Potentia, qualem jam delineavimus, per se liquidissimum est, haud alteri cuicunque eam esse communicabilem. Non enim illa quæ Dei est communicata dici potest, nisi communicata sit & simplicissima, & independens, & infinita, & denique ea cujus unica radix est inexhausta Omnisufficientiæ plenitudo. Talia creaturæ transcribere quis potest, qui non prorsus confundere velit, illius cum ea quæ Dei est, notionem? Imò, neque finitum subjectum infinitæ virtutis capax est, nec infinita virtus ab infinita  
 natu-

natura separabilis esse potest. Ut mirum profectò sit, chimæ-ricum istiusmodi conceptum etiam Doctoribus quibusdam Chri-istianis in mentem venire potuisse. Quæ isti obijciunt de my-stica duarum naturarum in Domino Jesu unione, deque ea, quam inde fluere opinantur, idiomatum communicatione reali à natura ad naturam, cum fori Theologici sint, prætereo. Verbo expedienda difficultas alia, oriunda ex operibus sphaeram finitæ activitatis longissimè excedentibus, quæ tamen etiam crea-turas quasdam produxisse credimus, historiæ Sacræ divinâ fide per-suasi. Sed notandum, illam miraculorum strictè dictorum pa-trationem ad virtutem propriam causarum secundarum, earun-demque efficientiam realem referendam minimè esse; sed omnem, quæ in effecti miraculosi productione exeritur physica activitas, esse unius Dei: quippe qui solus, tanquam naturæ universæ auctor & dominus supremus, hujus legibus non adstringitur; atque ideò de eisdem ex plenitudine potestatis pro arbitrio dis-pensare potest. Id illius nequaquam esse, quod tanquam crea-tum naturæ legibus subest, res ipsa loquitur. Et tamen, fateor, hominibus quibusdam miracula istiusmodi passim tribuuntur. Ne-que sine causa. Cooperati scilicet sunt ii circa miraculi patratio-nem. moralem saltem quandam causalitatem exercendo, sub-jectum ad ejus fidem disponendo, divinas promissiones appli-cando, complementum earum Deum flagitando, symbolo quopiam prodigia obsignando, similibusque aliis operandi mo-dis, quibus, si propriè loqui voluerimus, miraculi patratio vestitur potius, quam ipso facto causatur. Ut nihil hic com-pareat, quod, quatenus ad creaturam pertinet, non sit finitæ potentia, quodve quicquam detrahat eis, quæ pro vindicanda soli Deo Omnipotentia gloria adduximus.

Nunc, quænam ista sint quæ infinitâ suâ Virtute possit Deus? ordine nobis expendendum venit. Innuebam id jam ab ini-tio, quando aiebam, per Potentiam Deo promptissimum esse extra sese ponere, quæcunque perfectissimæ rationi haud repu-gnant. Scilicet, ea duntaxat divinæ Potentiæ obijciuntur, quæ extra Deum existere apta sunt: ut circa semetipsum aut proprias suas perfectiones potentia suæ exercitio actuosum Numen con-cipi nequaquam debeat. Etenim, quandoquidem omnis vis

## VI.

*Objectum  
divinæ vir-  
tutis neque  
Deus ipse,  
neque con-  
tradictoria.*



activa cogitanda necessariò est tanquam causalitas quæpiam, omnisque causa causato suo naturâ existit prior, quis non videt, rationi planè adversum esse, si quis statuat entis alicujus attributum, qualis est Potentia, ipsius sui subjecti essentiam vel procreare posse vel conservare? Ut liqueat, quam hac parte clarè & distinctè philosophetur Cartesius, quando nihil dubitat, Dei *Potentiam tam exsuperantem agnoscere, ut planè sit causa cur ille esse perseveret; quia videlicet, in quo tantum est potentia, ut rem extra se positam conservet, omnino tanto magis se ipsum sua propria potentia conservat.* Profectò, vel absfona ista nimium vox est, vel absurdissima assertio! Verùm de hisce etiam actum nobis retrò, *Exercit. IV. §. 11.* Tantum ergò objecta extra Deum respicit de qua agimus Potentia. Sed quæ illa? Dixi, quæcunque rationi perfectissimæ haud repugnant; sive, quorum ideam Deus in sua mente gerit; qualia sunt absolutè omnia omninò quæ concipi queunt citra contradictionem, seu mutuatam prædicatorum essentialium repugnantiam. Quæ enim usquè aded incompatibilia sunt prædicata, ut intellectui ne quidem repræsentari possint, istæc omnia à Potentia divina secludimus, ob ipsam ejus perfectionem. Ob ipsam, inquam, divinæ virtutis perfectionem: quippe quæ non finitèam cogitare ad instar bruti impetûs; quo pacto tamen concipienda foret, si quod intelligere nequit producere posset Deus. Ut nefas sit primæ rationi tribuere Virtutem, quæ citraprævium intellectûs actum, quicquam quod non mente conceperit, formare queat. Atque hîc iterum ad partes vocandus foret Cartesius; ex cujus mente, *liquet, Deum non potuisse determinari ad faciendum, ut verum foret, quod contradictoria nequeant esse simul; ac proinde, potuisse illum statinere contrarium.* Verùm, quam sit absurdum hoc Weigelianæ sapientiæ mysterium, nunc non ostendam, qui jam dudum plurimis instantiis urgentissimis id præstiti *Exercitat. peculiari*, quâ expendebam, *An Deus possit contradictoria?* In illo labore brevitatîs causâ in præfens acquiesco.

## VII

*Possibilitas  
rei quâ talis  
nihil reale  
est, sed de-*

Ex dictis concludere licet, quid statuendum sit de rerum Possibilitate, ejusque Radice seu fundamento; de quibus tot difficiles nugæ tradunt Scholastici Doctores. Ipsa videlicet rei possibilitas per se spectata aliud nihil notat, quam puram putam de-

denominationem, desumptam à potentia causæ, cujus effici-  
tiâ id quod possibile dicitur aptum est transire à non-esse ad esse.  
Quæ denominatione cum à parte rei possibilis nihil reale sit, sed  
meram tantum dicat relationem, rectè ratiocinari hoc loco vi-  
dentur, qui possiblea quamdiu non existunt non-entibus annu-  
merant; planè ad instar rerum futurarum, quæ quamdiu &  
in quantum merè futuræ sunt, nihil reale continent, sed de-  
nominationem duntaxat à divinæ voluntatis decreto derivan-  
dam. Quapropter frustrà entitas quæpiam fingitur nominalis,  
quæ rebus possibleibus æquè ac existentibus sit communis;  
frustrà ab essentia existentia distinguitur, ut illa etiam possiblei-  
bus, hæc eis solummodò quæ extra causas posita sunt, conve-  
nire dicatur; frustrà, ut verbo absolvam, tam immensâ inuti-  
lium notionum hùc pertinentium multitudine nimium onera-  
tur, ac bonam partem sterilis atque fœda redditur pars Philo-  
sophiæ nobilissima, omniumque facilè princeps, Metaphysica.

Clarum est ex allatis, ut ad rem redeam, proximum omnis  
possibilitatis fundamentum esse causæ primæ atque universalis  
Potentiam activam: ut ideò quid sit habendum possibile, quia  
id Deus suâ potentiâ producere potest. Verùm, an hic prorsus  
subsistendum sit, num verò aliqua ratio prior reddiqueat, cur  
hoc Deus possit, illud non possit? nova quæstio est. Nos sanè ex  
iis quæ jam de Dei potentia disseruimus clarere omninò arbitra-  
mur, reddi posse ac debere. Est nimirum Idea in mente divina  
rerum producibilium principium dirigens, Potentia exequens:  
consequenter, quemadmodum, saltem pro modo concipiendi,  
in causâ rationali ordine naturæ prius est rem concipere, quam  
producere, ità quoque prius erit rem concipi posse, quam pro-  
duci posse. Si itaque quæras, quid pro primo, sive ultimo, ut  
appellare lubet, possibilitatis fundamento sit habendum, respon-  
demus, id esse Intellectum divinum, quatenus is horum aut il-  
lorum prædicatorum est repræsentativus. Ut si accuratè philo-  
sophari cupiamus, dicendum sit, rem quampiam esse possibilem,  
quia Deus eam potest producere; posse autem Deum eam produ-  
cere, quia in ejusdem idea in divina mente nulla involvitur con-  
tradictio. Atque hoc sensu possibilitatem hanc, quam vocant  
intrinsecam, illâ, quæ extrinseca dicitur, priorem esse, aper-

*nominatione  
tantum ex-  
terna.*

VIII.  
*Radix pro-  
xima Possi-  
bilitatis est  
Dei Poten-  
tia; prima,  
Intellectus  
ejusdem.*

tum est. Solet fermè hoc loco de his atque istis singularibus rebus disquiri, num eas posse dicendus sit Deus, nec ne? Verum quum major harum quæstionum pars parùm utilis sit, saltem plus justo curiosa, nos secundum ea quæ jam demonstrata sunt, tutissimum habemus, unam duntaxat regulam hanc generalem probè observasse: Quæcunque contradictionem non involvere certò constat, ea Deum posse, docet ejus Sufficiencia; quæ eam involvere omninò certum est, ea non posse Deum, docet ejusdem Sapientia; de quibus non clarè liquet, temerarium est atque profanum in alterutram partem definire. Nominatim, de ultimo possibili, num id à Deo produci ipso facto possit? disputant. In controverso sensu negandum videtur. Certè, quotcunque & quantascunque res creatas Deus unquam produxerit, eas omnes suâ naturâ finitas semper esse, necessum est. Ab altera parte, tanta Dei est Potentia, quanta ejus existit perfectio, id est, infinita. Quumque finiti ad infinitum nulla sit proportio, concludendum restat, nunquam perfectionum creaturarum amplitudinem existere posse tantam, quæ re ipsâ adæquata sit immensæ virtuti Divinæ, sicque hujus plenitudinem exauriat.

IX.  
*Potentia  
 Divinæ in  
 Absolutam  
 & Ordinata  
 tam divisio  
 explicata &  
 asserta.*

Cæterum, quo rectius percipiatur, quem ad modum eadem res Deo quandoque possibilis pariter atque impossibilis dici queat, notanda venit Potentiæ divinæ distinctio vulgaris, quâ in Absolutam & Ordinatam dispescitur. Illa meram Dei Sufficienciam significat, quatenus ejus vi existere potest id omne quodcunque in primæ causæ intellectu non involvit contradictionem; nullamque ea relationem ad decretum connotat, quandoquidem pro modo concipiendi actum voluntatis decernentis antecedit, dum ei suum objectum, puta merè possibilia, substernit. Hæc notat Sufficienciam Divinam, quatenus per eam re ipsâ aliquando sunt ponenda quæ æterno decreto ad existentia statum determinata sunt; sive notat virtutis divinæ determinationem, ad illa certa possibilitium genera actuanda, quæ liberissimo voluntatis placito à se facienda fore Deus ordinavit. Ex quo apparet, plurima nunc ipso facto Deo esse impossibilia, ex hypothesi scilicet immutabilis decreti & infallibilis præscientiæ, imò etiam prædictionis nonnunquam, quæ eadem, si meram

Numi-

Numinis Potentiam spectes, secundum sese possibilia dici debent. Parco exemplis, etiam in Sacris obviis. Non nescio, hanc Potentiæ divisionem improbari hodiè quibusdam, qui mallent omne possibilitatis negotium ità in solidum ad Dei Voluntatem referre, ut illius solius determinationi tribuendum foret, quod hæc vel ista res possibilis sit, alia non item. Verùm nos, uti voluntatem complacentiæ minimè hinc secludimus, sic opinamur, in concipiendis possibilibus tanquam talibus nullas Decreto partes esse, sed solius Intellectûs ac Potentiæ divinæ considerationem sufficere. Cum ipsa namque perfectione causæ primæ, à se intellectà tanquam quomodocunque expressibili extra se, possibilia immediatè cohærent. Quumque istam perfectionem suam Ens primum non possideat aut intelligat vi decreti, etiam possibilia vi decreti non sunt facta talia. Sed jam §. II. inter alia allata sunt plurima, quæ hùc transferre, ad distinctionis hujus tum utilitatem tum necessitatem confirmandam, vel leviter attendenti fuerit facillimum.

## EXERCITATIO VIGESIMA-SECUNDA,

DE

## DEI MAJESTATE

ET

## BEATITUDINE.

## SUMMARIUM.

- I. *Majestas Dei conspicua in absoluto & independenti  
Ejus in quævis Dominio. II. Dominium Dei concipiendum non nisi sanctissimum; & in sola Ejus per-*

*perfectiōne fundatum. III. Dominium Dei Morale per Legislationem, ejusdemque Executionem. IV. Non omnem Legem nobis Moralem fluere ex ipsa Dei natura. V. Majestatem Dei non ritè aestimari nisi humillimo venerationis affectu. VI. Beatitude Dei tanta quanta in Eo perfectiōnis plenitudo.*

I.  
Majestas  
Dei conspi-  
cua in abso-  
luto & inde-  
pendenti  
Ejus in qua-  
vis Dominio.



Uum ergò non quantæ sunt vires Divinæ Omnipotentia tanta sit ejusdem efficientia, verùm infinita possibilitium multitudo in abyſſo perfectiōnis primæ causæ sit relicta, atque illa ipsa quæ ex ea educuntur ratione attributorum & circumſtantiarum exiſtere poſſent modis longè diverſis ab eis quibus nunc actu exiſtunt, de tanti ſelectus origine meritò cogitatur. Et quam illam dabimus aliam, præter abſolutiſſimam Numinis *Poteſtatem*? ad quam idcirco nonnihil nobis hîc ſubſiſtendum eſt. Per eam intelligimus, ſupremum jus diſponendi de rebus quibuſcunque tanquam ſuis pro liberrimo voluntatis divinæ placito. Cujus Dominiî independētia quandoquidem legis omnis ab alio præſcriptæ prorsus eſt impatiens, ipſumque coruſcat ſtupendâ incomprehenſibilis Gloriæ eſſulgentiâ, Poteſtas hæc Dei, ſuntâ voce in ſenſu pleniffimo ac maximè emphatico, MAJESTAS rectiſſimè nuncupatur. Eam Deo convenire, tam evidens eſt, ut vix ſit operæ pretium de eo diſquirere. Deum ſolum independentem eſſe, jam olim demonſtravimus. Tantum ergò cætera omnia habent dependentiæ à Numine, quantum habent perfectiōnis; atque ideo totum quod ſunt Dei ſui ſunt. Notiſſimum verò, unicuique in rem ſuam competere jus ac poteſtatem de ea faciendi quod lubet. Undè nec enti perfectiſſimo hæc prærogativa eſt deneganda. Ex quo ſimul facilè colligitur, infinitum eſſe hoc Dei Dominium. Sic poſtulat infinita Dei perfectiō, ſic dependens creaturarum natura, quæ non finit quicquam earum ſubduci arbitrio illius, cujus merâ munificentia ſunt id omne quod ſunt.

Fateor,





habet Deus. Quamobrem necesse est, Deo esse peculiare quoddam Dominium in creaturarum rationalium rationalitatem ipsam, ejusque exercitium; quod ipsum tanquam tale ad res alias ratione carentes extendi nequit. Involvit hoc Potestatem significandi rebus rationalibus tanquam subditis moralem suam dependentiam à Numine, atque ad eam agnoscendam obligationem omnimodam. Quod cum sine Lege fieri non possit, utique jus habet Deus ferendi leges, quas regulas esse velit obedientiæ sibi præstandæ à subiecto, uti moralis dependentiæ, ita præcepti, capace. Ex quo Jus aliud sequitur, sancienti nempe legem pœnali comminatione; quatenus absque ea potestas legislatoria vim obligatoriam vix satis efficaciter exerit; cum citra ipsam penes rebellem subditum stet sese impune istà suâ erga superiorem obligatione eximere. Undè porro fluit jus infligendi pœnas propter demeritum violatæ legis, secundum sanctionem pœnalem. Per quæ omnia apparet, concipi non posse rationalem creaturam, in quam Deo non competat plenissima Potestas tum legislatoria, tum legis executoria. Quam quomodo Deus, tanquam Rex pariter & Judex, ipso factò circa hominem exerceat, non hujus loci est disputare, sed ad actualis Providentiæ considerationem pertinet. Quæ speciatim Dei Potestas sit circa peccati permissionem, imputationem, punitionem, dispensationem, & quæ sexcenta istius commatis huc spectant plura, cum paucis expediri nequeant, nihil in præsentiarum de iis dicere malumus quam parum.

## IV.

*Non omnem  
legem nobis  
moralem  
fluere ex  
ipsa Dei  
natura.*

Tantum planè præterire non possum nobilissimam controversiam, Num Deo etiam jus sit præscribendi suis creaturis rationalibus præceptum aliquod, tanquam morale, quod tamen ex natura sua aut essentialibus perfectionibus minimè fluat? Prænoto (nequis in voce lusus fiat) id morale dici, quod homini universum naturæ notum est tanquam regularum. Nescio, quomodo affirmativa videri possit quibusdam dubia, quin falsa. Saltem Deum legem ferre posse homini, quæ non fluat ex sua natura, indubium est. Quid si tulerit circa res de quibus hodiè lege nihil est definitum? Quid si omnes eà obligatos velit? Quid si tanquam naturæ auctor conscientis hominum eam inscripserit? Non posse, undè demonstrabitur? Imò

verò



verò imprimis ad declarandam Divinæ Majestatis excellentiam , & plenissimi in hominem juris demonstrationem pertinere videtur , quòd præceptis etiam positivis , sive officiis , quæ non aliter bona sunt nisi propter arbitriam Dei jussionem , creaturam rationalem adstringere possit. Specimen luculentum exhibet in ipso integritatis statu (si ex fide Christiana id huc adferre licuerit nobis Philosophis) mandatum circa arborem scientiæ boni & mali. Quin & hodiè præcepta de Incestu, Polygamia, Furto , ut plura sileam , quæ nobis juris naturalis & moralis sunt , esse re verâ juris divini positivi atque liberrimi , luce meridiana clarius videtur. Saltem rationes audire lubet , quibus conficiatur , ista omnia mandata necessariò fluere ex perfectissima Dei natura. De quibusdam tamen aliis posterius verè dici , largimur. Displicet idcirco vehementer illa in oppositum planè abiens quorundam sententia , quæ tam amplam concipit Dei potestatem , ut omnium quæ præcepit contrarium præscribere , si voluisset , potuisse contendat. Medium tenere suadet ratio.

Sed desino scrutari Majestatem ; cujus arcana pervestigare nefas eis , queis devoti obsequii gloria relicta tantum est , cum submissa humillimæ venerationis æstimatione. O ! si tantæ effulgentiæ radii mentis oculos ut decet perstringerent , quam non adeò securè philosopharemur de Potestate Domini , cujus amplius est hoc ipso universo territorium ! Quid , si de ea persuasi satis essemus ut oportet , superbiremus usque eò sæpè vermiculi , & non potius istius lucis fulgore contabesceremus ad instar ceræ , viribusque planè concideremus ? Quid , si hæc cordi sint nobis , tanti Numinis leges sanctissimas toties transgredimur petulanter , neque vindicem manum metuimus Judicis , cujus non minor est in exequendo suo jure Potentia , quam in ferendis legibus Potestas ? Sed & quæ ista Regum hujus sæculi fascinatio est , simulac aliquam in universi puncto quod inhabitamus particulam suo subjecerunt imperio , supremam nescio quam somniantium legibusque solutam potestatem ? Altior profecto est istis altis ; cujus gratiâ precariò tantum imperant potentissimi terrarum domini , hujus Regis mancipia duntaxat & servi. Quid itaque illorum indignationem toties plus justo me-

V.  
*Majestatem  
Dei non ri-  
tè æstimari,  
nisi humilli-  
mo venera-  
tionis affe-  
ctu.*

tuimus, & non multo magis horremus violatæ Divinæ Majestatis crimen? Venerabiles etiam sunt summo jure Magistratus, in quibus aliquam suæ Majestatis relucere voluit Deus imaginem: sed imaginem tantum; ut discamus primo loco eum revereri, cujus delegatâ auctoritate isti imperant, cujusque sceptrum cœlestes etiam venerantur potestates. Denique, quid passim de Providentia primæ causæ sumus queruli; cujus gloriæ servire bonum majus est, quam totius mundi tenere imperium. Intendat tantum mens debitis tanto Domino obsequiis: eritque hæc via brevissima ad obtinendam veram ac imperturbabilem animi tranquillitatem; dum tutelam in omni fortuna certissimam promittit fideli subdito amica cum immensæ Potentiæ pariter ac Potestatis Monarcha, societas. Caveamus ante omnia religiosè, ne fœdissimo sacrilegio quid nostrum unquam fingamus, per quod quicquam limitetur summa Majestas; cujus sese ubique tanta prodit effulgentia, ut ipsa ratio dicteret abundè, probandam esse ceu optimam præ aliis Religionem, cujus prima ac præcipua cura est, suam Divino Numini per omnia semper & ubique asserere supremam Legibusque solutam potestatem.

## VI.

*Beatitudo  
Dei tanta  
quanta in eo  
perfectionis  
plenitudo.*

Tandem de Dei BEATITUDINE addam verbum; ut quæ Divinorum Attributorum meditatio ab Infinitate perfectionis fecit initium, in eadem contemplatione finiatur. Est enim nihil aliud Dei Beatitas, quam ipsissima perfectionum infinitas, quatenus in ejus fruitione perfecta cum complacentia acquiescit. Ut sit in Deo quædam quasi sui ipsius, tanquam boni sese satiantis, constantissima, maxima cum voluptate, absque ægritudinis ullius mixtura, fruitio. De ea demonstranda nihil laborandum. Felicitatem jam olim quis dixit statum bonorum omnium congregatione perfectum. Infinita ergò quum sit Numinis perfectio, etiam minor esse nequit ejusdem Beatitudo. Imò sese fruitur ex se ipso per se ipsum, qui per independentiam suam & simplicitatem solus ipse sibi & Beatitudo est, & beatus, & beatitudinis fruitio. Sed nimium tantæ detraherem excellentiæ, si balbutire pergerem de re, quam mens nulla assequi, lingua nulla effari, potest; cujusque idcirco anhelanda potius fruitio, quam scrutanda plenitudo: quippe quæ non nisi sensu ipso percipitur ab eis, quos ritè ad se acceden-

tes in tanti boni communionem admittere, atque hoc ipso terque quaterque beare, dignatum aliquando fuerit benignum Numen.

*Ergò sub alarum velut umbra secta Tuarum  
 Mortales stantem corda quiescunt fide.  
 Hic velut irriguà saturos pinguedine pasces  
 Fortunata Tuae divitis aula penus.  
 Plena voluptatum polos ad flumina ducis,  
 Deliciis saturent omnibus unde sitim.  
 Tu fons ille sacer, Tu vena beata salutis,  
 In vitam laeices dans salientis aquae.  
 Ite igitur nigro torpentia flumina caeno!  
 Non bibitis e vili gurgite nostra sitis.  
 Ite! Sicut superi diis mens fluminis undae,  
 Cervus ut irrigui fontis anhelat aquas.*

## EXERCITATIO VIGESIMA-TERTIA,

DE

## DEO CREANTE.

## SUMMARIUM.

- I. Productio rerum à Deo facta non indigentiae sed sufficientiae argumentum.
- II. Creatio quid; Ead quae sese extendat?
- III. Admittendae Creationis necessitas demonstrata.
- IV. Difficultatibus praecipuis in hoc negotio occurrentibus obviam itur.
- V. Creandi vis ita solius Dei est, ut in ejus societatem nulla veniat creatura.
- VI. Creandi actio numquid notet à Deo diversum?
- VII. Productio creaturarum Deo, uti liberrima, ita facillima.
- VIII. Mundum ab aeterno creatum fuisse, repugnat.
- IX. Quando tamen praecise fuerit productus, natu-

*ra non docet. X. Creationis universæ tum ordo tum modus per naturæ lumen incertus planè. XI. Cartesii in eo omni definiendo notata temeritas. XII. Cartesianæ mundi Genesis Mosaicæ quam multis modis adversa. XIII. Frustrâ palliata ab Auctore fictionis audacia. XIV. Mundus hic creatus, nobis quidem indefinitæ, re ipsâ tamen finitæ amplitudinis. XV. Indeque majorem, imò & plures alios, creare potest Deus. XVI. Difficultatum hic moveri solitarum amotio. XVII. Finis creati mundi, ultimus Dei gloria, subordinatus homo, re Etè statuitur. XVIII. Objectæ à Cartesio in oppositum rationes paucis excussæ. XIX. Ex visibilibus creaturis majestatem Creatoris invisibilem venerari discit piæ mens.*

I.  
Productio  
rerum à  
Deo facta  
non indigen-  
tiæ sed suf-  
ficientiæ ar-  
gumentum.



Tiam si, ob eam quam hætenus per partes prosecuti fuimus pro modulo perfectionis infinitatem, ex se ipso per se ipsum Beatissimum existat Numen, haud tamen illi repugnat opulentia suæ manifestare immensitatem, extra se aliquid producendo; quo ostendat, non duntaxat sibi, sed & rebus aliis extra se, sufficere tantam plenitudinis abundantiam. Ut nimium ineptiat argutatio Epicureorum, inferentium, non posse Deum agnosci Universi auctorem, quoddam sic vel frustrâ, vel ex inopia consortii suæ creaturæ, id produxisse dicendus foret; quorum illud Numinis sapientia, hoc ejusdem sufficientia non patitur. Verum, neque Deum intelligunt, neque rem à Deo diversam, qui sic philosophantur. Saltem jam dudum, ubi de Independentia Dei egimus, probavimus, nec hujus nec illius naturam id sine re, ut quicquam existat, quod non vel ipse Deus sit, vel res à Deo dependens. Quid ergo? Rei cujuslibet productio per se arguit tantummodò, inde quidem causæ producentis sufficientiam, hinc verò rei productæ omnimodam ab isto suo principio

cipio dependentiam. Quamobrem nihil existit efficacius ad illustrandam causæ primæ perfectionem, quam ipsa rei præ aliis excellentissimæ Creatio: planè quemadmodum non melius quanta sit Solis perfectio intelligitur, quam ex copiosissimis quos quaquaversum ex corpore suo emittit radiis. Verbo, quodcunque operatur Deus, non id vel frustranei laboris, vel indigentis naturæ existit argumentum, sed luculentum potius exundantis bonitatis testimonium. Quæ ut percipiantur rectius, quem hæcenus in se Maximum cogitavimus Deum, nunc eundem in operibus Optimum contemplari fuerit pretium operæ. Sic autem videbimus amictum Majestate & Gloriâ ex adyto quasi sui prodeuntem in hoc Universum rerum omnium Creatorem, Conservatorem, Gubernatorem, potentissimum, benignissimum, sapientissimum. Atque ultimus iste erit Meditationis nostræ de Deo tractatus, ut utilissimus, ità minimè hic prætercundus; quippe qui conferet plurimum ad amplius persuadendam certitudinem omnium, quæ huc usquè docuimus. Neque enim fieri potest, ut non vehementer in suo quem de Deo habet sensu mens nostra confirmetur, quando videt non alium Eum apparere in operibus, quam qualem debere in semet ipso existere ex Independentia jam, à priori quasi, demonstravimus.

Primum quod in qualibet re spectandum occurrit, est prima ejus positio, seu primum existentiae momentum; ac cui causæ & causalitati illud debeat. Idcirco etiam primò loco illa Dei actio spectanda venit, cujus vi existere cœperunt quæcunque existunt. CREATIONIS nomine ea vulgò occurrit; sumtâ voce quatenus notat, Actionem Dei transeuntem, quâ quicquid existit à se diversum ex nihilo produxit. Transeuntem Dei actionem dico; per se scilicet aliquid constituentem extra Deum: quo nomine à Decreto distinguitur. Hoc rei creandæ futurationem duntaxat ponit; illa actualem rei creatæ existentiam. Ut minus accuratè Creatio quibusdam definiatur efficax Dei voluntas: ea enim per se extra se nihil efficit, sed tota tantum immanens est. Verùm hac de re etiam suprâ egimus, ubi de Divina Potentia differebamus. Facit autem hæc actio creaturam transire ipso facto à nihil ad aliquid; ut quod antè non-erat

II.  
*Creatio  
quid; &  
ad quæ sese  
extendit?*

jamy

jam sit, quodque prius dici poterat solum possibile, aut futurum ad summum, nunc actu verè existat. Parùm autem refert, num id de Nihilo absolutè & simpliciter sic dicto accipias, num etiam de nihilo illius rei quæ producitur; qualis actio est, quæ quid efficitur ex materia per se secundum ordinem & leges naturæ inhabili ad id, ut inde fiat, quod per virtutem divinam ex illa producit. Neque enim posterior hæc, Mediata vulgò dicta, minus propriè Creatio est ac illa prior, sive Immediata; quandoquidem ejusdem virtutis est aliquid producere ex puro nihilo, ac est id conficere ex subjecto nullo modo apto, adeoque non plus quam merum nihil ad rei noviter ex se productæ existentiam conferente. Cæterùm, ad illa quæ existunt à Deo diversa Creationem restringimus. Ut enim ens primum citra contradictionem concipi non potest unquam transitum fecisse à non-esse ad esse, ita nullam actionem cogitare datur, quæ vel ipsum circa se, vel aliud circa ipsum creando versetur. Restat itaque, illa solum Creationis objecta esse, quæ tam debilis sunt entitatis, ut, nisi potentioris causæ influxus accedat, ex sese nihil sint; qualia sunt contingentia quævis, quæ ob hoc ipsum possunt non-esse quod sunt, quia quod sunt aliquando non-fuerunt. Atque huc pertinent omnia quæ existunt præter Deum, totumque adedò quæ latè patet hoc Universum: solius enim Independentis Dei privilegium esse existendi necessitatem, jam dudum ostendimus.

III.  
*Admissio-  
da Creatio-  
nis necessitas  
demonstra-  
ta.*

Suppeditat autem hæc ipsa, de qua loquor, rerum nobis obviaram contingentia fundamentum pulcherrimi argumenti, pro demonstranda Creationis non tantum possibilitate, sed & (datæ hypothefi, existere Mundum) necessitate: in quo negotio laborarunt plurimi, sæpè minus accuratè; cum tamen certum sit, vix aliud dogma occurrere in universa Philosophia, quod plus adferat momenti, quam hoc ipsum solidè adstructum, ad Religionem Christianam confirmandam, contra Atheorum atque Epicureorum insultus. Ut verbo dicam: Nisi ex nihilo productæ sint res quæ sunt, undè illud est, quod earum quælibet ad non existendum per sese æquè sint indifferentes quam ad existendum? Sed juvat paulò explicatius urgere vim ratiocinii, quod imprimis efficax arbitror ad totum hoc conficiendum. Ne-

minem



minem ejus vires latere poterunt, quicumque revocaverit in mentem duas veritates jam antè firmissimè adstructas. Prior est, Independentiam sic unius Dei prædicatum esse, ut per naturam suam nulli alteri attribui possit. Evidens hoc postulatam est, sive ipsam in se attendas Independentiam, prout ea suo loco à nobis explicata fuit; sive infinitatem perfectionis, quam & Deo soli propriam, & cum Independentia insolubili vinculo connexam esse, jam antè ostendimus. Si itaque mundus hic noster Deus ipse non sit (quem non esse, docet absentia perfectionum hætenus de Deo demonstratarum) utique neque Independentens est: quod si non independens, neque etiam Necessariò existens; per ea quæ retrò *Exercitat. VII. §. v.* demonstravimus. Est ergò mundus ens contingens, quod ex sese haud magis existit, quam non-existit; atque idèd, hoc ipso quod existit, causam aliquam sui arguit extra se, quæ faciat cum existere potius quam non-existere. Si enim aliquam extantiae suæ rationem in sese contineret, ipso facto neque dependens foret, neque contingens. Existit ergò hoc universum virtute alicujus causæ. Sed quomodo? Sic ut in existentia sua perseveret: atque ita quidem, ut ejus hodiè non sit heri, neque heri hodiè, neque cras alterutrum illorum. Ecce itaque durationis lapsus ex præterito per præsens in futurum; consequenter & partes, partiumque successionem! Ea verò ubi dominantur, istic æternitatem locum habere non posse, invictè jam *Exercitat. VIII. §. v.* probavimus. Atque istud alterum eorum erat, quæ hoc loco prænotari cupiebam. Ex quibus pro eo quod nunc intendeabam brevi collectione sic infero. Per ea quæ jam allata sunt, Mundus neque fuisse ab æterno, neque sine causa sui existere potest. Quumque quod æternum non est, necessariò aliquando non-fuerit, manifestissimum evadit, mundum quidem aliquando non-fuisse, attamen virtute suæ causæ deinceps extitisse; sive, quod eodem redit, eum per potentiam efficientis transiisse à non-esse ad esse. Atqui hoc ipsum est, productum esse per Creationem; cujus rei veritatem demonstrandam sumseramus.

Neque virbus hujus argumenti quicquam detrahet, qui ad id declinandum studuerit excipere, dici posse, genitum fortè esse hoc universum ex materia quapiam præjacente; uti inter

IV.  
Difficultati-  
bus præci-



*puls in hoc  
negotio oc-  
currentibus  
obviatur.*

antiquiores in Ethnicismo Philosophos plurimi opinati fuerunt: adeoque ex antè dictis non sequi ejusdem ex nihilo Creationem. Etiam si enim lubens largiar, non mihi videri solum rationis naturalis lumen suppeditare demonstrationes, quibus plenè conficiatur, mundum hunc ex nulla prævia materia formatum esse, stat nihilominus suo talo nostra ratiocinatio. Ex quocunque enim præexistente corpore hanc universi molem originem suam traxisse finxeris, de illo eadem facilitate eadem demonstrantur, quæ jam de mundo ipso demonstravimus; scilicet, nec independens, nec æternum id esse posse. Atque adeo, uti mundi ipsius, ita rei cujusvis alterius contingentis, ultima tandem analysis fiet (an mediatè, an immediatè, parùm facit ad rem præsentem) in causam quampiam, quæ eam fecerit esse, cum antè non fuerit; id est, quæ eam creaverit. Sufficiet autem ad sobrietatem sapere cupienti adstructa jam tam evidentis veritatis necessitas, tametsi intellectûs captum excedat modus ille operandi quo ex nihilo fiat aliquid. Profectò, non, si sapimus, mirum videbitur, aliquid hîc occurrere nobis inaccessum. Nempe vix claram & distinctam notionem habemus istius activitatis, quæ à finita causâ procedit, exeriturque secundum naturæ leges jam constitutas & obvias: quanto minus comprehendemus illam, quæ ipsam naturam spectat ut primùm constituendam, eam sicuti antecedens ita longissimè excedens; quæque fluit non ab ente quopiam finito legibus naturæ adstricto, sed ab eo qui incomprehensibilem æternæ suæ divinitatis & potentiae amplitudinem hac ipsâ actione manifestare intendit. Quare, nisi conceptus ejusdem nobis homuncionibus foret inconceptibilis, neque ipsa operi tam admirabili excitando sufficiens foret, neque Deo digna, quam exindè enarrat cælorum expansum, gloria. Sit itaque impervestigabilis tanti Numinis via, dummodo nihil includat contradictionis; quam involvere hanc alicujus ex nihilo productionem, haudquaquam putandum est. Per se quidem notum videtur illud tritum, *Ex nihilo nihil fit*; quatenus scilicet ex nihilo, per ipsum nihilum, sive virtute ipsius nihili, nihil produci potest; nihilque adeo alicujus principium esse nequit. Verum haudquaquam illi repugnat, eum qui sufficientissimus est non sibi tantum sed & aliis à se, facere,

facere, ut ex nihilo, tanquam à termino à quo, uti loquuntur, ab ipsa potentiae suae infinitate, tanquam à principio, id existere incipiat, cujus antè dabatur nihil. Prorsus ut rei contingenti nunc existenti minimè adversatur, si, destituta influxu causae cujus vi existit, existere desinat, sicque quod est aliquid fiat nihil.

Interim, quamvis infinito Numini Creationem minimè faciat impossibilem hæc difficultas, haud tamen adeò nullam eam esse arbitror, quin conficiat omninò. quavis finitâ virtute majorem requiri ad id ut quicquam creetur. Certè nihilum rei creatæ principium esse non posse, jam diximus. Ipsum itaque creans rei creatæ in solidum omnem quam per creationem habet essentiam dare debebit. At quì poterit creatura? Num suam suæ creaturæ dabit essentiam? Non utique, nisi unum à se ipso hoc pacto divisum, & sic re verâ plura, fiat; vel sese saltem in aliud transmutet. Nùm potius quam ipsa non habet alteri dabit essentiam? Atquì in effectu nihil esse posse quod non in causa præextiterit, certa veritas est. Restat ergò, creare illius solius esse, qui modo incomprehensibili ob perfectionum suarum infinitatem aliis de suo potest dare, neque ipse tamen idèò habere minus. Imò, quam nulla sit in nihilo aptitudo ad aliquid, ritè cogitemus; consequenter quam nulla inter ista duo proportio. Agere verò absque ulla proportionem inter terminum à quo & terminum ad quem, ut cum Schola loquar, neutiquam ejus est, cujus, quemadmodum essentia, sic potentia, omnem proportionem excedere, hoc est, infinita esse nequit. Adhuc, Creatio actio est, naturam in suo esse constituens. Quid autem clarius, quam quod naturam constituit referendum id duntaxat esse ad virtutem ejus, qui naturæ rerum, tanquam auctor ejusdem, præest; non ad debilem efficientiam illius, cujus omnis vis naturæ legibus adstricta subest. Et quì sufficiat aliis à se creandis, quod ipsi sibi conferendo sufficiens non existit; qualis non existit quævis per sese contingens creatura? Quam ridiculum, statuere, id facere posse ut nihil fiat aliquid, quod facere nequit, ut aliquid non fiat nihil. Atque evertunt hæ rationes Creationem creaturæ possibilem, non immediatam tantum, sed & mediatam: utram-

V.  
*Creandi vis  
est à solius  
Dei est, ut  
in ejus societatem nulla  
veniat  
creatura.*

que enim ejusdem virtutis esse, ob non majorem subjecti inhabilis, quam ipsius puri nihili, ad opus creandum ineptitudinem, §. II. notavimus. Quin, ne instrumentalem quidem causalitatem hac parte creaturæ relinquimus, quandoquidem tota instrumenti natura in aptitudine ad usum consistit; qualis re verà in eo nulla est, nisi in ordine ad subjectum in quod agit, vel circa quod versatur. Atquæ subjectum hic vel planè nullum est, vel, quod eodem redit, nullo modo aptum ad productionem rei, quæ per Creationem ex eo efficitur. Detestandum itaque sacrilegium est eorum, qui non dubitant Angelos aliasve creaturas cum Deo in Creationis societatem admittere, saltem ut comministros; nimium profectò obscurantes effulgentem in opere creationis divinæ Majestatis gloriam. Quæ à miraculis per creaturas patris petita hic obijci possent, jam suprà *Exercitat.* XXI. §. v. diluta sunt.

VI.  
*Creandi  
actio num-  
quid noset à  
Deo diver-  
sum?*

Quandò autem solum Deum rerum omnium Cratorem statuimus, attendendum est diligenter, ne quid cogitationibus nostris admisceamus quod perfectissimo perfectionum quarumvis creaturarum Auctori quicquam detrahat. Removenda hinc est quam longissimè primo loco omnis sive compositio sive mutatio, qualem inferunt operationes creaturarum; quæ, quemadmodum agunt per actionem ab essentia distinctam, abotio transeunt ad actum, ab actu redeunt ad quietem. Errat, qui concipit Creationem tanquam aliquid quod Deus ipse non sit, sed ei in tempore superacceserit. Certè in Deo nihil est, quod, ob Simpliciter jam antè demonstratam, Deus non sit; nihil in creatura, quod non, ob dependentiam ejus & contingentiam, sit creatum: atque idè nulla fingenda creatio, quæ non à parte Creatoris activè spectata ipse Deus creans sit, à parte Creaturæ passivè considerata ipsa res creata. Tertium quid, quod nec Deus sit, nec creatura, monstrificum prorsus est, omnique rationi nimium adversum. Quamobrem si, prout se à parte rei habet, Creationem menti distinctius repræsentare voluerimus, ipsa æterna Dei sufficientia cogitanda venit, quatenus ejus vi in tempore Deo coexistere incipit res alia à Deo, idque cum omnimoda ab ea tanquam à principio suo dependentia. Talis res ex nihilo producta cum nulla Deo ipso facto coëxisteret ab æter-

no, neque etiam extitit ab æterno illius denominationis, quæ Deus Creator dicitur, fundamentum: atque idèd minus accuratè Deus ab æterno dicitur fuisse Creator; etiamsi possederit quicquid in actu creandi absolutæ perfectionis involvitur.

Porro, nequaquam sentire fas est, ex aliqua naturæ necessitate Deum creasse quod creavit, ad instar causæ, quam vocant, emanativæ. Sicuti enim res quævis extra Deum Divinæ perfectionis infinitati, si sint, nihil addunt, si non sint, nihil detrahunt; ita nulla inter perfectissimi Numinis essentiam, & productarum ab ipso creaturarum existentiam, ex natura rei est connexio. Atque idèd, liberrimè creasse Deum quod creavit, certum est; ut vel nihil planè creare, vel aliud creare, vel alio modo atque ordine creare, si voluisset, potuisset. Quæ de re dubitare non sinit quod antè observavimus, tum de modo operandi enti perfectissimo tribuendo non nisi perfectissimo, qualis procul dubio est liberrimus; tum speciatim de Dei absoluto atque supremo in possibilia quævis Dominio ac Potestate. Tenendum denique, absque labore, mora, ac defagatione operatum fuisse Deum, quandò creavit. Sic exigit independens infinitæ activitatis efficacia, cui nihil resistere aptum est, cujusque eminentiam maximè commendat prompta ad nutum Creatoris rei creatæ extantia. Adde, quæ idem postulat, immediatam nihili atque entis oppositionem: ea, ut mixturam extremorum non patitur, ita respuit successivum à nihilo ad aliquid transitum, & cum eo languidam ac moram trahentem creandi actionem. Undè liquet, quam parum magnificè de re tanta, sentiant, qui serie benè longa eam nobis delineant novam mundi genesin, quæ regulis mechanicis adstricta, tantùm successivâ particularum configuratione & concursatione absolvitur. Quasi verò vectibus atque machinis eguerit Numen in Universi fabricatione! quæ Velleji apud Ciceronem stoliditas est. Sed plura hanc in rem dicenda erunt: de eis enim quæ nostri hujus mundi Creationem speciatim concernunt non nihil adhuc disferendum.

Et quidem de productionis hujus Universi tum tempore, tum etiam ordine atque modo, disquiritur. Primum quantum attinet, in genere dictat ratio, sic saltèd necessariò aliquod primum extitisse Creationis momentum, ut ab æterno Mundus

VII.  
*Præductio  
creaturarum  
Deo, uti  
liberrima,  
ita facillima.*

VIII.  
*Mundum  
ab æterno  
creatum*

*fuisse, re-  
pugnat.*

hic creatus neque fuerit, neque fuisse potuerit. Contrarium enim quisquis tueri vellet, statuere cogeretur, mundum creatum ab æterno potuisse verè coëxistere suo Creatori; cum, ut jam notavimus, citra ejusmodi rei creatæ & causæ creantis coëxistentiam, Creatio, si propriè loqui cupiamus, non consistat. Atqui æternitatem perfectionem esse in imperfectam illam durationem, quæ successiva est, minimè cadentem, semel iterumque jam evicimus. Conferatur, §. III. Imò etiam æterna Creatio æternam, atque idèò re verà infinitam, causarum subordinatarum seriem secum trahit: cujus consequentis absurditatem demonstravimus clarè; *Exercitar. II. §. III.* Quin ipsam tantum Creationis notionem secundum se si attendamus, nescit ea hic nodum insolubilem. Quis enim cogitet actionem, quæ faciat creaturam transire à non-esse ad esse, qui non hoc ipso concipiat hujus non-esse antecedere ejusdem esse? Verum de quo dici potest, quòd antequam esset non-fuerit, de eo indeterminata existentia affirmari nequit. Æternus ergò non est mundus creatus, idèò quia creatus. Neque obstat, quam hùc adferunt quidam, Potentia Dei; quæ, ajunt, ut ipsa æterna est, ita arguit quolibet momento possibili, id est, ab æterno, mundum creari potuisse. Et si enim certum sit, æternam esse divinam potentiam, nihil tamen indè conficitur aliud, quam ab æterno possibile fuisse ut mundus existat; existat nimirum naturæ suæ convenienter, id est, duratione, uti successivâ, ita principium habente. Potuit ergò æterna potentia ab æterno quolibet possibili momento initium existentiae dare huic universo. Sed quemadmodum citra contradictionem non potest creaturæ dare essentiam cujus duratio successiva ipso factò omne possibile momentum temporis collectivè includat, sic neque æternam creaturam creare potest. De æterno Dei decreto minus laborandum est, cum id sit actio immanens, nihil æternum à Deo diversum per se constituens; quale quid reapse constitueret æterna Creatio: quapropter ab illo ad hanc nulla legitima atque efficax est hac parte sequela.

IX.  
*Quando tam-  
en præcisè  
fuerit pro-*

Interim, accuratè loquendo, mundus non tam in, quam potius cum tempore, est productus: id est, unà cum productione mundi initium cepit duratio ejus successiva, quæ est  
ipsum

ipsum tempus. Ut mustea sit eorum subtilitas, qui rem creatam ante tempus esse potuisse asserunt; quia tempus contendunt non esse sine motu, ac potuisse Deum materiam creare quiescentem. Sed attendere debuissent, motum esse aliquid tempore accidentarium, non essenziale (nam & ipsi motui sua successiva duratio, sive tempus, competit) quatenus in dimetiendis temporum partibus nos pro mensura motum sumimus. Quâ autem anni tempestate initium sumserit tempus mundanum, sive, ut rectius dicam, in quo Zodiaci signo in prima rerum productione sol extiterit, ne quidem in subsidium vocatâ sacrâ Auctoritate, expediri satis potest. Pro solstitio hyemali vix ulli, pro æstivo pauci; pro æquinoctio alterutro plærîque definiunt: sed debili nimis fundamento, quam ut huic rei immorari debeamus. Quod idem ferè dicendum de primi creationis momenti à nostro hoc præsentî tempore distantia. Etsi enim Chronologia Sacra collata cum profanis annalibus sextum millenarium præter propter exindè elapsum esse doceat, solùm tamen naturæ lumen ne quidem probabili conjecturæ locum facit. Quandoquidem enim nullos ætatis suæ caractères sibi impressos habet mundus, & non nisi ex effectis de causæ liberrimæ actionibus concludere datur, nemo nisi temerarius quicquam de hac re definiverit. Non desunt tamen nobis, qui citiùs aut seriùs mundum creari potuisse, strenuè negant. Atquî, cum solius æterni sit non posse existere vel citius vel serius, quid isti sibi velint, nescio. Nisi forsân hoc pacto viam struere contendant opinioni, quæ nullos agnoscit in Universi hujus ut extensione, sic quoque duratione, limites. Aliàs enim, si non nimium nugari lubitum fuerit, otiosam excitando logomachiam (quandoquidem nullus de Deo rectè sentiens ignorat, in ordine ad Divinam æternitatem nihil citum aut serum dici debere, aut posse) quo modo ex naturæ lumine negari potest, citiùs aut seriùs creari id potuisse, de quo quando creatum sit, ne quidem per naturam constat? Et quid ni, situ corporum cœlestium (à quibus quemadmodum mensuram temporis sumimus, ita etiam durationis longioris aut brevioris determinationem) existente hodiè qualis est, sol hic ab initio sui, si Deo visum fuisset, absolvere potuisset per Zodiacum non sexies mille, sed

*ductus, natura non docet.*



sed vel centies mille circuitus? Verùm desino esse copiosior in re manifesta.

X.  
*Creationis  
universæ  
suum ordo  
tum modus  
per naturæ  
lumen incer-  
tus planè.*

De modo & ordine, quem servaverit causa prima in excitanda hac mundi mole, ex solo naturali lumine non magis liquet, quam de præciso creationis tempore. Quicquid enim ratio manifestat de Divina operandi ratione, id totum vel à priori quasi, deducendum est ex perfectissima Opificis natura, vel, quasi à posteriori, colligendum ex inspecta ipsius operis constitutione. Neutra contemplatio quicquam ad negotium hoc satis expediendum conferre potest. Deum si spectes, independeas ejus libertas atque supremum in res quasvis dominium, cum infinita tum sapientia tum potentia conjunctum, non finit nos ullam ejusmodi Creationis methodum excogitare, ut non mille aliis viis ea æquè facilis atque expedita esse potuerit Creatori. Neque juvat obvia universi dispositio. Qualemcunque enim assignaveris originis modum (dummodo talis sit, qui neque perfectioni divinæ, neque hodiernæ mundi syntaxi atque phænomenis in eo obviis, manifestè adverfetur) is omnis, ob jam memoratam sapientissimi ac potentissimi agentis plenissimam in operibus extra se producendis libertatem, fermè æquè probabilis videri potest: nulla saltem istius existit necessitatis, ut certa atque indubitata haberi debeat. Solus ipse Deus, quid hïc voluerit, cum modo alio atque alio agere potuerit, de suo opere testari aptus est. Atque ita Christiani cœlesti oraculo didicimus, sextiduanâ Creationis morâ surrexisse hanc Mundi machinam: eâ operationis serie, ut cum ipso primi diei exordio exordium sumferit universa mundi materia, ab ipsa jam prima sui origine Cœlo constantem, Terrâque à cœlo divisâ, ac Mari ubique diffuso circumfusâ; mox altero hæmisphærio illustrata luce primigeniâ, quæ triduanâ, Solis nondum conditi vicaria, suâ circumvolutione nocturna diurnaque tempora discriminabat. Jactis hisce nascentis mundi quasi fundamentis, orbem terrarum primum habitabilem facturus Creator, atque exundante liquore evoluturus, altero die bonam aquarum partem in altum subvectam jussit constituere Nubes: daturas in sublimi admiranda mundi spectacula Meteora. Tertiâ luce fecit ascendere montes, descendere valles, Mari sic suis ostiis con-

cluso



cluso, ac divino imperio veluti vecte oppellulato, quo residuâ aquarum diffusionem detecta passim terra; mox, picturato Plantis solo, exitura amænissimum mundi viridarium. Sequenti originum die concameratam orbis nostri testudinem Cælum cælavit opifex perpetuis mundi luminibus, in scenam ætheream productis Sole, Luna, reliquisque innumerorum syderum choragiis. Parato hunc in modum domicilio, quæque suis sedibus datæ fuerunt incolæ: progenitâ quinto die ex communi aquarum gremio omni avium atque piscium sobole; illis in aëra dimissis, his in materno sinu retentis. Quibus, ad consummandum mundi vivarium, addita fuit sexto die terrestrium animantium generis; quam mox excepit sanctius his animal, pulchritudinis passim sparsæ compendium, ipse homo, de terræ quidem limo, ad Cosmopæi tamen imaginem, formatus, rerum creaturarum futurus dominus, qui easdem suo Creatori devoveret.

Hanc universi operis ideam, ex natura non sciendam, delincent sacre Ephemerides: quæ indubitata fidei esse oportet inter quosvis, qui infallibilem divinorum oraculorum auctoritatem ritè se agnoscere profitentur. Non tamen hodiè eorum numerus deest, quos juvat, contemptâ, sepositâ saltem, narratione Mosaicâ, totos sese tradere confictis pro lubitu hypotheseos toto cælo ab ea recedentibus. Quod Ethnici pro suo quisque captu alia atque alia finxerint atque pinxerint rerum primordia, à genuinis istis originibus longè diversa, condonari utcunquè poterat hominibus in meris tenebris hac parte palpatibus. Sed quòd isti quoque, quibus cælitus patefactum est tanti operis mysterium, usque eo suis hinc ausint indulgere ideis, ut à tam clara luce recedere nihil metuant, id verò facinus indignissimum existit, neque ulli cui Creatoris gloria cordi est ferendum. Iliada commentorum canit Cartesius, Principiorum suæ Philosophiæ parte Tertiâ & Quartâ: ubi tantâ confidentiâ de mechanica hujus mundi, ut structura, sic quoque origine, disserit, ut majori haud potuisset, etiamsi vel Deo conditori extitisset à consiliis. Quod si aliquanto major fuisset Viri erga Sacras Scripturas reverentia, abstertere debuisset à temerariis conatibus vel una illa gravissima Dei concio, quæ ex-

XI.

*Cartesii in  
eo omni de-  
finiendo no-  
tata temeri-  
tas.*

tat ultimis in sacro Jobi codice capitibus. Provocat ibi Creator industriam humanam, ad expedienda, si possit, stupenda vasti operis miracula: quorum interim minutissimas rationes exploratissimas se habere sibi persuadent nuperi homines; percunctanti Deo ad singula respondere parati ex solis Cartesii sui, si sint vera hujus vaticinia, principis. Cogitatio profectò parum est modesta, ne dicam in Deum contumeliosa, ea velle mente comprehendere, quibus excogitandis nulla par est, nisi infinita supremi Numinis, intelligentia: cujus solius existit definire modum, quo omnia facta sint, aut fieri etiam poterint. Sed qualem nobis narret idealis mundi vorticosus conditor genituram, audire, nisi res longa foret, esset operæ pretium. Totum negotium, ut verbo dicam, merâ arte mechanicâ absolvitur, materiâque secundum regulas ejus motâ. Mentio Dei, quæ apud Moſen in tanti opificii molimine utramque facit paginam, vix rara alicubi aspersa est, neque multo sapius, quam tantum ut ne credas Lucretium te legere aut Epicurum. Neque id mirum. Nullam enim planè in Cœli Terræque formatione Deo reliquam facit operationem nova Mundi Genesis, præterquam materiæ (forsitan æternæ, vel undecunquè suppeditatæ; neque enim de ejus origine quicquam Auctor laborat) per inditum motum in particulas divisionem, earumque per servatam eandem motus quantitatem diversimodam motionem. *Que pauca sufficere ei videntur, ut ex iis, tanquam causis, omnes qui in hoc mundo apparent effectus secundum leges nature oriantur.* Usque eo, ut non putet alia simpliciora, vel intellectus faciliora, vel etiam probabiliora rerum principia posse excogitari.

XII.  
Cartesiana  
mundi ge-  
nesis Mo-  
ſaicæ quam  
multis modis  
adversa.

Quam hæc prosus indigna sit Divinâ Majestate philosophatio, quamque nihil contineat quod assurgat ad illam grandiloquentiam, quâ ipse suum opus in Sacris commendat Creator, utcunquè jam notavimus. Quam malè inter se cohareat ista vorticosarum sabellarum textura, nisi id physici potius fori foret, non uno modo unicuique vigilantius ad cernenda vera oculos deducendi, ostenderem facillimè. Tantùm, quam existant historiæ Sacræ inimica, atque Viro Dei Moſi in barbam contradicentia, illa nudiusquartus in Cartesii cerebello nata commenta, non possum non planum facere hoc loco instantiâ so-

lum.

lummodò unâ atque alterâ , ab unius Telluris productione petitiâ. Cæterùm , ex ungue leonem ! In ipso primi diei rerumque omnium exordio æquè Terram creatam fuisse ac Cælum , exertim narrat Genesis Mosaïca : Cœlos tamen fluidos præëxistisse jam dudum , ac non nisi post plurium indè æstatum lapsum , efformatam fuisse Terram , singit Genesis Cartesiana. Triduum antè productas Stellas exitisse globum nostrum terraqueum , docet Genesis Mosaïca ; Ipsam stellam cum primitus fuisse , quæ , multo tempore post Solis & Fixarum existentiam , maculis tandem involuta , ac variâ crustâ crassiori tecta , indèque in motu suo languescens à valentiorè vicini Solis vortice absorpta , atque in istam orbitam in qua hodiè oberrat circa solem compacta , in corpus solidum & opacum abierit , tellusque qualis nunc est esse cœperit , prolixè fabulatur Genesis Cartesiana. Unius tantum telluris , tanquam partis universi principalioris , ac cœlis contradistinctæ , meminit Genesis Mosaïca : Planetis eam annumerat in Solis cœlo cum cæteris fluitantem ; eamque non unam tantum , sed , si mechanicis suis regulis convenienter philosophari cupiat , in infinitis vorticibus sine fine multiplicatam , fingere necesse habet Genesis Cartesiana. Aquis ab origine sui tectam , ac tertio primùm die emergentem , telluris faciem exhibet Genesis Mosaïca : aridæ verò ubique superficie , paulatim factæ rimosæ , collabente crustâ , ac quibusdam ejus fragmentis substratarum aquarum fundum petentibus , sicque superfluitante liquore , erupisse mare , pingit Genesis Cartesiana. Sed quid διχονοίαν tantam paucis comprehendere laboro ? cui , si singula , uti rei momentum postulat , prosequi vellem , volumen Cartesii Principiis grandius conscribendum foret. Etsi verò de re tanta in præsentiarum non liceat adferre in medium quicquid istuc pertinet , non tamen planè hoc loco silenter transmittere poteram Helenam , cujus amoribus ad furorem usque infatuatur hodiè orbis eruditus , etiam Christianus.

## XIII.

Alibi quidem novæ Geneleos Auctor testatur , se , quando in Mosaïcam historiam inciderat , miratum fuisse ejus cum suis hac parte cogitatis consensum. Mirum autem , pro eo demonstrando nihil unquam eum tentasse. Quod tamen fecisse impi-

*Frustrâ  
palliat ab  
Auctore  
fictionis  
audacia.*

mis cordi esse debuisset homini, cui nihil magis in votis erat, quam suam ubiquè locorum in Academias Christianorum inducere Philosophiam. Quin, quam parùm suas hypothèses Mosàzare ipse cœdiderit, vel istud evincit, quod, quo loco illud docere imprimis oportuisset, præfari istic maluerit, se ad res naturales melius explicandas, causas earum repetere aliis, quam ipsas unquam existisse existimes. Modesta quidem illa videri posset, nisi pelluceret artificium prudentioribus rerum æstimatoribus. Quid enim ad illustrandam veram mundi syntaxin pertinet ejusdem adedò operosa per confictas sine fine hypothèses constructio? Nisi ex mendacio suum veritati accedere splendorem, credendum sit. Aliud itaque auctor intendebat, si, quod hic sese manibus palpandum offert, dicere liceat. Animus erat suo arbitrio res naturales tales fingere, quales ipse somniabat. Fidem facturum inauditis commentis, via paranda erat, accommodando eis nativitatem præconcepto somnio faventem. Eam ut veram neminem facile sanæ mentis admissurum, sat prævidebat. Ergò homo callidus in ipso exordio profitetur, se duntaxat hypothèses narraturum, de quibus credere liceat, non omnes esse veras. Ità, postquam lectoris sui mentem longiori progressu vorticosis ideis assuefecit, primum ei minùs ridicula videri poterant quæ jam facta familiariora; mox saltem possibilia; dein non prorsus improbabilia; denique verissima; quin etiam talia, ut, nisi Deum non summè bonum ac veracem habere voluerimus, in mathematicarum demonstrationum numerum ea sint recipienda; quando quæ de Mundo scripsit, vix aliter quam à se explicata sunt, intelligi posse putet. Princip. IV. Art. CCVI. Mirum foret, nisi quantum crescit fingendi licentia, cresceret pariter asseverationis confidentia. Verùm jam dudum in his excessi quem huic tractatui præstitui modum. Vorticosi mundi subversio alterius laboris erit, neque valdè difficilis; si vitæ vires addere voluerit Deus.

## XIV.

*Mundus hic  
creatus, nobis  
quidem  
indefinitus,*

Quam amplum hoc Universum condiderit Creator? amplius queri potest. Equidem tam vastæ diffusionis menti nostræ occurrit hoc naturæ domicilium, ut finium quibus clauditur distincta imaginatio cadere non videatur in humanam cogitationem, omnem quantitatis mensuram ferè sumentem à modica magnitudine

tudine rerum in terræ nostræ superficie visui sese offerentium. *re ipsa tamē finitæ, ampliitudinis.* Multa quidem de exacta cœlorum à tellure distantia tam præcisè definiunt quidam Astronomi, ac si nudius-tertius cœlo delapsi forent; sed id totum mera atque omni idoneo fundamento destituta nugatio est. Quin, si vel maximè res haberet ut isti vaticinantur, ne sic quidem negotium hoc expediri posset. Dato enim stellarum errantium & fixarum altitudinem ad perfectum calculum à nobis revocari posse, non tamen idcirco intelligimus, quæ & quanta ultra fixarum ambitum fortè sese diffundant vastissima cœlorum spatia; ut sensui inaccessa, sic menti nostræ non nisi temerè definienda. Quamobrem hæc Geometria illi relinquenda, qui cœlos extendit solus, eosque definità à se mensurâ formavit. Etsi verò isti suaviter delirent, qui tantum sibi tribuunt, ut exactam mundi mensuram se animo comprehendere arbitrentur, gravius tamen errant hodiè qui, in alterum extremum abeuntes, tantam huic Universo adscribunt magnitudinem, ut re ipsâ immensam nullosque extensionis fines habentem agnoscant. Quantum enim Divinæ eminentiæ decedat, si quicquam præter ipsum Numen quocunque modo aut sensu admittatur infinitum, docent quæ de divinæ perfectionis Infinitate suo loco diximus. Quibus solvendis minimè satisfacit inanis distinctiuncula inter infinitatem perfectionis, atque extensionis; quarum scilicet hæc mundo tribui queat, citra præjudicium illius. Quando enim, ut illi contendunt, corporis essentiam constituit ipsa extensio, manifestum evadit, extensionis & essentiae infinitatem passu pari hoc loco ambulare. Quumque quod essentiâ infinitum est etiam idem necessariò tale sit omnibus suis attributis (quæ suâ naturâ subjecti sui conditionem sequuntur) apparet, vel nullam, vel omnimodam, mundo tribuendam esse infinitatem. Verum de hac hallucinatione longè gravissima prolixè disputavimus *Exercitat. de Infinito*: quâ, & quæ mens sit novi Philosophi hac parte genuina, & quibus sese tueatur rationibus, & quam multis modis absurdum dogma incurrat in proprietates tum Creatoris tum creaturæ, tam plenè exposuimus, ut si quid vellemus addere, actum ageremus.

Intra suos limites (ubicunque etiam locorum illi fuerint) *XV. Indique mæ-*

jorem, imò  
et plures  
alios, creare  
potest Deus.

coërcita hujus Universi diffusionem, cumque ea collatâ Divinæ potentia immensitate, quamvis rei finitæ perfectionem longissimè excedente, facile apparet, potuisse Creatorem, si ita lubitum fuisset, majus fecisse hoc universum; cum quod majus minusve, quam reipsa est, non existat, res sit solo indifferenti Dei arbitratu definita. Atque eodem hoc fundamento ex mero naturalis rationis lumine solvi nequit dubitatio, num unius hujus mundi productione omne Creationis opus absolverit Deus; num verò alios etiam huic similes extra ejus fines constituerit? Quandoquidem enim saltem id potuit, ac noluisse ipsum, hoc universum per se non docet, neque ex ipsâ Creationis natura, neque ex mundi creati contemplatione colligere datur, quam in partem liberrimam voluntatem hic determinaverit Deus. Temerarius, fateor, est, quisquis plures rerum universitates asserit, quia quod asserit nullâ rationis specie firmare potest: maximè, cum præter Creationem hujus Cœli atque Terræ, omnique qui in utroque existit exercitûs, aliam nullam agnoscat Sacra Dei Pagina. Verum, câ sepositâ, neque is qui pluralitatem mundorum negat, ejus quod negat ullam, nisi negativam, rationem reddere valet. Qui autem, ne creari quidem alium mundum posse, præter eum qui existit, affirmat, haud leviter is in primæ causæ valentiam existit injurius, quando omnem ejus infinitatem operis unius finiti Creatione exhaustam esse, necesse habet profiteri.

XVI.  
Difficultas  
hic motus  
universalitatis  
amotio.

Quam enim hic venantur contradictionem, ex eo quod se perspicuè intelligere affirmant, *mundi hujus materiam jam occupare omnia omninò spacia, in quibus alii isti mundi esse deberent*, ea nulla re verâ est; cum totum hoc sit purum præjudicium, natum ex crasso errore de infinita mundi extensione; quem jam notavimus. Levius est, quod de impossibili plurium mundorum sive contactu, sive distantia, adferunt. Etsi enim sese tangerent, haud idèò opinandum, eos hoc ipso fore ordinatos ad constituendum unum corpus harmonicum, cujus partes sint mutuo adjumento; quod tamen imprimis, ad constituendam naturam rei quæ ex aggregatione una est, requiritur. Et si distarent, nil vetat, ob eandem rationem, interjici corpus quodcunque tertium intermedium, ad neutrius extremi essentiam

tiam & integritatem ex ordinatione Creatoris pertinens. Quid si etiam nullo interposito corpore distarent? Nullum in eo contradictionis periculum; nisi quod isti sibi fingunt ex infantili præjudicio, dum à pueritia observarunt, corpora quæque nobis obvia intergerino tertio ab alio separari. Ast hoc de natura distantiae ipsius esse, & non potius quid accidentarium, demonstrandum foret: qua de re alibi agendum ex professo. Omnium maxime clumbis est cavillatio ex voce Universi; quasi id, quippe complectens omnia, extra se quicquam existere non sinat. Certè Universum hic mundus est, quatenus compages est universorum corporum sibi ad sui integritatem debitorum. Jam verò tale quid ni maneat, etiamsi alia corporum qualiumcunque, sed ad mundi nostri constitutionem atque integritatem (cujus unica mensura existit Dei opificis idea & ordinatio) nil pertinentium, detur compages? Cæterum, cum absolute loquendo ne mundorum quidem plurium Creatio contradictionem implicet, quanto minus negandum venit, Deum infinitum, sive lit, creare posse alias adhuc rerum species, præter illas finitas quæ creatæ hodiè existunt? Quo pacto id dubium, quin falsum, videri possit iis qui infinitam Numinis sufficientiam agnoscunt, nescio. Neque dicere juvat, eas non-productas rerum species clarâ ideâ nobis non intelligi: quis enim homuncio, sine sacrilegii nota, ausit suas ideas virtutis divinæ facere normam, ultra quas nihil causa prima actuare queat? Sufficit, Opificem intelligere suarum facturarum rationes; creaturis suis eas imprimere cur debuerit, nulla causa est. Sed in *Narratore nostro Confutato*, sive *Animadversionibus* in Cel. Collegæ D. Burmanni *Narrationem de Controversis nuper in Academia Ultrajectina motis* §. 11. etiam de hoc nobis est actum.

Priusquam finiam has de Creatione cogitationes, de Fine tanti operis paucula dicenda supersunt. Principalem illum atque supremum esse Divinæ Majestatis per tam illustria infinitæ sapientiæ, potentiæ, ac bonitatis documenta, manifestationem, arguit Dei in omni causarum genere primitas; quæ non finit ob alium esse hæc omnia, nisi ob ipsum à quo sunt omnia; ut ità, qui in causarum efficietium ordine prima existit cujusvis veritatis origo, idem sit in finium subordinatione ultimi-

XVII.

*Finis creati  
mundi, ul-  
timus Dei  
gloria, sub-  
ordinatus;  
homo, re-  
statuitur.*

mus



mus bonitatis terminus, ipsumque summum bonum. Parum huic veritati consonum est, quod alibi Cartesius: *Puerile est & absurdum, asserere in Metaphysicis, Deum, ad similitudinem hominis superbi, non habuisse alium finem in constituendo mundo, quam hunc ut Laudaretur ab hominibus.* Dura certè, imò ne satis quidem pia, hæc est supremi Domini cum superbo homine comparatio absurdissima. Atqui, parum erat Atheismo tradidisse argumentum pro existentia Dei à causarum efficientium subordinatione petitum; pariter alterum ex simili finium serie deductum è medio tollendum fuit. Vicinus existit huic alter ejusdem error, quo negat conditi mundi finem subordinatum esse Hominem: etsi id tenuerint communi consensu sapientiores quivis, ipsi quoque Gentiles; quorum illustria hanc in rem testimonia adferre, prohibet brevitatis. Et profectò, quid tum Creatoris sapientiæ, tum ipsarum rerum creatarum naturæ convenientius existit, quam cætera imperfectiora ordinata esse ad usum istius rei, quæ in omni creaturarum genere cminet tanquam perfectissima, qualis est homo? infra cujus dignitatem longè subsidet quicquid in hoc Universo contemplationi nostræ est obvium. Maximè, cum unus homo sit, qui ex omni creaturarum cœtu suam Deo Creatori laudem potest accinere. Quid itaque pronius cogitare, quam ejus usibus omnia destinata esse, cujus solius animo atque ore ad Deum redire poterat suus ex opere creationis honor & gloria. Sed & exertim sic definit ipsius Conditoris vox, in Sacris ita de sui operis fine restantis, ut totum id hominem spectet & ad ipsum referatur; ne astris quidem, vastissimis illis & à terra nostra remotissimis corporibus, exceptis. Indè quoque omnia homini, angelis solis paululum inferiori, dicuntur subjecta Scilicet homini, ad Dei imaginem, tale Dominium inserentem, condito; quo quando excidit, etiam universa creatura vanitati subjecta fuit; usque aded, ut tota seculi hujus consummatio tantum præstoleretur beandorum hominum plenitudinem, obfirmatorum in peccatis pœnas. Quid? quod ipse ordo, quem in formando homine servavit Creator, cæterorum omnium in hominis commodum ordinationem inferat; quatenus quæ in executione præcedunt, respectu eorum quæ ultimò sequuntur, medii ferè rationem

ha-

habent. Vidit quodammodo harum consequentiarum vim, quam fufius profecquitur S. Codex, ex ipsa crepera naturæ luce Metamorphoseôn scriptor, cum canit:

*Sanctius his animal, mentisque capaciùs alia  
Deerat adhuc, & quod dominari in cætera posset.  
Natus homo est; &c.*

Quem

*Finxis in effigiem moderantum cuncta Deorum.*

Tam nulla tamen hæc omnia sunt Cartesio, ut qui quod ad- XVIII.  
struximus tuentur, eos de se superbè nimis sentire, pronunciet; *Objecta à*  
cum hæc sententia ei nequaquam sit vero similis, imò in physica *Cartesio in*  
consideratione ridicula & inepta. Et cur obsecro talis? *oppositum*  
inquit, non dubitamus, quia multa existant, vel olim existerint, *rationes*  
jamque esse desierint, quæ nunquam ab ullo homine visa sunt aut in- *paucis ex-*  
tellecta, nunquamque ullum usum ulli præbuerunt. Subtilis equi- *cuisse.*  
dem collectio! Quasi quæ incognita existunt idè suâ careant  
utilitate, quin & necessitate quandoque, quia incognita! Mil-  
lena nobis insciis usum quotidie præstare longè maximum, nemo  
ignorat, nisi rei Medicæ atque Physicæ prorsus ignarus. Imò,  
si multa visa non sint aut intellecta, quâ fide narratur, ea nul-  
lum omninò cuiquam mortalium, sive directum sive indire-  
ctum, sive proximum sive remotum, præstitisse usum? Af-  
fignet talia, si possit: si nequeat, quid præsumit judicare de  
rebus, earumque usu, quarum nullas habet ideas? Sed aliud  
pectoreolvebat consilium, ad quod hæc hypothese præstruen-  
dus erat gradus. Animus erat mundum fabricare ex infinito  
vorticum numero coagmentatum, in quo plures forsân ober-  
rent terrarum orbis, quam in nostra hac tellure vivunt homi-  
nes. Et hæc procul dubio ista sunt *nunquam ab homine visa vel*  
intellecta, quæ *nunquam ullum usum ulli præbuerunt;* sed quæ  
hoc loco profiteri intempestivum videbatur. Id autem minime  
capio, quo sensu velit, esse in Ethicis pium, dicere, omnia à  
Deo propter nos facta esse, ut nempe tanto magis ad agendas ei gra-  
tias impellamur; ejusque amore incendamur. Frigida profecto  
pietas, imò verò mera superstitio, quæ ad Deo gratias agen-  
das impellit animum suppositionibus quibusdam superbis, non-  
verosimilibus, ridiculis, ineptis! Quid, quod alibi expressè sic  
instituat: Si concipiamus nihil esse extra cælos præter spacia imagi-

maria, cœlosque omnes non nisi terrâ causâ factos esse, terram vero hominis; hinc fiet ut propendamus ad cogitandum, terram hanc esse præcipuam nostram sedem, hacque viâ melius nihil ad nos pertinere. Vol. I. Epist. VII. Ergò in Ethicis id dicere pium erit, quod idem per sese comparatum est ad reddendos homines Epicureos! Imò, neque intelligo, quid Cartesiano homini multo plus solatii post hanc vitam futurum sit in istis extra cœlum nostrum circumactis vorticibus; quam in aliorum spatiis imaginariis. Nisi fortè animulæ eorum vagulæ, postquam terram hanc tanquam sedem minus-præcipuam dereliquerunt, in hoc delicias sint habituræ, quod, ad instar cometarum, ex uno vortice in alium absque fine modo ac mensura sint trajiciendæ, ac sine quiete per peregrinos cœlos vagaturæ. O pulchras sedes, quas manibus defunctorum paravit Cartesianæ sapientiæ pietas!

XIX.  
Ex visibili-  
bus creaturæ  
majestatem  
Creatoris  
invisibilis  
venerari  
discit pia  
mens.

Verùm desino plura addere. Sic hîc altercandum, ne pietas amittatur. Quamobrem satius est parcius de hisce disputare, interim diligentius id agere, ut ad suos unaquæque, ad quos à Creatore Deo condita est, creatura fines diligenter ipso facto referatur. Sed quantum hac parte deficit etiam optimi cujusque cura! Scelus esse jam olim dixit Socrates, de creaturis agere, & Opificem omittere. Quis, cheu! hoc crimine insons planè? Omnia propter hominem formata esse, allubescit facilè plerisque. Ast ipsum hominem ad hoc esse conditum, ut universa illa Deo Creatori suo reddat, se persuasum habere, quis est qui ipso opere testetur, ut oportet? Inexcusabiles pronunciat alibi Gentium Doctor, qui, quam ex creati mundi factura mente perspicere debuissent æternam Divinitatem & potentiam, cum debita gratiarum actione non fuerunt ritè venerati; quando, quem ignorare non potuerunt Creatorem, non glorificaverunt. Utinam duntaxat in gentiles idololâtras id quadret! & non peculiari quadam ratione in nostros quoque homines, qui quodcumque pulchrum ac delectabile occurrit in creaturis, à Creatore id descendisse parùm cogitant, deque eo ad Illius gloriam ordinando nil sunt solliciti. Etiam hi Idololatræ pessimi: bonitatem non-dependentem, quæ solius Dei est, adscribentes creaturis; atque ita incorruptibilis Numinis gloriam re ipsâ mu-

tantes

tantes in corruptibilis creaturæ similitudinem, atque huic servientes hunc in modum *ὡς ὑπάρχοντα*. Imò, præter Creationem colunt creaturas, qui toti harum utilitati inhærentes, eis non ex Creatoris lege utuntur, sed suo quodam fruuntur arbitrio, ingrati tantarum opum usufructuarii. Recurvæ nimirum in terram animæ! indignæ erecto vultu, quo sublimiora quam quæ præ pedibus sunt meditari monentur, cœlumque potius sublatis in altum oculis tueri, cumque qui creavit hæc omnia Deum. Ita fas erat publicam hanc Naturæ domum cogitare Dei Optimi Maximi Templum, divina omnipræsentia consecratum: cui pro ara, humanus animus; pro dedicandis muneribus, obviæ quæque naturæ opes; pro liturgo perpetuo, ipse homo, qui obsequioso sacrificio creaturas univèrsas suo devoveat Creatori. Hoc intuitu quicunque contemplantur tantæ summæ opificium, non illi in externa templi specie atque apparatu hærent, sed piâ mente ad intimum ejusdem penetrant *ὑπερέσθον*; iisque solis occurrit hoc Universum, tanquam visibile invisibilis Majestatis monumentum. Beati ter & amplius, quæ accessibile tantum sacrarium! in quo fruuntur ineffabili voluptatis dulcitudine, quando mirantes *μετρούμεθα τὸ πᾶν* Deum, discunt indè, ut oportet, in tanta rerum utilitate Optimum, in tanta amplitudine Maximum, in tanto decore Pulcherrimum, in tanta varietate Ditissimum, in tanta vicissitudine Constantissimum, in tanta earundem constantia Immortalem, investigare, agnoscere, colere, adorare, Cosmopæum. Juvat cum Regio Vate, de universis Creationis operibus, deque tota natura longè latèque homini tributaria, omnium Condiditori lætanter sic paucis applaudere:

*O Domine! O magni Fabricator maxime Mundi,  
Quam celebre est toto nomen in orbe Tuum!  
Cum mens cœlorum spectat seriemque decusque,  
Quos digiti artifices composuere Tui;  
Cum tuncor variam Phœben, ignesque globosos,  
Pulcraque per nitidum sidera fusa potum:  
Tunc ego: Quid sumus! Es pietas que tanta subegit,  
Ut memor humanis usibus ista dares?*

*Quo Tibi tam potuit sibi humana placere ,  
 Ut res dilectas inter & ante loces !  
 Das etenim facili dominetur in omnia nutu ,  
 Archetypi recipit dum simulacra Tui :  
 Mille greges pecudum , genus omne volatile cæli ,  
 Squammigerum quicquid per mare sulcat aquas .  
 O Domine ! O magni Fabricator maxime Mundi .  
 Quam celebre est totum nomen in orbe Tuum !*

## EXERCITATIO VIGESIMA-QUARTA .

D E

## DEO PROVIDENTE

P E R

## CONSERVATIONEM .

## S U M M A R I U M .

- I. Providentiæ Divinæ circa hoc Universum consideratio generalis. II. Prioris Providentiæ actus , Conservationis , specialior explicatio. III. Eam positivum in creaturam durante influxum notare , demonstratur. IV. Imò re ipsâ esse quandam continuatam Creationem. V. Difficultatum quarundam hic obviarum solutio. VI. Qualescunque creaturas conservat Deus , influxu immediato , ac sibi proprio. VII. Quæcunque conservat Numen eadem annihilare , si velit , potest. VIII. Annihilatio ,

*latio nil positivi dicit, sed meram non-conservationem.*



Scilicet fuit Creatio. Verum non illâ solâ quicquid extra sese operatur causa prima absolvitur. Ergo circa creaturas jam productas mox alter Dei actus contemplationi nostræ sese offert; ille nimirum, qui PROVIDENTIÆ nomine vulgò venit. *Altuus* scilicet: vox enim ista frequenter etiam notat, tum Dei voluntatem quâ jam ante tempora seculorum rerum omnium futurarum rationes penes ipsum exactissimè definitæ extiterunt; tum etiam æternam earundem juxta decretum præscientiam. Nostræ hîc considerationis est utriusque illius in creatura, per creationem jam existente, executio: quæ quoniam in eventu æterni consilii intentioni ad amissum respondet, nil mirum si diversis cæterum rebus idem commune nomen sit impositum. Generatim sumtum Providentiæ vocabulum hoc loco significat, Curam Dei Creatoris circa suas jam productas creaturas. Hanc qualemcumque admittere minimè quidem sufficit (quod fusius & per partes infra ostendetur); interim universam qui negarunt vix extiterunt, nisi qui Deum mundi auctorem & opificem esse pariter negarunt. Tanta videlicet nexûs necessitate ista duo coherent, ut jam dudum communi consensu in axioma quasi abierit: *Si Deus est, ergò mundus regitur Providentiâ.* Epicuri gregem quod attinet, etiamsi videri voluerit agnoscere Numinis existentiam, rectè tamen existimasse videntur eruditi, parùm reverâ eum ab Atheismo abuisse, ob negatam ejusdem Providentiæ. Multò saniora hac parte extiterunt, & præ aliis pulcherrima, Stoicorum philosophemata; quæ procul dubio jam dudum applausum meruissent plerorumque, nisi obstitisset eorundem de Fato (sed malè intellecta; ut ego quidem arbitror) sententia: de qua forsân ex professo aliàs differemus. Nunc, si Deus Universi hujus Auctor sit, quam esse Exercitatione proximâ evicimus, quam pariter providens ejusdem Curator agnosci debeat, est ostendendum. Neque difficile est demonstrare, ex collata Divinæ naturæ excellentiâ cum multiplici creaturæ rei imperfectione, non

I.  
*Providentiæ Divinæ circa hoc Universum consideratio generalis.*



*sine custode stare tantum opus*, ut alibi Seneca. Verùm multo evidentior erit veritatis hujus evictio, si singulos potius Providentiæ Divinæ actus circa res ab ipsa pendentes consideraverimus.

II.  
Prioris  
Providentiæ  
actûs,  
Conservationis,  
specialior  
explicatio.

In unaquaque re per Creationem jam producta duo observare licet, quorum alterum ab altero est diversissimum, Permanentiam ejus in existendo, & Activitatem ejusdem in operando. Secundum illa duplex occurrit distinctè notandus Providentiæ Divinæ actus, CONSERVATIO & GUBERNATIO. Illa est efficax Providentiæ Divinæ actio, quâ Deus creaturas suas omnes atque singulas, quamdiu esse non desinunt, facit manere eas quæ sunt factæ per creationem. Quibusdam quidem Conservationis vocabulum hoc loco minus appositum videtur; quasi notet plurimum causarum sociarum in eadem re servanda coöperationem: cum tamen solius Dei sit actio illa, de qua hic sermo est. Sed pepercisse potuissent isti supervacuâ crisi, si attendere voluissent, rectè dici Conservationem, quasi *servationem rei cum* illa essentia, quàm jam ab initio sui per Creationem acceperat. Verum ad rem potius accedo. In qua concipienda nequid erremus, diligenter cavendum est, ut non hic intelligi putemus qualemcunque illam conservationem, vulgò sic dictam, quâ quid simpliciter non-destruit, quod destruere si voluisset, potuisset omnino. Ludunt hac vocis ambiguitate, qui, admittentes quasi Divinam conservationem, interim ad continuandam rem creatam in sua existentia nullum realem actum aut positivum influxum Dei requiri, arbitrantur, contententes, sufficere puram destructionis negationem; sic ut creatura, postquam existere cœperit per creationem, ad porrò existendum usque aded sibi sufficiat, ut nullo ad id indigeat ulteriori Dei auxilio, sed mero duntaxat indultu, qui otiosè finat eam manere quod est. Istis ut occurreremus, describebamus nos Conservationem, efficacem Dei actum, quo creaturam permanere re ipsâ facit. Planè ad instar Solis diem, dum durat, conservantis. Nequaquam is meridianum lumen tantum non-destruit, sed virtute quam maximè positivâ, nec minus efficaci quam quâ primam auroram produxit, ad ejus conservationem operatur.

Sup-



Suppeditat huic nostræ assertioni fundamenta firmissima ipsa creaturarum rerum in suo esse permanentia, si jus tantum imperfectiones ritè cogitemus. Eam & dependentem esse, & contingentem, & successivam, res ipsa clamat, nec quisquam negaverit, qui creatam non negaverit. Sed & certum est, rei cuiuscunque in suo esse permanentiam haud esse omninò nihil: sic enim res nihil fieri inciperet, simulac durare inciperet; quo nihil fingi potest absurdius. Est itaque duratio verum aliquid ac reale. Neque hoc tantum, sed & continuata duratio à primo ejusdem momento realiter est distincta; quandoquidem certum est, rem aliquam durationis suæ initium accipere potuisse, ut tamen ea, quousque prolongari posset, non prolongetur. Quandoquidem autem jam sæpius demonstravimus, nequicquam quod spirat independentiam creaturæ tribui posse, clarum est, permanentiam in existendo, quæ sit aliquid verum & reale, in ea locum habere non posse, nisi ab independenti Deo, tanquam à vera & reali causa, per veram & realem influxum, procedat. Hic verò influxus est ipsa, quam explicuimus, Conservatio. Contingentiam creaturarum ratione durationis si attendas, idem suadet eadem. Nimirum, quod contingenter durat, per sese non magis est determinatum ad permanendum in suo esse, quam ad non-permanendum. Si enim ex se ad permanendum sit determinatum, non jam contingenter durat, sed necessariò. Quod si non ex intrinseca necessitate res duret, utique causæ alicujus influxui tribuendum erit quod duret. At cuius? nisi illius, quæ ut rem possibilem & ex se non-existentem per creationem fecit existere, ita & eandem contingentem & ex se non-durantem faciat durare. Cum durationis contingentia si junxerimus ejusdem successivum per partes lapsum, pulchra imprimis inde resultat argumentatio. Nempe, momenta durationis quæ in re contingente & successiva occurrunt, ex se nullam inter se connexionem habere, multo minus alterum eorum in alterum influere posse, faciliè ostenditur. Certè, non ideo nunc sum, quia ante horam fui; neque ero post horam, quia jam sum: aliis in durando contingens non forem. Iterum, ob successivum durationis meæ lapsum, non erò post horam quod ero, nisi quod nunc sum esse desiero; neque sum quod nunc sum,

## III.

*Eam possi-  
vum in crea-  
turam du-  
rantem in-  
fluxum no-  
tare, de-  
monstratur.*

nisi

nisi quod ante horam fui esse desierim. At verò, quod fuit, & jam non est, non erit, cum non erit id quod jam est: quodque jam est, mox non erit, cum non erit id quod jam est, vi ejus quod jam est, esse non potest causa illius quod mox erit. Ecce! per se insufficiens est ad durandum vel per momentum, quicquid durat permanentiâ contingenti ac successivâ. Necessaria ergò est vis externæ causæ, quæ ut suam durationem perfectissimo modo ex sese possidet, ita durationis cuiusvis alterius extra se existat fons & origo, per verum & realem, de quo loquimur, Conservationis influxum.

## IV.

*Imò, re ipsâ esse quandam continuatam Creationem.*

Ex demonstratis abundè liquet, minimè superfluum esse hanc, de qua locuti fuimus, conservandi actionem: quod opinantur, qui contendunt, unamquamque rem per seipsam id omne quod illi semel datum fuit per Creationem retinere facillè posse, etiamsi nihil amplius in eam conferatur, modò tantum non auferatur quod datum jam antè fuit. In cujus sententiæ confirmationem ajunt, frustrà ac nullâ ratione urgente, quin absurdè, poni actionem novam ac realem, cujus nullum effectum proprium ac positivum potest assignari. Verùm ex dictis totum hoc prorsùs corrui. Etiam si enim cuique creaturæ per Creationem simul & semel sua detur existentia; duratio tamen ejusdem, quam successivam esse jam diximus, quemadmodum, ob ipsum illum successivum sui lapsum, simul & semel existere non potest, ita ea unicâ momentaneâ actione simul & semel secundum se totam in creaturam quampiam conferri non potest. Quapropter, ad ponendam continuatam creaturæ existentiam, opus omninò est continuatâ productione; id est, Conservatione. Consequenter, proprium ac specificum Conservationis effectum est rei conservatæ existentia; non quatenus primum ex nihilo prodiit (sic ad Creationem pertinet) sed in quantum ultra primum illud emersionis suæ ex nihilo initium longius longiusque extenditur. Atque hanc ob causam rectè dictum fuit, Conservationem re ipsâ nihil aliud esse quam Creationem continuatam. Quæ enim Dei actio Creatio dicitur, in quantum existere facit, quod antè non erat, eadem illa Conservationis nomine venit, quatenus ejusdem generis influxu atque efficaciâ id permanere facit in suo esse, quod quidem antè extitit, fed

fed quod absque continuato hoc influxu jam non amplius extisset, verum in pristinum suum nihilum, ex quo per Creationem emergerat, fuisset relapsurum.

Continuatam Creationem dicebam Conservationem; non repetitam: ne quis hic alternationem quandam rei existentis atque nihili sibi imaginetur, quasi hoc momento res creata esse ex sese desinat, mox verò sequenti momento nova creatione à Deo reproducatur? idque toties quoties. Ut absurdissimus hic conceptus est, ita nihil is habet commune cum nostra jam explicata de Conservatione sententia. Multò minus difficilis est difficultas alia, petita ab artificibus, quorum imprimis laudatur industria, si struant machinas, quibus manum admovere ad earundem conservationem nihil est necesse. Undè arguunt, minorem longè agnosci Dei quam hominum sapientiam ac potentiam, nisi fateamur, cum saltem producere posse creaturas, quæ ipsæ per sese subsistere queant, solo Numinis indultu, citra ullum istiusmodi continuatum Conservationis influxum. Sed non attendunt isti, quam, quæ duo tanquam paria hic componunt, toto cælo reverâ sint disparia. Dedit quod ipsi contendunt; si machinæ cujuscumque à suo opifice tantam esse dependentiam demonstraverint, quanta creaturæ cujuscunque est à suo Creatore. Profecto, uti supereminentis perfectionis atque excellentiæ nota est, res etiam perfectissimas à sui tanquam causæ efficientis influxu habere pendentes omni modo (tantum si id contingat absque labore & defatigatione illius à quo pendent) ita non absque ingenti tantæ perfectionis abnegatione hac se prærogativâ exueret causa perfectissima. Exueret autem re verâ, si quid tale produceret, quod perpetuâ suâ manutenentiâ quamdiu existit non indigeret. Dixi, si sine labore id fiat & defatigatione: absque qua quatenus artifex in rem artefactam nec influit nec influere potest, industriæ alicujus atque peritiæ argumentum existit, opera fabricare, quæ quam diutissimè per sese subsistant & durent citra architecti sui manum atque curam. Sed quid hæc omnia ad illum mundi custodem attinent, qui nullâ unquam operis magnitudine distrahitur aut fatigatur, cujusque activitas & circò non absque contumeliæ nota cum laborioso nostrorum fabrorum conamine confertur.

V.  
*Difficultas  
tum quarum-  
dam hic ob-  
viarum solu-  
tio.*

## VI.

*Qualescun-  
que creatu-  
ras conser-  
vat Deus,  
influxu im-  
mediato, ac  
sibi proprio.*

Ostensa sic est Conservationis à nobis descriptæ veritas non tantum, sed & necessitas. Quæ quia se extendit ad omnia quæ in esse successivo perseverant, non erit opus ambulare per singulas rerum conservatarum classes. Quæcunque durant alia à Deo, eidem dependenti contingenti ac successivæ durationi subjiciuntur ex æquo omnia, atque idèd pari virtute Dei, ut Creatoris, sic Conservatoris, ad existentiam sui indigent. Magna illa fuerint num parva, visia num pretiosa, nil attinet; cum nulla excellentia tam magna existat quæ hanc dependentiam transcendat, nulla vilitas tam parva quæ infra eandem subsidat. Quin tantum abest, ut res nobis minimi momenti visæ ab hac Conservatione excipi debeant, ob abjectam sui conditionem, ut, si quod majus aut minus hic locum habere posset (utì non potest in eis, quæ quantum habent entitatis tantundem habent dependentiæ) quo quid existit imperfectius, eo minus id sibi sufficere primæque causæ sustentatione carere posse, cogitandum foret. Porro, cum cum in modum nulla creatura ab alia pendeat aut pendere queat, quo ipsæ omnes pendent à Deo, facile patet hunc actum conservandi solius Dei esse privilegium. Neque de eodem dubitare sinunt quæ de Conservationis cum Creatione identitate jam disputavimus: ex qua fluit, vel Conservare non posse creaturam; vel, si conservare possit, etiam creare posse. Atquè creare non posse, suo loco satis efficaciter evicimus. Etiam quidem nonnunquam creatura alteram conservare dicitur, vel quatenus eam non-destruit, vel in quantum particulæ quæpiam unius in locum particularum dissipatarum alterius substituuntur (quod fieri quotidie, observamus in corporum illorum continuatione quæ alimento indigent) sed quam hæc nulla sit ejusdem ordinis cum illa de qua hic agimus Dei Conservatione, nemo vel leviter ad antè tradita attendens ignorare potest. Undè intelligitur, omnem Conservationem, si spectes modum operationis divinæ, immediatam semper esse: etiamsi ratione causarum secundarum, quarum usum qualemcunque, eo quo jam dictum est modo, admittit aliquando, aliquando omninò præterit Deus, in Mediatam & Immediatam dispecisci soleat.

## VII.

*Quæcumque*

Istud deniquè probè tenendum est, Conservationem, non minus

minus quam Creationem, omnemque aliam actionem Dei ad extra, liberrimam esse ac purè arbitrariam; quandò perfectissima independentis causæ natura postulat, ut non diutius conservare teneatur, quam quo usque lubuerit. Neque mirum; cùm ad Entis primi perfectionem nequaquam pertineat continuata suarum creaturarum existentia. Quamobrem quâ facilitate omnia creavit olim Deus, quâque etiamnum ea conservat, eâdem, si velit, quicquid præter se existit abolere potest. Neque, si conservare aliquid desineret Numen, quicquam idcirco decederet illius vel constantiæ vel immutabilitati; quandoquidem illis non magis adversatur rei existentis abolitio, quam nova rei nondum existentis productio: quæ quo pacto cum immutabilitate consistat, quando egimus de Creatione, vidimus. Mira hinc semper mihi visâ fuit illa Cartesii collectio, quâ ex Divina immutabilitate eandem motûs quantitatem in hoc universo conservari debere concludit. Gravius tamen est, quod contendunt hodiè multi ex ista cava Philosophi, Deum nec universum hoc totum, nec partem aliquam illius, annihilare posse. Et cur nequeat? Ne spatiis imaginariis fortè fiat locus; ac pulcherrima ista mundi, tanquam nullos extensionis fines habentis, idea periclitetur. Sed jubet brevis mittere dogma, quod penitus abnegat liberrimum Dei Conservatoris in rem à se conservatam dominium.

*conservat  
Numen ead-  
em annihila-  
re, si ve-  
lit, potest.*

Cæterùm cum Annihilationis mentionem feci, minimè per eam actum aliquem positivum intellectum volui; qualem quidam eam habent: sed perperam. Revera enim in ejusmodi conceptu tacitè supponitur, ac si in creatura aliquid sit, quod à mero Conservationis influxu non pendeat. Si enim pendeat, utique tantùm cessante influxu isto, cessabit existere ejus effectum, id est, creatura hæcenus conservata. Quare superfluous planè est positivus annihilandi actus. Imò & absurdus. Quo pacto enim quo nihil planè ponitur, actus positivus dici potest? Et quis nisi conceptu monstrifico cogitet, perfectissimum agens omnipotenti suo influxu producere planè nihil? Rectius itaque sentiunt, qui opinantur, ad Annihilationem nil prorsus pertinere præter purum causæ primæ non-influxum. Scilicet, uti ante mundum conditum præter Deum nihil erat, tantùm quia Deus ex-

VIII.  
*Annihila-  
tio nil posi-  
tivi dicit,  
sed meram  
non-conser-  
vationem.*

tra se nihil operabatur ; ita quoque nunc , si duntaxat Deus extra se operari defineret , nihil eorum quæ antè existerant existeret , redirentque in nihilum , quæ fuerant quondam nihil. Ut Annihilatio sit re verâ non-actio , & quædam quasi non-Conservatio. Prorsus se res habet quemadmodum in aëris nostri , quæ nocte accidit , obtenebratione. Nullam ea arguit luminis diurni , quod antè exitit , per positivam actionem solis abolitionem ; sed sufficit hujus in nostrum hæmispherium merus non-influxus , non-illuminatio.

EXERCITATIO VIGESIMA-QUINTA  
ET ULTIMA,

DE

DEO PROVIDENTE

PER

GUBERNATIONEM.

S U M M A R I U M.

- I. *Alter Providentiæ actus , Gubernatio , meditationis difficillimæ ac periculose.* II. *Error afferentium , solum Deum omnia , creaturas nihil operari.* III. *Alter error illi oppositus , nullum Dei in operantes creaturas influxum agnoscens.* IV. *Vera Dei effcientia in causarum secundarum actiones asserta :* V. *Atque à difficultatibus quibusdam præcipuis vindicata.* VI. *Utriusque cause , primæ & secundæ , eadem esse docetur in effectû quopiam producendo actio.*



actio. VII. Dubiorum\* in hac sententia occurrentium brevis solutio. VIII. Tres hujus Providentiæ quasi actus, Præcursor, Concurfus, & Gubernatio strictè dicta. IX. Virium ad operandum largitio ad hos Providentiæ actus neque sufficit, neque pertinet. X. Præcursor quid, & quo usque actione creaturæ prior? XI. Præcursor Divini actionem creatam prædeterminantis necessitas demonstrata. XII. Influxus Dei generalis & determinabilis aliorum quam sit non uno modo in Deum contumeliosus? XIII. Præmotionis Dei efficacia cum libertate creaturæ conciliandæ difficultas undè potissimum oriunda? XIV. Duplex in hanc rem prænotanda magni momenti observatio. XV. Creatæ causæ libertas, uti non independens, ita nec prorsus indifferens, statui potest. XVI. Alterius causæ veram libertatem cum determinatione alterius consistere, & ex natura rei, & ex adversa hypothefi ipsa, docetur. XVII. Prædeterminans Providentiā neque Deum peccati auctorem statuit, neque peccantem creaturam excusat. XVIII. Eadem neque Deum injustitiæ arguit, neque causarum secundarum potentiæ activæ præjudicat. XIX. Concurfus Dei agnoscendus tanquam causæ totalis, immediatæ, & principalis. XX. Concurfu Dei continuato indiget creatura quamdiu in operando perseverat. XXI. Gubernantis Providentiæ Divinæ necessitas paucis demonstrata. XXII. Ea ad quasvis creaturarum actiones extendenda; etiam minimas, contingentes, liberas, malas. XXIII. Gubernatio Dei tota sanctissima, independens, irresistibilis, sapientissima, constantissima. XXIV. Providentiæ Divinæ in Ordinariam & Extraordinariam; item, in



*Realem & Moralem, divisio. XXV. Moralis Providentiæ consideratio unicum genuina Philosophiæ Moralis Fundamentum. XXVI. Tractatus de Deo, ejusque Providentiæ, Epilogus.*

1.  
*Alter Providentiæ actus, Gubernatio, meditationis difficillimæ ac periculosa.*



D alterum Divinæ Providentiæ actum transeo, sive ad curam Dei circa rerum creaturarum activitatem, GUBERNATIONEM puta; sumtâ voce generaliori significatu: nam & aliâs specialius aliquam quasi hujus Providentiæ partem notare solet. Quæ eadem ambiguitas in vocabulo *Concursus* observanda: uti ex infrâ dicendis intelligitur. Attentione verò attentissimâ ac multo majori hic opus erit, quam in tullo capite de Deo hætenus tractato; tam ardua & periculi plena est hæc meditatio. Nimirum, vix imò vix concipiendæ alicui activitati par est nostra cogitatio, quam non exigat ad actionum quas in nobismetipsis deprehendimus mensuram. Atqui illæ sese hic nobis offerunt viæ, quæ quantum cælum tellure nostrâ est altius, tantum existunt viis nostris sublimiores. Quamobrem quisquis curâ minus circumspiciat ac pede parum stabili incomprehensibilis mysterii altitudinem conscendere nititur, etiam ex levissimo lapsu præceps devolvitur in errores profundissimos; quorum quidem initia primâ specie apparent tenuia, incrementa verò existunt tanta, ut nullo unquam dogmate purioris rei Theologicæ facies conspurcata fuerit sædius, quam perperam intellectâ hac Providentiæ divinæ parte. Est hæc re verâ hæresium quarumcumque corculum: quandoquidem una sermè omnium summa existit, ex impiis corruptæ rationis elementis hanc saniozem impugnare doctrinam; quâ vitiatâ facilis via est, ad profanandum universum divinarum perfectionum sacrarium, eumque obtrudendum Deum, qui re ipsâ iners atque impotens prorsus sit idolum. Ex adverso, nulla æquè pia est de Numine persuasio, quam quod ejusdem provido consilio & efficaci manu regatur omnis qua latè patet universi machina. Hic nunc deus & medulla est puriorum de Deo cogitationum; absque quo nun-

nunquam erit, ut quis ritè agnoscat & veneretur adorandam supremi Regis majestatem. Ejus gratiâ freti tantarum rerum meditationem aggredimur: sed modestam; quando hic tutius est humi serpere, quam in sublimi pati vertiginem.

Intelligimus per hunc Providentiæ actum, omnem illum causæ primæ influxum, quem præbet ad quascunque quarumcunque suarum creaturarum, sive causarum secundarum, actiones. Duplex in hoc negotio sese offert causa, utraque verè operativa: interim altera alteri sic subordinata, ut quicquid agit inferior, id agat acta à superiore; indèque idem effectus duplici causæ sese debeat, Deo scilicet & creaturæ. Notandum itaque hic occurrit duplex principium *ἐντελεχτικόν*, sive operativum; una tamen *ἐντέλεια*, sive operatio, à gemino illo principio fluens; atque unum denique *ἐντέλεια*, sive opus productum. De hoc quidem dubitari nequit. De isto constabit faciliè, quandò illud planum fecimus. Ut ergò à primò faciamus initium, asserimus, effecta quævis, quæ à causis suis naturaliratione procedunt, & Deo tribuenda esse, & creaturæ; utrique tanquam causæ proximæ & totali in suo genere. Adversatur nostræ huic thesi duplex error, in extremaè diametro opposita sedecens. Alter creaturas nihil agere, sed solum Deum; alter Deum nihil agere, sed solas creaturas, contendit: quorum ille etsi sit stultissimus, hic profanus quoque, neuter tamen suis destituitur propugnatoribus. Priorem opinionem rejectam suscitaverunt quidam Scholastici, docentes, nihil activitatis creaturis competere, sed duntaxat Deum agere ad earum præsentiam. Admodum vicina huic sententiæ existit illa hodierna Cartesiana Philosophatio, quæ (exceptâ mente humanâ) præter materiam ac varios ejus modos in creaturis admittit nihil. Quum enim illa duo sint merè passiva, sequitur exindè, res omnes creatas omni prorsus activitatis principio destitui, nec quicquam extra se producere posse. Imò, ne mens humana quidem hic excipi potest, quandoquidem eam contendunt meram esse cogitationem; quæ quam nullum effectum extra se ponere apta sit, clarum est. Sileo deliria fanaticorum, non se, sed solum Deum in se, agere, quod agere dicuntur, contententium. Et hos quidem efficacissimè redarguere poterat vel propria suorum facinorum conscientia; quo-

II.  
Error asserentium,  
solum Deum  
omnia, creaturas  
nihil  
operari.

quorum culpam sanctissimo Deo, ceu causæ, transscribere, abhorrentius est ab omni pietatis sensu, quam ut à nobis confutari debeat. Istos verò refellit evidenter constans Universi harmonia, conservata per adjumentum mutuum quod sibi præstant ejusdem partes; quippe quæ sibi invicem id præstare nequeunt absque alterius in alteram influxum & causalitatem. Adde Dei variam in creaturis ad naturarum varietatem accommodatam operationem: frustra profectò huic accommodatam, nisi sic postulante variâ rerum creaturarum activitate; quandoquidem divina virtus, si per se solam cogitur, in quovis subiecto quidvis operatur eadem operandi facilitate. Verùm, quoniam de Dei potius quam creaturarum activitate agendum nobis est in præsens, desino pluribus confirmare, quod (ne nimium abeamus ab eo quod præ manibus est argumento) hypotheseos instar hoc loco rectius à nobis assumitur.

III.  
*Alter error illi oppositus, nullum Dei in operantes creaturas influxum agnoscens.*

De altero itaque errore videndum erit diligentius; illo scilicet, qui citra ullum verum Dei influxum causas secundas operari contendit. Agmen hic ducunt, post Atheos, Epicurei, qui nihil hujus Providentiæ Diis suis faciunt reliquum, verentes eosdem ex suis intermundiis ab otio voluptuoso vocare ad negotium. Exertim, ex eorum mente, Lucretius:

*Natura videtur,*

*Libera continuo dominis privata superbis,*

*Ipsa sua per se sponte omnia Dis agere experts.*

Quibuscum in partem societatis veniunt Peripatetici, illi qui mundum sublunarem divinæ curæ subducunt. Ruunt quidem hæc omnia per ea quæ jam antè de Creatione & Conservatione nobis disputata sunt, ut solo contemptu vindicanda videri posset sacrilega impietas; nisi inter ipsos Christianos jam olim Durando, nuperius quoque Taurello, cum suis, libuisset eandem recoquere, negando cum actionibus causarum secundarum concurrere Deum. Atque utinam negent isti soli! Etiam hodiè Jesuitæ & Sociniani, cum socienis suis, etiamsi, ad declinandam negatæ divinæ Providentiæ invidiam, vastro consilio verbis ferè utantur modestioribus, quando tamen ad rem ipsam ventum est, cum primis autem ad concursum Dei in liberas rationalium creaturarum actiones, sic consulunt libero suo arbitrio

bitrio per efficacis divini influxûs divortium, ut supremo cœlorum terrarumque Regi tribuant re verâ pro sceptro arundinem. Istud ergo nobis hoc loco ponendum est fundamentum, cui firmum superstruatur ædificium, ac tale quod sustinere queat Sophistarum quorumcunque insultus. Summa rei est, nullam à creatura qualicunque fluere actionem, qua talem, quæ non pariter proficiscatur ab efficientia Dei, tanquam causæ ejusdem veræ ac realis. Hanc assertionem si demonstratam dederimus, faciliori negotio superabimus quicquid circa Providentiæ hujus modum ab adversariis movetur difficultatis. Ergo hoc agamus! & paucis quidem: quandoquidem res omnis conficitur, attendendo duntaxat notionem tum Creaturæ tum Creatoris. *Faciám (dicam cum Seneca) rem non difficilem, causam Deorum (Dei) agam.*

Multà demonstratione jam sapius evicimus, indubitatum esse axioma, tantum esse in creaturis relatis ad suum Deum dependentiæ, quantum est in eis entitatis. Nunc itaque scire lubet, nûm quid entitatis quæcunque creaturæ actio includat? Si includat (ut includit; nisi forsan actio creaturæ nihil sit) tantumdem ergo includit dependentiæ. Dependentia scilicet talis, qualis est cujusvis entitatis; id est, istius, quâ Dei tanquam suæ causæ influxui vero ac positivo se totam debet. Quamobrem, vel nihil planè est creaturarum actio, vel si quid positivi sit, id totum à Deo habet tanquam à principio sui. Iterum: planum jam antè fecimus, à Deo tanquam à causâ sui pendere creaturam quamvis, quousque ab eo pendere potest. At si solius essentia non item operationis suæ respectu, à positivo Dei influxu penderet creatura, minus certè à Deo penderet, quam ab ipso pendere posset. Nisi quis contendere cupiat, actiones creaturarum ipsâ suâ naturâ ab alio pendere non posse; id est, divinas esse & infinitè perfectas. Quin, cum modus operandi eum qui essendi est sequatur, creatura autem quolibet existentia momento vi efficacis Dei influxûs, sive Conservationis, subsistat, negari nequit, eandem in operationibus suis pari Dei influxu, sive Concurso, indigere. Et quis concipiat rem, cujus tota substantia Dei est; cujusque tamen accidentia, actiones puta, eodem cum sua substantia modo ad Deum nil pertineant? Subjectum ergo dependens erit,

## IV.

*Vera Dei  
efficientia  
in causarum  
secundarum  
actiones  
asserta.*

adjunctum independens? Creaturæ secundaria & subordinata erunt entia, prima interim nec ulli causæ obnoxia agentia? Videmus clarè, quam nemo affirmare possit, Deum minus influere in actiones causarum secundarum per Concursum, quam influit in essentiam earundem per positivam Creationis & Conservationis efficientiam, quicumque non monstrosâ contradictione, eandem rem simul agnoscere velit dependentem, id est creaturam, in essendo, & independentem, id est Deum, in operando. Sufficiens ista: quapropter alia addere desino. Tantum notari velim, hisce rationibus non solum nos ostendisse ejus Providentiæ de qua agimus veritatem, sed & universalem ejusdem necessitatem; atque adeo simul consecisse, extendere se eam ad quasvis quarumcunque creaturarum actiones. Quandoquidem enim eas eruiamus ex ipsa natura creaturæ quæ talis consideratur, nequeunt, citra hujus abnegationem, illi magis subduci sublunares actiones, quam cælestes; liberæ, quam necessariæ; malæ, quam bonæ; minimæ, quam maximæ. Quatenus enim omnes in eadem creaturæ entitatis categoria includuntur, etiam pariter eidem subsunt dependentiæ. Quæque interim suo modo atque ordine: de quo constabit ex sequentibus plenius.

V.  
Atque à  
difficultati-  
bus quibus-  
dam præci-  
piis vindi-  
cata.

Difficultates quæ nostræ sententiæ obstat videntur, nunc prius amovendæ sunt. Nil moror Epicureorum fatuitatem, metuentem, ne nimis rerum molestis implicetur Numen, si cunctis nostris actionibus præsit. Toto crelo ea aberrat ab omnî conceptu saniori de Deo; quem qui cum molesto conatu ac fatigatione concipit actuosum, ne Deum quidem concipit. Æquè frivolum est, quod urgent de bonis quæ malis, de malis quæ bonis in hac vita frequenter eveniunt; quodque minime futurum autumant, si cura justî ac benigni Dei circa singulas rerum actiones versaretur. Sed solvit jam dudum egregiè hunc nodum Seneca, in suis de Providentia dissertationibus. Itaque, quid alii huc adferant, videamus potius. Urgent impræmis, superfluum essetatem Dei in nostras actiones influxum: si enim certum sit, creaturas tanquam causas principales naturæ sibi quæ inditæ ac sufficiente virtute præditas esse ad operandum, sequi omnino putant, eas causæ superioris auxilio non indigere.

Sed

Sed consequentia inconsequens est. Etenim, sit causa secunda sufficiens ad operandum, etiam tanquam causa principalis; non hoc ipso sufficiens est ad operandum tanquam causa prima. Aliud enim est, sufficiens esse ad operandum in suo genere; aliud, prorsus independens esse, nulloque primi entis auxilio indigere. Sufficientia causæ creatæ secludit omnem causalitatem quæ sit ejusdem secum generis ac naturæ; non subordinationem ad efficientiam illam, à qua quemadmodum pendet ipsa causæ creatæ virtus, ita non minus actio ab ea procedens, cum dependentia à causa prima utrique illi æquè sit essentialis. Itaque, si subordinata non pugnare cogitaverimus, facillè intelligemus, dependentiam à causa prima nil præjudicare sufficientiæ ad operandum quæ competit creaturæ in genere causæ secundæ. Si insites, causæ creatæ suarum actionum perfectiones in se ipsis continent, facillè ergo ex se & per se eas producere poterunt, citra alterius auxilium: regero, speciem habituram fore hanc objectionem, si creaturæ actionum suarum perfectiones in se continerent à se & ex se. Atqui id est falsissimum. Quamobrem, quemadmodum creaturæ actionum suarum perfectiones in sese non continent ex sese, sed dependenter à causa prima, quæ eas in illis posuit; ita quoque eandem ex sese elicere non poterunt, nisi dependenter ab influxu ejusdem causæ, qui eas faciat ipso facto illas exferere. Ut verbo dicam, tribue creaturæ virtutem operandi quantumvis sufficientem, nil repugno; duntaxat si, quantam in ea ponis sufficientiam ad agendum, tantam agnoscas in agendo dependentiam.

Manet itaque firmum, nullam actionem ita in solidum causæ creatæ tribui posse, ut non ea pariter agnoscat causam sui Deum. Verum, nùm utrumque hoc principium influat in eundem effectum eadem numero actione; an potius distincta in hoc negotio statuenda sit actio Dei, & alia ab ea quæ creaturæ est? quæritur. Mereturque hoc dubium eo diligentius hoc loco expendi, quia eodem utitur Durandus, ad evertendum quem jam adstruximus Dei influxum. Si Deus, inquit, ageret immediatè ad productionem effectuum causæ secundæ, aut ageret eadem actione, quæ creatura; aut aliâ. Non eadem; quia impossibile est, eandem numero actionem esse à duobus vel pluribus agentibus ita, ut à quolibet sit immediatè & perfe-

## VI.

*Utriusque  
causæ, primi  
et secundæ,  
eadem esse do-  
cetur in effe-  
ctu quopiam  
producendo  
actio.*



etè. Non alià; quia, &c. Nos hìc respondendum censemus cum eis qui sentiunt, Deum agere cum creatura actione numero eàdem cum ea quà agit creatura. Atque arbitror, si sic sentiamus, multo facilius expediri haud paucas difficultates, quæ sese in hoc Providentiæ negotio offerunt. Id certum est, præter Deum & res à Deo productas nihil dari in rerum natura. Quod si actionem Dei cogitaverimus, prout sese habet activè à parte principii sui, Dei, non minus certum est, eam nihil creaturæ esse, sed ipsissimum simplicissimo modo actuosum Deum. Passivè ergò spectanda venit, prout extra Deum terminatur in creaturam. Atque sic consideratam nihil aliud esse posse asserimus, quam ipsam actionem causæ secundæ, quatenus eà à prima quoque causa procedit. Prorsus quemadmodum Creatio: quæ non concipienda venit ut actio, indè à creatoris, hinc à creaturæ natura distincta; sed tanquam ipse creator, si activè spectetur, vel tanquam ipsa res creata, si consideretur passivè. Sicuti verò præter ista duo tertium quodcunque in creatione nec dari nec concipi potest, ita pari ratione dicendum hoc loco, illum divinæ virtutis influxum, de quo agimus, à parte Dei quidem ipsum Deum esse, verum à parte operantis causæ secundæ, ipsissimam actionem creaturæ. Imò, nisi eàdem numero actione Deus agat & creatura, non potest actio creaturæ Deum habere causam sui proximam, sed remotam duntaxat: quod immediatæ creaturarum à Deo dependentiæ planè adversatur. Tandem, si Dei actio non eadem sit cum illa creaturæ, quid ni pari necessitate illa actio Dei, quæ actio creaturæ ab illa distincta producitur, alià indigeat iterum efficientiâ à se distinctâ, quâ producat ipsa hæc? Si sic, influxus influxibus cumulandi erunt absque fine. Id ergò ne fiat, in prima actione Dei, quæ cum actione creaturæ una eademque sit, erit subsistendum.

VII.  
*Dubiorum  
 in hac sen-  
 tentia oc-  
 currentium  
 brevis solu-  
 tio.*

Quod asserunt, fieri non posse, ut actio numero eadem à duobus agentibus procedat, ità ut à quolibet sit immediatè & perfectè, id totum verissimum esse damus in causis coördinatis; quarum mutua independentia eundem ab utroque procedentem influxum non admittit. Verùm longè dispar ratio est illarum causarum, quarum una per omnia sui omnimodam & totalem dependentiam dicit

ab,



ab altera; uti hic obtinet. Cui rei simile exemplum in rerum natura nullum exstare, cum jam antè monuerimus, frustra laboratur in adferendis hùc instantiis ab obviis causis defunctis; quippe quæ nimium existunt dissimiles, ad fundandam argumentationem contra allatæ à nobis demonstrationis evidentiam. Sed, inquirunt alii, eidem actioni eadem necessariò conveniunt prædicata. Si itaque Dei & creaturæ actio numero una hic sit, quod peccatum huic adhæret, etiam illi adhærere dicendum erit: quod tamen omni modo à divina sanctitate abhorret. Ast, tametsi sit verum, ejusdem actionis secundum se spectatæ easdem esse affectiones reales ex natura illius actionis fluentes, non tamen id quadrat in peccatum, quod propriè loquendo privatio est alicujus boni, atque idcò potissimum æstimandum venit ex modo quo se agens habet ad suam illam actionem, quæ peccaminosa existit. Jam verò parili modo & Deum & creaturam ad eandem illam suam actionem habere sese, id est quod nego. Producit Deus actionem; non comproducit bonitatem moralem; atquæ non tenebatur. Producit creatura eandem illam actionem; nec comproducit bonitatem moralem: atquæ hæc omninò tenebatur. Negativè ergò sese habet Deus, privativè creatura: consequenter, eadem in eadem actione absentia respectu hujus rationem peccati habet, illius respectu nequaquam. Verum de hisce deinceps quoque dicendum erit. Nunc, ut absolvam, contentus ero demonstrasse, quod ab initio demonstrandum proposueram; videlicet, quodcunque opus à creatura productum, etsi in se sit unum, duplex tamen agnoscere sui principium subordinatum, Deum & creaturam; à quo utroque fiat per unam & eandem utriusque actionem. Quæ qui rectè perceperit, viam ad sequentem tractatum is stratum sibi experietur planam atque expeditam.

Nequaquam verò sufficit, generatim agnovisse Divinam Providentiam, quæ in omnibus creaturis operetur omnia; nisi quoque istius efficientiæ modus statuatur ille, qui tanti Numinis independentia atque primitate sit omninò dignus. Quod arduum negotium quo distinctius à nobis concipiatur, plurimùm juvabit tria sigillatim attendisse, quæ in quavis causæ secundæ operatione intellectui nostro sese offerunt. Occurrit primò agentis cujusvis prima applicatio ad agendum; hanc mox sequitur

VIII.  
*Tres hujus Providentiæ quasi actus, Præcursus, Concursus, & Gubernatio strictè dicta.*

tur ipsa ejusdem activitas ; quam denique excipit actionis universæ ad suos fines specialis determinatio. Quumque in istis omnibus dominetur Dei influxus, non malè etiam hîc tripliciter consideratur : vel quatenus primo instanti quiescentem antè creaturam potenter excitat ad agendum ; vel quatenus agentem jam creaturam, quamdiu agit, indefinenter promovet in agendo ; vel tandem, quatenus in præstitutos abs se fines actionem totam sapienter regit atque gubernat. Illo modo spectata Providentia, Præcursor ; isto, Concurfus ; hoc, Gubernatio dici commodè potest : sumtis vocabulis aliquanto strictius ac sæpè accipiuntur, quando absque discrimine singula pro universa Dei Providentia usurpantur. Cavendum verò, ne quis hîc trinam Dei actionem verè distinctam concipiat : idem enim unusque re verâ influxus est, qui variè conceptus cum relatione ad actionis creatæ, vel initium, vel progressum, vel finem, pro vario hoc considerandi modo, variam subit denominationem.

## IX.

*Virium ad operandum largitio ad hos Providentiæ actus neque sufficit, neque pertinet.*

Quæ percipiuntur multo facilius, ubi de singulis dixerimus. Suppono semper & ubique in hac dissertatione, Deum creaturas instruxisse viribus ad agendum idoneis, sive facultates naturales eæ fuerint, sive etiam habitus : quin & eundem vires istas in eisdem continuare suo influxu. Id tam manifestè arguit creaturarum à Deo dependentia, ut de eo vix dubitet quisquam eorum omnium, qui aliquem saltem Dei Concursum admittunt. Tantum falluntur vehementer, quotquot hoc uno omnem Providentiam divinam absolvi putant, neque progrediuntur longius. Si sic, non jam Deus ipsius actionis creatæ auctor foret ; quem esse necessariò, jam demonstravimus. Quandoquidem enim potentiæ atque habitus frequenter existunt otiosi omnique actu secundo destituti, certè non is qui facultatem agendi concessit, vel habitum infudit, idèd actionis indè fluentis haberi potest vera causa. Quumque actio ipsa aliquid sit ab istis agendi principiis verè distinctum, etiam in actionem quæ talem, non tantum in agendi facultatem, Deum influere, tenendum est. Imò, illa Dei actio quæ creaturis vires ad operandum dedit, si accuratè loqui cupiamus, non tam Providentiæ est, quam potius Creationis : sicuti illa, quæ vires semel con-

concessas permanere facit, propriè non Concursus est, sed Conservationis. Prærequisita ergò illa tantum sunt specialis istius Providentiæ, de qua hîc agimus.

In ea sese primum offert PRÆCURSUS: qui quatenus naturæ ordine creaturæ activitatem antecedit, etiam Prædeterminatio, seu Præmotio, aliis quoque Concursus prævius vel prædeterminans, dici consuevit. Designatur eo nomine, ipsa Providentia Divina, quatenus creaturarum vires, quotiescunque sunt operaturæ, efficaciter ad agendum excitat & applicat. Dicebam, hunc actum Præcursum dici, eo quod ordine naturæ activitatem creaturarum antecedit: quandoquidem enim jam ostendimus, non aliâ atque aliâ, sed eâdem numero actione & Deum agere & creaturam, per se manifestum est, nullam temporis prioritatem hîc locum habere posse; nisi quid se ipso prius extitisse dicatur. Probè id observandum est adversus adversariorum nostrorum hac parte calumnias, quibus affingere nobis solent, ac si sentiamus, primo temporis momento Deum reali efficientiâ creaturam ad agendum excitare, deinceps sequenti temporis articulo creaturam sic motam, istâque vi externâ impulsam, cum aliter nequeat, operari quoquæ. Absque ista sunt, uti à natura rei, ita à nostra opinione. Imò verò, Concursum concomitantem & simultaneum, ut ipsi vocant, ab hoc concursu prævio, ac si gemina actio sit, ne quidem re ipsâ distinguimus: sed inchoatum Concursum, quatenus is ordine naturæ creaturam agentem præcedit, Præcursum vocamus; qui idem Præcurfus continuatus, quatenus ratione temporis cum actiosis creaturis prorsus simul est, Concursus dicitur. Tantum ergò volumus, Deum non duntaxat simultaneitate temporis agere cum causis secundis, sed & prioritatem naturæ agere in causis secundas. Etiam si autem hæc communis etiam opinio sit plurimorum ex Doctoribus Scholasticis, qui inde Prædeterminantes appellati sunt, quales existunt præ aliis Thomistæ & Dominicani, adversantur tamen ei imprimis quotquot Scientiæ mediæ commentum sunt amplexi, quos inter excellunt Jesuitæ. Videndum itaque, quæ ratio suadeat, Deotribuendam esse hanc in operando prioritatem, quoties per ejus influxum agunt creaturæ.

X.  
Præcurfus  
quid, &  
quo usque  
actione crea-  
tura prior?

## XI.

*Præcursor  
Divini æli-  
onem crea-  
tam præde-  
terminari  
necessitas  
demonstra-  
ta.*

Demonstratum jam dedimus, nihil agere creaturam, nisi influente Deo. Influyente nimirum efficacia sese digna, atque conveniente cum Independentiæ suæ excellentia. Non finit hæc, pares facere Deum & creaturam, ita ut nulla sit causæ primæ præsecunda eminentia. Atqui quæ hæc erit, si tantum cum creaturis concurrat Deus? Nam & itidem cum Deo concurrunt creaturæ. Nihil ergo sic Deo fiet reliquum, præter causæ merè sociæ gloriæ, pari passu cum creatura progredientis, habentisque non nisi divisum cum ea imperium. Imò verò, prima atque secunda causa nomina duntaxat erunt absque re; quando primæ nullæ veræ erit prioritas præsecunda, secundæ nulla ad primam subordinatio. Adde (quod suis locis à nobis est ostensum) jam ab æterno suam stare efficaci Dei consilio absolutam immutabilitatem, suam divinæ præscientiæ infallibilem certitudinem. Qui autem stet, nisi intentionis ordini respondeat ad amissum eventus complementum? Et quo pacto hoc illi respondeat, nisi provida cura Numinis intercedat, prævio suo imperio ad id agendum creaturas excitans, quod ipsas in tempore acturas ab æterno & præordinavit & prævidit? Neque hujus illationis vim ignorant adversarii: quamobrem ad æternæ providentiæ scriem cum actuali ejusdem executione conciliandam, quam ut agnoscant supremi Numinis super suis creaturis in agendo primitatem, cerea & ambulatoria illi decreta, ac speculantem quasi ex conjectura scientiam, tribuere malunt. Atque hac de causa universum hoc negotium planè ac plenè confici posset vel illis rationibus solis, quibus jam dudum Divini Intellectus & Voluntatis asseruimus independentiam. Unum, quo absolvam, adjiciam. Nisi alteram causam ab altera hic prædeterminari statuamus, scire lubet rationem & modum istius connexionis inter actionem utriusque, quæ sit ut utraque in eodem opere producendo concurrat? Non id forte fortuna fieri, clarissimum est. Neque tamen extra Deum & creaturam quicquam existit, cui id adscribi queat: nisi fatuissimum satum quis inducere cupiat, cujus legibus utrumque agens, æquè primum ac secundum, sic sit adstrictum, ut altero operante mox coöperetur alterum. Quando ergo nullum tertium impellat Deum & creaturam ad simultaneam actionem, restat, nexus istius rationem quarendam esse vel in Deo, qui faciat, creaturam concurrere

recre

secum; vel in creatura, quæ faciat Deum concurrere secum. Posterius quis est qui palam ausit amplecti? Nemo enim non manibus palpat, si causæ secundæ id tribuatur imperii in actiones causæ primæ, ut illa quoties lubitum fuerit hanc vocet in operis sui societatem, idem prorsus hoc esse, ac Numen habere non Univerſi gubernatorem, sed apparitorem potius; qui scilicet attentissime creaturarum suarum nutus observare teneatur, atque ilicò præsto esse, simulac hinc ad opus quodpiam sese accingere placuerit.

Et profectò tantum harum demonstrationum est pondus, ut eo prelli Adversarii apertè quod res est profiteri vix ausint, sed tutius habeant latebras quærere in ambagibus verborum; at quorum sensum si detexeris, detexeris pariter eandem, verum palliatam tantum, quam nunc impugnavimus, impietatem absurdissimam. Nimirum, influxum Dei admittere videri planè volunt: at verò ita sese mox explicant, ut non agnoscant alium, quam generalem, indifferentem, determinabilem; specificandum scilicet & determinandum ad alterutrum oppositorum à libero rationalis creaturæ arbitrio. Ut fermè Deum in hoc negotio sese habere cogitandum sit ad instar hominis, qui organi alicujus pneumatici tubos aëre quidem inflat, totam tamen hujus ad hunc vel istum sonum producendum determinationem arbitrio & actioni musici relinquit. Indè fingunt, loco Præcursorum jam à nobis explicati & demonstrati, concursum nescio quem, *oblatum*, uti vocant, quo voluntatem nostram prædeterminari negant; quippe qui existat talis, ut eum creatura libera sic habeat in sua potestate, ut eo uti vel non uti, ad hoc vel ad oppositum efficiendum uti, queat. Quain re eo usque progredi non verentur, ut doceant, *hominem nō posse pro suo arbitrio Dei concurrere, non aliter ac si esset habitus inherens*. Atque hinc principiis suam debent originem omnia illa sententiarum portenta, quibus ab omni ævo hæreticorum furor victricem Dei efficaciam in salutis nostræ negotio impugnavit. Qualis est imprimis gratia illa conversionis resistibilis, quæ quidem sufficiens sit, si forsitan incidat in piæ dispositionis animum, eà ritè uti paratum; per se tamen nequaquam efficiens, quippe quæ nullo negotio à contumaci peccatore possit respui. Nos, relictis Theologis poste-

XII.  
*Influxus  
Dei genera-  
lis & deter-  
minabilis  
aliorum  
quam sit  
non uno  
modo in  
Deum con-  
tumeliosus?*

rioribus hisce, ista priora à detestando sacrilegio absolvere non possumus, propter rationes quibus præcedente articulo firmiter evicimus, Deum non tanquam Deum agnoscere, nisi agnoscat primus motor, quasunque causarum secundarum operationes efficaciter sibi subordinans. Atqui per ista creaturæ subordinatur creator; pars magna divini influxus irrita redditur & frustranea; independens determinatio actionis quæ Dei est dependenti creaturæ asseritur; omnipotentia divina per creaturam ponitur obex; divina præscientia certitudo evertitur; consiliorum divinorum constantia infringitur; omnis divina gubernationis ordo confunditur; utque uno dicam verbo, sic in supremo dominationis throno collocatur humana voluntas, divina Providentia nexibus emancipata, ut Deo inane duntaxat relinquatur simulacrum imperii, quippe quod sit mancum, pendulum, confusum, precarium, enervatum, ac mixtum cum plurima ad creatum arbitrium submissione. Quorum omnium cum ex antè dictis facilis sit demonstratio, brevitatis causâ eis inhærere desino. Certè rem quâ oportet attentione examinanti dubium jure merito videri possit, an non tolerabilior re verâ sit Epicureismus, omnem Dei gubernationem penitus expungens, quam tam mera providentiæ creato arbitrio sic subditæ, ac ne speciem quidem summæ Majestatis præ se ferentis, umbra.

XIII.  
Præmotio-  
nis Dei effi-  
cacem cum li-  
bertate crea-  
turæ conci-  
liandæ diffi-  
cultas inde  
potissimum  
oriunda?

Duas autem præ aliis admovent machinas, ad quassandam Divina Prædeterminationis certitudinem, ejusdem hostes. Altum ante omnia clamorem tollunt de libertate nostra, quam perimi omninò vociferantur, si divina præmotioni humani arbitrii actus eo quo dictum est modo subjiciantur. Nimirum, necessitatem quandam agendi induci per hunc Præcursum efficaciter excitantem, manifestum evadit. Atqui quod in operando necessitati cuipiam subest, id liberè agere non posse, contendunt; quatenus per necessitatem destruitur ad utrumlibet oppositorum indifferentia; quam ipsi pro anima libertatis habent. Atque hæc illa Helena est, quæ dedit, non decennale bellum, sed omnium fermè seculorum Theomachiam. Nobis nunc paulo pressius cum istoc Achille est congregiendum, & nùm tantus sit, ad conficiendum quod isti volunt, ac vulgò habetur, cominùs experiendum est. Dederim ab initio, in

con-

conciliando hoc Dei cum creata voluntate. Præcursu aliquid latere, quod obstat, quo minus omnem hîc difficultatem superare queam. Dederim, inquam, hoc: neque mirum id videri poterit; neque tale, quod quicquam saveat adversariis. Mirum accidere nequit; præcipuum enim fundamentum ex quo ratio conciliandæ nostræ libertatis cum divino Præcursu est eruenda, pendet à clarè & distinctè percepto modo illo quo causa prima in creatam voluntatem operatur: illo enim non planè perspecto, necessariò etiam hærebimus in comprehendenda habitudine, quam ex ipso hoc operandi modo causa prima dicit ad creaturæ voluntatem. Atqui quid dignius existit incomprehensibili Deo, quam incomprehensibiles fateri quas servat nobiscum agendi vias. Decentior itaque Deo ac veritati magis congrua videri debet nostra sententia, vel ob hoc ipsum, quia aliquid mirabile in ea latet, quam illa adversariorum, quæ nihil difficultatis, ut illi opinantur, hîc reliquum facit. Interim in ea quam asseruimus veritate ipsi quoque minus invenirent scrupuli, si didicissent satis à sublimitate tantarum rerum humiles istos & abjectos influendi modos remove, qui nobis in creaturis sunt obvi. Id quia negligunt, nodos ipsi sibi nectunt in hoc negotio insolubiles: quos magnam partem potuissent declinare, si attendere voluissent, indè quidem nullam causam creatam tam intrinsecam esse posse alteri, quam Deus existit creatæ voluntati; hinc verò, nullam causam creatam tam ab alia pendere posse, quam à Deo pendet sua creatura. Quo observato, sponte suâ evanescit præcipua hujus loci difficultas, ex iniquâ istiusmodi comparatione maximè oriunda. Sed & ab initio aliquid hujus præmonuimus.

Quicquid sit, quod nos ignorare mirum non est, nequam id creare debet præjudicium veritati, de qua sumus aliundè certò persuasi. Deum non posse non omnibus creaturarum actionibus præesse, ex perfectissima ejus natura jam demonstravimus: creaturæ rationalis voluntatem non posse non liberam esse, ipsi in nobis ipsis experimur abundè. Nunc pone, in connectendis istis duabus veritatibus me hæsitare: nùm idèò non-cognita connexionis ratio abnegare faciet alterutrum extremorum certissimè exploratorum? An verò etiam id scire non velle debebo

XIV.  
*Duplex in  
hanc rem  
prænotanda  
magni mo-  
menti ob-  
servatio.*



quod scio, quia quo pacto eorum quæ scio alterum cum altero cohæreat, nescio? Quin imò, ut nulli non constet, quam absurdus sit adversariorum in hoc negotio processus, grandius quid dabo, nunquam tamen concedendum. Fingamus, demonstrasse eos, concipi non posse causæ primæ prædeterminationem qualem descripsissimus, nisi hoc ipso aliquam patiatur libertas nostra diminutionem. Quid si jam ego rationibus saltem non minus firmis demonstratum dederò (utî dedi) neque concipi posse causæ secundæ libertatem qualem illi describunt, nisi hoc ipso aliquam patiatur independens Dei dominium diminutionem? Cujusnam hîc sententia alteri præferri debeat? res ipsa clamat. Nos à Deo initium facientes, quid ejus perfectio postulet, unicè primùm attendimus; atque modum operandi illi convenientem postquam collocavimus in tuto, de salvanda demùm omni meliori modo nostra libertate cogitamus. Adversarii à semet ipsis initium facientes, id anxie primo loco agunt, ut quam amplissimam atque absolutissimam creatæ voluntati assignarent libertatem; quâ in arce collocatâ, de Deo deinceps cogitare incipiunt, totiesque ejus decreta, præscientiam, potentiam, influxum, fingunt refinguntque, donec eam illis omnibus induerint formam, quâ nihil detrahatur præconceptæ voluntatis humanæ libertati. Quis rectius hîc philosophetur, judicet æquus quilibet rerum arbiter! Profectò, quanto existit tutius in hominem injurium, quam in Deum sacrilegum esse, tanto securius quis, potius quam ut Deo quicquam detrahat, aliquid suæ abneget libertatis.

## XV.

*Creatæ causæ libertas, utî non independens, ita nec prorsus indifferens, statui potest.*

Verùm enim verò neque hujus quicquam fieri necessum est. Stante quoque divinâ prædeterminatione, nobis salva manet libertas; vera scilicet; non illa quam suo sibi arbitrio fingunt isti. Confundunt perperam duas distinctissimas notiones, ac si idem planè sint voluntatis libertas, atque *ἀδραποεία* sive indifferentia; putantque nihil huic detrahi posse, quin tantundem & illi decedat: undè nata famosa illa, quam vulgò circumferunt, libertatis definitio, tanquam facultatis, quâ quis, positus omnibus ad agendum requisitis, agere possit, vel non-agere. Sed confictam eam totam esse, nos dicimus ac prorsus erroneam. Nulla enim ex hac hypothefi esse potest vera libertas quæ non sit

fit independens : quatenus dependens esse , & tamen tam absolutum in suas actiones habere dominium , ut , positis omnibus ad agendum requisitis ( etiam ratione illius à quo dependet ) agere quid possit vel non-agere , apertè contradictoria sunt. Quisquis ergò dicere noluerit , Deum creando creaturam liberam , eandem pariter creasse independentem , is neque admittere poterit queni illi nobiscudunt libertatis conceptum. Nescio, quid hic Cartesio in mentem venerit , quando concedit quidem, *contradictionem implicare , ut voluntatis nostræ actiones à Dei voluntate non pendeant* ; interim simul fatetur , nos liberum arbitrium si ad nos tantum attendamus non posse non pende à quo independens : eo usque , ut liberum nostrum arbitrium nos Deo aliquo modo pares efficiat , ejusque imperio eximere videatur. Voces profectò nimium ( ut dicam mollissimè ) rudes in re delicata , quam ut ferri debeant ! Sed ad rem redeo , quæ præmanibus est. Consistere absque indifferentia libertatem , vel id quoque evincit efficacissimè , quod quo perfectior est voluntatis libertas , eo minor sit ejusdem indifferentiâ. Res claret in Deo ipso , nec non in beatis cœlitibus , quorum libertas perfectissima procul dubio est , sejuncta tamen prorsus ab indifferentia ; quippe immobili constantia determinata ad hoc unum , ut non nisi quod bonum existit ament aut amare possint. Est itaque indifferentia per se adjunctum duntaxat libertatis , & quidem separabile. Ex quo conficitur , rectius hic sentire , qui ad libertatem , ut sic spectatam , sufficere statuunt rationalem complacentiam , sive facultatem agendi ex prævio judicio intellectus & concomitante lubentia voluntatis.

Quibus positis , ne hilum nostræ libertatis per prævium Dei concursum evertitur. Sic enim suaviter infinitæ virtutis suæ efficaciam intra creatum animum Deum insinuare docemus , ut quam creaturam rationalem agere facit , faciat agere non nisi ex rationali ductu proprii judicii & plenissimo suæ voluntatis lubitu. Quo ipso divina præmotio firmat nostram libertatem ac verum ei addit vigorem ; quatenus nil magis liberè agit , quam quod efficaciter ad liberè agendum sic est determinatum , ut non-liberè agere planè non possit. Abs est itaque hinc longissimè omnis necessitas , quâ vel ex bruto ac ratione destituito

XVI.  
*Alterius  
cause ve-  
ram liber-  
tatem cum  
determina-  
tione alie-  
rius consi-  
stere , & ex  
natura rei,  
& ex adver-  
sa hypothesi*

*ipsis, docetur.*

instinctu, vel ex coactione per illatam vim externam contra propensionem impellatur rationalis creatura: quam utramlibet sicuti libertati adversari lubenter concedimus, ita omnem aliam necessitatem, præter eam quam jam removimus, cum illa consistere posse, asserimus. Cæterum, ad detegendum amplius, quam nullarum virium sit hæc sophisticatio, cui, ad destruendam Divinam Prædeterminationem, nihil non tribuunt isti imaginariæ suæ libertatis patroni, juvaret imprimis ostendere, quam pulchrè quicquid huc adducunt retorqueri possit in ipsam eorum sententiam, quâ divinum concursum submitunt arbitrariæ creaturarum determinationi. Si namque idcirco creatæ voluntatis libertatem lædi credendum sit, quòd actiones ejus divini influxus determinationi subordinentur; quid nì pari jure inferre licuit, lædi ex opposito divinæ voluntatis libertatem, quando actiones ejusdem arbitrii creati determinationi subjiuntur. Non dabunt huic difficultati exitum in æternum quotquot indifferentiam cum libertate statuunt eandem. Sed verbum unum non addam, cum jam dudum in hoc argumento fuerim justo prolixior.

XVII.  
*Prædeterminans  
Providentia neque  
Deum peccati  
Auctorem statuit,  
neque peccantem  
creaturam excusat.*

De Deo tamen solliciti quoque videri volunt, qui quam asseruimus non admittunt divinæ Providentiæ Prædeterminationem. Si enim, ajunt, ad quascunque actiones per Præcursum incitetur creatura; de malis ejusdem actionibus id intelligendum erit æquè ac de bonis: quumque ratione istius Præmotionis auctor & causa prima harum statuatur Deus, etiam perindè istarum auctor dici debet. Ut in summi Numinis sanctitatem & justitiam haud leviter existat injuria hæc sententia; quippe quæ necesse habet nostrorum scelerum labem optimo Deo affricare. Sic arguunt isti; sed perperam. Quoties quid bonum operatur creatura, duo occurrunt, ipsa videlicet actio, tum etiam talis ejusdem modificatio, cujus ratione ea legi conformis, atque idèò moraliter bona, est. Ad utramque hanc Deus suo influxu rationalem creaturam excitat; consequenter utriusque, non actionis tantum quâ actionis, sed & qua bonæ, totiusque adèò complexi, vera causa existit. Secus sese res habet in peccante creatura; in qua quidem itidem sese offert tum actio ipsa, tum conformitatis cum lege absentia, quæ  
est

est malitia ejusdem : atquæ Dei ad utramque illam minimè eadem , sed dispar planè , est habitudo. Incitat is creaturam ad agendum vero influxu ; atque hæcenus actionis qua talis vera existit causa. Non-influit interim in bonitatem moralem ; ad quam Præmotionis suspensionem sequitur quidem in actione creata legalis rectitudinis carentia , attamen non idèd hujus causa dici debet Deus ; propterea , quia non-influendo suspendit duntaxat efficaciam suæ gratiæ , ejusque indebitæ. Indebitæ , inquam : ut intelligamus , nihil in hoc negotio à Numine committi , quod sanctissimæ suæ naturæ adversetur ; quin potius hoc omne , quatenus à Deo est , bonum esse ; neque tantum metaphysicè bonum , sed & moraliter. Interim quam actionem , se quod attinet , bonam producit Creator , in eadem producenda volens suo vitio deficit creatura , illamque privato suo non-influxu sic inquinat , ut vitiositatis qua talis vera ac solitaria existat , si sic loqui liceat , deficiens causa. Dices : Criminis culpam nihilominus in Deum conjicere poterit creatura , quippe quæ idcirco peccat , quia Deus non-influit. Verùm nihil eo efficitur , quamdiu probatum non est , illum Dei non-influxum talem creatæ voluntati imponere necessitatem ; quæ cum libertate ejusdem consistere nequeat. Quam id falsum sit , ex præcedentibus proximè articulis abundè licet colligere. Equidem extra omnem controversiam esse nos inter & adversarios opinor , alteri cuicunque culpam peccati imputare posse neminem , qui id committit non nisi liberrimè , plenissimoque sui judicii ac voluntatis consensu & arbitrio. Quum itaque , non obstante Providentiâ Prædeterminante , salvam & integram esse creaturæ rationali in omni sua actione libertatem , jam demonstraverimus , utiquè manet , non posse hanc sui sceleris iniquitatem Deo aspergere , prætextu alicujus necessitatis , quæ nihil prorsus plenissimæ peccatoris libertati detrahit ; cuiusque uti sensum nullum ita neque ullam habuit , dum peccavit , rationem.

Instabis : Saltem bonitatis ac justitiæ divinæ nequaquam congruum existit , suâ lege officium ab homine postulare , quod hic præstare non potest : uti nihil legis præstare potest , quando Deus gratiæ suæ influxum suspendit. Ad quod probè notandum

XVIII.

*Eadem neque Deum injustitiæ arguit, ne-*

*neque causa-  
rum secundarum  
potentie  
active præ-  
judicat.*

tandum venit, propriè loquendo, actualement prædeterminationem nullam tribuere subjecto in quod influat agendi potentiam; sed tantum ad operandum excitare creaturam, quæ jam antè potentiam talem possidebat. Quamobrem, sicuti Providentiæ divinæ influxus potentiam agendi in creatura supponit<sup>1</sup>, non in eam confert; ita planè ex opposito Providentiæ divinæ non-influxus potentiam agendi in creatura integram relinquit, non aufert. Habet ergo creatura rationalis, in integritate sua spectata, potentiam præstandi omne opus legis; eamque illam habet, sive in actum ipsum influat causa prima, sive non influat. Sinimus itaque facilè tantam creaturæ rationali tribui potentiam ad obediendum Deo per omnia (loquor, ne quis erret, de ea prout venit ex manu Dei) quantam quis concipere voluerit aut potuerit: tantum si noningas independentem, quam neque Creatoris neque creaturæ conditio ferre potest. Nisi verò ad sceleris condemnandum hominem, & ab omni injustitiæ specie absolvendum Numen, sufficiat creatam potentiam tam amplam, tam perfectam, tam sufficientem statuere, quam in suo genere statui potest; quid sufficiat! equidem non video. Nobis saltem id sufficit, qui indubitabilibus rationibus sumus persuasi, citra divinæ perfectionis abnegationem aliter statui non posse; relinquentes de cætero suam curiositatem eis, queis nefas non videretur scrutari minutatim supremum independentis Dei in suam creaturam dominium: quorum istud quemadmodum nostri est officii, ita hoc temeritatis profectò nimis existit atque inexcusabilis. Ne tamen nesciant Sophistæ, nec nobis deesse quo eis os batuatur, unum addam. Ipsi in veritorum actuum effectione hætenus saltem admittunt concursum Dei, ut influxui creaturæ liberæ in peccaminosam actionem vergentis, influxum suum ad eam producendam extemplo Numen jungere, fateantur. Nunc ego illos obtestor, si per concursum nostrum prævium, eorum iudicio, statuatur mali auctor, dicant mihi, cur non eadem sequelâ per concursum eorum simultaneum Deus existat mali fautor? Expediant hic sese! Experienturque, si quam invenerint viam, illam nobis non minus ac ipsis eundem monstrare exitum. Si expedire non se possint, sileat tandem calumniam!

Agit

Agit ergò Deus in creaturas per Præcursum ; sed & cum iisdem agit per CONCURSUM : actum illum Providentiæ , quo causa prima una cum causis secundis potenter coöperatur in productione effectuum naturalium ab hisce procedentium. Dico, effectuum naturalium : quæcunque enim in hoc Universo producantur opera præter & extra naturæ ordinem , ea quemadmodum causarum creaturarum activitatem secludunt & remouent, sic non per aliquem Dei cum creatura Concursum , sed per unius Dei tanquam solitarii principii vim producantur. De hoc Concurso demonstrando nil laborabimus. Sufficiunt abundè huic rei quæ jam antè probata dedimus , tum de efficaci Providentia Dei in genere , tum speciatim de Præcurso ; à quo ratione tantum Concursum distingui , dudum notavimus. Addendum solummodò , in Præcurso præcipuè attendi ad activitatem creaturæ , quatenus ea à causæ primæ influxu excitatur ; in Concurso etiam imprimis rationem haberi ipsius effectûs , ab utriusque causæ causalitate procedentis. Interim nihil hîc novum occurrit aut difficile , cuius intelligentiam ex antè dictis non liceat haurire. Verbo igitur de quibusdam hîc monendi potius sumus , quam docendi. Cavendum , ne nomen Concursum decipiat , mentemque inducat ad cogitandum hoc loco duas causas concurrentes partiales ; quarum exempla in creatis ubique obvia. Absit longissimè iste conceptus ! Partialis causalitas , uti non sufficit ad effectum totum producendum , nisi ab alia concausa juvetur , independente & sufficientissimo Numine prorsus indigna existit. Verè totalis causa est tum Deus , tum creatura ; quatenus in effectû nihil est , quod non sese totum debeat & Illi & huic , unicuique in suo genere atque ordine. Ut ridicula hoc loco sint Scholasticæ sapientiæ mysteria , quibus universali causæ Deo in omni opere à creatura producto respondere fingitur universale effectum , puta existentiam. Quasi effectû cuiuslibet à creatura procedentis tantum existentiam ( si vel maximè hæc ab essentia distingueretur ; quod illi perperam contendunt ) Deo debeat , & non potius omnia omninò & essentialia & accidentalia prædicata ! Nec peccatum obstat , nam & illius , in quantum aliquid positivi est , Deus verè causa totalis est ; etsi non sit causa adhærentis privationis sive vitiositatis :

## XIX.

*Concursum  
Dei agnos-  
cendus tan-  
quam causæ  
totalis, im-  
mediatæ, &  
principalis.*

de quo actum proximè. Neque est absolum, ejusdem effecti duo agnoscere principia totalia; dummodo existant, uti hìc existunt, subordinata: quæ ut non pugnant, sic alterum eorum alteri nihil præjudicare potest, quo minus utrumque in suo genere verè sit totalis causa. Eandem ob rationem immediata quoque effectorum, ad quæ concurrunt, causa existit Deus; quì quemadmodum vi Immensitatis suæ per essentiam omnibus rebus intimè est præsens, ita quoque pari ratione immediatè in eisdem operatur. Quæ omnia pulcherrimè cogitare possumus, si eandem concipiamus esse & Dei & creaturæ actionem: quæ de re Art. VI. VII. egimus. Deniquè, Principalis quoque causa Deus est eorum, quorum per Concursum causa est: noquit enim ens independens agere, nisi suà virtute, quā principatum obtineat in agendo. Quod attendere negligunt isti, &, qui efficientiam Dei circa liberas creaturarum rationalium actiones moralem solummodò agnoscunt; qualis tantum est causæ minus-principalis, sive procatartica: &, qui Concursum Dei statuunt determinabilem à causa secunda; haud aliter ac si causa prima suis creaturis ad instar instrumentalis causæ subserviat.

## XX.

*Concursu  
Dei contin-  
nuato indi-  
get creatura  
quamdiu in  
operando  
perseveras.*

Ex quibus omnibus per sese sequitur, quod unum in hoc negotio observandum superest, Concursum hunc Dei non duntaxat esse restringendum ad aliquod primum creatæ actionismomentum; ac si Numen de cætero, citra sui influxûs continuationem, sinat solummodo creaturam continuare inchoatam actionem, uti observamus v. c. pilam à manu semel impulsam, ad hoc ut aliquamdiu moveri pergat. renovato manûs influxu non indigere. Minimè sic cogitandum. Imò verò, si creaturam, quamdiu in operis productione occupatur, in agendo Concursu suo continuato non ipso facto promoveat causa prima, utiquè effectum ex parte tantum & remotè ad Deum referri posset; quandoquidem id suam perfectionem consummatæ demum actioni debet. Consequenter Deus causa illius totalis, immediata, ac principalis nequaquam existeret: quod jam demonstratis è diametro adversatur. Adde, non minus à Deo pendere causæ secundæ operationem continuatam, quam eadem ab ipso pendet inchoata, quia illa majoris quam hæc, perfectionis esse



esse non potest; esset verò, nisi illa eodem modo ac hæc à Deo foret dependens. Et quis dubitet, cujuscunque creatæ actionis eam esse contingentiam, ut quolibet sui momento ex se deficere queat, adeoque non hoc ipso quod est inchoata continuari debeat? Nempè, quodcunque creatæ actionis momentum nullam certam ex natura sua cum alio ejusdem insequenti momento continuandæ habet connexionem. Si sic, manifestum evadit, causas secundas in quovis activitatis suæ articulo æquali Dei influxu indigere. Quemadmodum itaque suo loco ostendimus, non posse ens creatum in existendo perseverare, nisi singulis continuatæ existentiae momentis eadem vi, quâ primum id ex nihilo fecit existere, influat Deus; ita pariter concludendum erit (si creaturæ modum operandi tribuere velimus, qui modo ejusdem existendi sit appropinquatus) non posse ens creatum in operando perseverare, nisi singulis continuatæ operationis momentis eadem vi in eam influat Deus, quâ primum id ex non-operante operans fieri fecit.

Interim, dum hoc pacto causa prima creaturas per Præcursum ad agendum præmoveret & per Concursum in agendo promoveret, simul eadem illâ efficientiâ & actiones & effecta causarum secundarum, pro liberrimo suæ voluntatis placito, ad præstitutos à se fines ducit & gubernat. Atque hic est tertius actus istius influxûs, quem Deus circa creaturarum actiones exerit: tertius nimirum pro modo concipiendi nostro; qui qualis hic sese offerat, jam monui ab initio. Estque hæc propriè illa GUBERNATIO, quæ strictissimâ significatione *Providentia* vocatur. Per eam dicimus Numen omnem creaturarum activitatem dirigere ad fines, quos ipse ei prædefinivit. Videlicet, primum quidem ad proximos, aliisque ulterioribus subordinatos; sic tamen ut omnia tandem redeant ad manifestandam gloriam multiplicis perfectionis istius principii, cujus abundanti bonitati & se & omnes suas actiones agentia creata debent. Ità demum omni modo patet Deus tanquam Alpha & Omega; quando qui in genere causarum efficientium existit prima, à qua derivanda rerum quarumcunque genesis, idem in ordine causarum finalium occurrit ultima, in quam terminetur omnis rei creatæ analysis. Tanti est hanc Providentiæ partem, ut de-

XXI.  
*Gubernan-  
tis Provi-  
dentie Di-  
vine neces-  
sitas paucis  
demonstra-  
ta.*

cet, agnoscere! absque quo nemo Deum ceu Universi Regem ritè veneratur. Risit quidem eam præ aliis Epicureorum fatuitas, nescio quid insaniens de cæca fortuna & mero casu, quo volvantur rerum omnium in hoc Universo vicissitudines: verùm ad confutandum cæcum furorem multo apparatu non est opus. Tantùm eis quæ antè demonstravimus inhæreamus. Æternum decretorum divinorum ordinem, atque infallibilis præscientiæ certitudinem jam dudum adstruximus. Atquæ res secum ordinare ab omni ævo, easque ordinatas prævidere, sapienter & certò nemo potest, qui non in tempore ipso factò potenti dispensatione sic eas moderetur, ut æterno consilio respondeat ad amussim eventus complementum. Et quorsum omnis, quem probavimus hætenus, tum Præcursor, tum Concursum, nisi ei hæc accedat Gubernatio? Nulla profectò constat illi sapientia, nisi certo fine impellat causas secundas, quas impellit, Numen. Quare, vel frustra tanta molitur Deus, quod ne hominis quidem est non planè insipidi; vel quod agit in & cum creaturis, sic agit, ut ad certos id dirigat fines. Infinitas rationes suppeditat Universi hujus contemplatio; cujus harmonia, vicissitudo, constantia, & quid non, uno ore vociferantur, nil eorum quæ fiunt fieri citra potentissimum pariter ac sapientissimum primæ cujusdam mentis præsidium & moderamen. Verùm tam millies hæc coëta sunt ac recoëta à multis, & ab hominum impiorum cavillatiunculis vindicata, ut non sine tædio fusus essem in re trita. Imprimis, quoniam ex eis quæ sæpius inculcavimus facile est huc transferre, quod rem omnem nullo negotio conficiat.

XXII.  
Ea ad quas  
vis creatu-  
rarum actio-  
nes exten-  
denda;  
etiam mini-  
mas, con-  
tingentes,  
liberas, ma-  
las.

Cæterum, si, ut jam ostendimus, cum decreto, præscientia, præcursu & concursu pari passu ambulet Dei Gubernatio, illisque omnes omninò actiones creatæ subjiciantur, de hac quin idem præasserendum, dubium esse nequit. Absurdi sunt, qui nimis minutas censent quasdam creaturarum operationes, quam ut earum curam gerat Deus. Quasi scilicet quo quid existit minus, eo magis haberi id debeat independens! Quin, quæ nos minima habemus, in eodem ordine cum maximis hîc esse collocanda, vel ipse Deus nos experienciâ docet, quoties minimis utitur ad conficiendas res maximas. Et, nisi minimarum,

cur

cur non nullarum actionum potius dicatur Gubernatio ; quandoquidem totum quoque hoc universum coram infinito Numine quid minimum existit ? Contingentium eadem planè ratio est. Præterquam enim quod tantum causarum secundarum respectu , nequaquam in ordine ad primum motorem , actionum quarundam contingentiam admittimus ; etiam contingentia ipsa tantæ imperfectionis prædicatum est , ut , si ulla alia , saltem ea quæ contingens est actio , idè quia contingens est , modamine causæ cujusdam necessariæ indigeat. Imò verò , præprimis in contingentibus ludit frequenter stupendum in modum divina Providentia : ut non aliundè clarius elucescat sapientissima Dei œconomia ac in ipsa contingente , tam opportuna sæpè quam improvisa , contingentium causarum connexion. Idem easdem ob causas de liberis rationalium creaturarum actionibus tenendum. Fateor , causam quamcunque liberam existere actionum suarum dominam ; at non supremam & independentem : nisi quantum homini in suas actiones imperiî concessit Deus , tantum dominii in eum ipse sibi dextraxisse credendus sit. Sed de eo satis liquet ex *Art. XIII. XIV. XV. XVI.* Tandem malas quoque actiones divinæ Gubernationi subesse , nemo neget , qui non magnâ imperiî parte Numen exuere velit ; quandoquidem pleræque rerum humanarum mutationes , omniumque semè regnorum ac rerumpublicarum revolutiones , peccaminosis mortalium machinationibus suas debent origines , incrementa , exitus. Certè , ad peccati cujusvis actum substratum Deum & præcurrere & concurrere , jam dudum demonstravimus. Frustrà profectò , imò nec sanctè , nisi totum complexum & limitare , & in bonum finem ordinare ac dirigere , ipso factò & velit & possit. Atque hoc sensu , non alio , Nostri physicam peccati permissionem , eamque Efficacem , Deo adscribere solent. Ut mirum sit , etiam eo nomine nobis impingi impium dogma de Deo auctore peccati. Stultè ! Quo pacto enim peccati causa evadat eâ actione , quæ peccatum quasi supponit ; quin potius , quæ flagitio hominum ad optimos fines , ut ita loquar , abutitur ? Scilicet , aliquid Numine dignius sentiunt , qui sic philosophantur hoc loco de nuda permissione , ac si decussatis manibus sedeat Deus in hoc negotio spo-

ctator. Quæ permissio re ipsa est otiosa non-providentia: quippe quæ infer, necessariò, vel incio Deo committi peccata; vel invito; vel nec volente nec nolente, id est, nesciente omnino.

XXIII.  
*Gubernatio  
Dei tota  
sanctissima,  
independens,  
irrefragabilis,  
sapientissima,  
constantissima.*

Etiamsi autem circa peccaminosas æquæ ac circa quasque alias creaturarum operationes versari statuamus hunc Divinæ Providentiæ actum, universam tamen ejus rationem agnoscimus Sanctissimam; quando non aliam admittimus, quam quæ divinæ puritati & justitiæ sit planè congrua, quæque nihil sibi contrahat labis ex actionum, quas suâ dispensatione moderatur, vitio. Interim non minus cogitandum est, absolutissimam existere hujus Gubernationis Independentiam; convenientem scilicet enti ex natura sua per omnia independenti. Ut nullam admittamus præambulam hominis voluntatem, quam præstetur Deus, cujusque determinationibus sese attemperet; quod subservientis potius est ministri, quam suo jure gubernantis domini. Ast neque independens esset hoc Dei regimen, si quæ vis creata ejus manum posset avertere. Quamobrem potentissimum pariter existit hoc summi Numinis imperium, insuperabili efficientiâ omnem omnino creaturarum activitatem flectens in eos quos Ipse illi prædefinivit fines. Absque quo neque sapientissima agnoscitur hæc Providentia; à qua nihil est abhorrentius, quam excidere suis scopis, aut quicquam frustrà moliri. Moderatur verò prudentissimè omnia ordinatissimâ causarum serie Deus, per varios casus aptis mediis universa dirigens in præstitutos eventus, idque naturis causarum secundarum convenienter. Non semper, fateor, tanti operis elegantissimum ordinem comprehendit nostra stupiditas: ubi amen rerum exitus attendimus, aperit sese in hac supremæ rationis Gubernatione sapientia impervestigabilis, in iis maximè rebus quæ nobis homuncionibus omnium perplexissimæ videntur. Ex quibus sponte suâ sequitur imperii divini immutabilitas, clarè refulgens in tanta tam mutabilis Universi constantia. Et, si sapientem sibi constare fas est, necessariò Numen sapientissimum procul habet mutatas quasvis sui regiminis formas.

XXIV.  
*Providen-*

Neque obstant prodigia, quorum meminit divina pagina: ea enim uti consuetam naturalium causarum efficientiam quoad cætera

cætera non perturbant, ita exceptiones quædam sunt naturæ regulas confirmantes quam efficacissimè; quandoquidem non casu ea accidunt, sed Dei consilio & nutu singulari, ad declarandum supremum ejusdem & independens in res suas dominium. Sed de miraculis minus nobis laborandum, qui qua Philosophi ea fermè ignoramus; id tantum scientes, liberrimum Deum creaturarum legibus esse superiorem, atque ideò ab eisdem quoties voluerit recedere posse. Hoc loco igitur de Providentiæ in Ordinariam & Extraordinariam distributione fufius non agam. Alia occurrit, eaque momenti longè maximi, ejusdem in Realem & Moralem divisio. Nimirum, duum generum dantur creaturæ, brutæ ac rationales: undè duplex obvia earundem activitas; alia ex mero naturali impetu fluens, alia non nisi liberè & prævio rationis consilio suscepta. Utrique præest summi Numinis Gubernatio, quæ rem unamquamque regit aptè congruenterque istis perfectionibus ac viribus agendi, quas illi in prima creatione concessit, inque ea continuatò suo influxu conservat. Præter illam ergò Providentiam, quæ potentissimo quodam regimine sese extendit ad omnes omninò creaturas, consideratas simpliciter tanquam actuosà principia causæ primæ subordinata (de qua hætenus potissimum diximus) specialioris considerationis est creaturarum intellectualium, tanquam talium, per juris moderamen Gubernatio; quæ ab appropriato objecto Moralis scitè appellatur. Ejus admittendæ necessitas neminem fugere potest, attendentem duntaxat intimam creaturarum per omnia sui à suo Deo dependentiam: ea enim, cum tanta sit quanta esse potest, non sinit causarum rationalium rationem à prima ratione esse independentem. Et cum agentia cætera quæcunque ordini naturæ à summo Deo præscripto, secundum nativam indolem quam in eis posuit Creator, obediunt accuratissimè, negari planè nequit, rationales creaturas etiam suo modo, id est rationali, juxta rationis lumen sibi ingenuitum, suum quoddam proprium, id est, rationale obsequium debere rationali Deo.

Atque ità nostræ meditationi Deus hic sese offert tanquam supremum Dominum, in creaturas quasvis mentis capaces seu subditos suos exercentem imperium pro suo arbitrio, rationali tamen

*tia Divina  
in Ordina-  
riam & Ex-  
traordina-  
riam; item,  
in Realem  
& Mora-  
lem, divisio.*

XXV.  
*Moralis  
Providen-  
tiæ conside-*

*ratio uni-  
cængenuine  
Philosophiæ  
Morali  
fundamen-  
tum.*

tamen utriusque naturæ congruum. Hujus verò duplicem ob-  
servare licet œconomiam; alteram immediatam, mediatam al-  
teram. Videlicet ipse Deus per sese in hoc Regno regit, quate-  
nus conscientiiis hominum se manifestat, & tanquam Legislato-  
rem supremum, potestate architectonicâ jura dantem, eisque  
illas adstringentem; dictando officia quæ à quolibet præstanda sint  
Deo tanquam Regi, sibi tanquam Subdito, aliis hominibus  
tanquam Concivibus in hoc regno morali: & tanquam Judi-  
cem, indè quidem justissimâ severitate rebelles subditos punien-  
tem secundum sanctionem legis pœnalem; hinc cives morigeros  
præmiantem ex gratuita promissione. Interim & aliis admini-  
strationis partem quadantenus commisit; Magistratibus nimi-  
rum, tanquam suis in hoc regno vice-Regibus, qui potestate  
coactivâ armati invigilent debitæ societatis humanæ sub suo Rege  
Deo conservationi. Et his paucis continentur fundamenta  
omnis sanioris doctrinæ tum Ethicæ, tum Politicæ: quas no-  
bilissimas Philosophiæ partes fœdissimum in modum polluant  
plurimi, qui, nihil attendentes moralem hominis à Deo depen-  
dentiam, unicam, vel sui, vel etiam societatis, conservatio-  
nem sibi sumunt morum regulam; abnegantes sicre verâ summi  
Numinis in creaturas suas imperium, ac genuinum inducentes  
Atheismum: quorum monstrorum ferax, cheu! nimium exi-  
stit hoc nostrum seculum. Verùm, tam est illustre hoc argu-  
mentum, ut nihil de eo dicere præstet, quando quod sufficit  
dicere in præsentiarum non licet. Justam ergò ejus explicatio-  
nem servabimus Tractatui peculiari *de REGNO DEI MORALI*:  
cujus Sciagraphiam nobiscum affectam jam habemus; quemque  
dabimus forsàn aliquandò, si Deus vitam dederit atque vires.  
Nunc ostendisse verbo sat est, ibi principium sumere Philoso-  
phiam Moralem, ubi existit Theologiæ Naturalis finis.

XXVI.  
*Tractatus  
de Deo,  
ejusque Pro-  
videntia,  
Epilogus.*

Ità benigna Numinis Providentiâ nostram hanc qualemcumque  
de Divinis Perfectionibus Meditationem absolvimus. Unum  
Deum per omnia independentem atque supremum docere, sco-  
pus fuit: in quo si quid fuit erratum, ipsâ pietate erratum  
fuit; quâ quanto erratur difficilius, tanto in his cogitationi-  
bus acquiescimus tutius. Interim quem cognoscimus, utinam  
agnoscamus talem! Neque agnoscemus, nisi altum præprimis  
animo

animo semper inhæreat firmissima de Divina Providentia, submissa cum veneratione juncta, persuasio. Hæc una potens existit liberare nos idololatriâ, quâ optimus etiam quisque tantopere adhæret creaturis; quarum tamen nulla in sua extantia est permanentia, nulla in opere producendo efficacia, nisi motore primo conservante, excitante, adjuvante, moderante. Ea si sat infixa sedeat menti opinio, nunquam id eveniet, ut diffidentes abjiciamus spem, simulac earundem destituimur auxilio; superbiamus fatui, quoties inferiorum causarum suppetit abundantia. Quin potius in solum Numen fiduciam collocabimus, mente quidem sedulitate debitâ rebus agendis ex Ejus voluntate intentâ, cæterum verò securâ, atque obsequioso silentio acquiescente in cura illa, quâ prudentissimus Pater suam unicuique nostrum distribuit sortem, eamque suo arbitratu adversâ modò, modò prosperâ varietate, dispensat. Hæc una meditatio in periculis pariet securitatem, in terroribus fortitudinem, in turbulentis tranquillitatem, in adversis tolerantiam, in futurorum expectatione æquanimi-tatem. Absunt longissimè ab hac felicitate quotquot suâ, quam Dei, vivere malunt providentiâ: quippe qui sese subducentes petulantur Providentiæ dirigenti ad vitam, incidunt justissimè in Providentiam ducentem ad mortem. Absit à nobis tanta calamitas! Et aberit, si datum fuerit, devoto animo Numinis vias non-pervestigabiles sic mirari, leges sanctissimas sic revereri, ut studium nobis sit indefessum, rerum omnium Statorem ac Moderatorem mente contemplari, factis venerari, dictis celebrare, per omnia Optimum Maximum.





## Lect. S.

*Ut in plerisque nostris hisce de Deo cogitationibus fuimus contractiones, ita et in eis quæ spectant Providentiam ejus Moralem. Hujus vis omnis cum ferme consistat in obligatione hominis quâ tenetur universas suas actiones practico rectæ rationis dictamini præstare conformes, placuit hanc, quæ ad manum erat, quâque paucis complecti conati fuimus præcipuam hujus rei summam, de Lege Naturæ Exercitationem, Coronidis instar, addere. Neque loco alieno; quando tota aurigatur eo, ut demonstret, quod diximus, nullam veram stare Moralem Philosophiam, nisi Naturalis Theologiæ fundamentis innixam.*

## EXERCITATIO PHILOSOPHICA,

DE

## LEGE NATURÆ.

## SUMMARIUM.

- I. Providentiæ Divinæ subest quicquid existit rerum.
- II. Ex quo fluit Numinis in universas creaturas Imperium.
- III. Quod quatenus circa hominem versatur peculiarem meretur considerationem.
- IV. Regni Dei Moralis instrumentum est Lex Naturæ.
- V. Ea est practicum rectæ rationis dictamen.
- VI. Innatum, quoad habituales animi in id proclivitatem.
- VII. Præcipue quidem quod ad generalia honesti principia.
- VIII. Lex hæc est, & quidem proprie dicta.
- IX. Ejus existentia tam manifesta, quam omnimoda hominis à Deo dependentia.
- X. Citra eam nulla existere potest rationalis creatura.
- XI. Legislatoriæ potestatis basis Divinæ naturæ eminentia.
- XII.

XII. *Obligationis ad eam agnoscendam sensum infert dependentiæ suæ in creatura conscientia.* XIII. *Jus Dei Legislatorium malè ad Ejus beneficia, vel solam potentiam, refertur.* XIV. *Innatæ Legis præcepta quædam sunt Juris Divini Naturalis;* XV. *Ut alia præscribere per ipsam suam naturam Numen nequiverit:* XVI. *Quædam tamen Juris Divini merè Positivi.* XVII. *Quæ sententia & Divinæ Majestati planè congrua est;* XVIII. *Et naturali hujus Legis sensui nihil detrahit.* XIX. *Arbitraria præcepta cadere possunt sub Dei dispensationem.* XX. *Lex Naturæ lata & omni, & soli creaturæ rationali.* XXI. *Ut nulla cæterorum animantium hic haberi debeat ratio.* XXII. *Triplicem, ad promovendum Regnum Dei, imponit hæc Lex obligationem:* XXIII. *Cui minimè satisfacit sola Societatis Civilis conservandæ consideratio;* XXIV. *Cum multorum officiorum antiquior longè sit obligatio:* XXV. *Quam qui non admittit Atheismum Politicum re verâ inducit.* XXVI. *Lex Naturæ necessariò munita Sanctione Pænali;* XXVII. *Quâ æquissimo jure immorigeros exstirpatio ex hoc Regno manet:* XXVIII. *Uti obsequiosos ejus cultores beata Dei, Regis sui, fruitio.* XXIX. *Undè ipso naturæ lumine Lex hæc ut formula Fœderis operum innotescit.* XXX. *His paucis contineri universæ Moralis Philosophiæ fundamenta.*



Etus verbum est: Si datur Deus, ergò mundus regitur Providentiâ. Et verissimum! Quisquis enim Creatoris excellentiam cum creaturarum imperfectionibus ritè conferre instituit, necesse habet fateri, quam Deus totâ suâ naturâ ind-dependens est, tam esse ab influxu Dei depen-

I.  
Providen-  
tiæ Diti-  
ne subest  
quic-  
quid exis-  
tit rerum.

dentes per omnia sui qualvis creaturas. Si sic, sponte suâ sequitur, tantam existere Creatoris circa suas creaturas Providentiam, quanta est creaturarum à suo Creatore dependentia. Huic cum nil creaturæ queat subduci, neque etiam illi quicquam ejusdem potest subtrahi.

## II.

*Ex quo fluit  
Numinis in  
universas  
creaturas  
Imperium.*

Quæ veritas quemadmodum immota basis est omnis Imperii, quod suo jure atque supremâ legibusque solutâ potestate diffundit Numen per omnes omninò res universi hujus Macrocosmi ambitu comprehensas, ita eadem præcipuum existit fundamentum specialioris illius Providentiæ, quâ semet ipsum Regem Microcosmi, sive Homini, manifestat Divina Majestas: quæ quo proximior est Homini atque magis propria, eo diligentior em ejusdem meretur attentionem.

## III.

*Quod quatenus  
circa hominem  
versatur pecu-  
liarem me-  
retur consi-  
derationem.*

Etiamsi enim nihil quicquam in universo Providentiæ opere tam est minutum, quod non animi nostri & admiratione summâ & veneratione profundissimâ sit dignissimum, tanto tamen quâ Deus moderatur hominum genus, eâ quæ cæteri mundi est, excellentior existit gubernatio, quanto præ omni alia re corpora eminentioris naturæ, atque idè imperii cujusdam sublimioris capaxior, est homo. Creatus nimirum mentis particeps, & ipse in suas actiones habet dominium; atquæ, quia creatus talis, etiam hoc ipso Creatoris sui dominio subjectus.

## IV.

*Regni Dei  
Moralis in-  
strumentum  
est Lex Na-  
turæ.*

Subjectus, inquam, dominio Dei, ceu Regis sui, gubernantis rationalem creaturam peculiari modo, & illi prorsus congruo, & sese maximè digno; quandò rationali imperio actionibus quibusvis rationalibus suam, tanquam primæ rationis, voluntatem proponit homini normam, ut imitandam semper religiosè, sic violandam nunquam impunè. Atque hùc spectat REGNUM DEI MORALE in genus humanum; cujus omnis tum vis tum exercitium consistit in præceptis illis, quæ vulgò Juris, sive Legis, Naturalis nomine veniunt. Circa quæ generaliora quædam in præfens paucis notare, animus est.

## V.

*Ea est præ-  
dictum rectè  
rationis di-  
ctamen :*

Est autem Naturæ Lex, Innatum creaturæ rationali rectæ rationis dictamen, quatenus illam obligat ad actiones suas ei præstandas conformes. Innatum dico esse rationis dictamen, quatenus id à naturæ humanæ auctore Deo à prima ejus origine ei est insculptum, sic ut in hac vita perpetuò eam comitetur.

Quem

Quem in sensum Naturæ Legem Philosophus scitè appellavit, *δικαιον ἐμφυλον*; atque gentium Doctor emphaticè alibi, *ἐξον τῷ νόμῳ χαπτὸν ἐν ταῖς καρδίαις*.

Quæ tamen non ità accipienda veniunt, ac si Legis Naturæ notitiæ actualis menti à primo nativitatis momento obversetur; *Innatum, quoad habitualement animi in id proclivitatem:* cujus ea in omni suo statu, nominatim infanti, non semper est capax: sed intellectam volumus constantem quandam & habitualement quasi animi dispositionem, quâ ipse suapte naturâ proclivis est, simulac ei sit idonea Legis hujus argumentum percipiendi occasio, & ad ruendum absque ulla hæsitacione ac citra demonstrationem in ejusdem assensum, & ad agnoscendam suam erga eam obligationem.

Ad hæc, Innatum dicimus Legis Naturalis sensum: non quasi omnium præceptorum eam pertinentium immediata persuasio in omnium ac singulorum hominum animis reperiatur; sed quatenus in unaquaque rationis compote creatura suâ luce radiant generalia saltem honesti atque turpis principia, undè menti, si rectâ ratione hac parte uti voluerit, proun existit, plurimas elicere per ratiocinationem legitimam conclusiones firmissimas; relicta quoque eidem, pro re nata & varia circumstantiarum exigentia, prudenti omnium applicatione. Quod observasse operæ pretium fuerit, ne quid vel perfectionis vel certitudinis decedere huic Legi opinemur, per diversissima sæpè hominum de Officiis quibusdam eâ præscriptis judicia.

Nugantur autem hic nimium, qui contendunt, Jus hoc Naturæ propriè loquendo Legem non esse; eò quod scriptum non sit, neque oratio ejus qui jure imperat, sed tantum conclusiones quædam ratione intellectæ. Posterius hoc quam sit falsum, jam vidimus: & res ipsa clamat; quas enim conclusiones ratio intelligat absque suis præmissis principiis? Prius quod attinget, non id urgeretur, si attendere placeret, scripturam nequaquam de Legis essentia esse, sed tantum ad id pertinere, ut alteri per eam de voluntate Legislatoris constet. Atqui non tenuibus istis adminiculis eget supremus Legislator, qui suæ mentis placita immediatè conscientii suarum creaturarum efficacius intimare valet, quam ullus mortalis Legislator suam voluntatem alteri declarare potest per scripturam, vel signa alia qualiacunque.

## IX.

*Ejus existentia tam manifeste, quam omnimoda hominis à Deo dependentia.*

Agnoscamus autem esse istiusmodi Legem animis ingentem, evincunt abundè quæ initio hujus Dissertationis præmisimus; quæ & idcirco præmisimus. Nimirum, simulacrum hominis nascitur, propter omnimodam ab Opifice sui dependentiam, nascitur ejusdem subiectus; id est, talis, qui quemadmodum se totum suo Creatori debet, ita obligatus est se suæque omnia debita cum observantia illius arbitrio submittere, ejusdemque summam præ se venerari excellentiam. Atque cum nulla obligatio aliunde quam à legis imperio derivari queat, manifestum evadit, tam naturalem esse creaturæ rationali innatam Legem, quam illi naturale est simulacrum produci rationaliter à Deo dependere, tique sese totam debere.

## X.

*Citra eam nulla existere potest rationalis creatura.*

Errant itaque, qui autumant, creare Deum posse creaturam sanctam, interim ex-legem, soliusque amoris vinculo sibi religatam. Errant; cum ne quidem ad hunc amoris actum elicendum obligatio citra legis mandatum concipi queat. Et quocumque in statu hominem fingere volueris, semper saltem est subiectum Legis à Deo ferendæ, si ita placuerit, capax; consequenter de facto semper obligatur animum saltem habere paratum, ad Legem divinam, casu quo præscribitur, humili cum pietatis affectu excipiendam atque observandam. Atque, dico iterum, undè hæc ipsa obligatio, si creatura cogitetur prorsus ex-lex?

## XI.

*Legislatoris potestatis basis Divina naturæ eminentia.*

Ut verò ex dictis satis intelligimus, ut naturæ nostræ sic Legis ei insculptæ auctorem esse eundem D. O. M. ita non obscure ex iis percipimus, quodnam sit in Deo potestatis hujus legislatoris fundamentum? Infinita nempe perfectissimæ naturæ eminentia: quâ ipsa digna existit tantâ existimatione atque veneratione, quanta in animum finitum cadere potest. Ex quo conficitur, Deum jus habere plenissimum creaturis suis præscribendi mandata, in quorum exacta observantia agnoscat re ipsa infinitæ perfectionis Numen, ac Dominus earundem supremus.

## XII.

*Obligatio nis ad eam agnoscendam sensum*

Cujus supereminentis in ente summè perfectæ potestatis, suæque infra eam, ut ita loquar, subsidentis conscientia quoniam neminem creaturam rationalem fugere potest; liquet, hanc sese illius imperio subducere nunquam posse, citra evidentem

tem rationalis suæ naturæ quandam quasi abnegationem. Ex quo fluit, rationalem creaturam qua talem, eo ipso quod talis est, obligari ad officiorum à Deo Rege suo sibi præscriptorum præstationem: eaque necessitate quâ se ipsam intelligit rationalem, etiam non posse non agnoscere omnimodam suam, hac quoque parte, à primæ rationis imperio dependentiam.

*infern dependētia in creatura conscientia.*

Errant idcirco toto cœlo, qui jus Dei legislatorium fundatum arbitratur in creatione, conservatione, similibusve beneficiis: hæc enim, tametsi ad actuale hujus potestatis exercitium prærequirantur, non tamen ponunt, sed supponunt, Divinæ perfectionis infinitatem; genuinum, ut jam ostendimus, hujus potestatis principium. Nec minùs errant, qui jus imperii Deo competere asserunt duntaxat ob irresistibilem potentiam, quâ inferior existat humana infirmitas: cum sola potentia irresistibilis, præcisa Dei bonitate, æquitate, sanctitate, justitiâ, vim quandam quasi tyrannicam potius sapiat, quam dignam tanto Numine potestatem.

XIII.

*Jus Dei legislatorium malè ad ejus beneficia, vel solam potentiam, refertur.*

Sed quo usque in condenda Naturæ Lege hac suâ potestate usus fuerit, vel uti saltem potuerit, Numen? non omnes idem sentiunt. Id certum est, non potuisse non Deum vi suæ perfectionis, ea saltem suis creaturis rationalibus præscribere officia, quæ ex natura tum sua tum harum indiviso nexu sequuntur; quale saltem est præceptum de agnoscendo Deo, tanquam supremo Domino, ut in sese beatissimo, ita sufficientissimo rebus quibuscvis aliis extra se, atque ideò perfecto amore & honore prosequendo.

XIV.

*Innatæ Legis præcepta quædam sunt Juris Divini Naturalis.*

Ut minimè ferenda sit assertio universum Legis naturalis argumentum ad merum jus Dei positivum sic referentium, ut, quicquid eâ continetur à pura liberrimæ voluntatis Divinæ determinatione in solidum id pendere contendant. Quod crudum profectò dogma est, atque à sanctissima Dei natura nimium abhorrens; quando per se indifferens inducit Numen ad id, ut vel coli velit à suis creaturis, vel abnegari: sive, cui perinde sit, vel obligare, si velit, suos subditos ad sui abnegationem, id est Atheismum, vel ad agnitionem sui tanquam talis, qualis revera existit.

XV.

*Ut alia præscribere per ipsam naturam suam Numen nequiverit:*

At neque eorum hic probamus sententiam, qui in aliud extremum

XVI.

*Quædam*



*tamen Juris Divini merè Positivi;*

tremum abeuntes, nulla officia per Naturæ Legem Deum homini præscripsisse, vel etiam præscribere potuisse, asserunt, quam quæ vel sua, vel à se pendentium creaturarum natura, necessariò postulet: cæterum nullas hoc in negotio partes esse juris divini merè positivi. Equidem, nisi hos abripuisset totos contentionis Sabbathicæ fervor, contrarium docere potuisset, ut alia multa fileam, vel sola prohibitio incestus: qui quo pacto per sese naturæ vel divinæ vel humanæ necessariò advesetur, ex alterutra illa firmiter demonstratum à nemine vidi, neque etiam solidè demonstrari posse confido.

**XVII.** Deo dignius, nostro judicio, sentiunt, qui quidem Legis Naturæ magnam partem esse Juris divini naturalis concedunt; sed & benè multa in eadem occurrere opinantur, quæ sint juris divini prorsus arbitrarii ac purè positivi, quorumque non tam facilis est ex natura vel Dei vel nostri demonstratio, quam quidem eorundem existit efficax per immediatum quandam sensum in nobis persuasio. Hæc sententia, ut ab una parte sanctissimum legislatorum ponit Deum, qui in Lege sua nihil eorum exprimere prætermisit, quæ ad perfectissimæ suæ naturæ agnitionem pertinent, ita ab altera illimitatam simul agnoscit divinæ potestatis in suas creaturas amplitudinem, quandò hic imperasse sufficit, etiam ea in quibus stat pro ratione solius imperantis arbitrium.

**XVIII.**  
*Et naturali  
hujus Legis  
sensui nihil  
destrabit.*

Neque idcirco definit naturale esse nobis ejusmodi aliquod præceptum. Non enim hoc loco id naturale dicimus, quod ex natura nostra necessariò fluit, sed potius id omne quod naturam nostram humanam in hoc naturæ statu in quo versamur indivisim comitatur. Non posse autem Deum cum natura nostra connectere notitiam quarundam rerum, quarum demonstrativa certitudo ex contemplatione nostri vel sui erui nequeat, hætenus à quoquam probatum non audiui: oppositumque vel solæ evincunt imbelles rationes quæ pro prohibito incestu indè petitæ vulgò adferuntur; quem tamen jure naturali turpem & illicitum habendum esse utrumque constat.

**XIX.**  
*Arbitraria  
præcepta*

Quæ si ritè percepta fuerint, viam planam faciunt ad expediendam agitatissimam controversiam, quanta sit Divini Numinis potestas circa Legis Naturæ vel mutationem, vel dispensationem;



tionem ? Tanta scilicet ea statuenda, quanta est ejusdem in condenda hac Lege libertatis indifferentia. Quatenus enim non nisi suo arbitrio præcepta quædam dedit, quæ, si placuisset, etiam planè non dare potuisset, liquet, eadem libertate posse cum, si velit, vel ejuscemodi præceptis quasdam personas eximere, vel eadem quoque præceptis abrogare. Quod tamen ad officia quæ sunt juris Deo naturalis extendendum non est; ob rationes antè datas. An verò facta sit aliquandò re ipsa talis aliqua vel mutatio vel dispensatio, quæstio tantum facti est; adeoque nec hujus loci.

*cadere possunt sub Dei dispensationem.*

Porrò, quandò jam sæpius dictum fuit, Legem Naturæ consistere in rectæ rationis dictamine, à Deo menti impresso, ad id ut sit actionum rationalium norma, clarum est, quinam isti sint, quibus hæc lex lata est? Creaturæ scilicet rationales: eæque tum solæ, tum omnes. Solæ; quia solæ Legis præcepta intelligere, auctoritatem Legislatoris agnoscere, suasque actiones ad ejus modulum componere possunt. Omnes; quia omnium æqualis est à Deo tanquam Rege suo moralis hac parte dependentia.

XX.  
*Lex Naturæ lata est omni, et soli, creaturæ rationali.*

Absona quapropter, etiamsi trita, est ea Juris Naturalis definitio, quâ describitur esse, quod natura omnia animantia docuit. Præterquam enim quod jam millies notatum sit, & ex dictis clareat, Jus sive Legem in res ratione carentes nullum cadere, vel cadere posse; etiam id minimè prætereundum, ingenti errore Legis hujus præcepta restringi ad istos tantum actus, quorum vestigia in brutis obvia sunt: quâ exceptione descriptionis hujus absurditatem vulgò palliare solent. Sed nihil agunt. Etenim pleraque officia Lege Naturali mandata, eaque longè præcipua, talia existunt, ut ne quidem quoad actum materiale, ut loqui solent, in bruta cadant: quod liquet intuenti omnia quæ ea jubet circa Deum, plurima quæ injungit homini circa se ipsum ac proximum observanda.

XXI.  
*Ut nullæ actionum animalium hic haberi debeat ratio.*

Qua de re dubitari amplius nequit, si porrò proprium hujus Legis finem attendamus; quem alium nullum esse, res ipsa clamat, quam ut sit instrumentum Moralis istius Imperii quod Deus in hominum tanquam Subditorum suorum animos exercet: dum hoc vinculo adstringuntur rationales creaturæ ad promo-

XXII.  
*Triplicem, ad promovendum Regnum Dei, imponit hæc*

*lex obligationem;*

vendam pro viribus Divini hujus Regni amplitudinem, ea fideliter præstando officia, quæ ex Legis requisito earum unaquæque Deo debet tanquam Regi suo, sibi met ipsi tanquam Dei Subdito, aliis omnibus hominibus tanquam suis in eodem Regno, sub eodem Principe Deo, Concivibus.

XXIII.  
*Cui minimè  
satisfacit  
sola Societas  
Civilis  
conservandæ  
confideratio;*

A qua saniori Legis Naturalis consideratione longissimè recedit philosophatio omnium ferè qui de Jure Naturali scribunt hodiè Auctorum, autumantium, unicum Philosophiæ moralis Fundamentum, atque adedò præcipuam Legis Naturæ summam absolvi unicâ societatis civilis culturâ. Ex qua una hypothefi fluxerunt tot monstrifici in hoc negotio conceptus Hobbesii, aliorumque; non, ut oportet, Politicæ fundamenta ex Ethica petentium, sed ordine prorsus inverso universam Ethicam Politicæ hominum societati subordinantium.

XXIV.  
*Cum multo-  
rum officio-  
rum anti-  
quior longè  
sit obligatio;*

Hominem quidem suâ naturâ esse animal sociale, certum est: verùm uti hæc ad societatem civilem colendam inclinatio hominis naturam sequitur, non constituit, ita longè altius petenda sunt officiorum homini qua tali præstandorum fundamenta, quam ex civilis convictus regulis. Imò verò, homini secundum se considerato, ut antè vidimus, ipsâ suâ naturâ vi hujus Legis incumbit obligatio, ad Deum colendum, proximum amandum, temperanter vivendum, etiamsi nulla ei ad corpus civile, cujus sit membrum, accesserit relatio.

XXV.  
*Quam qui  
non admis-  
sit Atheis-  
mum Politi-  
cum re verâ  
inducit.*

Jejunum est regere, etiam pietatem, temperantiam, similesque virtutes, quarum citra convictum civilem cum aliis dari potest exercitium, nihilominus ad societatem politicam referri posse, tanquam ejusdem firmiora vincula, quæque ad eam colendam hominem reddant pietiorem. Etenim quis non videt, profanum nimium esse, pietatem, temperantiam, &c. sic subordinare politicæ societati, ut si sine iis salva hæc esse posset, minor existeret ad earum cultum nostra obligatio? Ista tamen Atheismi Politici, nimium hodiè, proh dolor! succrescentis, infelicia existunt semina.

XXVI.  
*Lex Natu-  
ræ necessa-  
riò munita*

Cæterum, quandoquidem morali suæ dependentiæ à Deo rationalem creaturam pro suo arbitrio sese eximere posse, omni-modæ ejus dependentiæ non sinit; interim tamen omnino posset, quando vellet, si ei impunè liceret à Legis Naturæ præceptis recedere,

recedere, manifestum est, perfectam undiquaque obligationem hac Lege homini non imponi, nisi munita ea fuerit Sanctione Pœnali, in quam incurrentes Legis transgressores, experiantur nolentes per passivam obedientiam suam à Deo tanquam Judice dependentiam, quam volentes per obedientiam activam à Deo tanquam æquissimo Legislatore agnoscere noluerunt.

*Sanctione  
Pœnali;*

Quanta verò præcisè pœna ejusmodi perduellibus à Deo sit definita, non tam exactò Lumen Naturæ docere videtur. Id manifestum est, jus Dei esse, ut morte digni habeantur quotquot existunt Legis, quâ Regnum suum moderatur, violatores. Qui enim eo sine à Numine sunt conditi, ut tanquam morigeri cives vivant in honorem sui Regis Dei, quando tales vivere nolunt, justissimo supplicio, tanquam inofficiosi cives, ejiciuntur ea civitate, cujus membra esse se nolle factis declararunt: id est, jure merito tales ex hominum numero per mortem tolluntur. Imò, nullâ parte propitium sibi Numen promittere posse, qui ipsi communioni inter Deum tanquam Regem suum & se tanquam ejus subditos renunciarunt, rescisso ejusdem vinculo, quod in integra Legis hujus observantia consistit, res ipsa clamat.

XXVII.  
*Quâ æquissimo jure  
immorigeros  
exstirpatio  
ex hoc regno  
manet;*

Sicuti verò Justitiæ Dei conveniens est, debitâ pœnâ animadvertere in eos, qui sese per hujus Legis violationem reos constituerunt criminis Læse Majestatis Divinæ, itâ quoque naturæ lumen prorsus suadere videtur, Bonitati Numinis esse congruum, ut religiosis Legis suæ cultoribus semetipsum præstet talem, qualem cum ipsi in pia observantia hujus Legis agnoscunt. Nempè, quem Deum instituit amare creatura rationalis ac toto corde venerari tanquam Regem suum unicum, in cujus perfectissimo obsequio ac humillima sub eo submissione omnis sua consistat beatitudo, quo modo ea non benignum sibi ac faventem experietur Regem Optimum Deum?

XXVIII.  
*Uti obsequiosos ejus cultores beata Dei, Regis sui, fruatio.*

Atque itâ per ipsum rationis lumen sponte quasi ducimur, ad considerandum Naturæ Jus, non simpliciter tantum ut Legem, sed & tanquam Formulam alicujus Societatis sive Fœderis, intercedentis inter Deum, tanquam Regem, fœderis conditiones pro sua quidem eminentia, interim perfectissimæ suæ naturæ, nominatim tum justitiæ tum bonitati convenienter,

XXIX.  
*Unde ipso  
naturæ lumine  
Lex hæc ut formula  
fœderis operum  
innoscit.*

præscribentem; & creaturam rationalem, tanquam subditum, in easdem conditiones, tanquam quæ rectæ rationis judiciò non possunt non æstimari æquissimæ, animo lubenti consentientem atque acquiescentem.

XXX.  
His paucis  
contineri  
universæ  
Morali  
Philosophiæ  
fundamenta.

Progrediendum foret, ad expendendas Aëiones humanas à Lege Naturæ regendas; Conscientiam, hæc Lege informandam; Virtutem deniquè moralem, quatenus est constans animi propositum ad aëiones omnes huic Legi præstandas conformes: verum jam dudum Exercitationis Academicæ angustix limites ponunt nostræ meditationi: cui, nisi hoc obstitisset impedimentum, volupe sæpius fuisset, latius sese nonnihil diffundere in multis, in quibus ad ampliores cogitationes passim invitabat rerum sublimium Majestas. Nunc itaque suffecerit; & paucis exhibuisse prima illa fundamenta, quibus Moralem Philosophiam inædificandam censemus, & simul quaecunque specimen dedisse, cum nostrarum hac parte cogitationum, tum methodi, quæ res has tractandas putamus. In quo acquiescere cogemur, donec, quæ ad conatus tales perficiendos requiruntur, & otia & vires largiri voluerit benignus Deus.



GERARDI DE VRIES  
PHILOSOPHEMATA  
MISCELLANEA:  
SIVE  
DISSERTATIONES

D 2

*Infinito; Nullitate Spirituum; Homine automatico;  
Contradictoriis Deo possibilibus; Sensuum in  
Philosophando usu; Cogitatione ipsa  
Mente; Operationibus brutorum.*

PHILOSOPHY  
MISCELLANEOUS  
AND  
DIVERSE MATTERS

By  
J. G. ...  
...

DISSERTATIONIS  
DE  
INFINITO

SECTIO PRIOR;

Quæ est de

CONCEPTU INFINITI.

S U M M A R I U M.

- I. Quæcunque existunt humane menti pervestigabilia, præterquam Infinitum. II. De Infinito tamen mens nostra, etsi finita, rectè disputat. III. Neque idè quicquam quod finitatem suam excedat conari, credendum est. IV. De Infinito disputari, cur noluerit reverà Cartesius? V. Triplex circa Infiniti in nostra mente conceptum controversia. VI. Ad cujus intelligentiam præstructæ tres hypotheses. VII. Infiniti conceptum esse negativum, evincit ejus ad mentem creatam disproportion: VIII. Nec non Infiniti secundum rem & conceptum indivisibilitas. IX. Iniqua inter ideam negativam tenebrarum, & eam quæ Infiniti est, comparatio. X. Negativum Infiniti conceptum mens nostra quo modo formet? XI. Positivam Infiniti ideam non arguit, quod plus in Infinito esse intelligitur realitatis, quam in finito. XII. Conceptum Infiniti eo qui finiti est in mente nostra priorem  
non



non esse, demonstratur. XIII. Neque obstat, defectum finiti intelligi ex comparatione majoris, puta Infiniti. XIV. Si naturæ ordine idea Infiniti in mente nostra sit prior, non sibi constare novam methodum, docetur. XV. Infinitum clarâ & distinctâ ideâ à finita mente concipi, repugnat. XVI. Neque satisfacit distinctio inter conceptum totius Infiniti, & singularum in eo perfectionum. XVII. Non etiam juvat plus realitatis, quod in idea Infiniti, præ omnia alia, contineri dicitur. XVIII. Res in quibus minus perfectionis est clarius plerumquè nobis intelligi, ostenditur. XIX. Errores circa ideam Infiniti perpetuum Meditationum Cartesianarum

opus Joh. G.

## I.

Quæcumque  
existunt hu-  
manæ menti  
pervestigabi-  
lia, præ-  
terquam  
Infinitum.



Leganter ille & sapientissimè, *Quantum est quod ignoramus!* Experiantur id quotidie, quotquot unquam haud planè hebetes, exteriori cortice non contenti, sese dederunt severioribus meditationibus, eisdemque, interiorem rerum substantiam & medullam exhaurire conati sunt. Ità nimirum voluit providus naturæ Auctor Deus indè quidem abstergere sciendi nauseam, quo semper infixum hæreat illud, *Plus ultra*; hinc verò lusu elegantissimo fatigare industriam & laborem mortalium, tanto magis suam unicuique detegens ignorantiam, quanto altius in rerum scientia profecit: ut credas meritò, unumquemque quo scit plura, eo scire magis, se scire pauca. Causam si quæramus, cur adèd sint multa, in quorum contemplatione sic hæremus, ut initium facilius inveniamus quam exitum, reperiemus plerumquè eam esse, non tam ipsam rei difficultatem, quam potius inopiam administrorum, quibus oclusa ad rerum notitiam via reseretur; quod unum hic & opus & labor est. Fallitur quicumque eas sibi imaginatur mentis humanæ angustias, ut non apta existat quævis

ca-

capere, modo ad manum sint media idonea; quorum defectu sæpè contingit, ut subsistere cogatur atque acquiescere in qualicunque sapientiæ modulo. Unum duntaxat est quod omnem mentis nostræ vim longissimè excedit, ipsaque suâ naturâ, ut in se est, ab ea cognosci nequit; INFINITUM puta. Id, quia nullam planè ad finitum nostrum ingenium habet proportionem, tanto ferè magis nostram fugit meditationem, quanto diligentius in id inquirimus; & in hoc potissimum à nobis tanquam Infinitum cognoscitur, quòd mens humana ejus plenitudinem & perfectionem concipere nequeat. Ut mirum sit, non deesse hodiè Philosophos, qui, quidvis sibi de se promittentes, secundum methodum suam philosophantibus polliceri audent Infiniti ideam, non claram tantum & distinctam (id parum) sed omnium quoque quas quis habere potest clarissimam & distinctissimam. Quam verè? constabit ex hac Dissertatione nostra; quâ, aspirante Emè Infinito, de Infinito promodulo disputare constitui.

Verùm in ipso hìc limine necessitas imponitur vindicandi hoc institutum à censura quorundam, quibus ipso Dissertationis titulo graviter impingere videbor, dum disputare aggredior de re, de qua *nunquam disputandum esse*, dictant. *Cartes. Princip. 1. §. 26.* Quod si verum sit, unâ liturâ quicquid hìc meditatur inducitur. Mihi quidem mira semper hæc visâ fuit philosophatio, ac parum congrua eorum hypothesibus, qui conceptum Infiniti positivum, & quidem clarum ac distinctum, quin omnium qui in mente existunt evidentissimum se habere gloriantur. Si sic, quid ni disputare liceat de Infinito? Equidem quod clarè & distinctè cognoscimus, etiam priusquam concipimus finitum, quid ni de eo judicare liceat ista, quæ sic concipimus? Ast de quo judicare licet, de eo quoquè disputare non tantum licet, verum etiam sæpè necessum est. Quum enim variorum de eadem re judicia esse soleant varia, & non rarè opposita, facilè eveniet (quod passim evenire docet experientia; docebit hæc ipsa pagina, quâ de Infinito quandoque disputandum esse, contranegantem id Cartesium evincimus) ut quis in suo de Infinito judicio erret; quem errorem refutare, ac veram de Infinito sententiam vindicare, unusquisque teneatur,

## II.

*De Infinito  
tamen mens  
nostra, etsi  
finita,  
rectè disputa-  
tur.*

cui veritas, ne erroribus opprimatur, cordi est. Ecquid autem id est aliud, quam de Infinito disputare? Atque hoc fundamentum Metaphysici, Entis affectiones tractantes, de Infinito non minus agunt quam de Finito; Pneumatici Spiritum in Finitum & Infinitum dividunt, atque utriusque differentias explicant; Ethici de Bono summo seu Infinito, an & quale detur, disquirunt; Mathematici & Physici de Quantitate Infinita disputant; Theologi de Deo Infinito toti differunt. Absurdi omnes & inepti, si Cartesio credimus, qui sese *fatigarunt disputationibus* de re, de qua disputandum sit nunquam. Tandem de ipso Cartesio quid judicabimus, qui determinare passim audet de Infinito plurima, eaque vindicare ab objectionibus, puta, Infiniti Ideam positivam esse, & ideâ finiti priorem, esse omnium maximè claram & distinctam, &c. Ut taceam quæ de mundo, ejusque materia Infinita, docet alibi; de quibus infra suo loco. •

### III.

*Neque ideo  
quicquam  
quod finita-  
tem suam  
excedat co-  
nari, cre-  
dendum est.*

Sed cur, obsecrò, nullis unquam de Infinito disputationibus locum relinquit Cartesius? *Cum simus*, inquit, *finiti, absurdum esset nos aliquid de Infinito determinare, atque sic illud quasi finire ac comprehendere conari.* Itane? De nulla ergò re aliquid determinare licet, nisi quam intellectu nostro finimus ac comprehendimus? Profectò de re omninò nulla, ne minima quidem, sic quicquam determinare forsàn licuerit; cum certè non simus, nos vel unicam comprehensivè intelligere. Instantias, quibus vanitatem illationis ostendam, non longè petam. Attributorum Divinorum ne unum quidem nos comprehendere notum est; at quoties non imponitur necessitas disputandi de Æternitate, Simplicitate, Immensitate, Immutabilitate, Præscientia infallibili, Decreto immutabili, Providentia efficaci, &c. si vindicare voluerimus independentem Divinæ Majestatis gloriam à plurimorum eam temerè vellicantium cavillationibus? Ut addam aliud: exemplo sit Chiliogonum, quo ipso alibi utitur Cartesius, quodque hùc imprimis facit, quippe cujus ne claram quidem & distinctam imaginationem nos habere largitur, nisi tantum, quatenus ad unum aut alterum ejus latus se extendit nostra attentio. Numquid autem idcirco dubitabis de eo contra negantem disputare, atque asserere, id esse æquiangulum, si sit æquilaterum; in æquiangulo duo

duo latera quovis tertio esse majora ; esse minus circulo cui inscribitur ; esse majus circulo circa quem describitur ; & quæ alia similia ex Matheſeos principiis de Chilogono non minus certò demonstrari poſſunt , quam de Trigono aut Pentagono , quæ quod ad omnia & ſingula ſui latera atque angulos comprehendis ? Vides ( ut plura hùc adſerre deſinam ) non ideò nos aliquid comprehendere , quia de eo diſputamus ? Nec mirum. Sufficit de re quapiam diſputaturo , ſi ſatis habeat , ob quod ſuam tucatur opinionem , fundamenti , ex quo dubia circa rem controverſam mota poſſit decidere : habet autem ſatis fundamenti , ſi prædicatum , de quo diſputare aggreditur , percipiat cognitione certâ ; qualis apprehenſiva eſſe poteſt non minus quam comprehenſiva. Itaque ſufficiens nequaquam eſt hæc ratiocinatio ad prohibendas quaſlibet de Infinito diſputationes. Non ſaltem tales , quibus *omnes noſtri intellectus vires ſic in eo contemplando occupare conamur , ut non tam Infinitum capere laboremus , quam ab ipſo potius capi* : uti ipſe loquitur Carteſius , de Infiniti Dei in mente noſtra idea diſſerens. Modetiſ ejusmodi de Infinito diſſertationibus nihil præjudicant mentis noſtræ , quibus id comprehendere prohibemur , anguſtiæ. Modetiſ , inquam ; nequis autemet , noſ hùc quicquam ullo pacto patrocinari velle curioſis , temerariis , ac non raro profanis hac parte Scholaſticorum quæſtionibus ac deciſionibus , quibus infinitiſeximium hunc de Infinito tractatum turpem in modum polluerunt homines inaniter atque otioſè ſubtiles , nihilque de ſeſe humile in tractandis rebus etiam maximè ſublimibus ſentientes.

An verò humilitatis conſcientia genuina cauſa fuerit , ob quam de Infinito diſputare noluerit Carteſius ; an potius aliud eum moverit ad hâc utendum præcautione , conjectare licet ex iis quæ mox ipſe addit. Nimirum , pro ea quâ excellebat mentis ſubtilitate , prævidebat facile , quot difficultatibus , & quam proſuſ inſolubilibus , premenda eſſent quæ de mundi noſtri infinitate , ſeu nulliſ ejusdem terminis niſi imaginariis , traditurus erat deinceps. Neque tamen mittendum erat repudium opinioni , quam alibi agnoſcit *unum ex præcipuis , ſuoque judicio certiffimis , Phyſica ſua fundamentis. Epiſt. Vol. 1. p. 187.* Itaque via præſcindenda erat omnibus iſtiuſmodi rationibus & iſtantiis , quibus extenſio hujus uni-

IV.  
*De Infinito  
diſputari ,  
cur re verâ  
noluerit  
Carteſius ?*

versi intra limites coerceri atque compelli validè posset. Hinc ista sibi suisque hypothesebus cavet prolepsi, monendo in antecessum lectorem, istis se disputationibus fatigandum minimè esse. Sic enim mox pergit: *Non igitur respondere curabimus iis, qui querunt, an, si daretur linea infinita, ejus media pars esse: etiam infinita; vel, an numerus infinitus sit par an impar, & talis; quia de iis nulli videntur debere cogitare, nisi qui mentem suam infinitam esse arbitrantur.* En callidum consilium! quo uno quasi ictu secare nititur infinitos nodos, quibus mundum suum nullos extensionis terminos habentem constringendum fore præfagebat, quibusque ritè solvendis neque ipse par erat, neque ullus unquam sufficere mortalium. Pulchrè profecto! Disabit de Infinito quod placet Dominus Cartesius. In contrarium si objicias rationes, *non iis respondere curabit; causatus mentis finitudinem.* Benè habet, quòd hodiè didicerimus viam ratiocinandi brevem & compendiarium; quâ eadem, & vacui possibilitatem, & plurium mundorum non-repugnantiam, & spirituum cum corporibus essentialem coexistentiam, & alia quævis dogmata, novam sapientiam subvertentia, absque multa circuituione tueri datur facillimè.

## V.

*Triplex circa Infiniti in nostra mente conceptum controversia.*

Quum itaque nihil nobis re verà obstat mentis finitas, quo minus disputare de Infinito liceat, age! paulo propius cum Nobili Auctore congreduamur, acturi & de Infiniti in nostra mente notione, & de re ipsa quoque: utrobique enim nobis haud leviter errare videtur. Utque indè faciamus initium, triplex circa Infiniti conceptum occurrit expendenda controversia. Primum, An positivus sit, an potius negativus? Indè fluit secundò, Uter conceptus altero prior sit, Finiti, an Infiniti? Denique, An idea Infiniti in mente nostra existens sit clara & distincta, quin omnium quas habemus clarissima ac distinctissima? Conceptum Infiniti & positivum esse; & conceptu Finiti priorem esse; & omnium maximè clarum & distinctum esse, tuctur Cartesius, *Medir.* III. Nobis opposita sententia verissima videtur & certissima. Quo autem distinctius de his omnibus philosophemur, quædam in antecessum notari velim, quorum non levis erit in his quæstionibus decidendis usus.

## VI.

*Ad cujus intelligentiam*

I. Distinguendus est accuratè conceptus formalis, uti loquuntur, ab objectivo, sive notio rei in nostra mente, à re ipsa quæ notione

tione repræsentatur. Quod si attendamus, deprehendemus illicò, distinguendum planè esse conceptum rei positivum à conceptu rei positivæ. Illic *τὸ positivum* est affectio conceptus seu notionis, exprimens modum, quo mens rem sibi repræsentat: hic verò *τὸ positivum* est affectio objecti repræsentati, indicans id esse verum quid & reale. Ex quo conficitur, quemadmodum rei perfectæ dari potest conceptus imperfectus, & vice versâ, ita quoque non repugnare, rei positivæ dari conceptum negativum: quod ipsum plurimis instantiis cuique obviis confirmare facillimum existit. Hic nobis quæstio est, non de *conceptu Infiniti positivi*, sed de *conceptu positivo Infiniti*: i. e. non disquiritur, an Infinitas à parte rei sit positiva perfectio, quod nemo negaverit, qui expendet ea quæ de Infinito ipso deinceps trademus; sed quæstio est an Infinitas, etsi verè sit à parte sui quid positivum, etiam modo positivo à nobis concipiatur? Neque inanem hanc esse subtilitatem, sed controversiam magni momenti, vel hoc unum evincit, quod hinc pendeat omnis vis & robur argumenti Cartesiani, petiti ab infiniti Dei idea, ad probandam ejusdem existentiam; uti ex infrâ dicendis percipietur. II. Distinguendum quoque est inter nudam ideam, rem immediatè & directè per solam apprehensionem simplicem menti offerentem, atquè inter perceptionem istiusmodi, quæ, ex pluribus mentis actibus composita, superaccedente judicio & discursu quasi perficitur. Secundum ista evenire potest, nos firmiter tenere, prædicatum quodpiam esse positivum, non quia id tanquam positivum simpliciter concipimus, sed quia sufficientes sunt rationes, quæ nos compellunt ad credendum, quod negativo duntaxat modo ob mentis imbecillitatem concipimus, re verâ tamen esse positivum, quamvis tanquam tale nobis sit inconceptibile. Aliud itaque est, Infinitum simplici ideâ, eâque positivâ & positivo modo concipere; aliud, ope judicii & discursus intelligere, Infinitum, quamvis negativè conceptum, esse tamen re ipsâ positivum. Non de isto quæritur, sed de illo. III. Distinguenda deniquè est res quæ Infinita est, ab ipsâ Infinitate; consequenter, distinguendus quoque conceptus rei Infinitæ à conceptu ipsius Infinitatis tanquam talis. Ille compositus quasi est ex duabus notionibus, & rei ipsius, & adjunctæ Infinitatis; hic est simplex idea, Infinitatem.

*siam præ-  
struere res  
hypotheses.*



tatem in abstracto representans. Illum, quod ad rem attinet cui Infinitas tribuitur, posse esse positivum, non negamus; hunc (de quo nobis quaestio est) dicimus in finita mente positivum neque esse, neque esse posse.

VII.  
Infiniti  
conceptum  
esse negati-  
vum, evin-  
cis ejus ad  
mentem  
cream  
dispropor-  
tio:

Ista præmittere visum fuit ad statum controversiæ rectius intelligendum. Nunc Cartesium audiamus! *Nec, ait, p<sup>er</sup>are debeo, me non percipere infinitum per veram ideam, sed tantum per negationem finiti, ut percipio quietem & tenebras per negationem motus & lucis; nam contra manifestè intelligo, plus realitatis esse in substantia infinita, quam finita.* Ego verò prorsus autumo, conceptum Infiniti, qua talis, in nostra mente esse negativum, non positivum. Demonstrò. Quicquid positivè concipimus id intellectu nostro tanquam illi appropportionatum occurrit. Fieri namquè non potest, ut aliquid positivè à mente nostra attingatur, quod captum ejus excedit, in quantum nimirum eum excedit; quoniam implicat, intellectum nostrum positivo modo versari circa illud, quod suâ naturâ est extra ejus sphaeram activitatis. Jam verò Infinitum tanquam tale, sive ipsam Infinitatem, finitæ menti, ejusve vi perceptivæ, neutiquam esse appropportionatum, imò nec appropportionari posse, adeò clarum est, quam quod clarissimum; quandoquidem finitum quotiescunque sumptum nunquam potest Infinitum excedere: qui tamen possibilis unius supra alium excessus in eis requiritur, quæ aliquam habent ad se mutuo proportionem. Si itaque majus quid & amplius concipiendum sit in Infinitate, quam quod à mente nostra attingi potest, propter nullam illius ad hanc proportionem; sequitur utique, Infinitatem nos alio modo concipere non posse, quam cogitando, nullis unquam finitis conceptibus Infiniti perfectionem absolvi posse. Quod profectò clarè notat, Infinitatem qua talem tantum nobis cogitari negativè; removendo limites quoscumque vel conceptos, vel etiam conceptibiles.

VIII.  
Nec non In-  
finiti secun-  
dam rem &  
conceptum  
indivisibili-  
341.

His adde, Infinitatem ejusmodi prædicatum esse, quod (quemadmodum infra docebimus) in indivisibili consistit, quare uti ipsi, ita & conceptui, ei respondenti, nihil addi potest aut detrahi. At verò omnes conceptus nostri, in quantum sunt positivi, finiti sunt, cum conditionem ipsius mentis finitæ non excedant; adeoque semper iis addi potest & detrahi. Restat ergò conceptum



ceptum Infiniti in nostra mente non esse positivum. Si malis, clarius forsan sic arguam : Infiniti quæ talis vel totum concipit mens nostra, vel aliquam partem, vel nihil. Totum infinitum concipere est nihil aliud, quam suo conceptu id exhaustire & comprehendere, quod mentis finitatem omnino excedit. Partem Infiniti concipere, mera contradictio est ; cum infinitas suâ naturâ omnis partitionis sit expers. Restat ergo, dum positivo conceptu nec totum infinitum, nec partem ejus concipere possumus, si quo modo id concipimus, alio quam negativo id nos concipere non posse ; per remotionem puta termini cujusvis conceptibilis. Talis autem conceptus negativus, sicuti magis & minus non admittit, sed in indivisibili consistit, ita unice idoneus videtur ad rem indivisibilem, Infinitatem nempe, intelligendam. Neque attinet pluribus confirmare certam veritatem, quam & Cartesius ipse, quod mireris, Opponentis suo largiri cogitur, dum inquit : *Quantum ad rationem formalem Infiniti, sive Infinitatem, etiamsi illam intelligamus esse quam maximè positivam, non tamen nisi negativo quodam modo intelligimus ; ex hoc scilicet, quod in re nullam limitationem advertimus. Respons. Prim. p. 59. Quod si non, nisi negativo modo, intelligamus Infinitum, quare negat, ut audivimus, nos Infinitum tantum per negationem finiti percipere, uti quietem percipimus per negationem motus ? Neque hîc juvat distinctio inter Infinitatem & rem quæ infinita est, quasi non Infinitatem, sed ipsam rem quæ est infinita, positivè intelligamus. Nam de Infinito conceptu quæ tali est quæstio, ut antè monuimus, non de eo quatenus aut spiritus, aut ens, aut substantia est ; quo sensu quis unquam mortalium asseruit, Infiniti conceptum negativum esse ?*

Verum, neque prætermittendum est, esse valdè ambigüè dictum à Cartesio, *Nec putare debeo, me non percipere infinitum per veram ideam, sed tantum per negationem finiti, ut percipio quietem & tenebras per negationem motus & lucis.* Ambigua, inquam, sunt ista. Vel enim respiciunt duntaxat simplicem concipiendi modum, vel notant siml judicium quod de re concepta formamus, quodque notionem illam serè comitatur. Si solam ideam attendas, quatenus in mente nostra simplici apprehensione absolvi-  
tur, liquet ex antè demonstratis, verissimum hætenus esse, nos  
Infini-

IX.

*Iniqua inter ideam negativam tenebrarum, & eam quæ Infiniti est, comparatio.*

Infinittum non percipere per positivam ideam, sed tantum per finium remotionem, uti percipimus quietem & tenebras per negationem motus & lucis. Verum si notionem Infiniti spectes, quatenus eam comitatur iudicium de re quam negativâ notione percipimus, longè hoc loco dispar ratio est inter conceptum Infiniti, atque eum qui est quietis aut tenebrarum. Videlicet, quando conceptu negativo cogito quietem aut tenebras, simul intelligo, non tantum conceptum formalem, quem vocant, sive ipsum concipiendi modum negativum esse; verum etiam iudico, conceptum objectivum, sive tenebras ipsas à parte sui, esse duntaxat privationem luminis, quietem tantum privationem motus, &que ità reale nihil in se includere, quemadmodum in idea eorum nihil reale offertur menti. At verò, quamvis Infiniti quâ talis conceptus formalis, sive modus concipiendi, sit negativus, certò tamen iudicamus, conceptum objectivum, seu Infinitum ipsum prout à parte rei existit, esse quam maximè positivum. Atque hæcenus conceptus negativus tenebrarum aut quietis à conceptu negativo Infiniti distat quam plurimum. Illam notionem & negativam esse, & rei negativæ scimus; hanc negativam esse, sed rei positivæ, novimus. Ut reverà minus accuratè hæcenus instituitur inter conceptum tenebrarum & Infiniti comparatio.

X.  
Negativum  
Infiniti  
conceptum mens  
nostra quo  
modo for-  
metur?

Ut verò nihil amplius dubitemus, quin Infinitum, prout sub conceptum nostrum finitum cadit, non nisi negativè à nobis apprehendatur, per terminorum seu limitum remotionem, operæ pretium fuerit attendere paulo diligentius modum, quo, teste experienciâ, Infiniti notio à mente nostra formatur. Exemplo sit Æternitas, spectata simpliciter in quantum est duratio infinita: nam & successionis carentiam in ea includi novimus; atqui quam hic non jam attendemus. Eam concepturus tanquam talem, obviam quamcunque durationem apprehendo; finitam quidem, sed quam, factâ sæpius multiplicatione, amplifico quantum possum, & quam latissimè patentem concipere annitor. Indè quidem experior, ex finita duratione multoties aucta & multiplicata resultare tandem aliquam, cujus definitam magnitudinem non intelligo, utpote distinctum meum captum fugientem; non tamen ideò me Infinitam eam concipere probè novi, quippe qui mihi conscius sum, finiti ad infinitum nullam esse proportionem, neque

que aded multiplicationis finitæ, quantumvis magnæ, productum unquam esse, aut esse posse, Infinitum. Nunc itaque, nisi desperabundus omnem prorsus de Infinita duratione cogitationem abjicere velim, nihil restat aliud, quam ut cogitem rem infinitè durantem, tanquam aliquid quod omnem mihi conceptibilem durationem excedit. Quæ verò duratio conceptibilem omnem durationem excedere cogitur, eo ipso concipitur negativè: quandoquidem manifestam notat contradictionem, aliquid omne conceptibile excedere, & tamen simul à me positivè intelligi. Quodcunque enim, ut antè docui, concipitur positivè, in quantum concipitur positivè, mentem non excedit; & contrà, quod mentem excedit, hoc ipso quod excedit, mentem non afficit, & sic non nisi negativè cogitur. Et profectò modum concipiendi, ad quem nos ducit Spiritus Sanctus in Sacris, si attendamus, deprehendemus à finito fieri initium, & per finium seu limitum remotionem conceptum hunc terminari. Quid enim vult aliud, quando de Æternitate (ut tantum assumam hoc de quo jam diximus) sermo est, illud antropopathicum, *Anni tui non deficiunt*? Ecce, durationem Deo tribuendam, sive æternitatem, conceptam finitam primùm per modum annorum! Ecce, factam infinitam, pro modo concipiendi nostro, per remotionem terminorum! Mirum, balbutire voluisse ità Spiritum S. nobiscum, si Infinitatis positivum habere conceptum aded sit facile, quam contendunt isti.

Neque propositiva Infiniti idea facit, quod tanquam fundamentum assertioni suæ subijcit Cartesius, quando ait: *Manifestè intelligo, plus realitatis esse in substantia infinita, quam in finita*. Nam, quamvis sit certissimum, nos meritò ob validas rationes judicare, id quod in re infinita plus est quam in finita, & per quod res infinita constituitur in esse Infiniti, esse à parte rei quam maximè positivum, negatur tamen, ob antè demonstrata, te illud plus realitatis, quod in re Infinita est, eamque Infinitam facit, ideâ quadam positivâ concipere; quod docere omninò necesse fuerit, ad conficiendum, nos *Infinitum per veram ideam*, & non tantum per negationem finiti percipere. Neque multò aliter solvendum aliorum argumentum huic non valde ab simile. Idea, inquit, substantiæ infinitæ est positiva; quia infinita substantia

XI.  
Positivam  
Infiniti  
ideam non  
arguit quod  
plus in In-  
finito esse  
intelligitur  
realitatis,  
quam in fi-  
nito.

illa est, quæ omnes omninò perfectiones cogitabiles perfectissimè possidet: aut istud aliquid positivum est. Quamvis enim negandum non sit, rē possidere omnes perfectiones perfectissimè notare à parte ipsius possidentis quid quam maximè positivum & reale, non tamen inde conficitur, reale illud positivà ideā, pro modo concipiendi nostro, à nobis intelligi. Quis certè est, qui positivè concipiat, & omnes omninò perfectiones cogitabiles, & perfectissimam earundem possessionem? Quin, quis non potius experitur secum, se hæc concipere, removendo istiusmodi imperfectiones & modos possidendi imperfectos, quos in creaturis observamus? Quamobrem, Deum omnes omninò perfectiones perfectissimo modo possidere, quoties dicimus, non id exprimimus quod simplici ideā eaque positivā, de Numine nobis repræsentamus, sed, quod, quamvis nobis positivè inconceptibile esse sentiamus, ratiocinando tamen Divinæ naturæ convenire novimus. Quo sensu ille, piè non minus quam eleganter, *Nobis de Deo affirmanda esse & qua concipimus, & qua non concipimus.*

XII.  
Conceptum  
Infiniti eo  
qui finiti est  
in mente  
nostra prio-  
rem non esse,  
demonstratur.

Progredior ad alteram de conceptu Infiniti controversiam, cujus decisio ex priori facillima est. Dico nimirum, Conceptum finiti in mente nostra priorem esse eo qui est Infiniti. De hoc dubitare non sinunt jam allata. Scilicet, quod à mente nostra positivè percipitur, eademque sic satis est appropportionatum (quale esse finitum ostendimus) id procul omni dubio prius percipitur eo quod neque positivè menti offertur, neque ullā ratione illi appropportionari potest; quale est Infinitum. Ad ea enim concipienda mentem imprimis pronam esse & facilem, quæ maximè ei sunt appropportionata; item, conceptum positivum negativo priorem esse, per se clarum est. Quin, si, ut opinantur qui sentiunt oppositum, finitum tantum concipi queat per remotionem majoris alicujus puta Infiniti jam antè nobis concepti, sequeretur, ea concipi planè non posse finita, quæ ipsa Infinita quoque concipi nequeunt. Sumamus V. G. Extensionem vel Numerum. Ea quando concipio finita, dici nequit præcessisse in mente meā ideam extensionis aut numeri Infiniti, per cujus remotionem extensionem vel numerum hunc aut istum finitum concipio; nam (quod deinceps docebimus) ità contradictoria & sui eversiva est extensio vel numerus infinitus, ut ejus positivam ideam habere non quidem

quis-

quisquam possit. Atque hæc ratio efficacissima est, & vel una sufficit, ad evincendum, conceptum Infiniti notionem finiti suâ naturâ non antecedere. Et quid quæso de istis dicemus hominibus, qui per omnem vitam vix unquam seriò de Infinito cogitarunt, multò minus positivo conceptu id unquam conceperunt; quos tamen res quasvis obvias tanquam finitas clarè & distinctè concipere, notum est? Evidenti profectò argumento, non præcedere in nostra mente conceptum Infiniti notionem finiti; sed finitum concipi omninò posse ab aliquo qui nequidem de Infinito cogitat. Adde deniquè, ipsum Spiritum Sanctum non uno loco nos manu ducere ad concipiendum Infinitum ex finito; non contrà, finitum ex Infinito: cujus exemplum, ne alia adducam, dedimus in Æternitate Divina concipienda per durationem à qua removeantur fines. Non addam plura; sufficiunt hæc ad demonstrandum, falsum esse, quod asserit Cartesius, *priorem quodammodo in nobis esse perceptionem Infiniti, quam finiti.*

Neque stringunt, quæ pro sententia sua subjicit: *Qua enim ratione intelligerem me dubitare, me cupere, hoc est aliquid mihi deesse, & me non esse omnino perfectum, si nulla idea entis perfectioris in me esset, ex cujus comparatione defectus meos agnoscerem?* Nam non prorsus idem sunt, se ipsum concipere finitum; & concipere aliquid sibi deesse ex comparatione alicujus perfectioris. Prior conceptus absolutus est; posterior comparativus; & si benè attendamus, hic ex illo sequitur. Videlicet, primum positivè intelligo, me hoc vel illud prædicatum possidere hætenus; mox negativè cogito, non ergò me possidere majus, v. c. non duplum, aut triplum, &c. multo minus id me possidere sine ullis limitibus & modo perfectiore quam unquam positivè intelligere possum, id est, infinito. Quamvis itaque verum sit, me non posse concipere in meipso comparativè minus, quin connotetur conceptus majoris (minus enim & majus, tanquam relata, sunt simul, uti naturâ, ita quoque cognitione) nihil tamen hinc conficitur aliud, quam, quoties finitum cogitare incipimus comparativè, tanquam minus Infinito, conceptum Infiniti in hoc mentis actu involvi. At non inde sequitur, hunc idè priorem esse illo: non magis, quam si inferrem ego, conceptum finiti priorem esse notionem Infiniti, quia nimirum nunquam concipere possum Infinitum tan-

XIII.  
Neque obstat, defectum finiti intelligi ex comparatione majoris, puta Infiniti.

quam majus finito , quin in me existat idea entis finiti , ex cujus comparatione excessum Infiniti supra finitum intelligam. Comparativè itaque si spectentur Finitum & Infinitum , quatenus alterum altero majus est aut minus , intelliguntur , uti dixi , simul ; ut ne quidem in comparativo hoc sensu ex vero dicatur , *priorem quodammodo esse perceptionem infiniti quam finiti*. Concidit itaque omnis hæc Cartesii philosophatio. Quod enim ad conceptum Infiniti absolutum ( non comparativum tanquam alicujus finiti majoris ) eum conceptu finiti in nobis esse posteriorem , commate proximè præcedente , invictè docuimus.

## XIV.

*Si naturæ  
ordine idea  
Infiniti in  
mente nostra  
sit prior ,  
non sibi con-  
sistere novam  
methodum  
docetur.*

Id verò mirum est , si , quod contendit Cartesius , perceptio Infiniti , hoc est Dei , prior quodammodo in homine sit , quam finiti , hoc est sui ipsius , cur non Nobilis Auctor Meditationum suarum initium fecerit ab idea Dei potius tanquam Infiniti , quam sui tanquam dubitantis ; quoniam , si ei credimus , *nulla ratione intelligere possumus nos dubitare , sine comparatione entis perfectioris*. Certè , si sint hæc vera , non est nova methodus satis congrua ideis , prout ex nativo quasi ordine menti nostræ sese offerunt. Quin , quandò ipse Cartesius adhuc omnia pro falsis habebat , sic ut *supponeret , nullum esse Deum , totumque hoc de Deo daret esse fictitium* , omnemque adè de Deo , hoc est Infinito , cogitationem planè seponeret , intelligebat nihilominus etiam tum , se existere tanquam dubitantem , hoc est , tanquam finitum , cui aliquid desit ; nec tamen adhuc intelligebat , aliquid existere se majus , ex cujus comparatione se tanquam finitum & dubitantem intelligere poterat. Parum congrua ergò fuerit , nullâ habitâ ratione Infiniti , ejusque conscientia in alium locum rejectâ , tam operosa & profunda de mente dubitante , atque ex dubitatione ipsa suæ sibi finitudinis conscia , philosophatio. Videmus , ad concipiendum finitum supponendum non esse conceptum priorem Infiniti , ea ipsa si attendamus , quæ tradunt novi methodistæ.

## XV:

*Infinitum  
clarè & di-  
stinctè ideâ  
à finita*

Propero ad tertiam , de conceptu Infiniti in nobis , quæstionem : An nimirum idea Infiniti in nostra mente sit clara & distincta ; quin , uti loquitur Auctor , *maximè clara & distincta* ? Ad ejus solutionem multa hùc congerere necesse non erit. Si enim , quod demonstravimus , idea Infiniti , & negativa sit , & finiti  
ideâ



ideâ posterior, quis dubitet, clarius & distinctius à nobis finitum percipi quam Infinitum? An verò maximè clara & distincta erit idea ejus, quod, ipso teste Cartesio, *non nisi negativo quodam modo intelligimus; ex hoc scilicet, quod in re nullam limitationem advertimus? Respons. Prim. p. m. 59.* Ea ergò idea maximè clara & distincta erit, quæ est rei, quam totam simul animo completi non possumus, quamque *non nisi finitâ, & ad modulum ingenii nostri accommodata cognitione intelligere nos, fatetur? Ibidem.* Ecquis extitit unquam, qui non, vel leviter ipsas duntaxat voces attendens, intellexerit, id quod menti appropinquatum est, atque, absolute loquendo, totum ab ipsâ comprehendi potest, quale est finitum, longè clarius & distinctius intelligi à nobis, quam quod nullam planè per se & ex suâ naturâ ad mentem dicit proportionem, quale est Infinitum? Hoc enim, ut jam antè notavimus, neque secundum se totum prout in se est intelligere possumus, ob mentis percipientis finitatem; neque intelligere id possumus per partes, quas ipsa Infiniti natura respuit: undè nihil aliud de Infinito qua tali concipere licet, quam quod inæstimabili magnitudine & modo prorsus inconceptibili, omnem omninò vis nostræ intellectivæ finitudinem excedat. Hæcine idea maximè clara est & distincta? Concipiant ista qui possint, dicant qui audent! Ego, me quod attinet, sic omninò habeo, præclare hac de re disseruisse Auctorem *Objection. Prim. p. 49.* hunc in modum: *Interrogabit non nemo; clarene distincteque cognoscis ens infinitum? Quid ergo sibi vult tritum istud & vulgo notum: Infinitum qua infinitum est ignotum. Si enim ego cum de chiliogono cogito figuram aliquam confuse mihi representans, non chiliogonum ipsum distincte imaginor aut cognosco, quia mille ejus latera non distincte intueor; sane rogabit ille, quomodo infinitum ut infinitum distincte & non confuse tantum cogitet, si infinitas ejus perfectiones, quibus constat, clare & velut ad oculum videre non possit.*

Neque ullâ parte iis satisfecit Cartesius, respondendo, *Resp. XVI. Prim. p. 59.* *Confuse imaginamur chiliogonum, cum omnia simul ejus latera complectimur, sed potest valde clara & distincta esse imaginatio chiliogoni, si tantum ad unum aut alterum ejus latus se extendat. Simili ratione, &c.* Perindè enim id est, ac si dicam, posse esse valde claram & distinctam imaginationem leonis, cujus non omnia

*Neque satis facit distinctio inter conceptum totius Infinitis & fin-*



*gularum in  
eo perfectio-  
num.*

membra video, sed aliquem tantum unguem. Certè chiliogonum tanquam tale clarè & distinctè neutiquam concipitur, nisi id ad minimum concipiatur quod chiliogono est essentiale, videlicet non unum, non alterum, non tertium latus, quod & in decagono observare licet, sed mille præcisè latera totidem angulis inter sese unita: quæ nisi concipias, re verà chiliogonum non concipis tanquam tale; nedum ut id conciperes clarè & distinctè. Quæ si Infinito applicemus, res est evidentissima. Nam neque Infinitum tanquam tale clarè & distinctè concipitur, nisi omnes perfectiones quæ Infinitum absolvunt, & sine quibus omnibus Infinitum tale non est, & positivè tanquam tale menti non occurrit, clarè & distinctè concipiantur. Quapropter, quemadmodum mens nostra in formando repræsentamine chiliogoni, laterum multitudine, imaginationi non approportionatà, sic obruitur, ut chiliogoni tanquam talis clarum & distinctum conceptum nunquam acquirat; ità quoque mens nostra in formatione notionis Infiniti, multitudine perfectionum ad Infinitum requisitarum, & inconceptibile quantum captum nostrum excedentium, sic obruitur, ut Infiniti qua talis conceptum clarum & distinctum nec habeat, nec per finitam suam naturam ad infinitum collatam habere possit.

XVII.  
*Non etiam  
juxta plus  
realitatis,  
quod in idea  
Infiniti,  
præ omni  
alia, con-  
tineri dici-  
tur.*

Nititur quidem Cartesius, ideam Infiniti in mente nostra præ cæteris quam maximè esse claram & distinctam, hinc imprimis probare, quod illa *plus realitatis quam ulla alia contineas*. Sed frustra est. Neque enim eo clarius semper est & distinctior idea, quo plus realitatis objectivæ continet. Sive, ut loquar clarius, non eò evidentius & distinctius rem concipimus, quo plures in re concepta perfectiones existere judicamus, nisi simul illud plus realitatis, vel plures illas perfectiones ipsas, quarum ratione res concepta alias excedit, clarè & distinctè intelligamus. Etenim aliud prorsus est, intelligere rem quampiam esse perfectiorem, aliud, ipsas illas perfectiones, per quas res hæc existit illà perfectior, clarè & distinctè concipere: quorum hoc imprimis ad claram & distinctam rei perfectioris ideam pertinet. Jam verò, ut illud plus realitatis, quo Finitum ab Infinito exceditur, clarè & distinctè intelligas, tantum abest, ut ipse necesse habeas post pauca fateri, *alia innumera in Deo (Infinito) esse, quæ fortè ignoras, nec forte*

forte etiam attingere cogitatione ullo modo potes : aded ut , quantum ad ipsam Infinitatem , illam non nisi negativo quodam modo intelligamus . Tu ergò , qui in Infinito innumera ( quorum respectu Infinitum existit tale ) ignoras , sic ut ea cogitatione ullo modo attingere nequeas , & non nisi negativo quodam modo intelligas , dices nihilominus , Infiniti claram & distinctam , & quidem quam maximè claram & distinctam , te habere ideam ? Capiat ænigmata istiusmodi qui potest !

Juvat rem hanc paucis illustrare , quo veritas eorum quæ diximus ab imperitissimo quoque manibus palpetur . Similis omnino est universa hæc Cartesii philosophatio assertioni alicujus Geometræ , jactantis , longè clarius & distinctius se concipere figuram indefinitorum angulorum , quam trium ; eo scil. fundamento , quod , cum in idea Trianguli tres tantum sese offerant anguli , ex adverso Indefinitanguli conceptus plus angulorum contineat , quam ulla alterius figuræ idea : licet ipse interim experiatur , in Indefinitangulo innumeros esse angulos , quos ignorat , nec etiam attingere cogitatione ullo modo potest . Aut tantundem est , ac si quis gloriatur imaginem Solis se habere multò clariorem & distinctiorem quam ardentis alicujus candelæ ; quoniam intelligit in sole esse plus luminis quam in flamma candelæ , innumeros nimirum radios , sed quos omnes nec videt , nec visu suo ullo modo attingere potest . Si quis hæc ritè perpenderit , nihil dubito , quin omnis , qui non volens hic cæcutire cupit , intelligat clarissimè & distinctissimè , longè falsissimum esse & absurdissimum , tanto clarius & distinctius rem aliquam nos intelligere , quanto plura ei inesse judicamus prædicata , etiamsi ea nobis sint inconceptibilia . Quid ? quod experientia quotidiana nos doceat , verissimum esse , non rarè rem imperfectissimam , cui pauca duntaxat insunt prædicata , longè clarius & distinctius nobis concipi ( dum mens omnes & singulas ejus perfectiones magis quasi penetrat & plenius exhaurit ) quam aliam multò quidem perfectiorem , sed ipsa prædicatorum suorum multitudine & magnitudine intellectui inaccessam nec ullo modo appropportionatam . Obtinet hoc imprimis in re illa , quæ infinitis suis perfectionibus , sic mentis aciem perstringit , ut confundat , neque quid tandem percipiat , ipsa satis sciat , nisi fortè hoc unum , rem in hoc à se Infinitam agnosci , quod per-

## XVIII.

*Res in quibus minus perfectionis est clarius plerumque nobis intelligis ostenditur.*

perceptione finitâ percipere nequeat ea quæ in re Infinita percipienda sunt. Hæcine est ideâ maximè clara & distincta? Rectè rationis hac parte dictâmini conformia magis existunt dictata Spiritûs Sancti, asserentis, Deum ratione infinitarum suarum perfectionum *locum inhabitare*, sed finitis nobis homuncionibus *sic inaccessum*, ut & *in tenebris habitare* dicatur; adeò quidem, ut singulari etiam gratiâ illuminatorum in hac vita cognitio de Infinito Deo similis sit *enigmati*, cujus ipsam rationem formalem in obscuritate & confusione consistere, notissimum est.

XIX.  
 Errores circa ideam  
 Infiniti per  
 penam Meditationum  
 Cartesiarum  
 apertè  
 ostendit.

Ex hæcenus demonstratis liquet abundè, conceptum Infiniti, tanquam talis, in mente nostra & negativum esse; & notione finiti posteriorem; & deniquè non nisi obscurum & confusum: quæ ipsa de Infiniti idea probanda sumseramus. Quibus ritè intellectis, ad oculum apparet, quam parùm concinna sit methodus Cartesii, quam servat in famosis illis suis de prima Philosophia Meditationibus. Nititur enim hæc omnis eâ, quam jam profligavimus, sententiâ, de idea Infiniti in mente nostra & positiva, & ideâ finiti priore, & clara maximè ac distincta. Nominatim liquet, nullam omninò esse decantatam illam demonstrationem, quam adfert pro demonstranda summi Numinis existentia ex innata quadam nobis Dei, tanquam entis infinitè perfecti, idea, omnium quas habemus clarissima ac distinctissima, atque ideò maximè vera. Concidunt istæ omnia, quæque iis connexa sunt sexcenta, subruto hoc de idea Infiniti fundamento; quod conceptibus suis ac demonstrationibus ubiquè Cartesius substernit. Verùm novæ Methodi *ἀπὸ τοῦ ἑαυτοῦ*, & gravissima illarum Meditationum *ἀπὸ τοῦ Θεοῦ*, alias fortè detegemus pluribus & ex professo. Nunc circa Infiniti ideam hæc observasse suffecerit.

DISSERTATIONIS  
DE  
INFINITO

SECTIO POSTERIOR;

Quæ est de

EXTENSIONE INFINITA.

S U M M A R I U M.

XX. De Infinita materiae extensione quaestio est longissima consequentia. XXI. Infinitam Universi diffusionem agnoscit præ aliis rotundè Epicurus. XXII. Cartesianorum in indefinita mundi extensione vorticum cum innumeris Epicuri in infinito universo mundis consensus. XXIII. Universi extensionem verè infinitam statuere, æquè ac Epicurus, necesse habet Cartesius. XXIV. Cui difficultati frustra sese hic subducere laborat. XXV. Cartesii dissertatio, quâ suam aperit de Infinito universo sententiam. XXVI. Alia ejusdem in eandem rem adducta loca præcipua. XXVII. Philosophationis Cartesianæ summa omnis capitibus quibusdam comprehensa. XXVIII. Veram extensionis Infinitatem eis asseri, observatione unâ atque alterâ ostenditur. XXIX. Distinctio Cartesii inter Infinitum & Indefinitum nil hic aufert difficultatis. XXX. Mundi extensio quo sensu

*su affirmanda Infinita , Indefinita , Finita.*  
 XXXI. *Finitas partes nulli Infinitæ extensioni*  
*constituendæ sufficere, ostenditur.* XXXII. *Etiam*  
*partes numero infinitas in Infinita extensione admitti*  
*non posse, docetur.* XXXIII. *Neque ex partibus*  
*extensione infinitis Infinitam extensionem com-*  
*poni, evincitur.* XXXIV. *Imò ne alterâ qui-*  
*dem parte infinitas partes extensionem totam In-*  
*finitam conficere posse, demonstratur.* XXXV. *Ex*  
*quibus omnibus, extensum nullum, ob ipsam sui*  
*extensionem, Infinitum dari, aut dari posse,*  
*concluditur.* XXXVI. *Quod idem ex rei corporeæ*  
*natura & attributis quibuscumque pluribus instan-*  
*tiis conficitur.* XXXVII. *Essentia solius Dei*  
*Infinita extensionis cujusvis Infinitatem evertit.*  
 XXXVIII. *Immensitas Divina extensionem mundi*  
*Infinitam non patitur.* XXXIX. *Divinæ Potentiæ*  
*infinitas, & liberrimum in rem creatam dominium,*  
*cum Infinita hujus extensione non consistit.* XL. *De-*  
*niquè, extensionis Infinitas inimica existit Divinæ*  
*Sapientiæ, Unitati, Incomprehensibilitati, atque*  
*Æternitati.* XLI. *Difficultas de spatiis imagi-*  
*nariis, quæ veram in suo conceptu involvant exten-*  
*sionem, aufertur :* XLII. *Quamque ea sit ineffi-*  
*cax, ad impugnandam finitam mundi extensionem,*  
*duplici instantiâ ostenditur.* XLIII. *Non qui mundi*  
*extensionem finitam cogitat, quicquam sentit de se*  
*superbum, de Deo minus magnificum.* XLIV. *Non*  
*ad extensionem quamlibet finiendam aliud corpus*  
*ambiens cum Epicuro admittere necessum est :*  
 XLV. *Cum id corpori accidat, non qua simpliciter*  
*finito, sed qua parti Universi.* XLVI. *Omnipo-*  
*tentiæ Divinæ Immensitas pro possibili extensione In-*  
*finita*

*finita nil concludit. XLVII. Detegitur indè petita sophisticatio, non unâ in hanc rem allatâ instantiâ. XLVIII. Demonstrationis de extensione necessariò finita Porismata, Cartesianam Physicam subvertentia.*

**A**d rem ipsam progredior; in qua non minus, quam in ejusdem idea, graviter hallucinatum fuisse Cartesium, paucis ostendere constitui. Missis autem aliis, quæ plurima de Infinito disputari possunt, unam duntaxat, eamque longè præcipuam, excutere fert animus controversiam, de materia, sive extensione, infinita. Neque inutilis erit disquisitio, quum indè pendeant controversiæ vexatissimæ, quales sunt v. c. de Spatiis Imaginariis, de possibilitate plurium Mundorum, quæqueiis sunt affines; imò & gravissimæ, disputationes de primæ causæ potentia & providentia circa hoc universum totum, atquè etiam plurimas ejus partes: de quibus omnibus aliter atque aliter statuendum est, prout mundi nostri extensionem vel finitæ quantitatis agnoscimus, vel infinitæ. Ut forsân vix alia existat materia, quæ tantum consequentiarum syrma in re Theologica æquè ac Philosophica post sese trahit, quam hæc ipsa. Quæstionem quibus eam verbis vates Physicus *Lib. 1. de Nat. Rer.* proponit, & ipse proponam ego:

*Nunc age summa; ecquanam sit finis eorum,  
Nec ne sit, evolvamur: item, quod inane repertum sit,  
Sen locus, ac spatium, res in quo quaque genantur,  
Pervideamus, utrum finitum funditus omne  
Constet; an immensum pateat vel ad usque profundum.*

Inter Antiquiores varii à variis recensentur, qui voluerint Mundum, aut saltem materiam ejus, infinitè extensam esse. Ità sensisse fertur Anaximander, Diogenes, alique; qui tamen non eodem modo ac sensu mundi infinitatem explicuisse atque asseruisse videntur: sed hæc latè prosequi vix operæ pretium. Ex recentioribus Franciscus Patricius & Guilielmus Gilbertus, capita portentosarum novitatum feracissima, mundum mole infinitum propugnarunt. In hæretico Hermogene, faciente materiam infinitam, jam olim opinionem hanc tanquam Orthodoxæ Fidei

XX.  
*De Infinita materia extensione questio est longissime consequentia.*

XXI.  
*Infinitam Universi diffusionem agnoscis præ aliis rotundè Epicurus.*

inimicam notavit gravissimus auctor Tertullianus. Quamvis autem Christianis doctoribus passim commentum hoc de materiæ infinitate vehementer displicuerit, ipsumque cordatoribus etiam Gentilibus fuerit explosum, placuit tamen Cartesio illis omnibus, uti in Physicis sæpius, ità quoque hac in parte præferre Epicurum, quippe cujus opinio hypothesebus novæ sapientiæ mirum in modum existit congrua. Ipse Epicurus rotundè : *Μακρὸν γὰρ τὸ πᾶν ἀπειρὸν ἴσται*, apud *Laert. Lib. x.* Undè Cicero de *Divinat. Lib. 11.* *Videsne Epicurum, quem hebetem & rudem dicere solent Stoici, quemadmodum quod in natura rerum Omne esse dicimus, id infinitum esse concluderit.* Atque idem, *Lib. 1. de Natura Deorum:* *Cujus operam profecto non desideraretis, ait Vellejus, si immensam & interminatam in omnes partes magnitudinem regionum videritis, in quam se injiciens animus & intendens, ita longè latèque peregrinatur, ut nullam tamen oram ultimi videat, in qua possit insistere.* In hac igitur immensitate latitudinum, longitudinum, altitudinum, infinita vis innumerabilium volutat atomorum, &c. Contendit nimirum Epicurus, per infinitum Universi spatium ferri atomos infinitas, quæ alibi atque alibi concurrentes, innumerabilia mundorum systemata constituerunt; istic enim mundum nasci voluit, ubicunque congrua atomorum congeries per proprias quasdam earundem convolutiones coäluit. Quæ atomorum coagmentatio cum in infinito universo non potuerit non plurimis locis fieri, etiam non potuit non evenire, quin indè quoque innumerabilis mundorum multitudo in hoc universo extiterit. Quo pertinet illud notum Metrodori, *Ἄλοπον εἶναι ἐν μεγάλῳ πεδίῳ ἵνα εἶχον γεννηθῆναι, γὰρ εἴα κόσμοι ἐν τῷ ἀπείρῳ* : *Absurdum esse in magno agro nasci unam spicam; & sic præter absurdum esse in infinito unum nasci mundum.* Sed Lucretium audiamus, rem omnem dilucidè sub finem *Lib. 11. De Nat. Rer.* ità exsequentem :

*Principio nobis in cunctas undique parteis,  
Et luere ex utroque, infra, supraque, per omne  
Nulla 'st finis; nesciunt, res ipsaque per se  
Vociferatur, & elucet natura profundi.  
Nullo jam pacto verisimile esse putandum est,  
(Cum quoquo versus spatium vacet infinitum,  
Seminaque in numero numero summaque profunda*

*Multis*



*Multis modis voluit aeterno percita motu )  
 Hunc unum terrarum orbem , cælumque creatum ,  
 Nil agere illa foris tot corpora materiai :  
 Cum præsertim hic sit naturæ factus , & ipsa  
 Sponte suâ forte offensando semina rerum  
 Multis modis temere , incassum , frustra que coacta ,  
 Tandem conluerint ea , quæ conjecta repente  
 Magnarum rerum fierent exordia semper ,  
 Terrarum , maris , & cæli , generisque animantium.  
 Quare etiam atque etiam taleis fateare necesse est  
 Esse alios alibi congressus materiai ,  
 Qualis hic est , avido complexu quem tenet æther.  
 Præterea , cum materies est multa parata ,  
 Cum locus est præsto , nec res nec causa moratur  
 Ulla , geni debent nimirum & conseri res. Etc.*

Non piguit Poëtæ textum pleniorẽ exhibere , quo & mentem Epicuri assequamur rectius , & intelligamus simul , cui sapientiæ nova Physica suas debeat hypothefes. Mirum enim , quam concinnè hunc infinitorum mundorum in universo infinito exortum Epicureum referat vorticum innumerabilium in indefinita Universi extensione naturæ genesis Cartesiana. Ut ista caudis ex alio & alio atomorum in diversa infiniti hujus universi loca concursu genitos esse complures Mundos ; ita hic supponitur materiam hujus Universi , in qua nullos extensionis limites agnoscunt , divisam fuisse in particulas ferè æquales , & magnitudine mediocres , quæ circa centra sua circumactæ constituerunt vortices ut vastissimos , ita innumeros : in quibus corpora stellarum , tum fixarum , tum planetarum , quos inter numeranda nostra Tellus , quæque in iis dantur res naturales , originem traxerint ex solo confluxu & coactione particularum tantum ratione magnitudinis , figuræ , sitûs atquẽ motûs diversarum. Vide Cartesii Princip. Lib. III. §. XLVI. & seqq. Item , Lib. IV. ab initio. Et re verà ipsissimos infinitos in infinito universo Epicuri mundos in Cartesiana hypothefi , si propius attendamus , renatos videbimus : cum vortices Cartesianos inter & mundos Epicureos quantum hæcenus intersit discriminis ? non videam. Ecquid enim aliud mundorum nomine intellexisse Epicurum credamus , quam

XXII.  
*Cartesianorum in indefinita mundi extensione vorticum cum innumeris Epicuri in infinito Universo mundis consensus.*

plura systemata planetaria, nostro huic in quo nos degimus in plerisque similia? At verò ex hypothesibus Cartesianis vix evenire potuit aliter, quam ut quilibet vortex hujus universi, uti suum meditullium habet proprium Solem, ità suis quoque gaudeat Planetis, ipsisque etiam Terris; ad instar vorticis hujus, in quo nos terricolæ circa solem nostrum oberramus. Neque multum aberit hæc sententia ab opinione quam alibi Plutarchus tribuit Heraclidi & Pythagoreis, qui senserint innumeras stellas per universi immensitatem dispersas totidem existere mundos.

## XXIII.

*Universi extensionem  
verè infinitam  
statuere, æquè  
ac Epicurus,  
necessè habet  
Cartesius.*

Egregiam verò laudem merentur, qui deliramenta istiusmodi, sapientibus quibuscvis, Gentilibus pariter ac Christianis, dudum explosa, & jam silentio ac contemptu sepulta, in lucem revocant, & orbi literato novo habitu aucta & ornata proponunt. Etenim quamvis multa sua habeat Cartesius, in quibus conspicua est ejus ab Epicuro dividia, in hoc tamen tertium (ut alia, quæ hujus loci non sunt, taceam plurima) prorsus consentit utraque hypothesis, quod absque Universi extensione infinita nec ista nec hæc consistat. Uti enim jam olim ex mente Epicuri cecinit Lucretius, *Lib. 1.*

*Ante etiam alterutrum nisi terminet alterum eorum,  
Simplice & naturâ pateas Totum immoderatum,  
Nec mare, nec tellus, nec cæli lucida templa,  
Nec mortale genus, nec Divum corpora sancta  
Exiguum posens horai sistere tempus.  
Nam dispersa suo de cœtu materiai  
Copia ferretur magnum per incensoluta:  
Sive adeo potius nunquam concreta creasset  
Ullam rem, quoniam cogi dispersa nequisset.*

Uti, inquam, hæc arguit Lucretius, nisi Universum sit infinitum, fore, ut dissipatæ atomi æternum ferantur, neque compositionem ullam faciant; ita rectè Cartesium monuit H. Morus, *Lib. 1. Epist. LXVI.* debere ex ejus hypothesibus Universi expansionem statui infinitam, quia, hoc nisi supponatur, *materia, ait, suorum vorticum à centrīs suis recedet, totaque mundi machina in dissipatas atomos vagasque abibit pulvisculos.*

## XXIV.

*Cui difficultati frustra*

Cum itaque sit manifestum, absque infinita materiæ extensione, non magis consistere posse Cartesii mundum vorticosum, quam  
Epi-

Epicuri universum atomicum, frustra sunt, nimiumque sibiip-  
 sis adversi Recentiores, quando difficiles adeò existunt in expo-  
 nenda sua sententia de vera universi infinitate; quæ negari nequit,  
 nisi simul convellatur unicum & præ cæteris necessarium novæ  
 Physicæ fundamentum. Neutiquam verò hic sese exsolvit Car-  
 tesium, quando respondet Moro: *Cum dico, extensionem mate-  
 ria esse indefinitam, sufficere hoc puro, ad impediendum nequis extra  
 illam locus fingi queat, in quem meorum vorticum particule, abire possint.  
 Ubicumque enim locus ille concipiatur, ibi jam, juxta meam hypothesein,  
 aliqua materia est; quia dicendo eam esse indefinite extensam, dico ipsam  
 latius extendi quam omne id quod ab homine concipi potest.* Non, in-  
 quam, sic sese exsolvit satis Cartesius. Si enim aliquis re ipsâ sit in-  
 ter vortices ultimus (eum tanquam talem an concipias, nec ne, pa-  
 rum refert) utique partes hujus dissilient, & à centro, secun-  
 dum regulas motûs, necessariò recedent; quod ne admittere co-  
 garis, necesse omninò est ut vorticem quemcunque alio vortice re  
 ipsa existente cingi statuas, nullusque adeò admittatur in hoc Uni-  
 verso verè extremus. Quod aliud nihil est quam ipso facto Uni-  
 versum asserere infinitum. Nequaquam hæc ignorasse opinor  
 Cartesium. Verùm, cum faciliè videret, quot & quantis se dif-  
 ficultatibus involveret, si apertè sibi sumeret defendendam exten-  
 sionem mundi infinitam, eam non palam profiteri, sed crudum  
 dogma palliare, prudenter maluit, quæsito effugio in voce *In-  
 definiti*, in qua mirè ludit. Saltem declinandum sibi hoc argu-  
 mentum duxit, quo usque potuit: quod ipsum quoque profiten-  
 tem mox audiemus. Quicquid fuerit, quidnam hypotheseibus suis  
 de vorticibus convenienter Cartesius sentire debuerit de vera uni-  
 versi ratione extensionis infinitate, satis quæ jam diximus docent.

Verumtamen, cum, ut Cartesius ipse, ità quoque Cartesiani  
 adeò hac parte sint varii & inconstantes, ut nullibi magis (ità ajunt,  
 negant, dubitant, nesciunt) ipsique passim conquerantur de  
 calumnia quâ Cartesio affingantur opiniones à mente ejus alienæ,  
 age! de infinita mundi extensione quid ipse docuerit, videamus!  
 Fusè imprimis hac de re agit, *Lib. 1. Epist. xxxvi*. Totus istic  
 loci est in hac dissertatione, diluitorum objectiones, quas Regina  
 Sueciæ Christina proposuerat in eam, quam ipse mundo tribuit,  
 diffusionem. Dabo integrum textum: nam dedisse operæ pre-  
 tium

*sese hic sub-  
 ducere la-  
 borat.*

XXV.  
*Cartesii dis-  
 sertatio,  
 quâ suam  
 aperit de  
 infinita uni-  
 versi mate-  
 ria senten-  
 tiam.*

tium erit. *Quicquid*, ait, *in hoc argumento noverim conabor hic exponere.* Primo memini Cardinalem Cusanum, Doctoresque alios plurimos supposuisse mundum infinitum, neque tamen propterea ab ecclesia unquam fuisse correptos: contra videtur ad Dei cultum pertinere ut ejus opera amplissima censeantur; meaue, quam illorum sententia, commodius admitti potest, quia non dico mundum esse infinitum, sed tantum indefinitum. *Quæ* quidem duo inter se haud parum differunt: ad hoc enim ut quis dicat infinitum quid esse, ratione aliqua niti debet, quæ probeat rem ita se habere, quod de Deo tantum probari potest; sed ad hoc ut dicam esse quid indefinitum, satis est si nulla sit ratio, quæ probari possit id esse finitum. *Mihi* autem videtur probari non posse, imo neque concipi, ullos esse fines materie ex qua constat universus orbis. Cum enim materie hujus naturam perscrutor, invenio, positam esse totam in eo, quod extensa sit secundum longitudinem, latitudinem, & profunditatem; ita ut quicquid præditum est tribus hæc dimensionibus, sit materie hujus pars. Neque vero potest spatium ullum dari omnino vacuum, hoc est, quod nullum contineat materiam, quia tale spatium concipere nequimus, quin tres hæc in illo dimensiones, & proinde materiam concipiamus. *Mundum* autem finitum supponendo, concipimur ultra ejus fines spatia quedam tribus hæc dimensionibus prædita, & proinde non pure imaginaria, quæ Philosophi vocant, sed continentia in se materiam; quæ cum alibi esse nequeat, quam in mundo, liquet mundum extra fines ipsi præscriptos extendi. Cum ergo rationem nullam noverim, quæ probem, imo neque concipere queam, mundi fines ullos esse, illum indefinitum voco; sed negare tamen nequeo; illius forsitan fines aliquos esse Deo notos, licet illis comprehendendis impar sim: quare non dico absolute esse infinitum. *Quæ* de Cusano Cardinale, deque Ecclesia Romana sententiam de infinito mundo non cortipiente, hic narrat Cartesius, unde habuerit, facile erit colligere inspicienti *Lib. 11. Epist. cv.* ubi sic suo Merfeno: *Quæ* rescribe mihi, an de extensione mundi quicquam fuerit in fide definitum, utrum nempe sit finitus, an vero potius infinitus; atque, utrum spatia illa, quæ vocant imaginaria, sint corpora creata & vera: nam, licet non erat animus hanc questionem movere, tamen puto invito mihi tractandam fore.

XXVI.  
Alia ejus-  
dem in can-

Cæterum, etiam cum H. Moro proluxa fuit Cartesio de Infinita Mundi extensione concertatio. Summa hæc redit. Objecerat Mo-

Morus : *Indefinitam tuam mundi extensionem non intelligo. Extensio enim illa indefinita, vel simpliciter infinita est; vel tantum quoad nos. Si intelligis extensionem infinitam simpliciter, cur mentem tuam obscuras vocabulis nimium suppressis ac modestis? Si tantum quoad nos infinitam, re vera erit finita extensio; neque enim mens nostra aut rerum aut veritatis mensura est. Ac proinde materia tuorum vorticum à centrīs suis recedet, &c.* Respondet Cartesius, *Epist. LXVII. Lib. 1.* Neque vero affectata modestie est, sed caute, meo iudicio, necessaria, quod quædam dicam esse indefinita potius quam infinita; solus enim Deus est quem posuivē intelligo esse infinitum: de reliquis, ut de mundi extensione, de numero partium in quas materia est divisibilis, & similibus an sint simpliciter infinita, nec ne, me profiteor nescire; scio tantum me in illis nullum finem agnoscere. atque idcirco respectu mei dico esse indefinita. Quumquē instaret Morus: *Haud tamen latere te potest, quin sint vel simpliciter infinita, vel re vera finita; quamvis utrum horum sint, tam facile statuerere non possis. Quod autem vortices tui non disrumpantur & satisfiant, non obscurum videtur indicium, Mundum re vera esse infinitum. Etc.* Ista, inquam, quum iteratō urgeret Morus, clarius se explicat Cartesius, & confidentius loquitur, *Epist. LIX.* his verbis: *Repugnat conceptui meo, si ve, quod idem est, puto implicare contradictionem, ut mundus sit finitus vel terminatus, quia non possum non concipere spatium ultra quoslibet præsuppositos mundi fines; tale autem spatium apud me est verum corpus: nec moror quod ab aliis imaginarium vocetur, & ideo mundus finitus existimetur; novi enim ex quibus præiudiciis error iste profectus sit. Quibus convenienter itā, Princip. Part. III. §. 1. 2. De mundi aspectabilis constructione ut recte philosophemur, duo sunt imprimis observanda. Unum, ut attendentes ad infinitam Dei potentiam & bonitatem, ne vereamur nimis ampla, & pulchra, & absoluta ejus opera imaginari: sed è contrario caveamus, ne si quos forte limites, nobis non certo cognitos, in ipsis supponamus, non satis magnifice de Creatoris potentia sentire videamur. Alterum, ut etiam caveamus, ne nimis superbe de nobis ipsis sentiamus. Quod fieret non modo, si quos limites, nobis nulla cognitos ratione, nec divina revelatione, mundo vellemus assignare, tanquam si vis nostra cogitationis, ultra id quod à Deo re vera factum est, ferri posset; sed, &c. Adde quæ extant Ibid. Part. II. §. 21. 22. Cognoscimus prætereā hunc mundum,*

sive substantiæ corporeæ universitatem, nullos extensionis suæ fines habere. Ubique enim fines illos esse fingamus, semper ultra ipsos aliqua spatia indefinite extensa, non modo imaginamur, sed etiam verè imaginabilia, hoc est, realia, esse percipimus; ac proinde etiam substantiam corpoream indefinite extensam in iis contineri. Hincque etiam colligi facile potest ..... non plures mundos, sed unum tantum, esse posse: quia perspicue intelligimus, illam materiam, cujus natura in eo solo consistit quod sit substantia extensa, omnia omnino spatia imaginabilia, in quibus alii isti mundi esse deberent, jam occupare. Nec denique præteriri debet insignitè huc pertinens locus, ex Lib. 1. Epist. xxxv. Si insuper attendamus ad infinitudinem potentia ejus (Dei) per quam tam multa creavit, quorum pars sumus minima ..... denique hinc tenuitatem nostram, inde rerum omnium creaturarum magnitudinem perpendendo, & qua ratione ille à Deo pendeant, illasque modo potentia ejus congruo estimando, non vero pyxide veluti quadam concludendo (quod ii faciunt qui volunt mundum esse finitum) harum omnium rerum meditatio, &c.

XXVII.  
Philosophationis  
Cartesiane summa  
omnis capitibus  
quibusdam  
comprehensa.

Atque ista, si non omnia, pleraque saltem sunt & præcipua, quæ de mundo, ejusve materia sive extensione, Finita, & Infinita, extant in scriptis Cartesii. Juvat quæ istic sparsa jacent in ordinem cogere, & ad quædam capita revocare universam rei summam: neque erit opinor, cui amplius de mente Viri superesse queat dubium. i. Animum non fuisse, ait, hanc questionem movere; sed invito sibi tractandam fore. Gravem profectò causam fuisse oportet, ob quam invitatus trahatur ad tractandam rem, ad quam expediendam sponte potius advolare debuisset; cum citra infinitam extensionem vorticofam mundi structuram non consistere, jam observaverimus. ii. Anxiè percontatur, numquid de mundi extensione, finita an infinita, in fide fuerit definitum? Innuens sic satis, in quam sententiam animus inclinaret; de finito enim mundo opinionem, ut pervulgatam & ubique receptam, ità fide nunquam fuisse damnatam, qui nesciat nemo est. iii. De indefinito interim mundo, an quid ab Ecclesia sit definitum, nihil istic inquirat. Deinceps ergò demum incidit de indefinito cogitatio; ut sua scilicet, quam illorum qui mundum esse infinitum dicunt, sententia commodius admitti posset. iv. Cæterum asserit, sibi videri, probari non posse, imò neque concipi, ullos esse fines



*materia, ex qua constat universus orbis; nec rationem ullam novisse, quâ probet, imò vel concipere queat, mundi fines illos esse.* v. Excusat opinionem supponentem *mundum infinitum*, quod non meminerit, propterea Cardinalem Cusum, Doctoresque alios, *ab Ecclesia unquam fuisse correptos.* vi. Quin contra commendat hanc sententiam: quod videatur *ad Dei cultum pertinere*, ut ejus opera amplissima censeantur. vii. Tam ampla videlicet, ut rerum creaturarum *magnitudinem potentia divinæ infinitudini congruè æstitemus.* viii. Quod non faciant, qui volunt mundum esse finitum; quippe qui pyxide veluti quâdam eum concludunt. ix. Quique aded non magnificè satis de Creatoris potentia sentire videntur; quando limites quos, non certo cognitos, in Dei operibus supponunt. x. Quales superbè nimis de se ipsis sentiant; dum limites, nullâ cognitos ratione vel revelatione, mundo volunt assignere. xi. Cum *vis nostræ cogitationis ultra id quod à Deo re verâ factum est, ferri nequeat.* xii. Ut morandum hic non sit spatium imaginarium; quia quod spatium ultra quoslibet præsuppositos mundi fines concipimus, *verum corpus est*; quoniam in eo substantia corporea indefinitè extensa continetur. xiii. Utque error sit, ex præjudicii profectus, id imaginarium vocare, & ided mundum finitum existimare. xiv. Quoniam *dari non potest aut concipi spatium ullum omnino vacuum*, hoc est, quod nullam contineat materiam. xv. Ut hinc facillè colligi possit, non plures mundos, sed unum tantum, esse posse. xvi. Quia nempe perspicuè intelligimus, materiam hujus universi omnia omnino spatia imaginabilia, in quibus alii mundi esse deberent, jam occupare. xvii. Ut tandem cognoscamus, hunc mundum, sive substantiæ corporeæ universitatem, nullos extensionis suæ fines habere. xviii. Repugnetque conceptui, sive, quod idem est, implicet contradictionem, ut mundus sit finitus vel terminatus.

Talia cui exciderunt, non semel, non aliud agenti, is quo pacto mundum non re verâ habuerit extensione infinitum? ego quidem non video. Cæteris quidem admiscet, fateor, molliora quædam, v. c. cum se nescire profitetur, an mundi extensio sit simpliciter finita, nec ne; scire tantum, se in illa nullum finem agnoscere; negare se non posse, illius forsitan fines aliquos esse Deo natos; &c. Verum ista similiaque meritis referenda esse ad vocabula nimium superflua

XXVIII.

Veram extensionis Infinitatem eis asseri, ostenditur observatione una atque altera.



*pressa & modesta*, quibus *mentem suam obscurare* nititur, facile credat cum Moro, quisquis eorum quæ hîc exhibuimus continuum filum atque universæ cogitationis Cartesianæ non interruptam seriem, quam dedimus, vel leviter attenderit. Saltem, quicumque etiam cæteris quærat color, in quemcunque verba deflectantur sensum, tres postremi à nobis notati articuli tantæ sunt in hoc negotio evidentix, ut quavis exceptione existant majores. Certè qui asserit, *alios mundos esse non posse*, eo quod *intelligat perspicuè, materiam hujus nostri omnia spatia, in quibus alii esse deberent, jam occupare*, quæ obsecrò ratione illi dubium esse potest, num ipso facto infinitum sit nostrum universum? Hoc enim qui *se nescire profitetur*, quo fundamento ponit *se perspicuè intelligere, omnia spatia in quibus alii mundi esse deberent jam occupari* ab hoc nostro. Si enim sint *foras fines quidam Deo noti*, nec id negare queas; qui potes negare Deum foras extra illos aliquid creare posse? En, ut pelluceat artificium! Sed & quid clarius isto: *Cognoscimus, hunc mundum nullos extensionis sue fines habere*? Non ait negativè, *Non cognoscimus*, ullos fines mundum habere, quod potuisset videri magis pertinere ad cognitionis imperfectiorem, quam ad rei cognitæ actualem infinitatem: verum exertim & positivè inquit, *cognoscimus, nullos habere mundum fines*. Imprimis verò quid dici poterat hîc plenius & planius, quam: *Puto implicare contradictionem, ut mundus sit finitus vel terminatus*? An verò credemus, aliquem sanæ mentis id à se impetrare posse, ut dubium id habeat, nùm sit nec ne, quod ipsum *putat implicare contradictionem*. Adde expressimis hisce Cartesii effatis consentire, ut jam antè notavimus, hypothesein ejusdem de mundo vorticoso, cui omnis recentior physica inædificata existit; quæque salvari nullâ ratione potest, nisi Universi extensio supponatur actu infinita. Quæ cum ita sint, judicium penes lectorem esto, num tantas habeant Cartesiani causas conquerendi, suam Philosophiam opinione de mundi extensione actu infinita iniquè gravari?

XXIX.  
Distinctio  
Cartesii inter  
Infinitum & In-  
definitum

Nos quod attinet, ne hisce quidem litigiis inhærere necesse habemus, quandoquidem Dissertationi huic nostræ sat amplum campum aperit materia hujus Universi, si non *Infinita, Indefinita saltem*: in qua distinctione cum mirum in modum sibi placeat Cartesius, quid illi inter duo ista discriminis intercedat, viden-  
dum

dum est paulò accuratius. Textum Auctoris, quo hac de re differt, dedimus §. xxv. ex *Epist xxxvi. Lib. 1.* Addam illi verba clara & perspicua, quæ occurrunt *Repons. prim. p. 39.* Et quidem, ait, hic distinguimus indefinitum & infinitum, illudque tantum propriè infinitum appello, in quo nulla ex parte limites inveniantur; quo sensu solus Deus est infinitus: illa autem in quibus sub aliqua tantum ratione finem non agnosco, ut extensio spatii imaginarii, multitudinumerorum, divisibilitas partium quantitatis, & similia, indefinita quidem appello, non autem infinita, quia non omni ex parte fine carent. Ex quibus liquet, duas ob causas Cartesium maluisse mundum hunc appellare *indefinitum*, quam *infinitum*: Primum, quia id tantum vult propriè dici Infinitum, quod ratione aliquâ probetur esse tale; id Indefinitum, quod nullâ ratione probari potest esse finitum, qualis est materia ex qua constat universus orbis. Deindè, quia in mundo sub aliqua tantum ratione, videlicet respectu extensionis duntaxat, finem nullum agnoscit; cum Infinitum hoc tantum censeat appellandum, in quo nulla ex parte, respectu nullius prædicati aut perfectionis, limites inveniuntur. Atqui nequicquam Cartesium juvare potest hæc distinctio, ad declinandam vim efficacissimarum rationum, quæ pro finita mundi extensione urgeri queunt. Quandoquidem enim de Infinitate mundi, non omni ex parte, sed tantum sub aliqua ratione, scilicet extensionis, hic disputatur; & quidem ita, ut quærat, an hoc respectu mundum Infinitum non esse, firma ratione probari possit, utique in hac controversia planè coïncidunt hæcenus, atque unum idemque sonant, *Indefinitum* Cartesii, & Antagonistarum ejus *Infinitum*. Quibus ritè intellectis, nemo hic sibi patietur imponi per *Indefinitum*, sub cuius umbone in hac controversia Recentiores ferè delitescere, quodque instar caput Gorgonis identidem objicere, consueverunt; perturbantes ita quantum possunt quæstionis statum, atque in litigiosis vocibus, quandò se rationibus impares experiuntur, præsidium quærentes: quod profectò disputatoris est flexiloqui & parùm generosi.

Nos candidè agere instituimus: atque idèd, ut nullus maneat ambiguitati, in qua ludatur, locus, tribus articulis, quæ nostra sit de extensione universi Infinita, Indefinita, Finita, sententia, clarè & distinctè sic paucis definimus. 1. *Infinitam* mundi hu-

nil hic aufert difficultatis.

XXX.  
Mundi extensio quo sensu affirmanda Infi-

nita, In-  
definita,  
Finita?

jus extensionem esse & dici posse potentiâ, ut loquuntur, quatenus sese nunquam eo usquè diffundit, ut non in infinitum ulterius & ulterius extendi atque ampliari queat, tantum abest ut negemus, ut contrâ hoc ipsum quam maximè contendamus: nequit enim admitti hæc infinitas potentialis in mundi diffusionem, nisi actualis ejusdem terminatio omninò supponatur. II. *Indefinitam* hujus universi extensionem etiam faciles admittimus: si ejus nomine veniat magnitudo tam vasta, ut ejus termini, ubi definitè sint, & quantum ab invicem distent, præcisè à nobis definiri nequeant. Atque ità mundum agnoscimus Indefinitum, quo sensu indefinitum dicimus V. C. numerum arenarum in littore maris, aut amplitudinem Terræ Australis incognitæ, aut profunditatem maris, aut altitudinem Solis, &c. quæ omnia certo certius cognoscimus aliquos re verâ habere suæ magnitudinis terminos ac limites, licet eorundem definitum ubi nequeamus assignare. At si sumatur acceptione Cartesianâ vox Indefiniti, aut pro re in qua sit vera infinitas, etsi certâ tantum ratione, puta respectu extensionis; aut pro re, quæ nullâ ratione probari queat finita, prosùs negamus, mundum posse aut debere dici Indefinitum. Quin ex adverso asserimus, III. *Finitum* esse re ipsa hoc Universum, ut omni modo, ità nominatim respectu extensionis; idque solidâ ratione non tantum probari posse, verum etiam argumentis compluribus eisque efficacissimis, Universi hujus, sive materiæ ejusdem, diffusionem nec à parte rei esse, nec à parte mentis concipi posse Infinitam, citra multiplicem contradictionem, demonstratu esse facillimum, contendimus. Hoc si ostendamus, procul dubio verum faciemus elenchum; quum Cartesium contrarium ejus expressissimè asserere audiverimus.

XXXI.  
Finitas partes nulli Infinitæ extensioni consistuendæ sufficere, ostenditur.

Non explicabo aciem, neque omnes adducam argumentorum classes, adversus mundi extensionem, quæ sit, aut esse possit, Infinita, militantes infinitas. Tantum quas hic rationes suppeditat tum mundi creati conditio, tum Dei Creatoris perfectio, notabo. Neque has quidem omnes turgebo; contentus, unam aut alteram fortius adstrinxisse, alias istuc pertinentes paucis attingisse. Ut verò quæ res ipsa clamat audiamus primum, attendi velim diligenter ad corporum, ex quibus constat hoc Universum, naturam. Intima eorum essentia (urgentibus id præ aliis quibus-

cum

cum nobis hic res est) extensionem necessariò involvit. Ea quum sine partibus neque sit, neque concipi possit, nullâ ratione mundo partes integrantes denegari possunt. Et hæc quidem, ut opinor, extra controversiam collocata sunt. Jam verò, quodcunque partibus constat, id Infinitum nec esse, necesse posse, invictè conficitur ratiocinio hoc, quovis Hercule fortiore. Partes nimirum, quibus constabit totum extensione Infinitum, à parte rei vel finitæ erunt, vel infinitæ. Tertium hic ne cogitari quidem potest; propter membrorum oppositionem contradictoriam, medium quodvis respicientem. Neutras autem infinitum corpus admittere, sic ostendo. Non finitas; est enim manifestissimum, extremæ partis terminationem eandem omninò esse cum terminatione totius: ut toti, ex finitis partibus conflato, non magis deesse possit terminus & extremitas, quam ipsi ejusdem ultimæ parti finitæ. Quæ quamvis luce meridianâ sint clariora, neque ullâ ulteriori confirmatione egere videantur, ne quid tamen in argumento nostro desiderent importuni disputatores, qui quidvis sæpè negare malunt, quam suis valedicere hypothesebus, age! etiam assertionem hanc nostram demonstramus clarè & distinctè! Indubitatum est, partes omnes simul sumtas & unitas ipsum totum esse, adeoque illas huic existere prorsùs adæquatas. Pariter itaque indubitatum existit, inter partes & totum, hoc ipso quia illæ huic adæquatæ existunt, rationem vel proportionem dari. At finiti ad Infinitum ullam dari, aut dari posse, proportionem, nemo dixerit, cujus non insania sit sine ulla proportionem infinita. *Rationem habere inter se dicuntur quantitates, quæ possunt multiplicatæ sese mutuo superare.* Def. 5. v. Eucl. Multiplicetur autem finitum quotiescunque, nunquam superabit Infinitum: nunquam enim finitum finito additum finiti naturam exiit; nec partes unquam toti dabunt, quam ipsæ non possident, perfectionem. Quin, si finitis partibus constare queat totum Infinitum, quid eveniet, si nova eis pars finita addatur? (Finitis verò finitum addi, quid vetat?) Numquid hoc casu totum Infinitum adauctum dices? Quis neget; cum addita de novo pars suam toti, quâ antè caruit, adjecerit quantitatem? Quis tamen affirmet, qui non simul necesse habeat largiri, unum Infinitum altero Infinito finitâ quâdam sui parte posse esse majus? Quæ quam sit insulsa cogitatio, nemo

non videt; atquè ex infrà dicendis constabit abundè. Est itaque plus quam certum, contradictionem non unam ponere, si quis asserat, Infinitum totum ex finitis partibus constare posse. Quod demonstrandum erat.

XXXII.  
Etiam par-  
tet numero  
infinitas in  
Infinita ex-  
tensione ad-  
mitti non  
posse, do-  
cetur.

Verùm neque partes infinitas Infinita hujus Universi moles, vel quantitas quævis alia, admittit; seu numero eas infinitas dixeris, seu extensione. Aliam autem, præter hanc alterutram, infinitatem partibus tribui nullam posse, clarum est. Certè partium numerus infinitatem omnem prorsus respuit: nisi numerus admittendus sit verè innumerus, talis nempe, cujus unitates absolutè colligi nequeunt; id est, qui reverà sit non-numerus. Quid enim aliud est numerare, quam singulas unitates percurrere, & à paucioribus ad multiplicatiores gradatim ascendere? Quis numerus, qui non decades, centurias, chiliades, &c. completatur; quique adeò non constet partibus finitis? ex quibus Infinitum totum resultare non posse, planum modò fecimus abundè. Quis numerus, qui non subductâ unitate fiat minor; additâ unitate, major? Quumque Infinitum, quatale, suâ naturâ se majus non admittat, neque etiam minus, non tantum ea admittet infinitus numerus, sed & absolutam suam infinitatem unitati debet; adeò ut unius unitatis adjectione vel detractioe, infinitus numerus finito succedat immediatè, & finitus infinito. Ità insanire fas est eos, qui in extensione Infinita infinitas numero partes admittunt. Sed & aliud hìc occurrit planè insolubile. Pone, si lubet, partes illas numero infinitas, ex quibus hoc universum Infinitum constari contendis, pone, inquam, eas palmaris magnitudinis, vel etiam majores, minoresve, pro arbitrio; eodem enim vis demonstrationis redibit: tantum si divisibiles posueris; de quo nulla nobis contentio. Singulis palmis quaterni continentur digiti; totidemque grana singulos iterum componunt digitos; atque ità porrò quævis pars major plures minores in se complectitur in infinitum. Continebunt ergò semel infiniti palmi quater infinitos digitos; & decies sexies infinita grana; sicque in infinitum; quoniam hìc in corpore progressus à partibus majoribus ad minores continuari potest sine fine. Eligenunc, obsecro! nùm in Infinito corpore palmorum numerum numero digitorum, granorum, &c. statuere velis æqualem, an mino-

minorem. *Æqualem* si ponas (uti exigit natura Infiniti; quod, cum sit quid maximum atque absolutissimum in suo genere, inæqualitatem omnem respuit) tot unitates admittes in corpore, quot quaterniones, &c. utque uno verbo absolvam, directè incurres in 9. *Axiom. 1. Eucl.* statuendo, *partem toti æqualem*. Fac ergò palmorum numerum eo qui est digitorum minorem; (quod natura partium exigit) sed dic simul, unum numerum Infinitum altero numero Infinito infinities esse minorem. Quasi quod Infinito minusest, possit nihilominus verè esse Infinitum! Quasi de ulla re creata dici debeat, quod de solâ Divinarum perfectionum plenitudine cogitare fas est, eam esse infinities infinitam in infinitum, & ab infinitis sine fine participabilem. Hisce omnibus cum exitus dari queat planè nullus, constat certo certius, Infinitam quantitatem ex partibus numero infinitis nullâ ratione componi posse. Quod demonstrandum erat.

Supereſt, ut tandem cogitetur, quod unum restat, an non partes mundi Infiniti integrantes esse queant magnitudinis infinitæ. Verùm nec hoc monstrum absque multiplici contradictione sibi quis imaginatus fuerit. Etenim partem aliquam talem mundi Infinitam statuesque toti mundo æqualem, nec ne? Inæqualem non dixeris, nisi pariter unius Infiniti præ altero Infinito admiseris excessum, ob quem alterum alteri inæquale dicatur. At Infinitum quodvis nullum excessum ultra se admittit, quoniam de natura Infiniti qua talis est, ut contineat totam plenitudinem prædicati, cujus ratione Infinitum dicitur: adeò ut extensio Infinita tanta sit, quanta absolute dari potest; consequenter ea, quâ major cogitari nequit. Quin, ne quidem excessum unius Infiniti ultra aliud Infinitum cogitaveris absque evidenti repugnantia. Quis enim excessum concipiat, nisi limites supponantur in re, quæ ab altera se majore exceditur; limites, inquam, ultra quos excedens excessum excedat? Infinitum itaque si excedi ab alio cogites, terminatum id concipis istic, ubi excessum patitur. Quæ autem contradictio sit, nisi hæc sit? nescio. Id ergò solum reliquum est, ut partem Infiniti mundi Infinitam toti mundo Infinito æqualem statuas: quod rursus è diametro adversatur, & 9. *Axiom. 1. Eucl.* *Totum parte majus est;* & 1. *Def. v.* *Pars est magnitudo magnitudinis, minor majoris, cum metitur majorem*

XXXIII.

*Neque ex  
partibus ex-  
tensione in-  
finitis in-  
finitam ex-  
tensionem  
componi,  
evincitur.*



*rem.* Quid? quod ex partibus infinitum extensis (sint, v. c. A. & B.) propter ipsam earundem infinitatem, ne quidem totum componi possit. Vel enim pars altera A alterius B extensionem in se continebit; vel non. Si A in se contineat extensionem B, utique frustrâ ad totius complementum parti A addetur pars B; quoniam pars B comparti A nihil adungere poterit, quod non pars A jam antè in se continuit. Non ergo hoc casu B concurreret cum A ad constituendum totum; adeoque ne quidem B pars erit; quod manifestè est contra hypothesin. Dic itaque (quod superest) partem A infinitam in se non continere extensionem suâ compartis B. Verùm hac ratione pars A Infinita reverâ non erit; quoniam (ut res ipsa monstrat) de natura Infiniti est tantum esse quantum esse potest. Quapropter si parti A addi possit extensio partis B, prioris partis extensio tanta non fuit, quanta esse potuit; consequenter neque Infinita. Deniquè, ipsa totius integralis notio partium componentium Infinitatem penitus excludit. Totum nullum continuum datur aut dari potest, sine partium extensarum unione; nullum contiguum, sine mutuo earundem contactu. At quæ partium extensarum unio, quis contactus, conceptibilis est, qui non supponat partium unitarum in puncto unionis, vel contactus, terminationem? Undè & recepta est continui definitio, tanquam Magnitudinis cujus partes communi termino copulantur. Quoniam ergo possibilis non est partium infinitarum in unum continuum unio, vel etiam in contiguo contactus, etiam possibilis non erit quantitas continua, vel contigua, ex partibus in infinitum extensis constata.

## XXXIV.

Imò ne alterâ quidem parte infinitas partes extensionem totam Infinitam conficere posse, demonstratur.

:                    :                    :

---

B                  D                  A                  E                  C

composita cogitetur ex duabus lineis AB, & AC, finitis quidem



dem à parte A, quâ inter sese uniuntur, sed ab altera parte utrimque, & versus B, & versus C, protensis in infinitum : sic ut ex duabus A B, A C, infinitis alterâ parte, una fiat tota linea B C, Infinita utrimque. Verùm ista altius inspecta nequicquam hîc auferunt difficultatis. Ut mittam alia, tantum cogitemus, lineas A B & A C, infinitum, uti vis, extensas versus B & C, partes sui agnoscere, & tanquam tales includere, lineas A D, & A E. Hæc cum undiquaque existant finitæ, utique tota linea infinita B C, ex hac sententia, componetur ex partibus quibusdam finitis, puta A D, A E; & aliis quibusdam infinitis, scil. D B, E C. At verò, quod antè demonstravi, finiti ad infinitum nulla proportio est; qualis semper esse debet inter partes & totum : quapropter lineæ finitæ A D, A E, ne quidem considerari possunt tanquam partes totius lineæ infinitæ B C; nedum ut ex infinito & finito chimærica istiusmodi & quovis monstro monstruosior fiat mixtio. Præterea, ex junctis in puncto A lineis A B, & A C, alterâ parte infinitis, ita ut tota B C utrimque existat infinita, pars quæpiam circa A auferatur, puta D E, unitis rursus inter se punctis D & E. Quid jam? Num adhuc linea tota composita erit Infinita? At verò minor facta est per ablatam partem D E. Sic ergo iterum statuatur Infinitum infinito parte aliquâ finitâ minus; quod jam antè ostendimus implicare. Nec evades, si dixeris, lineam B C factam esse finitam, sublatâ parte D E : est enim contra omnem rationem, ut particula finita D E, quæ nullam omnino ad Infinitum dicit proportionem, si adjecta fuerit vel abjecta, ex Infinito faciat finitum, ex finito Infinitum. Contradictionem itaque multiplicem involvit magnitudo Infinita ex partibus infinitis quomodocunque composita. Quod demonstrandum erat.

Nequit igitur mundi extensio, Infinita si sit, constare ex partibus & numero & magnitudine finitis. Neque etiam ex partibus, vel numero, vel magnitudine, infinitis. Neque aliæ partes præter illas vel dantur, vel dari possunt. Interim partibus carere nequit. Restat itaque, ut universi extensio nec sit, nec esse possit, infinita. Quod demonstrandum erat. Estque hujus nostri ratiocinii per omnes sui partes vis & efficacia tanta, ut evidentissimâ certitudine & certissimâ evidentiâ certet cum demonstratione qua-

XXXV.  
Ex quibus  
omnibus,  
extensum  
nullum, ob  
ipsam sui ex-  
tensionem,  
Infinitum  
dari, aut

*dari posse,  
concluditur.*

vismathematica ; cujus rei judicium lubens quibuscunque , quĩ ad singula & omnia ejus membra sine præjudicio attendere dignati fuerint, committo. Me quod attinet , sic habeo , omnes omnium Novatorum in unum congestas claras & distinctas ideas minimè sufficere infringendo robori tam immotis rectæ rationis fundamentis inædificati argumenti. Ausim universam illorum familiam hìc obtestari per omnia quæ sacra eis sunt in Patriarchæ sui hæreditate , per ejus libros Principiorum quatuor , per Meditationes de Prima Philosophia sex , per Responiones ejusdem Primas , Secundas , Tertias , Quartas , Sextas , Quintas & Septimas , dent exitum huic rei aliquem , si possint ! Atqui quid possint isti , quod ipse non potuit Cartesius ? Is , cum nihil quod hisce opponeret inveniret , quod unum supererat , necesse habuit negare , *de infinito disputandum esse* ; nimirum , ut *respondere non curaret ius , qui querunt , an si daretur linea infinita , ejus mediapars esset etiam infinita ; vel , an numerus infinitus sit par , anve impar ; &c. Princip. I. §. 26.* Benè habet ! Veritati sat triumphus in eo est , si adversarios ipsa suos redegerit ad terminos *non respondendi*. Nulli interim extra partes constituto satisfaciet , opinor , turpis ejusce modi tergiversatio ; quippe quæ minimè arguit animum candidum , & veritati cedere paratum , sed manifestissimum potius existit invincibilis pertinaciæ argumentum. Confer *Dissertat. hujus §. IV.*

XXXVI.  
*Quod idem  
ex rei corporeæ  
naturæ & attributis  
quibuscumque  
pluribus instan-  
tiis confici-  
tur.*

Ità cum ostenderimus invictè , extensioni , quæ Recentioribus ipsam corporis naturam constituit , aded adversari Infinitatem ut eam penitus evertat , non necesse erit plura congerere , quibus mundi diffusio intra terminos coëreatur. Tantum , ne in unica ratione omne veritati præsidium esse videatur , alias nonnullas , quas ad modum prioris efficacissimè urgere facile fuerit , digito monstrabo. Nimirum , Mundus si sit extensione Infinitus , essentia pariter Infinitus erit. Si enim extensio sit ipsa corporis essentia , res per sese manifesta est. Si sit , ut placet aliis , aliquis corporis modus , eodem res redit ; cum essentia finita attributi nullius Infiniti sit capax. Creaturæ verò cujusunque essentiam Infinitam quis admiserit , qui non rectam sternat ad Atheismum viam ? Avertat Deus , quæ prudentiores meritissimo jure suspicari facit hæc de mundo Infinito opinio ! Porro , Si Mundus sit  
exten-

extensione Infinitus, omnium quoque attributorum suorum ratione Infinitus erit. Extensio enim infinita, uti docui, necessariò arguit essentiam Infinitam. At quod essentiâ Infinitum est, infinitum pariter est omnibus suis prædicatis; quoniam attributa quævis conditionem sui subiecti sequuntur. Erit ergò mundus non minus Infinitus ratione durationis, & cujusvis alterius perfectionis, quam ratione extensionis. Quid ad atheisticam naturæ ~~extensivæ~~ desideretur amplius? non video. Verum de hisce mox plura. Nunc & hoc notetur, Si mundus sit extensione Infinitus, omnia ei ex adverso detrahenda erunt attributa, quæ corpori sunt propria. Divisibilis non erit ejus magnitudo: neque enim in partes finitas resolvi poterit, neque infinitas; uti probavimus. Nec diminui ea poterit: Infinito enim nihil detrahi posse, ex antè dictis manifestum est. Neque ullâ sui parte augeri poterit: quia non minus incrementum respuit Infinitudo, quam decrementum. Nec figurâ aliquâ præditus erit: magnitudinis enim terminationem Infinito tribuere mera contradictio est. Nec mobilis erit: nam nullum Infinito relinquitur spatium quo feratur. Nec mensurabilis erit: non enim ei applicari poterit mensura finita, quippe quæ Infinitum nunquam exæquare potest; neque Infinita, cum ipsa infinitas mensuram destruat. Nec situm partium habebit: nullus namque is dari potest sine ordine, quem omnem Infinitas excludit? Nec distantia quibusvis ejus partibus in ordine ad alias conveniet: nisi alicubi Infinita; quæ re verâ nulla est. Verbo uno ut absolvam, neque, quo me ducit argumenti fertilitas, excurram in infinitum, extensionis Infinitas corpus omnibus exuit suis proprietatibus: adeò ut, mundum corpus non esse, si Infinitus sit; aut Infinitum non esse, si corpus sit, existat absolutè necessarium.

Nec tantùm ipsam corporis naturam prorsùs evertit, omnesque ejus proprietates planè tollit Infinita hujus Universi extensio, sed & in plurimas Dei Creatoris perfectiones eadem existit injuria haud leviter, neque uno modo. Certè, solius supremi Numinis prærogativam esse essentiæ Infinitatem, unanimi consensu tradiderunt hætenùs Doctores Christiani, ipsique inter Gentes sapientiores. Et meritò. Nam eam cum Independentia, quæ omnium Divinarum perfectionum fons est & origo, nexum habere essentialè & insolubilem, facile est demonstratu: quemadmodum & ex hac

XXXVII.  
*Essentia solius Dei Infinita extensionis cujusvis Infinitatem evertit.*

Infinitate Dei deducitur firmissimâ sequelâ, ejusdem Æternitas, Immensitas, Immutabilitas, Primitas, Unitas, aliaque ejus generis attributa, Incommunicabilia vulgò dicta. Hinc omnium voce celebratus semper Deus, tanquam qui unus existit, uti Optimus, ità Maximus. At non jam solius excellentissimæ Majestatis hæc erit eminentia, sed in societatem admittetur Mundus, extensione suâ eodem gaudens cum suo Opifice privilegio. Impia profectò, nec sine sacrilegio profana, cogitatio! quam magno mercentur Athei, qui naturam *Divinam*. Non nescio, quis absurditati obducatur color. Aliam planè esse, ajunt, atque alterius ordinis Infinitatem, quæ mundo competat, quam quæ Deo. Hanc dicere Infinitatem omnibus numeris absolutam, cum ratione ipsius essentia, tum ratione omnium omnino, quæ dari aut cogitari queunt, perfectionum: illam verò, quæ mundo conveniat, Infinitatem ad solam restringi extensionem; quam in ente perfectissimo locum habere non posse, certò intelligimus. Speciosè, fateor, hæc dicuntur, at minus verè; neque ea altius introspecta quicquam hic tollunt absurditatis. Quamvis enim differentiam agnoscant hi auctores inter essentiam Dei & Mundi, quod illa, ut ipsi loquuntur, sit cogitatio, hæc extensio; manet nihilominus firmissimum, admissâ magnitudine hujus Universi infinitâ, extensioni creatæ non minus, quam cogitationi increatæ, essentialem Infinitatem esse tribuendam. Contendunt enim hi auctores (quod & antè observavimus) ipsam corporis essentiam in extensione consistere: quapropter, cum mundus sit in genere rerum corporearum, imò verò corporum omnium compages, nequit ejus essentia negari, quæ ejusdem extensioni tribuitur, Infinitas. Ex quibus clarissimè conficitur, admissâ infinitâ mundi extensione, Infinitatem essentia tale prædicatum esse, quod secundum se, non tantum Deo proprium non est, verum quod cadat etiam in rem longè imperfectissimam, quale est corpus, sive extensio. Quæ quidem evidentia aded sunt, ut vel manibus sese offerant palpanda. Neque tandè dici poterit, non saltem omnimodam ratione cujusvis perfectionis Infinitatem, uti Deo, ità mundo infinitè extenso, tribui. Dato enim, quod jam evicimus, mundum, si sit extensione infinitus, ipsâ essentia infinitum esse, non potest non Infinitus pariter hic agnosci ratione cujusvis

julvis attributi; quàm, ut jam *artic. prox.* docui, proprietates subjecti sui conditionem necessariò sequantur. Undè & essentialitè Divinæ Infinitate quarumvis in ipso perfectionum Infinitatem rectè adstruunt Theologiæ Philosophi. Manet itaq; aut solum Deum essentiâ Infinitum non esse, quod à blasphemia non multum distat; aut Mundum nostrum extensione esse finitum: quod demonstrandum erat.

In Immensitatem Divinam non minus incurrit crudum dogma. XXXVIII  
Ejus nomine hætenus intellexere Philosophi & Theologi, illam *Immensitas*  
primi entis supereminentem perfectionem, quâ ipsum existit suâ *Divina ex-*  
essentiâ, non tantum ubi corpus est, verum etiam ubicunque id *tensionem*  
esse potest. Sed neque hac parte mundus, si sit extensione Infini- *mundi In-*  
tus, quicquam Deo cedit; quippe qui, non minus quam Ille, *finitam non*  
existit suâ essentiâ ubicunque corpus dari potest. Facilis admit- *patitur.*  
to, in hac mundi Immensitate diffusionem partium involvi, quæ  
eadem ab Immensitate simplicissimi Dei planè est removenda; ut  
in aliquo quidem rei modo videam discrimen: attamen in re ipsa  
nullum id mihi hæc esse videtur, dum nusquam in infinitum admittitur  
Deus non-extensus, ubi pariter non sit mundus extensus.  
Non profectò talis fuit idea, quam de Divina Immensitate habuit,  
à Deo ipso edoctus optimè, sapiens non minus per omnia Philo-  
sophus, quam Regius Propheta Salomon, quandò Deum Im-  
mensum cogitans, negavit Ipsum *capitælo, imo vel caputælorum.*  
Quem eundem in sensum scitè alibi Dionysius Deum celebrat  
*ἐν πᾶσι, πανταχῶς, ὑπερπᾶσι, ὑπερπάντων;* quasi dicas,  
*Immundanum, Circummundanum, Supermundanum, Superca-*  
*lestem.* Scio, non admitti hos conceptus Novellis Doctoribus,  
qui, cum clarè videant per mundum suum Infinitum & Immen-  
sum nullum relinqui locum Immensitati illi divinæ, quam hæc-  
tè credidit orbis Christianus, hanc totam, quasi aliquid sapiat cor-  
poreum, expungere re ipsa malunt, eique substituere creatio-  
nis & providentiæ ideas; quasi videlicet Immensitas Dei nihil sit aliud  
quam efficacissima Dei voluntas, quâ omnia producit, su-  
stentat ac regit. Verum uti ante nostra tempora inter Orthodo-  
xos inauditum fuit hoc dogma, ita etiam id longè esse absurdissi-  
mum ac periculosissimum, ostendimus alibi; nominatim in *Dis-*  
*sertat. de Nullitate Spirituum.* Sufficit in præsens monstrasse, aut  
mun-

mundum, si sit extensione Infinitus, non minus Immenſum eſſe, quam ipſum Deum; aut, ſi ſolus Deus exiſtat Immenſus, mundum non eſſe ubicunquè corpus eſſe poteſt, atque idèd nequè extensione Infinitum. Quod demonſtrandum erat.

XXXIX.  
*Divinae Potentiae infinitas, & liberrimum in rem creatam dominium, cum Infinita hujus extensione non conſiſtit.*

Non etiam cum interminabili Potentiæ Divinae amplitudine, liberrimaque, quam habet ſummum Numen in opera creationis & providentiæ, poteſtate, conſiſtere poteſt Infinita Univerſi quantitas. Theologorum & Philoſophorum axiomata eſt receptiſſimum, Opera Dei ad extra eſſe indifferenter libera. Verùm per hanc ſententiam id ſtare nequit; dum quæ adſerunt argumenta inferunt, non tantùm mundum actu eſſe in infinitum extenſum, verùm etiam alium quam Infinitum eſſe non poſſe. Ex quo ſequitur, Deum ex neceſſitate quãdam mundum produxiſſe tantum, quantus exiſtit, neque ex indifferenti voluntatis placito minorem producere potuiſſe. Sed de hiſce infra latius. Nunc obſervari velim, infinitam liberrimi Creatoris vim creaturæ cujuſvis perfectiones longiſſimè ſemper & in immenſum excedere; quandoquidem res adeò diſpares nullam ad ſe mutuo dicere poſſe proportionem, luce meridianâ exiſtit clariùs. Ex quo concluditur firmiſſimè, eam eſſe creatæ cujuſvis naturæ eſſentiam, ut nunquam ſit, aut quocquè eſſe poſſit, in extrema, uti loquuntur, actualitate, id eſt, in perfectionis gradu ac complemento abſolutè ultimo: quod vulgè ajunt, creaturam perfectiſſimam non poſſe dari. Quamobrem nequè ullum rei creatæ prædicatum unquam eſſe poteſt tantum, ut non amplius ſubſit activæ Creatoris potentia, utque adeò non exiſtat in potentia paſſiva ad recipiendos plures perfectionis gradus, quos necdum habet, liberrimo tamen Omniſufficientis Dei nutu & arbitrio habere poteſt. Jam verò corpus Infinitum ad ampliorem ſui diffuſionem potentiam nullam paſſivam admittere, liquet, quòd antè demonſtraverimus, Infinito majus nihil dari poſſe, neque id vel tantilli incremenci, per ipſam naturam Infinitatis, exiſtere capax. Undè ſequitur, admiſſo mundo Infinito, immenſam omnipotentis Dei vim de novo in hoc univerſo ne muſcã quidem aut pulicem ex nihilo creare poſſe. Quemadmodum & ex adverſo ex eadem fluït hypotheſi, per abſolutam Dei potentiam, ne pulviſculum quidem, aut quamcunquè vel minimam hujus univerſi particulam, annihilari poſſe; quoniam implicat.

per



per antè demonstrata, Infinitum finità sui parte posse diminui. Vel itaque (ut sileam quæ istius generis plura hùc adducere possem) si mundi extensio finibus caret, ad extremum deducta fuerit Dei potentia, ejusdemque sublatum indifferens & liberrimum in suam creaturam dominium; vel, si hæc cogitare nefas sit ac summo Numine indignum, mundus extensione Infinitus nequaquam esse potest: quod demonstrandum erat.

Et quid de Divina Sapiencia dicemus? Ea quo modo salvari queat in productione hujus Universi, si extensionem ejus nullos limites habere statuamus, non video. Certè, extensum aliquod sine partibus concipere, pura puta contradictio est. At partes (sive finitas eas volueris, sive infinitas) in Infinito citra repugnantiam cogitari absolutè non posse, fuscè jam demonstravimus rationibus firmissimis atque omni exceptione majoribus. Quid ergò? An extensionis Infinita à se producendæ ideam habuisse Creatorem, credendum erit? At illa sui everfiva est; necum ut cadat in mentem perfectissimam. An verò sio habebimus, Artificem summum ad instar causæ brutæ, absque prævio tanti operis in suo intellectu exemplari, id produxisse, cujus conceptum ne quidem habere per ipsam rei naturam quiverit? Absit! Quin potius concludo, talem hujus Universi materiam creasse Deum, qualis sine contradictione concipi potest, id est, necessariò finitam. Addi hisce possent & alia, quibus ostendatur, admittà mundi Infinitate, communicanda esse eidem absolutam Unitatem, Incomprehensibilitatem, similiaque Deo propria prædicata: quò ut deveniat, non facilè à se impetrabit devotus Deo animus. Etiam minimà operà demonstrari posset, Æternitatem hujus Universi cum ejusdem extensione infinita pari passu ambulare: ut illam negare nequeat, quicumque hanc tueretur: per quæ nec sòlus Deus æternus erit. Verùm per singula hæc non jam me diffundam, qui finire laboro hunc de Infinito laborem, ne & ipse excurrat in infinitum. Autumo, quæ hæcenus adversus hunc, nullos extensionis fines habentem mundum adduximus, tum ex natura ipsius creatæ materiæ, tum ex perfectionibus Dei Creatoris, esse omninò talia, in quibus non possit non acquiescere, quicumque adfert animum veritatis studiosiorem, quam vorticosis Cartesii ideis ex præjudicio additiorem. Me quod attinet, sic

XL.  
Denique, extensionis Infinitas inimica extensio Divina Sapiencie, Unitati, Incomprehensibilitati, atque Æternitati.



habeo, ipso sole meridiano clarius ex demonstratis intelligi, vix ullam in universa Philosophia opinionem è diametro magis rectè rationis lumini adversari, vix ullam includere sequelas tot portentosas & tam in Deum Creatorem atrociter injurias, quam quæ sententia creaturæ corporeæ vel umbram tribuit Infinitatis cujus-  
cunque.

## XLI.

*Difficultas  
de spatiis  
imaginariis,  
quæ veram  
in suo con-  
ceptu invol-  
vant exten-  
sionem, au-  
feruntur:*

Solvendæ supersunt difficultates, quæ contra Finitam mundi extensionem obijciuntur. Earum summa præcipuè redit ad duo capita quæ apud Cartesium occurrunt, locis ex Libris Principiorum jam suprâ allegatis. Priori sic infert: *Cognoscimus hunc mundum, siue substantie corporee universitatem, nullos extensionis sue fines habere. Ubique enim fines illos esse fingamus, semper ultra ipsos aliquæ spatia indefinitè extensa, non modo imaginamur, sed etiam vere imaginabilia, hoc est, realia, esse percipimus; ac proinde etiam substantiam corpoream indefinitè extensam in iis contineri.* At ego falsissimum esse dico, ex vero ultra quoscunque mundi fines *spatia extensa & VERE REALIA ESSE, percipi.* Etenim quoties intellectus noster ultra fines, quibus mundum alicubi saltem terminari certò certius novit, suas diffundit cogitationes, tantùm abest, ut ibi esse veram extensionem percipiat, ut ex adverso nihil prorsus istic esse percipiat, præter puram omnino verè corporis atque extensionis carentiam. Fateor, quandò animum simul subit de Divina tum Immensitate tum Omnipotentia cogitatio, occurrit menti nostræ fundamentum concipiendi extra suppositos quoscunque mundi fines corpora: atquæ non, quæ verè existant ac realia sint; sed planè contrà, quæ, cum non sint, per inexhaustam Dei vim, si sic visum fuerit, poni possunt ubi reapse nunc est nihil, ac mera duntaxat possibilis corporis negatio. Et hæc sunt illa tam nullo suo merito miserrimum in modum vexata hodiè spatia imaginaria: quorum sensus unice est, extra nostrum hunc mundum de factò existere planè nihil, produci tamen extra eundem posse corpora; quæ, si quandò producantur, realia crunt; nunc in sola nostra imaginatione, non tanquam realia, sed tanquam pure possibilia, subsistunt. Neque alicujus momenti existit, quod de extensione vera, adeoque reali corpore, in his spatiis contento, ingeminat centies ad ravim usque Cartesius. Non enim hic occurrit conceptus extensionis verè  
exi-

existentis, sed, ut dixi, tantum merè possibilis. Quæ verò scimus merè possibilia esse, quæque nos non nisi tanquam talia cogitare probè novimus, ea cum veris ac realibus corporibus confundere, tam est ineptum & ridiculum, ac si dicam, quando concipio, Principiorum Cartesii Libris Quatuor addi potuisse de viventibus Quintum, de homine Sextum, hoc ipso duos hosce libros me non modo mihi imaginari, sed & verè imaginabiles, hoc est, reales esse, percipere. Non invenio, quibus mentem clariùs exprimam in hoc negotio, quam quibus suam, *Lib. 1. Epist. xxxvi.* de indefinita mundi duratione effert ipse Cartesius. Sic ille: Quod obijcitur de indefinita mundi duratione, *mihi videtur tantum occasionem præbere putandi, nullam posse ante mundi creationem concipi tempus, quo Deus, si voluisset, non potuisset illum creare. Neque est cur exinde quispiam concludat, fuisse re vera mundum ante tempus indefinitum creatum; quia existentia mundi actualis, sive vera, quam retro abhinc quinque aut sex millibus annorum habuit, cum ejus existentia possibili, sive imaginaria, quam antea habere potuit, necessariam connexionem non habet.* Dicam ego, mutatis tantum mutandis: Quæcunque de spatiis imaginariis obijciuntur, mihi videntur tantum occasionem præbere putandi, nullum posse extra mundi fines concipi corpus, sive spatium, si mavis, quod Deus, si voluisset non potuisset extra illos creare. Neque est cur exinde quispiam concludat, fuisse re vera corpus tale, sive spatium, creatum extra fines mundi; quia existentia corporis, seu spatii actualis, sive vera, quam abhinc usque ad sui terminos mundus habet, cum spatio seu corpore possibili, sive imaginario, quod extra fines suos sibi adjiciendum habere potest, necessariam connexionem non habet. Scio, postremam periodum negare hoc ipso loco Cartesium: verùm si demonstrationem exigas, redibit vetus de extensione actuali in omni spatio conceptibili cantilema; quæ eadem faciliè illi occinitur de duratione mundi, quæ potuerit antevertere id quo nunc cepit durare principium, nec ipsa absque actuali mundi existentia concipienda.

Ut verò neminem lateat, quanta sit Cartesiani ratiocinii absurditas, addam duo, quibus ut clarè & distinctè satisfaciant ejus patroni, cupio. Primum suppeditat ipsa Epistola citata, eoquæ se frustra istuc expedire laborat. Nimirum, eadem sequelâ, quâ

*Antiam  
mundi ex-  
tensionem,  
duplici in-  
stantiâ  
ostenditur.*

hic impugnatur finis extensionis hujus Universi, impugnari quoque potest initium durationis. Quidni enim inferre liceat eodem argumentandi modo, iisdem penè verbis: *Cognoscimus hunc mundum, sive substantia corporea universitatem, nullum durationis sue initium habere. Quandocumque enim initium illud esse fingamus, semper ultra ipsum aliqua spatia temporalia indefinitè exte nsa, non modo imaginamur, sed etiam vere imaginabilia, hoc est, realia, esse percipimus: ac proinde etiam substantiam corpoream indefinitè durantem in iis contineri.* Respondeatur solidè ad hanc nostram illationem, atque erit quo ipso satisfiat argumentationi Cartesianæ. Alterum quod hoc loco notari cupiebam est, hac ratiocinatione Cartesii, si sit vera, confici necessario, non tantum hunc mundum posse esse Infinitum, sed & Deum alium quam Infinitum producere nequivisse. Quin sequitur, ne quidem ullum finitum corpus à Deo creari posse. Siquidem possit, produxerit ergò Deus hoc solum, in quo ista scribo, musæum. Atquè de hoc ipso eadem viâ concludere dabitur, nullos id quoque extensionis fines habere. *Ubiunque enim, dicam, fines illius esse video, semper ultra ipsos aliqua spatia indefinitè extensa, non modo imaginor, sed etiam vere imaginabilia, hoc est, realia, esse percipio; ac proinde etiam substantiam ejus esse indefinitè extensam.* Ex quibus instantiis, ad oculus patet, vel nullam omninò esse, quam tanti faciunt & invictam arbitrantur Recentiores, argumentationem hanc Cartesii; vel, si quid valeat, eâ evinci re verâ, quodlibet corpus non posse non infinitum esse simul & æternum. A quo quicumque non abhorret, viderit is, ne hac ratione rectam struat ad Atheismum viam.

#### XLIII.

*Non qui  
mundi ex-  
tensionem  
finitam co-  
gitat, quic-  
quam sentit  
de se super-  
bum, de  
Deo minus  
magnificum*

Altera, quam tollendis Mundi limitibus Cartesius admovet, machina hæc est. *Attendentes, ait, ad infinitam Dei potentiam & bonitatem, ne vereamur nimis amplè, & pulchra, & absoluta ejus operis imaginari: sed è contrario caveamus, ne, si quos forte limites, nobis non cerio cognitos, in ipsis supponamus, non satis magnifice de Creatoris potentia sentire videamur. Etiam caveamus, ne nimis superbe de nobis ipsis sentiamus. Quod fieret, si quos limites, nobis nulla cognitos ratione, nec divina revelatione, mundo vellemus affingere, tanquam si vis cogitationis ultra id quod à Deo revera factum est ferri possit.* Ità scilicet Viri modestiam simulant, cujus velo absurdum de Infinito mundo ideam pallient, qui ipsi in enarrandis Uni-  
versi

verſi hujus orginibus ex materia & motu ad ſtuporem uſque exiſtunt temerarii & audaces, tantæque de omnium ac ſingularum in eo partium fabrica & ſtructura definiunt confidentiâ, ut majori non poſſint, ſi vel Deo à conſiliis fuiſſent. Rem quod attinet, magna procul dubio temeritas eſt quorundam Mathematicorum, iſto ſupercilio præciſam mundi magnitudinem definiunt, ac ſi ſpithama vaiſſiſſima ejus ſpatia fuiſſent dimenſi; de quibus rectè Plinius, *Lib. 11. Cap. 1. Furor eſt, meſuram ejus animo quosdam agiſſe, atque prodere auſus.* Verùm cum iſtiusmodi deliriis nihil habet commune noſtra aſſertio, ad nullam determinatam quantitatem descendens, ſubiſtensquè duntaxat in generali theſi, de agnoſcendis ſaltem aliquibus in hoc Univerſo limitibus, ubicunque demùm iſti fuerint, & quantumcunque ab invicem diſtent. Quam veritatem, juxta rectæ rationis non uno modo firmiſſimè eam perſuadentis dictamen, agnoſcere non velle, metu neſcio cujus ſuperbiæ, aut defectûs erga magnificentiâ Divinam reverentiæ, præpoſteræ eſt modeltiæ. An verò etiam de ſe ſuperbè, de Creatoris potentia non ſatis magnificè, ſentit, qui negat muſcam eſſe concipiendam ad inſtar elephantis? Proſectò conceptus rebus ipſis conformes formare, atque opera Dei concipere qualia ſe produxiſſe ipſe Creator lumine rationis manifeſtum facit, ea demùm vera ſapientia eſt. Quumque operum divinorum norma & meſura ſit, non abſoluta Dei potentia, verùm liberrima ejusdem voluntas, poſſumus utiquè, ſi eis plus tribuamus perfectionis, quam largiri illis voluit Creator, poſſumus, inquam, etiam hac parte à vero aberrare, illa nobis imaginando ampla nimis, & pulchra, & abſoluta: quibus hîc cogitationum ſuarum exceſſum ad id quod rei naturæ congruum eſt reſtringit, nullâ parte injuriuſe exiſtit in Deum, quippe qui non idèò deſinit illum habere Optimum atque Maximum. Quid? Quod ipſi non ſentiant ſat magnificè de Creatoris potentia & bonitate, qui eam creaturæ productione exhaustam eſſe fateri coguntur: uti coguntur, qui mundi extensionem finitam negant; quemadmodum oſtendimus. Adde, de Opificis bonitate & potentia, nec non de operis ipſius amplitudine, pulchritudine & perfectione, nec potiſſimum, nec ſemper, judicandum eſſe ex magnitudine molis. In minimo non rarè ars maxima: magiſque relucent ſapientiæ, potentiæ & bonitatis Divinæ

radii ( si nobis homuncionibus fas sit tantarum rerum instituire comparationes ) in unius hominis ad imaginem Dei conditi minuta machina , quam in totius macrocosmi amplissima structura. Denique, constat sua Deo bonitas infinita & potentia, sua huic Universo amplitudo, pulchritudo, & perfectio, etsi id ab æterno extitisse non concepiamus ; cur minus , si extensione infinitum negemus ? An verò nequè hîc sat magnificè cogitabimus de Creatoris potentia & bonitate, nisi, ut extensionis, ita quoque durationis principium omne Universo detrahamus ? An quoque hîc de nobis ipsis sentiemus superbè, tanquam si vis nostræ cogitationis, ultra id quod à Deo re verà factum est, ferri possit ? Mirum, nisi probent hi modestiæ patroni, & tam sollicitæ de Creatoris magnificentia animæ, quæ de hoc Universo Plinius, *Loc. cit. Mundum numen esse credi par est, æternum, immensum, neque genitum, neque increitum unquam. Hujus externa indagare, nec interest hominum, nec capit humana conjectura mentis. Sacer est, æternus, immensus, totus in toto, imo vero ipse totum, &c.* Quæ quò tendant, nemo ignorat, qui Atheismum Plinii non ignorat.

**XLIV.**  
Non ad extensionem  
quantilibet  
finiendam  
aliud corpus  
ambiens  
cum Epicuro  
admittere  
necessum  
est :

Aliæ quædam solvendæ supersunt argutiæ, quæ quandoquæ pro Infinita hujus Universi mole à quibusdam adseruntur. Ajunt: Quicquid finitum est, ab aliquo ambiente finitur & terminatur. Itaque, si sit finitus mundus, ultra ejus extremitates corpus aliud, quod, cujus complexu & circuitu terminetur, admittere erit necesse. Id verò contradictorium est. Quandoquidem enim omne corpus est pars Universi, nunquam cogitari potest corpus finiens mundum, quin hoc ipso cogitetur mundus longius adhuc extensus, id est, re verà nondum finitus. Ex quibus concludunt, sine repugnantia mundum finitum concipi non posse. Si quid autem video, eadem hæc prorsus ratio est cum ea, quâ jam olim Epicurus probare nitebatur, Universum hoc esse Infinitum. Ciceronem audiamus, *Lib. 11. de Divinat. Videsne Epicurum, quem hebetem & rudem dicere solent Stoici, quemadmodum, quod in natura rerum Omne esse dicimus, id infinitum esse conclusit ? Quod finitum est, inquit, habet extremum. Quis hoc non dederit ? Quod habet extremum, id cernitur ex alio extrinsecus. Ne hoc quidem negari potest. Omne igitur, cum nihil habeat extremum, infinitum*

nium sit necesse est. Videsne, ut ad rem dubiam concessis rebus perveneris? Accinit vates Epicureus; cujus quædam hic referam; ut intelligat unusquisque, quibuscum antiquatis, atque orbicredito explosis dudum, à Novatoribus nuper instauratis, conceptibus, pugnandum hodiè sit. Sic ille, *Lib. 1. de Rer. Nat.*

*Omne quod est igitur, nulla regione viarum*

*Finis est: namque extremum debebat habere.*

*Extremum porro nullius posse videtur*

*Esse, nisi ultra sit quod finiat, ne videatur,*

*Quo non longius hac sensus natura sequatur.*

*Nunc extra summum quoniam nil esse fatendum est,*

*Non habet extremum: caret ergo sine modoque.*

*Nec refert quibus adstas regionibus ejus,*

*Usque adeo quem quisque locum possedit, in omneis*

*Tantundem partes infinitum omne relinquit.*

Quo eodem pertinent, quæ post pauca sequuntur:

*Postremo ante oculos rem res finire videtur:*

*Aër dissepit colleis, atque aëra montes,*

*Terra marè, & contra mare terras terminat amnis.*

*Omne quidem verò nihil est quod finiat extra.*

*Usque adeo passim parer ingens copia rebus*

*Finibus exemptis in cunctas undique parteis.*

Facilis autem est universæ difficultatis solutio attendenti, falsissimum esse, quod cum fundamentum huic ratiocinio subternitur, videlicet, id postulare rei finitæ finitudinem ut extrinseco quo ambiente terminetur. Equidem, in conceptu finitatis, qua tali, includitur nihil, quam rem non extendi quousque extendi potest. Cujus causa non est quid ambiens, sed arbitrium efficientis, rei extensionem tantam, non majorem, tribuentis. Itaque unaquæque res suis ipsa definitur perfectionis extremitatibus, non termino ambeuntis. Quod idem in mundo obtinet; qui terminatur istic, ubi nullum amplius corpus producere Deo Creatori placuit. Etenim pone, hanc solam terram, quanta nunc existit, creasse Deum prætereaque nihil, finita illa erit certò certius, nec tamen ambiente corpore circumscripta. Nisi quis tueri malit, corpus nullum à Deo potuisse produci, nisi simul hoc ambiens infinita extensio producta fuerit. De quo absurdum jam antè dictum.

Sed



**XLV.**  
*Cum id cor-  
 pori acci-  
 dens, non  
 quâ finito  
 simpliciter,  
 sed quâ par-  
 ti universi.*

Sed aperiendus non nihil clarius fons argumentationis, non nisi ex infantili præjudicio ortum trahentis. Nimirum ab incunte ætate hi observarunt, cum Lucretio, montes cingiære, terras mari, nullamque Universi partem nobis esse conspicuam, cujus terminatam superficiem non tangat proximè aliud corpus vicinum. Inde de extremis mundi partibus idem cogitare instituerunt. At qui perperam; dum ipsam Finitatem ab eo quod per accidens in hoc universo eam comitatur non distinxerunt satis. Per accidens, dico: quamvis enim quodcumque ab alio ambitur finitum sit, non tamen idcirco finitum est, quia ab alio ambitur. Nam non idè sese mutuo tangunt Universi partes, ut altera alterius diffusioni ponat limites (ad quos sufficit mera ulterioris extensionis carentia) verum quia mediantibus causis secundis rerum naturalium operationes peragi voluit Deus. Quum enim solo motu interveniente corpus in corpus agat, nec ullus possit esse corporis moti in aliud quiescens influxus, nisi per contactum ei fuerit approximatum, planè necesse fuit, partes hujus universi contiguas esse, si, ex intentione Dei Creatoris, coöperaturæ sint omnes, tanquam causæ secundæ, in mutuum auxilium ad totius universi conservationem. Atque hæc vera causa est, cur quævis corpora in hoc universo vicinis aliis corporibus cingantur: non verò eorundem finitas, quæ, sublato etiam quovis ambiente, eadem planè manet. Sufficit enim ad corporis finitatem, ut id tantum non sit quantum esse potest. Cæterum, an quod ei addi potuisset existat re verà, & corpus finitum tangat, an saltem existere idque tangere possit, nihil omninò refert. Atque hoc posterius in mundo obtinet: qui quamvis à nullo corpore ambiatur, finitus nihominus est, quia, uti suprâ docuimus, magnitudini ejus potest fieri accessio, adeoque eaq̃ tanta non est, quanta esse potest: quod unum prædicatum hic sufficit, tanquam Finitati proprium & essentielle; quale non est ab extrinseco tangi.

**XLVI.**  
*Omnipoten-  
 tia Divine  
 Immensitas  
 pro possibili  
 extensione*

Nec deniquè præsidium hic est in Divina Omnipotentia juncta cum ejusdem Immensitate; undè quidam hunc in modum argumentantur. Deus, ajunt, ubicunque existit, inibi potest operari, & corpus extra se producere: At verò ipse existit ubicunque corpus est vel esse potest; Ergò etiam potest corpus producere, ubicunque corpus esse potest. Quodcumque autem corpus

est



est ubicunquè corpus esse potest, id necessariò infinitum est: si enim finitum supponatur, nondum est ubicunquè corpus esse potest. Atque hoc ratiocinio arbitrantur confici corpus Infinitæ extensionis, si non detur, saltem dari posse. At, si sat diligenter totum hoc expendamus, mera est sophisticatio, orta ex conjunctione *tū ubicunquè corpus esse potest*, modò cum potentia divina, modò cum producti corporis existentia. Quamvis enim rectè dicas, Deus *ubicunquè potest* creare corpus; non tamen rectè dixeris, Deus potest creare *corpus ubicunquè* existens: illud enim ex perfectione Divina fluere, facilè demonstratur; hoc verò cum corporis natura non consistere, jam antè ostendimus. Ut ista duo toto cœlo sint diversa. Itaque potest Deus distributivè in quolibet spatio conceptibili creare corpus finitum; at non idèò collectivè in omni simul spatio conceptibili potest creare corpus Infinitum. Planè, quemadmodum Deus potuit producere mundum quodcunquè Ipse extitit ab æterno: *ab æterno* nimirum *potuit*; sed non potuit condere *mundum ab æterno* existentem. Quapropter, uti æternus Deus ab æterno potuit condere cum quovis temporis initio mundum non-æternum; ità Immensus Deus in immensum potest condere in quolibet spatio vel ubi mundum Finitum.

Instabis fortè: Potest Deus tamen creare tantum corpus quantum creare potest. Supponamus ergò, tantum creare ipso factò, quantum creare potest; illud vel finitum erit, vel infinitum. Non finitum; quia quolibet finito potest à Deo fieri majus. Ergò Infinitum. Potest itaque Deus producere corpus infinitum. Ut verbo expediam: nego unquam ex vero dici posse, Deum tantum corpus creasse, quantum creare potest; quandoquidem id non minus perfectibilitati creaturæ quam inexhaustæ perfectioni Divinæ repugnat; de quibus suprà actum est abundè. Ut autem clarè deprehendatur, quam nihil solidi sit in hoc argumento, tantum attendamus has illi similes illationes. Puta: Deus creare potest tantum corpus finitum, quantum potest creare. Supponamus ergò tantum creare ipso factò, quantum creare potest: illud vel finitum erit, vel infinitum. Non finitum, alias Deus non posset facere majus finito; quod absurdum. Ergò corpus illud finitum erit Infinitum. En contradictionem explicitam! Iterum dicam: Deus potest tantum quadrangulum creare quantum potest.

XLVII.  
Deregitur  
inde petita  
sophistica-  
tio, nonnuma  
in hanc rem  
allata in-  
stantia.

Creet ergò : illud vel finitum erit, vel infinitum. Non finitum, sicut enim nondum maximum esset, cum quovis finito possit fieri majus. Ergò quadrangulum fieri poterit infinitum. Quis concedat ? Rursùm arguam : Deus potest creare spiritum tam perfectum, quam creare potest. Creet ergò : ille vel finitus erit, vel infinitus. Non finitus; is enim tam perfectus non est quam esse potest. Ergò Deus creare potest spiritum infinitè perfectum; id est, alium Deum. Absurdissimè ! Sufficiunt hæc instantiæ, ad demonstrandum, quam sit nullarum virium hæc argutatio, pro extensione mundi quæ saltem Infinita esse possit.

XLVIII.  
*Demonstrationis de extensione necessarii finis Porismata, Cartesianam Physicam subvertentia.*

Desino alia addere. Satis est, per hæcenus disputata lascivienti hujus Universi extensioni præfixos esse fines, ubicunquè locorum illi fuerint; solique Deo Optimo Maximo vindicatam stare Infinitatis gloriam. Tantùm coronidis loco recolligam quædam nostræ demonstrationis Porismata, quorum & in ipso tractatu subindè facta est mentio. Quamobrem & tribus verbis ea notasse habeo satis. Ex mundi nostri extensione finita, eaque concipiendâ tanquam tali, sequitur : I. *Reclè concipi spacia imaginaria* : i. e. extra Universi fines, ubi nunc nihil est, corpora quædam per omnipotentiam divinam produci posse. II. *Dari Posse plures mundos*; si enim aliquod corpus extra hoc universum esse queat, quid ni corporum Systema, nostro, in quo vivimus, per omnia simile; quod ipsum Mundus dicitur. III. Imò, *ex natura non constare, hunc mundum tantùm esse unum* : cum ejus unitas fluat non ex natura rei, sed ex libera Divinæ voluntatis determinatione. IV. *Mundo huic tribui posse Ubiquitatem*, non Immenstatem; quatenus hæc Infinitatem involvit, non ista. V. *Per absolutam potentiam posse dari vacuum*: cum enim extra mundum actu sit corporis carentia negativa, cur non in ipso, absolutè loquendo, esse queat absentia ejusdem privativa? VI. *Mundum mechanicum ex vorticibus compositum adversari legibus moris* : quatenus partes extremorum vorticum, mox etiam proximorum, à centro sui motus, juxta naturæ legem, recedentes, necessariò per inane dissilirent. Quæ omnia cum sint clara & distincta, viderint quotquot Universi extensionem Infinitam admittere nolunt, num Cartesiani hìc esse possint, & amplecti Physicam, cujus, nullos agnoscere in mundi extensione fines, præcipua basis est & fundamentum.

DISQUISITIO  
DE  
NULLIBITATE  
SPIRITUUM.  
SUMMARIUM.

- I. Nullibitatis nomen merito in hac Disquisitione usurpatum, neque sine exemplo. II. Nullibismi spirituum assertor primarius Cartesius: III. Contendens, non nisi operationum respectu spiritus dici posse Alicubi esse. IV. Prævit olim hac sententiâ Cartesio Valentinus Weigelius. V. Opinionis Weigelianæ atque Cartesianæ consensus. VI. Ex operationibus spirituum in aliquo Ubi essentialis eorundem in illo præsentia infertur. VII. Frustrâ ad actionem spiritûs transeuntem ejus Alicubi restringi. VIII. Is imprimis, qui motus corporis cum actione spiritûs nihil habere per se commercii opinantur. IX. Artissima mentis humanæ cum corpore conjunctio præsentiam spiritûs essentialem valide adstruit. X. Nec non mystica, quam dicat fides, duarum naturarum in eandem Christi personam unio. XI. Essentialem Dei Omnipræsentiam Nullibistica sententia palam evertit. XII. Cælumque beatorum inducit reperendum nuspiam locorum. XIII. Nequaquam ex vulgi errore natum axioma, Omne quod est, Alicubi est.

XIV. *Neque spirituum Ubi obstat spatium, quod cum corpore sit idem.* XV. *Quale sit spirituum Alicubi, & quâ ratione nobis concipiendum?* XVI. *Spirituum Alicubi non tollit non-extensa illorum natura.* XVII. *Forgei in hanc rem dictum, & quædam in id observatiuncula.* XVIII. *Corporis, cui spiritus coëxistit, aucta vel diminuta quantitas hujus Alicubi nil præjudicat.* XIX. *Solo spiritu, nullo corpore, existente, etiam illi suum competit Ubi; & quo modo?* XX. *Actio spiritus transiens, eum hic aut illic esse non facit, sed tantum indicat.* XXI. *Nullibistis nulla de affectis sibi opinionibus querelarum causa.* XXII. *H. Mori in Nullibistas dicto Disquisitio clauditur.*

I.  
Nullibistas  
nomen me-  
rito in hac  
Disquisitio-  
ne usurpa-  
tum, neque  
sine exem-  
plo.



Omina rebus & conceptibus, quibus significandis inserviunt, convenientia esse oportet. Quapropter, quum hâc Dissertatione examinare constituissem illam quorundam assertionem, quâ, *Spiritus esse Nullibi*, contendunt, conceptui novo subtilissimo exprimendo conveniens omninò & dignus videbatur novus titulus. Nequeres est absque exemplo. Simili planè aliorum errori, nec minus prodigioso, sed abeunti prorsus in oppositum, de Omnipræsentia corporis Christi, notum est deberi voces Ubiquitatis, Ubiquitismi, ac Ubiquitistarum, in scholis Theologorum tritissimas. Pari in casu pari jure hic uti quis veter? Maximè cum hac ipsa quoquè in re præeuntes nobis habeamus alios. Audiamus, si lubet, Henricum Morum, *Enchirid. Metaph. Part. 1. Cap. xxvii*. Is uti quosdam Philosophos ait Spiritus naturam sic describere, quasi sit totus in toto, & totus in qualibet sui spatii parte, ità aliam quoque esse sententiam, atque huic è diametro oppositam, eorum „qui, „tamen si Res incorporeas in rerum natura existere non gravatè ag- „noscunt, eas tamen in tota rerum Universitate *Nusquam* esse, „perquam acriter contendunt. Quæ quidem opinio, quanquam „vel

„vel primâ fronte satis ridicula videtur, ab ejus tamen Assertori-  
 „bus, non sine aliquo fastu ac supercilio, aut occulto saltem con-  
 „temptu aliorum philosophorum, qui aliter sentiunt, tanquam  
 „minus Intellectualium, & Imaginationi nimium quantum indul-  
 „gentium, mordicus tenetur. Hi igitur, propterea quod Spi-  
 „ritus *Nullibi* esse tam audacter affirmant, *Nullibistarum* titulum  
 „sibi merito conciliaverunt.

Novi dogmatis Auctorem primum & fautores idem ibidem  
 hunc in modum describere pergit: „*Nullibistarum* quidem, ait, pri-  
 „mus Author existisse videtur festivum illud caput *Renatus Carte-  
 „sius*, qui, jocularibus suis Meditationibus Metaphysicis, In-  
 „geniis satis sobriis alias atque acutis, sed in hac parte ob nimiam  
 „Cartesii admirationem minus cautis, facultates rationales ita lu-  
 „xavit ac distorsit, ut partim e mentis ac præstigiis subtilitate,  
 „partim autoritate decepti, ea sibi persuaserint verissima clarissi-  
 „maque esse, quæ, nisi hisce præjudiciis occæcati essent, nun-  
 „quam existimaturi fuissent possibilia. Itaque tam sedulo ab ipso  
 „edocti & diligenter instructi, ut à nullo, ne potentissimo qui-  
 „dem & malignissimo deceptore Deo, falli possent, non satis sibi  
 „caverunt, ne à mero homine, sed perfaceto quidem, quan-  
 „quam astuto satis & abstruso, deciperentur illuderenturque.  
 „Quemadmodum clarè patebit, postquam rationes hujus Opinio-  
 „nis *Nullibistarum* ab ipsa stirpe exquisivimus. Hoc idem præsta-  
 re nobis propositum est: verum ita, ut hujus Auctoris rationes,  
 nec non hypotheses ejusdem de Spiritu extenso, similesque, ininimè  
 adoptemus. Eas intactas suolinquimus loco ac pretio: contenti  
 eundem errorem confutasse argumentis magis sumis ac solidis,  
 quam multis fortasse videbuntur illa Mori.

Sed necessarium fuerit ante omnia rectè percepisse *Nullibistarum*  
 mentem; quæ abundè & clarè innotescit ex iis, quæ occurrunt  
 apud Claubergium, de *Cognit. Dei & nostri*, Exercitat. LXV t. ubi  
 ad eam, quam sibi pertractandam istic sumit, Quæstionem, *An  
 omne quod est, Alicubi sit*; adeo ut hoc axioma à Deo & Creatura  
 (convenientius iis, quæ apud ipsum sequuntur, dixisset, à Spi-  
 ritu & Corpore) sit abstractum? inter alia respondet, §. 2. Subje-  
 ctum de quo dicitur quod sit *Alicubi*, non est res intellectualis seu incor-  
 poreæ, sed corporeæ tantum, sive materialis, quæ in longum, latum &

II.  
*Nullibi sibi  
 spirituum  
 Assertor  
 primarius  
 Cartesius:*

III.  
*Contentens,  
 non nisi ope-  
 rationum  
 respectu spi-  
 ritus dici  
 posse Ali-  
 cubi esse.*

*profundum est extensa.* Et §. 16. *Res intellectuales non possunt aliter dici esse Alicubi, quam efficaciter agendo.* In eandem sententiam alii asserunt, Spiritum in se consideratum non posse dici *Hic* esse, aut *Illic*, aut *Ubique*; quippe qui conceptus ei non magis quadrent, quam coloris aut saporis. Atque idem secundum verborum & conceptuum proprietatem non verè dici, ajunt, Spiritum per suam essentiam *Hic*, *Illic*, aut *Ubique* esse; sed tantum per operationem, quam circa corpus exerceat, acquirere denominationem, quod *Hic* sit aut *Illic*: corpore verò non dato, non posse de eo rectè dici, quod *Hic* aut *Illic* existant. Atque hoc ipsum est, quod rejicimus, cujusque antithesin asserimus esse verissimam: Spiritus scilicet citra ullam operationem in corpore sic *Hic* aut *Illic* existere, ut etiam ratione essentie accuratè & propriè dici & concipi debeant esse *Alicubi*.

## IV.

*Prævit  
olim hac  
sententiã  
Cartesio  
Valentinus  
Weigelius.*

Id priusquam planum facio, minimè prætereundum videtur, non ita in solidum subtilissimi hujus de *Spiritu* *Nullibi* conceptus laudem Cartesio tribuendam, ut non in ejus partem admittendi sint & alii. Famossimum est fanatici hominis Valentini Weigelii nomen. Is, præter alia, ex Paracelsi veterumque hæreticorum lacunis potissimum hausta deliria, etiam asserit, *Spiritus Nullibi esse.* Verum illi hac quoque in parte, sui inter Orthodoxos antagoniste non defuerunt. Celebris in his est Johannes Crocius, qui *Antiweigelii sui* Part. 1. Cap. IV. *Quest.* 1. versatur totus in examinanda controversia. *An Angelus sit neque Hic, neque Illic?* Sed lubet ipsa Weigelii verba referre, ut à Crocio exhibentur. Ea ex Germanico in Latinum versa sic sonant: *Summus intellectus omnem crassam imperfectionem removet, ac reperit, neque Deum, neque Angelos ulla sede corporea aut quopiam externo indigere, verum eos neque Hic esse; neque Illic; sed esse in se ipsi actuosos, ut Dens est. Corpus certo in loco esse debet, sed Spiritus eget nullo loco.* Huic assertioni Weigelianæ communi Orthodoxorum nomine hanc aliam opponit Crocius Anti-Weigelianam, camque, loco citato, variis tum Testimoniis S. Scripturæ, tum Rationibus naturalibus, tum Patrum Auctoritatibus confirmat. *Angelos;* inquit, *non indigere loco circumscripto, modo corporum, quæ propter quantitatem suam loco commensurantur, agnoscent Catholici.*

*An-*

*Angelos non indigere aliquo ubi, seu Ubi, in quo existant, non agnoscunt. Quin imò Angelos Hic & Illic esse affirmant; non modo corporum, sed sue nature spirituali convenienter.*

Parallelismum utriusque & Weigelianæ & Cartesianæ sententiæ, atque hanc in illa à Crocio Catholicorum nomine rejectam & confutatam, quis hic non videt? Quisve etiam miretur, consentire conclusiones, ubi principia amicè adeò inter sese conspirant. Expendantur quæ Crocius, *Ibid. Quest. II.* citat. ex Mystica Philosophia Weigelii. *Qui dicunt, Angelus in Persia non est simul in Grecia, si saltem perpendunt, Angelum visibilem corporeum, juxta corpus assumptum, & non juxta veram substantiam Angelicam, que potest esse Ubique.* Quid verò Neoterici? Contendunt hi, *Angelos in duobus spatiis esse posse; quin, ne id parùm videatur, Mentem nostram, quamvis divina non sit, toti Universo posse esse presentem.* Essent fortè quos impelleret tantus Virorum inter se in dogma non ubique obvium consensus, ad suspicandum, vitulo Weigelii arasse Cartesium. Ego verò benignius sentio, ac forte fortuna potius in eandem cum Weigelio sententiam hunc incidisse; ipsumque ideò (deficiente jam fermè familiâ Weigelianâ) lubens, cum Moro, agnosco hodiernorum nostrorum Nullibistarum caput atque principem. Operæ pretium interim erat, hanc utriusque auctoris in eodem placito notare harmoniam: ut exemplo hoc nunc obvio appareat, quam hodiè eveniat sæpè, ut illa quoque paradoxa non rarò applausum inveniant apud multos, tanquam reconditoris sapientiæ arcana, quibus assurgere deceat orbem eruditum, quæ ipsâ jam olim, tanquam fanatica, & veritatis atque orthodoxiæ prorsus inimica, damnarunt & confutarunt viri magni. Si menti infixum hæreret illud: *Via trita, viatuta*, non tam frequenter qui per diverticula incedunt cum erronibus inciderent in foveam eandem. Sed ad rem!

Pro confirmatione nostræ assertionis, assumam primum, quod ultrò largiuntur adversarii, Spiritus alicubi esse, saltem ratione operationum, quas circa corpora exercent. Possunt autem hæ spectari duobus modis, vel à parte Spiritus operantis; vel à parte corporis actionem istam recipientis. Priori modo, si credimus Recentioribus, quibus Spiritus non existunt actuosi nisi simpliciter volendo, sunt nihil aliud quam ipsissimæ Spirituum Cogitationes,

V.  
Opinionis  
Weigelianæ  
atque Cartesianæ  
consensus.

VI.  
Ex operationibus  
spirituum in  
aliquo Ubi  
essentialis  
eorundem  
in illo præ-  
sens.



*sentia inferitur.*

nes. Posteriori verè sunt ipsi corporis motus, illas cogitationes comitantes. Neutro sensu stare potest Nullibistica opinio. Si enim verum est illud tritum, uti est verissimum, *Agere præsupponit esse*, & *Modus operandi sequitur modum essendi*, utiquè certissimum est & hoc, *Hic aut Istic agere præsupponit Hic aut Istic esse*. Quod si jam operationes Spirituum, prout sese habent à parte ipsorum, nihilque aliud sunt quam meræ Cogitationes, verè sint alicubi, quis etiam essentiam Spirituum verè alicubi esse neget? Imprimis, quis id neget eorum, qui omnem rei intellectualis rationem formalem in sola Cogitatione consistere affirmant? Et profectò non video, quò, hoc sensu, cum iis, quas suprà ex Claubergio aliis-que exhibuimus, assertionibus consistat hæc illius thesis, quæ occurrit §. 17. cuique planè similia alii etiam Nullibistica subindè tradunt. *Nec proinde*, inquit, *opponenda sunt in rebus intellectualibus, quod essentia, virtute, actione sint præsentia; cum hæc omnia in ipsis realiter idem sint, licet ratione nostra distinguantur*. Quid enim? An non opponitur essentia Spiritus actioni ejusdem, cum hæc alicubi esse conceditur, illa esse negatur? Certè opponitur; nisi idem prædicatum de eodem subiecto affirmari simul & negari posse citra oppositionem, deinceps statuendum sit. Sed age! non sint hoc loco opponenda, uti contendit Claubergius, spirituum essentia eorundem actioni, verum sint ea unum idemque. Quid indè sequitur aliud, quam invictam hanc esse & firmissimam nostram illationem: Quodcunque præsens est alicubi virtute & actione, etiam præsens est essentia. At Spiritus verè & propriè loquendo præsens alicubi est virtute & actione. Sequitur ergò, etiam Spiritum verè & propriè loquendo præsentem alicubi esse suæ essentia. Quod ipsum volebamus.

VII.  
*Frustrà ad  
actionem  
Spiritûs  
transcuntem  
ejus Alicubi  
refringi.*

Sed jam præsentisco, respondendum fore à Nullibistica sententiaë fautoribus, nullius esse hanc nostram argumentationem, quòd Spiritus tantum sibi dicantur esse alicubi ratione actionis, non immanentis, sed transcuntis ad extra. Verum, quicquid sit de soliditate hujus exceptionis (de qua mox) non saltem eà se tueri potest Claubergius, quique hac in parte ejus premunt vestigia. Exiis enim quæ ipse, loco citato, ad confirmationem suæ sententiaë addert, evidentissimum est, ei intelligi operationes, quatenus se habent à parte Spirituum ipsorum, tanquam immanentes. Nempe,

pè, ut doceat Spiritus duntaxat per operationes alicubi esse, ad imitationem illius axiomatis Metaphylici, *Ut unumquodque est, ita & verum est*, format hoc aliud §. 15. *Ut unumquodque est, ita & Alicubi est; sive, Qualis est existentia rei, talis etiam ejus est presentia. Ratio similis est*, inquit (sui, ut videtur, prorsus oblitus) quoniam N. B. per *Entitatem suam Alicubi est, sive presentis est per suam existentiam*. In eo autem, pergit §. 16. *consistit id esse rerum intellectualium, quod sint actus: existentia enim actus est ipsarum vita, vis, efficacia. Itaque si unumquodque uti est, sic etiam Alicubi est, res intellectuales non possunt aliter dici Alicubi esse, quam efficaciter agendo*. Clarissimum est, in toto hoc discursu sermonem esse de Spirituum actionibus immanentibus, seu ipsius cognitionibus, quatenus sunt in mente; non de iisdem quatenus sese circa corpus exerunt. Nisi dicendum sit, res spirituales amplius actus non esse, adeoque omni *existentiâ actuosâ, viâ, vi & efficacâ* destitui, quando ab omni corpore separatae existunt, nec quicquam in eo ad extra operantur. Quod minimè velint Nullibismi spiritualis patroni.

Verùm neque satis convenienter suis hypothefibus ratiocinantur. quoties ajunt, Spiritus alicubi esse ratione operationum, quas producunt in corporibus. Nullæ enim tales existunt quarum mentem causam agnoscant propriè dictam: statuunt enim ipsi, rem intellectualem non esse actuosam nisi cogitando, ita ut in sese operetur, quicquid operatur. Motus corporeos quod attinet, qui in nobis conspicui sunt, eos à mente tanquam à vera & reali causa pendere negant, quippe qui, mente etiam non datâ, in corpore humano, tanquam in automato, peragi nihilominus possint. Quin tantum abest, ut mentem habeant motuum corporeorum principium, ut nullum illi in hos imperium concedant, nisi quatenus, ex sola Dei voluntate, ejus actiones volendi corporeis actionibus junguntur. Quod si ergò motus in corpore non sint operationum mentis effecta, sed solummodò quædam ejus concomitantia, eaque ne reciproca quidem, sed talia quæ quoque existere in corpore possint, mente non operante, quin non datâ; sequitur, ineptissimum esse asserere, Spiritus esse alicubi duntaxat ratione operationum ad extra, quas producunt in corporibus, cum ne ullas tales mentem in corpore verè producere credant ipsi & con-

VIII.  
*Isti impri-  
mis, qui  
motus cor-  
poris cum  
actione spi-  
ritus nihil  
habere per se  
conveniens  
opinantur.*

tendant. Quid itaque attinebit spiritui tribuere alicubi ratione motus ejusmodi corporei, qui tam nullis perticis cum essentia spiritus ejusque activitate quicquam commune habet, ut ne quidem hæc illius vera causa cogitari possit aut debeat? Verum missa hæc facio Claubergiano discursu, quo res omnis absolvitur & conficitur plenissime: Ut unumquodque est, ita alicubi est: At per essentiam suam, quæ illis in nuda cogitatione consistit, non per operationes extra se in corpore productas, Spiritus est: Ergo per essentiam suam, non per operationes extra se in corpore productas, Spiritus alicubi est. Quod erat demonstrandum.

## IX.

*Arctissima  
mentis hu-  
manæ cum  
corpore con-  
junctio præ-  
sentiam spi-  
ritus essen-  
tialem vali-  
dè adstruit.*

Si deinceps animo cogitemus arctissimam illam Spiritus cum corpore in idem suppositum unionem, qualis observatur naturalis in quolibet nostrum, mystica creditur in Christo Domino, validissimum ea contra opinionem Nullibisticam suppeditat argumentum; quin efficax adeo, ut, quæ ejus ictum declinare possint Novatores, non videam. Nam id quidem extra controversiam est, omnem plurium rerum inter sese conjunctionem præsentiam earundem mutuam, unioni isti convenientem, supponere. Jam verò anima rationalis humano corpori unita existit, non per assistentiam duntaxat, & ratione operationum transeuntium quas inibi exercet, sed re verà per essentiam & personaliter. Si enim nulla sit unio inter mentem & corpus, citra influxum operationum illius in hoc, utique ea cessante, sublata quoque erit inter partes hominis essentielles unio personalis. Si sic; ergo moritur homo, omnisque animæ cum corpore unio tollitur, quoties in lypothymiam, syncopen, apoplexiam, similesve graviore cerebri affectiones, omne mentis imperium in corpus suspendentes, incidit: contra reviviscet, quoties, recedente paroxismo, ad se redit, mensque iterum in corpore operari incipit, Non jam miremur amplius bis-mortuos opus est, quando cum vel centies mortuis res nobis est quotidie. Adeo est per novam sapientiam à morte ad vitam facilis regressus! Addere possem, ex hac sententia admittendum esse, Angelum cum corpore in quo operatur, non minus unam constituere hypostasim, quam anima nostra constituit cum corpore nostro. Sed ulteriorem hujus rei pertractationem servo peculiari Diatribæ, quæ examinare constitui Neotericorum conceptum de Unione humanæ mentis cum corpore. Nunc indicasse ista sufficit, ut appareat,

pareat, citra manifestam absurditatem negari non posse, Mentem, adeòque & Spiritum, per essentiam verè alicubi esse, etiam ubi extra sese nihil operatur.

Supposità porrò ex fide duarum Naturarum in Christo Mediatore unione hypostaticà, simile incommodum sententiam Nullibisticam premit; sed tanto gravius, quanto periculosus magis hìc error est. Si enim Spiritus *non aliter* possint dici esse alicubi, quam efficaciter agendo, nec dicantur *verè secundum verborum & conceptuum proprietatem* per essentiam suam *Hic* aut *Illic* esse, sed *santum per denominationem* ab operationibus in corpore; (quod Nullibistas diserte asserere, audivimus) non poterit etiam *verè ac propriè* dici, essentiam naturæ Divinæ unitam fuisse in Christo cum natura humana, sed *santum per denominationem* ab operationibus ad extra in corpore desumptam. Ubiergò vera Unio personalis? quam Theologus doctissimus Junius ait *propriè definiri*, quòd sit *duarum naturarum perfectissima & SUBSTANTIALIS in unam personam conjunctio*. Viderint itaque Theologi, an hætenus sententia Nullibistica absolvi possit à consequentia Nestorianismi, non aliam hìc admittentis unionem personalem, quam *παράστασις* vel *ταυτοθυμία*, per assistentiam, vel voluntatis consensum. Per *SOLAM operationem*, inquit Walæus, *Divina Natura in humanam unionem hanc esse factam, Nestorianum est, & à tota Veteri Ecclesia condemnatum*. Sed nos manum de hac tabula. Sat nobis est evicisse, sive rationem attendamus, sive revelationem, ex personali spirituum cum corpore unione admitti debere, non tantum per operationes, sed & per essentiam illos esse alicubi. Quod erat demonstrandum.

Ulteriùs, Si Spiritus *non aliter* dici possint alicubi esse, quam *per denominationem* ab operationibus in corpore derivatam, non autem *verè & propriè* per essentiam, quid de Divina Immenfitate & vera *πανταχυρία* dicendum erit? Eam contra Vorstium, ejusdemque affectas, ità asseruerunt hætenus saniores Theologi & Philosophi, ut (verba sunt Walæi) *Omnes orthodoxi, Deum Ubiquè per essentiam, tam in cælo quam in terra, presentem esse, rectè continent; & contrariam sententiam blasphemiam condemnent*. Ubi interim invaluit apud quosdam opinio Nullibistica, nullis non modis orthodoxa hæc doctrina fucillata fuit passim atque luxata. Præi-

X.  
Nec non  
mystica,  
quam dicit  
fides, dua-  
rum natura-  
rum in ean-  
dem Christi  
personam  
unio.

XI.  
Essentialem  
Dei Omni-  
presentiam  
Nullibistica  
sententia  
palam evir-  
sit.

vit Cartesius ipse hunc in modum, *Epist. Parr. 1. p. 205. Videris* (Moro respondet) *Infinitatem Dei in eo ponere, quod ubique existat; cui opinioni non assentior. Sed puto, Deum ratione sua potentie ubique esse; Ratione autem sua essentia nullam plane habere relationem ad locum.* Antesignanum suum graviter secuti alii, hypothesi Nullibisticae convenienter, affirmarunt, *Omnipraesentiam Dei nihil aliud esse, quam efficacissimam ejusdem voluntatem, qua omnia extra se sustentat ac gubernat.* Quæ thesis, etsi plurimos jam dudum gravissimè offendit, ita tamen Nullibistis in deliciis est, ut post alios nuperrimè quidam eorum publicè contenderit, illam *neque pietati neque reformationi adversam, sed questionem purè Philosophicam esse.* Uti quondam Vorstius cum Sociis, quò tutius controversiam subterfugerent, atque Orthodoxorum censuram declinarent, controversiam de essentiali Omnipraesentia Divina subtilitatem Scholasticam esse, prætenderunt, *ejusque modum nusquam in Verbo Dei esse patet factum.* Quin rideri cœpit apertè verficulus Orthodoxis hac in re explicanda tritus: *Enter, Praesentier, Deus hic & Ubique Potenter.* Nam, qui statuerunt Dei Immensitatem esse triplicem, nempe Essentiae, Potentiae, ac denique Praesentiae, illi nugus agunt, disertè Auctor *Append. Demonstr. Princip. Cartes. p. 114.* Verùm missa hac facio, alibi quoque nobis notata pluribus.

## XII.

*Caelumque  
beatorum  
Inducit re-  
periendum  
nusquam  
locorum.*

Aliud contra Nullibitatem Spirituum argumentum subjicerem; ostendendo, parem hîc esse rationem *tū Ubi & Quando*: ideòque cùm posterius Spiritibus, operationum non tantùm, verùm essentiae quoque ratione tribuendum esse, non inviti largiantur Neoterici, etiam prius iisdem denegandum minimè esse. Universalem porrò eruditorum consensum adducerem, rem omnem singularem hætenus determinantium per *Hoc, Hic, Nunc*; & pro generali ac firmissimo axioma habentium illud. *Quod Nullibi est, non est.* Verùm quæ jam in medium adduximus sufficiunt restituendo Spiritibus suum Ubi, undè nullo suo merito à Recentioribus fuerunt exturbati. Neque per hæc singula ire sinunt, præfixi brevitatis termini. Quapropter nec urgebo argumenta Scripturaria, quibus Deus asseritur *cælorum cælum non capi*, ubi tamen nil extra se operatur; Animæ damnatorum abiisse dicuntur in infernum, tanquam in *Locum suum*; Beatorum Spiritibus promittuntur parata

*Loca*

*Loca in cælis*, tanquam *in Domo* patris, ubi *Mansiones* multæ; quæque sexcenta occurrunt in Sacris hisce similia. Ad quorum vim elidendam, quæ mira Scripturarum interpretamenta, Cartesiana Philosophiæ radiis illustrata, ab iis quibus Novæ sapientiæ lux affulsit, excogitata sint? non est hîc ostendendi locus. Novum certè, & de quo nulla unquam audiverunt tempora, à quo invaluit opinio Nullibistica fabricari cœpit cælum; quod nimirum nusquam re verâ detur, statumque tantum significet non locum, inque quod migratio mutationem statûs duntaxat dicat non loci. Aberrarunt itaque totâ viâ à vero cælo, & nusquam inveniendum quæsierunt, quotquot id hætenus quæsierunt absque præambula hac face Cartesiana de Nullibitate spirituum; ductura scilicet ad cælum quod inveniri possit nusquam gentium. Notus est gravissimi Theologi Petri Martyris scrius ille locus, quo Bullingero se jamjam excessurum è vivis consolanti dicto Pauli, de fidelium *Politia quæ sit in cælo*, respondit, *Sed non in cælo Brentii, quod est nusquam*. Ità tunc temporis Dôctores Reformati; qui ignorabant cælum quod sit sine loco status solummodò, & nil nisi quidam novus cogitandi modus, in quo pacem habitura sit mens cum glandula pineali, cujus motibus hodiè adfuit mancipata, Solentur suas animulas spe cæli ejusmodi Cartesiani, qui velint nobis Paulinum placet, quærendum *supra*, in quod olim Dominus Jesus corpore suo ascendit, quo & hodiè capitur, & ex quo visibili modoreduimur novissimo consummati hujus seculi die expectamus. A qua fidei simplicitate quisquis abduci semet ipsum patitur *ἡ δὲ φιλοσοφίας*, viderit is ne sic tandem hîc aberret, ut inveniat nunquam, quod quærit nusquam.

Sed properandum est ad expendendas rationes, ob quas Spiritum omnem ad Atopiam, dicam, an Utopiam, relegandum censent Nullibistæ: ut appareat, quam *ἀτόπως* Atopica sententia confirmetur. *Subjunctum* (inquit Claubergius, loc. cit. §. 2. 3.) de quo dicitur, quod sit Alicubi, non est res Intellectualis, sed Corporea tantum: id quod probatur, primò ab eorum sensu, qui hoc Axioma (Omne quod est, Alicubi est) invenerunt & usurparunt. Qui id primi introduxerunt sunt vulgus hominum, qui nihil solent nisi corporeum cogitare, deque eo solum sermones miscere. Mirum equidem argumentum! de quo undè constet Claubergio, nes-

XIII.  
Nequaquam  
ex vulgi  
errore na-  
tum axioma, Omne  
quod est  
Alicubi est.



cio. Eruditos primos controversum canonem introduxisse, eumque consequenter non corporibus tantum, quæ sola vulgus ferè concipere solet, sed & Spiritibus applicandum esse, æquali certitudine affirmet alius. Quin hoc hic probet ex universalis regula Platonis (Viri procul dubio haud vulgaris, ac immateria- lium rerum ideis contemplandis satis assueti) quam ex Parmenide ipse citat Claubergius, *Quod Nusquam est, nihil penitus est.* Verum esto! Introduxerit vulgus! Nihilne adeò à vulgo benè dictum aut conceptum, ut quicquid id fuerit, ilicò totum sit rejiciendum, quia tale? Si hoc axioma à vulgo introductum est, etiam aliud ei simile, *Quod nunquam est, non est*, pari ratione ab eodem descendit. At hoc etiam ad Spiritus extendi debere, ipsi largiuntur dissentientes. Quæ igitur consequentia, Effatum hoc à vulgo fuit usurpatum primitus, ergò rebus Intellectualibus applicari nequit? Et quicumque demùm fuerit, qui axioma hoc introduxit, demonstratum à nobis, non absque gravi causa Auctores gravissimos, Sacros pariter & profanos, de rebus etiam intellectualibus pronunciaisse, quod fortè ex vulgo quidam, nil nisi corporeum cogitantes, rebus tantum extensis applicuerunt. Perquam jejunum est, Claubergium, ostensurum idem hic secum sentire (de axiomate videlicet vulgi Spiritibus non applicando) eruditos, Theologos scilicet & Philosophos, duos §. 4. & 7. adducere textus, alterum Platonis, Augustini alterum, in quo neutro vel quò quod huc spectet, occurrit. Afferit duntaxat uterque, corpora sine Ubi esse non posse: at verbum apud eos nullum, quo Spiritus ab eo excludant; quod probandum sumserat Claubergius. Rectius allegasset illa, quæ nos ex Weigelio suprà exhibuimus, quippe quæ verbotenùs memem Nullibisticam exprimunt.

XIV. Pergit Claubergius §. 8. *Nec ratio permittit, ut latius extendatur axioma: nam causa hujusce veritatis, quod omne quod est Alicubi sive in aliquo spatio sit, alia non est, quam quod corpus omne sit extensum, & spatium etiam sit extensum: adeo ut idem re vera sit, extensum esse, & spatium esse, & in spatio esse, &c. Ad quæ autem causa axiomatis applicari nequit, ad illa nec ipsum debet applicari.* In quibus omnibus supponitur, spatium esse corpus ipsum quod in spatio est, nec quicquam inter ista duo intercodere discriminis; quod plurimi, nec

Neque spiritum Ubi obstat spatium quod cum corpore sit idem.



nec fineratione, negant: ut qui autumant, errorem hunc, spatium cum corpore locato confundentem, non aliundè ortum duxisse, quam ex infanti præjudicio, quo mens nostra jam indè à primis annis occupata esse solet, dum ab incunte ætate observavimus, omnia spatia, nobis designabilia, corpore esse repleta. At distinctius rem cogitantes, ac omnipotentiam Divinam ritè expedientes, facilè percipere asserunt, etiam dari posse spatium sine corpore, seu distantiam inter duo corpora nullo tertio interposito, quam vacuum appellant. Et quamvis hi ex vero sic philosophari nobis videantur, hoc loco tamen de spatio corporis, nùm sit idem cum ipso, nùm quid ab eo diversum, disputare nil attinet. Nam, utrum lubet supposueris, id certum, neminem eorum, qui asserunt Spiritum esse Alicubi, eo absurditatis descendisse, ut Spiritus in spatio esse voluerit per modum corporum, quibus proprium est, per partes sui spatio suo ejusque partibus coëxistere, idque sic occupare, ut omne aliud corpus ex eodem spatio excludant. Quis enim est qui ignoret vulgarem & Alicubi distinctionem in Circumscriptivum, Definitivum & Repletivum? Et cui non audita recepta antiquitus formula, de Spiritu, qui sit in spatio toto totus, & totus in qualibet ejus parte? Ista & Alicubi distinctio, hic coëxistentiæ modus, expugnanda fuissent, non verò de spatio corporum differendum, cum id totum sit à re præsentī alienissimum; nisi in antecessum demonstratum fuerit, aliud Ubi, præter id quod Corporum est, admittendum non esse: quod hoc saltem Claubergiano argumento non evincitur, nisi per principii petitionem. An autem, & quæ sint causæ, ob quas hoc Axioma non corporibus duntaxat, verum etiam Spiritibus sit applicandum, jam vidimus abundè.

Instabis fortè, quale ergò erit id Alicubi Spirituum, si non aliquam involvit extensionem? Nihil aliud quam tale eorumdem attributum, quo per essentiam suam in rerum corporearum spatiis, seu veris seu possibilibus, existunt modo indivisibili. Notatque aded, ut verbo dicam, absque sui extensione spiritum esse, ubi corpus est, vel esse saltem potest. Ita V. C. Anima nostra in corpore humano est, tanquam in suo Ubi, quatenus essentia suâ corpori ejusve spatio intimè ac verè coëxistit; sed naturæ suæ spirituali convenienter, i. e. absque sui partibus. Sic quoque Deus,

XV.

*Quale sit  
spirituum  
Alicubi, et  
quâ ratione  
nobis concipiendum?*

etiam

etiam ante mundum conditum, Alicubi fuit, quatenus ipse infinitus omnisque extensionis expertus verè tunc extitit, ubi nunc mundus est, tunc esse poterat. Quæ, cum clarissima sint & distinctissima, qui non capit, cum vel indocilem esse oportet, qui hæc intelligere non possit, vel malignum, qui non velit. Quapropter neque plura addo; imprimis quandoquidem quædam adhuc infra dicenda venient, quæ ad plenissimam horum explicationem conducent plurimum, quæque cum eis quæ jam diximus collata, facillimam facient solutionem omnium, quæ vel eadem, vel ex istis principiis deducta, in citata sæpius Claubergii Exercitatione de Spirituum Nullibi occurrunt. Nominatim concidunt, quæ adfert §. 12. *Unde & ipsum Axiomatis nostri, Omne quod est, Alicubi est, predicatum satis innoteſcit; nihil enim aliud significat id Alicubi esse, quam in aliquo loco esse, per spatium aliquod extensum esse, &c. adeoque corporeo modo quantum esse.* Idem quavis daretur verum esse de Ubi corporum, nulla tamen inde, uti ostensum, ad Ubi Spirituum formari potest consequentia. Disquiri porro posset, quid cohæreat, quod Auctor §. 1. asserit, *idem re vera esse, extensum esse, & spatium esse & in spatio esse*, cum eo quod immediatè sequitur, §. 9. *Alicubi esse solum est intelligendum de his & illis rebus particularibus, quæ portiones quadam sunt Universi; non de ipso Universo, seu toto mundo, vel corpore in genere.* Quasi totum Universum, vel corpus in genere extensum non sit! Verum cum de Ubi corporum nunc agere non constituerim, hæc, aliaque quæ huc spectant in Dissertatione Claubergiana plura, tranſeo, pergoque potius tollere alias nonnullas, quas contra Spirituum Ubipassim urgent difficultates Nullibistæ.

## XVI.

*Spirituum  
Alicubi non  
tollit non-  
extensa illorum  
natura.*

Trita est & ad nauscam usque plus millies reposita Novatorum contra Spirituum Alicubi objectio, desumpta ab eorundem non-extensione. Inconceptibile est, inquirunt, neque ullà ratione fieri potest, ut res non-extensa atque indivisibilis per essentiam suam coëxistat rei extensæ & divisibili. Quapropter (pergunt) quicumque rebus Spiritualibus id Alicubi tribuunt ratione essentia, pariter in iisdem extensionem concipere necesse habent; si non crassam, saltem subtilem. At hoc absurdissimum. Verum universi hujus discursus fundamentum unicum est, non posse res plures sibi mutuo coëxistere, nisi inter se ejusdem prorsus sint

naturæ & conditionis : quod totum falsissimum est. Quidenim? An non æterna Dei duratio, omnis mutationis ac successionis experis, *totaque* adeò, uti loquitur Philosophus Christianus, *simul & perfecta*, coëxistit spatiis hisce nostris temporalibus, annis, horis, &c. quæ fluunt continuò & mutantur? Quis neget, nisi qui simul, vel Deum nunc durare, vel durationem ejusdem successivam non esse, neget? At quod obtinet in rerum diversissimarum *Quando*, idem in earundem *Ubi* obtinere quid nò queat? Quæquè, obsecrò, ratio erit, cur, si res eadem & immutabilis coëxistere queat rebus successivis earumque mutationi, absque tamen ulla suæ durationis mutatione aut successione, cur, inquam, non pari ratione res non-extensa & indivisibilis, qualis est Spiritus, coëxistere possit rei extensæ & divisibili, puta corpori, absque extensione aut divisibilitate sui? Vidit jam olim consequentiæ hujus vim & robur Vorstius cum Sociis: undè etiam factum, ut, postquam ridere cœperunt essentialem Dei Omnipræsentiam, ut vocabant, *Atomicam & Atopicam*, simul etiam negaverint, ejusdem Æternitatem successionis ac mutationis expertem esse. Similibus hypothesibus qui utuntur, caveant ne in consequentiam incidant eandem: & quæ queant non incidere? ostendant, velim. Nos terrent vestigia. Concedo itaque, quantum ad rem ipsam, quoties Spiritus Alicubi concipitur, concipi pariter extensionem; at non in Spiritu qui est Alicubi, sed in eo cui Spiritus coëxistere concipitur, nempe in corpore, vel, si ità vis, in spatio quod extensum & corporeum est, aut tanquam tale concipitur. Rectè ergò instituis: Si spiritus essentia extensione caret, ergò neque per essentia suæ extensionem corpori potest coëxistere præsens. Quod totum uti verissimum est, sic minimè concludit, etiam spiritum corpori præsentem esse non posse modo sibi conveniente, id est, indivisibili; quod unum contendunt Nullibistarum antagonistæ.

Quibus dum solvimus objectum argumentum, simul satisfecimus difficultati, quam movet De la Forge, *Tractat. de Mente Hum.* Cap. XIII. cum inquit: „Philosophia Scholastica, cum „ex una parte doceat, essentiam mentis in eo consistere quod non „sit extensa, & ex altera statuatur, naturam unionis duarum substantiarum consistere in locali præsentia unius cum altera, simul

XVII.  
Forgei in  
hanc rem  
dictum, &  
quædam in  
id observa-  
tiunculæ.

R r

„au-

„aufert hoc modo omnia media concipiendi mentis ac corporis unionem. Quomodo enim quis comprehendat mentem, id est, secundum ens substantiam cuius natura consistit in eo quod non est extensa, posse fieri extensam? Nam nullo alio pacto concipere possumus, quomodo præsens esse possit substantiæ alicui extensæ, nisi ipsam etiam extensam concipiamus, &c. Ad quæ notetur: 1. Nullo modo necessum esse, ut extensum sit id omne, aut tanquam tale concipiatur, quod alicui extenso coëxistit; uti demonstratum satis. Quapropter etiam, ad difficultatem hanc evitandam, nullatenus indigemus distinctione inter *extensionem realem & virtuales*, aded ut per hanc res spiritualis corpori esset quasi coextensa; quam Auctor impugnat deinceps. Non magis quam in explicanda Æternitate Dei, successivæ rerum creaturarum durationi coëxistente, opus est concipere *virtuales successivas* à *reali* distinctam. II. Si nullo alio pacto concipere possumus, quomodo Spiritus præsens esse possit substantiæ extensæ, nisi ipsum etiam extensum concipiamus, viderit Auctor, quâ aut fide, aut prudentiâ, sub finem Cap. XII. professus sit, se nolle negare, Deum non etiam per suam essentiam suamque substantiam rebus omnibus esse præsentem. Profectò, nisi lectori suo hic verba dare voluerit, omninò secundum ista necesse habet fateri, vel Dei substantiam extensam se concipere, cum eam rebus corporeis præsentem esse fatetur; vel falsò dici, non alio pacto consipi posse, quomodo spiritus rei extensus sit præsens, nisi concipiatur extensus. III. Quod ad unionem Spiritûs cum corpore attinet, non quidem ea, nostro iudicio, in locali præsentia consistit; attamen hanc ad illam omninò prærequiri, firmiter in superioribus probavimus. IV. Observetur, Auctorem diserte fateri, *Philosophiam Peripateticam docere, essentiam mentis in eo consistere, quod non sit extensa; &* (uti addit paulò inferius) *non esse mentem, nisi propterea quod non habeat extensionem.* Audiant ista nostri Novatores! qui quamvis ignorare nequeant, hanc esse adversariorum suorum mentem perpetuam & assertionem constantem, nihilominus, planè contra officium viri boni, obijcere illis non desinunt iterum iterumque, eos Spiritum sibi imaginari per modum subtilis corporis ac tenuis extensionis. Cætera, quæ habet hac de re Auctor, transco; quippe quæ, uti magnam partem ex Claubergio petita, ità quoque cum hunc refutavimus refutata sunt.

Alii,

Alii, ut probent Spiritibus Alicubi tribui non posse citra absurditatem, vehementer urgent, quid sit futurum, si pars istius corporis, cui Spiritus coëxistit, auferatur, V. C. si manus homini amputetur; vel si extensio ea augeatur, ut cum puer accrescit, &c. Rogantque, an eo in casu adhuc Spiritus maneat in eodem Ubi, nec ne? Quibus respondeo, in eodem Ubi manere, quamdiu eidem spatio, coëxistit. Membrum resectum quod attinet, ei mens simpliciter non amplius existit præsens, absque ullo tamen sui motu, divisione, aut diminutione. Habet res se per omnia, uti in æterna Dei duratione nostris temporibus coëxistente. De ea si quis quærat quid futurum sit, si mundus existere desinat? dicendum, extitutum Deum, uti semper extitit, citra ullam suæ durationis contractionem. Quapropter quæ à quibusdam hoc loco quærentur, An Spiritus essentia dividatur, minuat, prorepatur in partes de novo additas, vel retrocedat seseque contrahat in cæterum membrum, atque ibi intumescat? quæque sexcenta moventur his similia, ridicula prorsus sunt, & inepta aded, ut responsum nullum mereantur. Oriuntur quippe difficultates illæ & quæstiones absurdissimæ ex absurdo conceptu, quem de Spirituum præsentia sibi formant, aliosque secum formare autumant. Videlicet supponunt, & sic sentire dissentientes fingunt, quasi ita dicatur & concipiatur Spiritus corpori coëxistere, quemadmodum ex. gr. vapor, vel aliud quod tenue corpus, corporis alterius porosi, v. c. spongiæ, interstitia replet, in ea sese insinuat, perque ea diffunditur; undè necessario fit, ut, si corporis ejusmodi pars abscindatur, etiam simul auferatur aliqua pars corporis subtilioris, per id diffusi eique inhærentis, nisi hoc sese contrahat ac in cæteram illius partem sese recipiat. Verùm nisi quis ex hæcenus explicatis didicerit alios formare conceptus de Spirituum Ubi, ac intelligere longissimum discrimen quod intercedit inter spiritus cum corpore coëxistentiam, & hanc tenuis corporis in poros alterius insinuationem, frustra laborabo discutere crassas illas corporum idearum nebulas: quæ suâ sponte evanescent, superioribus duntaxat ritè perceptis.

Majoris momenti est argumentum quod pro Nullibitate Spirituum defumunt quidam ab eo, quod Spiritus solos producere potuerit Deus, nullis creatis corporibus. Nempe inquirunt, hoc

R r 2

posito,

XVIII.  
Corporis,  
cui spiritus  
coexistit,  
aucta vel  
diminuta  
quantitas  
hujus Alicu-  
bi nil præ-  
judicat.

XIX.  
Solo spiritu,  
nullo corpo-  
re, existen-

*re, etiam  
illi suum  
comperis  
Ubi, &  
quo modo.*

posito, etiamnùm Spiritus Alicubi forent? Si non; utique insep-  
parabile Spirituum attributum non erit  $\tau\theta$  Alicubi esse, sed id eis  
conveniet, non sui ratione, sed ex accidente tantum, ratione cor-  
porum in quibus operantur, quæque verè sunt Alicubi. Si verò  
non existente corpore, Spiritus nihilominus forent alicubi, ad-  
mittendum etiam erit, Spiritum à Spiritu distare, alterumque  
alteri propiorem esse, &c. At quis ista concipiat sine existentia  
extensionis intermediæ? Ad quæ observandum, fore omninò,  
spiritus alicubi, etiamsi soli existerent, quatenus essentia eorum  
esset, ubi corpora esse possent, ità ut, si hæc producerentur,  
Spiritus iisdem verè coëxisterent, quod ad Ubi Spirituum concipi-  
endum sufficere, antè fuit dictum. Atque hoc sensu Im-  
mensus Deus etiam ante creatum mundum extitit Alicubi, quo-  
niam fuit, ubi tunc fuit nihil, extensio tamen esse potuit. Quod  
additur de intermedia extensione, cujus respectu Spiritus distare  
deberent, id supponit, extensionem & spatium & distantiam coïn-  
cidere prorsus, nec hæc posse esse sine illa; quod falsum autuma-  
mus. Sed latioris id indaginis est, quam quod in præfens, hæc  
absolvere festinans, pertractare possim. Conferantur quæ in hanc  
rem notavimus. §. XIV.

XX.

*Alio spiri-  
tûs tran-  
sientis, cum  
hic aut illic  
esse non fa-  
cis, sed  
tantum in-  
dicat.*

Urgent alii: Si mens per se & ratione suæ essentia alicubi esset,  
procul omni dubio huius sui attributi sibi foret conscia, novisset-  
que adeò ubinam præcisè existeret. At nullo modo ejus sibi conscia  
est. Imò, addunt, ignoraremus penitus, utrùm Spiritus hic  
aut illic sint, nisi id concluderemus ex operationibus eorundem  
externis & transeuntibus; quas ubi nullas observamus, illicò in-  
certi sumus, utrùm quis adsit Spiritus, nec ne. Ex quibus mani-  
festum esse putant, non per essentiam, sed tantum per operationes  
in corporibus, Spiritus esse alicubi. Verùm salva res omnis est,  
si distinxerimus inter causam, uti vocant, essendi & cognoscendi.  
Fateor, non nisi ex operationibus transeuntibus nobis innotescere,  
Spiritum in hoc aut illo determinato Ubi existere: cum enim sit  
res quæ sensus non afficit, quæque in intellectum nostrum rarè  
immediatè agit, nos verò, ceu cognitionis nostræ ministris, uta-  
mur sensibus, quid mirum, si ignoremus, in hoc aut illo de-  
terminato Ubi Spiritum existere, quamdiu se suis operationibus  
inibi non manifestat? Sed & sæpissimè corporis alicujus tenuioris,

no.



nobisque ob subtilitatem suam insensibilis, præsentia à nobis non percipitur, nisi quædam ejus operationes externæ sensus nostros afficiant. At, quemadmodum nequaquam indè colligere licet, corpus tale verè istic præsens non fuisse, quamdiu conspicuas nobis operationes non produxit, ità neque de Spiritu concludere id licet. Cæterum, parvi momenti est, quòd dicatur mens sibi non esse conscia sui alicubi: plura enim sunt prædicata, quorum sæpè mens sibi conscia non est, quæ nihilominus verè ei conveniunt. Non longè abeamus, dic, quæso! estne sibi satis conscia mens, in qua parte corporis humani immediatè operetur? Si est; undè ergò tam diversa de sensorio communi inter ipsos eruditæ sententia? Si non; nùm & idèò negandum, mentem in aliqua corporis nostri parte immediatè agere? Inquires forsàn, benè attendenti id sat notum esse potest. At (ne jam inquiram, quam hoc sit vel verum vel falsum) idem à me tibi responsum puta; mecumque idcirco agnosce, haud licere menti denegare attributum quodpiam, ex hoc quod ejus sibi non sit immediatè conscia. Nempè, non immediatè, sed argumentando ferè devenimus in cognitionem plerarumque proprietatum nostræ mentis: quam argumentationem quisquis secum instituit diligenter & accuratè, actutum is certus erit nobiscum, Mentem etiam verè alicubi esse, atque esse debere.

Ex omnibus hæcenus allatis concludimus, Spiritus jure merito esse revocandos ex exilio, ad quod eos nullo suo merito damnarunt, & non ultra Garamantas tantùm & glaciale oceanum relegarunt, sed terrâ marique, inferni cœlique sedibus, totiusque Universi finibus expulsos, proscripserunt Nullibistæ: aut delirantes, aut ludentes, vafreque ac obliquè insinuantes, mentem, quantum est substantia incorporea, tanquam chimæram inutileque figmentum, ex tota rerum Universalitate esse exterminandam, inquit H. Morus. Quousquè hæc verè? judicent alii! Ipsi quid ad hæc? Jam mihi eos more suo videor audire conquerentes de injuriis & calumniis, quibus iniquè graventur. Non enim se eos esse, qui negent Spiritus, etiam ratione essentia, esse alicubi; sed, qui accuratius solùm explicant, *Quomodo* alicubi sint; idque ordine meliori quam hæcenus factum sit à Scholasticis. Videlicet, tantùm se velle, ut concipiamus gradatim Spiritum esse Alicubi; primum quidem per operationes externas; hinc per potentiam;

XXI.

*Nullibistæ  
nulla de  
afficiis sibi  
opinionibus  
querelarum  
causa.*



indè deniquè per essentiam. Ast hocine est, quod rotundè affirmare audivimus, Spiritus alicubi esse *non aliter* quam efficaciter agendo; *tantum* per operationem; *non verè*; *non propriè* per essentiam, &c. Quis, hæc cum illis conferens, non miretur vel prodigiosam contradicendi libidinem, vel vaserimam in palliativa hac cura astutiam? Non ità solent qui pacem & veritatem amant candidi. Si dissentiant ab iis qui statuunt Spiritus alicubi esse ratione essentiae, etiamsi extra se nil operentur, quid Viros pudet suæ sententiæ? Cur eam per verum elenchum oppugnatam non fatentur? Quidve adedò conqueruntur de injuriis amplius & calumniis? Quod si cum affirmantibus idem re verà sentiant, quid attinet his obloqui non tantum, sed & eos tam immeritò & acerbè passim traducere? Cur non missas faciunt phrasas oppositum sonantes, inusitatas, periculosas, ac turbantes docentium & discipulorum scholas? Atqui cum stupidis istis, scilicet! Peripateticis idem se sentire, affirmabunt, fat scio, nunquam: tam animulis istis volupè est esse Nullibi, ne videlicet corporum contagio ipsæ quoque extensæ fiant, atque ità omni suâ excidant cogitatione.

XXII.  
H. Mori in  
Nullibistas  
dicto Dis-  
quisitio  
clauditur.

Uti orsus sum, ità pertexam hanc Dissertatiunculam verbis H. Mori, qui, loco citato, ad verba illa Ludovici de la Forge, *Quando dico Deum esse omnibus rebus presentem per suam Omnipotentiam, nolo negare eum etiam per suam Essentiam suamque Substantiam illis esse presentem*, sic differit: „Audin' tu, mi Nullibista! quid apertè „profitetur unus è præcipuis Condiscipulis tuis, & religiosissimis „stupendi vestri Arcani, *Nullibismum* intelligo, Symmystis, „Deum etiam per essentiam vel substantiam suam omnibus materiæ „partibus adesse? Et tamen vos non pudet interim asseverare, nec „Deum nec Spiritus ullos creatos *Alicubi* esse posse? Quo nihil „repugnantiùs dici potest vel excogitari, & ab omni ratione alienius. Quamobrem cum tam prope ad veritatem accedant *Nullibista*, impossibile videtur, ut adeo ex inopinato eam rursus re- „fugerent, nisi superstitiosa Metaphysicæ *Cartesiane* admiratione „occæcati essent, & joculariis illius subtilitatibus præstigiisq; „abstractionibus illusi, effascinati, & dementati. Concluditque demum: „Quod quicquàm existat, nec tamen sit usquam in „tota rerum Universitate, tam malefana vox est & ab omni ratione aliena atque absona, ut à nemine mentis compote, nisi „per

„per deridiculum possit proferri ; prout suprà monuimus.  
 „Unde magis dolendæ sunt eorum vices , qui , admiratione  
 „primi Authoris tam absurdæ sententiæ capti & occæcati , eam  
 „tam seriò sanctoque amplectuntur , tamque diligenter ex-  
 „poliunt.

E X E R C I T A T I O  
 D E  
 H O M I N E  
 A U T O M A T I C O .  
 S U M M A R I U M .

- I. *Assumptarum hypothesium falsitas fertilis plerorumque errorum causa.* II. *Admissi in brutis motus automatici iisdem in hominibus admittendis viam parant.* III. *Hominem Automaticum quem, & quo sensu, admittat Cartesius?* IV. *Per eum inane reipsâ redditur & superfluum animæ rationalis in corporis motus imperium.* V. *Deleturque prorsus efficax mentis, tanquam veræ causæ, in motus corporeos influxus.* VI. *Obstat eidem impeditus corporis motus ad mentis ægritudinem, abstractam meditationem, & separationem ejus à corpore in morte.* VII. *Opinio de Homine Automatico paternos suos incertos reddit, nùm bona hominum pars anima rationali gaudeat?* VIII. *Operationes brutorum*

torum pro automaticis hominis motibus nihil concludunt. IX. Operationes hominis multæ rationem habent causam, etsi inconsultâ eâ fieri videantur. X. Etiam purè animales actiones à rationali anima proficisci possunt. XI. Motus corporis qui passionibus animi comitantur mentem habent principium sui, & voluntarii sunt. XII. Convulsionum motus ipse ab anima est; inordinatio ejus à perturbata corporis dispositione. XIII. Automata artefacta pro rerum naturalium motibus automaticis concludendis nihil prosunt.

I.  
Assumptum  
hypothesum fal-  
sitas fertilitas  
plerorumque  
errorum  
causa.



**D**ubi pedem figam, & totam Terra molem dimovebo loco, quondam Geometræ Syracusani vox erat. Aded facile est, datis postulatis etiam valdè exiguis, grandia quævis moliri. Atque id in veritatis inquisitione non tantum obtinet, ubi ex principiis valdè paucis & tenuibus infinita deducitur conclusionum continuâ demonstrationis concatenatione connexarum multitudo, cujus rei specimen exhibet elegantissimum Geometria; sed & falsitatis atque erroris par, si non major, existit fertilitas. Nimirum non solum in ratiocinando consequentiæ inconsequentes nectuntur sæpius, verum legitimæ etiam firmæ sequelæ necessitate dogmata deducuntur sat nitidè ex hypothesi falsa, quæ tamen ob vitium præmissorum principiorum, iisdem nihilo sunt aut firmiora aut veriora. Quæ cogitantes haud mirabimur, eum, qui vel semel hypothesin falsam pro vera assumpsit, ex una falsitate incidere in aliam, nec sæpè antè quiescere in præcipiti hoc lapsu, quàm continuo descensu venerit ad imum; istud nimirum absurditatis barathrum, in quod descendere potuisse rationis compotem negares, ni viam noscas quâ istuc pervenerit. Scilicet, uti nemo de repente fit pessimus, quoniam quisque sceleratus sentit reluctantis conscientie morsus, quos simul & semel superare difficillimum est & vix possibile; ita nemo facile per saltum in extrema incidit absurda, cohibente hominem aliqua-

quatenus & aliquamdiu lumine rationis menti ingenito. Idcirco sensim plerumquè sine sensu à minori ad majus hic fit progressus; donec error, initio parvus & contemnendus, dum errorem trahit, accrescat cundo, atque in fine magnus evadat & monstruosissimus. Ità ut quisque paulo ingeniosior promittere jure possit: *Da ubi pedem figam* (in falsa hypothefi), & *totum sciscitantium orbem movebo loco*.

Rei hujus fidem facit, neque uno specimine, hodierna Philosophorum secta, cui placita Cartesii placent. Insolens ei non est, quædam præmittere dogmata, quæ primo intuitu minoris momenti videri possunt, & toleranda saltem tanquam ingeniosæ subtilitatis inventa; quibus tamen si quis inhæserit, iisque convenienter philosophari perrexerit, absurditatibus involvetur longè maximis: quibus tamen (ut pessimo more fieri solet) repudium mittere deinceps recusabit, ne in præconceptis hypothefibus errasse deprehendatur. Sit unum instar omnium! Cæpit antehac Recentioribus defendi, Bruta quicquid agunt agere ad instar machinæ cujusdam pneumaticæ aut hydraulicæ; per solam nimirum partium dispositionem, & sanguinis ac spirituum motum tantum ab extrinseco impressum, citra ullius animæ, quæ sit intrinsecum ac substantiale sensus & cognitionis principium, præsidium aut moderamen. Quamvis autem hujus sententiæ patroni primùm non proderent, se opinari, idem quoque in corpore humano evenire posse, haud tamen jam tum deerant inter eruditos prudentes viri, qui, attendentes quanta sit & organorum & operationum externarum in bruto & homine similitudo, facilem ab illo ad hunc transitum & consequentiam aliquandò faciendam, prævidebant. Indè non pauci vel ob hoc solum concedendum neutiquam arbitrabantur dogma de brutis, quæ sine principio substantiali intrinseco agant ad instar horologiorum, quòd crederent, viam per illud sterni, ad humana quoque corpora in ejusdem generis machinas automaticas convertenda; sique tandem mentem substantialem penitus ab iisdem excludendam.

Neque hic metus fuit omninò vanus: re verà enim Cartesius corpus humanum considerare cæpit tanquam ergasterium quinque accidentium, Motus, Quietis, Situs, Figuræ, & Magnitudinis; quodque adeò vivere possit & moveri absque animæ rationalis

II.

*Admissi in  
brutis motus  
automatici  
eisdem in  
hominibus  
admissendis  
viam pa-  
rant.*

III.

*Hominem  
Automaticum  
cum quiete,*

et quo sensu, admittas Cartesius?

lis præsidio, æquè ac brutum. Ipsum audire operæ pretium fuerit. *Epist. LIV. Part. I. Externarum nostrarum actionum nulla est, præter loquelam, quâ possu enipiam illas examinari constare, corpus nostrum non esse automatum, sed insuper inesse illi animam, que cogitandi facultate polleat.* Ecce! Actiones nostras omnes corporeas, loquelâ exceptâ, ad corpus, tanquam ad automatum referri posse, opinatur. Atque iterum clarè, *Epist. LXVII. Nullam agnoscimus rationem, propter quam, ubi est talis membrorum conformatio, qualem in animalibus videmus, cogitatio etiam debeat adesse; atque ideo majori admiratione dignum est, quod mens aliqua reperitur in unoquoque humano corpore, quam quod nulla sit in nullis brutis.* Transeo quæ huc spectantia occurrunt plurima in *Tractatu ejusdem gemino, tum de Homine, tum de Passionibus animi*: quem utrumque quisquis unquam evolvit diligentius, super hanc unam hypothesein, tanquam primum ac præcipuum fundamentum, ædificatum stare, nullo negotio deprehendet. Quin imò, si ad ipsas Viri Philosophationes attendere velimus potius quam ad phrasæologias quasdam modestiores, quibus illas evitandæ offensionis gratiâ de industria nonnunquam involvisse videtur, intelligemus facili, genuinam illi mentem fuisse, hominis corpus vivere non tantum posse sine animæ rationalis influxu, sed & re ipsâ absque ejusdem præsidio vivere & moveri. Quibus convenienter passim hodiè docent istius opinionis fautores: *Vitam nostram in solo corporeo motu consistere; eam cum belluis nos communem habere; non dependere à mente, cum, hac non datâ, in automato, omni suâ operâ potuisset desungi.* Item, *Hominem moveri ab anima, & moriem ejus à carne divortium esse, non simpliciter esse asserendum: Ut Molitor molam non movet, sed motam regit, sic animam non tam motum, quam ejus modos facere, suâ directione, &c.* Et hic Homo, cujus corpus, licet forte animâ rationali non careat, haud tamen ab ea moveatur (quem meritò idcirco *Automaticum* dicimus) nùm admittendus sit? hac Exercitatione disquiremus.

## IV.

Per eum inane re ipsâ redditur et superfluum

Videtur autem nobis sententia affirmativa, uti falsissima, ita periculosissima. Id demonstraturi supponemus, certum esse, nos ipsos in nobis experiri Animam rationis participem, essentia à corpore nostro distinctæ, ad cujus nutum & arbitrium motus nostri

nostri corporis passim excitantur & peraguntur. Jam verò si motus isti corporis etiam citra animæ moderamen oriuntur, aut oriri possint, cui, obsecro, fini mens corpori unita sic fuerit, ut illius imperio hujus actiones subsint, talesque quales sunt existant? Certè, dicis causâ hæc duo connectere noluit sapientissimus rerum opifex; qui, uti pondere, mensurâ, numero fecit omnia, ita frustra produxit nihil. Quasi necesse sit, motorem addere navi, quæ ipsa ex sese, ventis solis & fluctibus agitata, apta sat est moveri, & viam sic conficere ut nullo motoris auxilio indigeat. Quasi sapiens sit, qui famulum assistere perpetuo jubet horologio, citra admotæ manûs opem horas indicare parato. Quin nihil jam aliud restare videtur, quam ut credamus, animam nostram corpus, cujus motibus non tam præest ex hac opinione quam potius subiecta existit, pro vero carcere duntaxat habere: quæ quondam Platoniorum erant deliria, sapientioribus dudum rejecta & explosa. Quanto fuerit concinnius, & sapientiæ ac bonitati Divinæ, nec non animæ rationalis dignitati, congruum magis, sic omnino habere, movendæ nobili & structuræ præ omni alio in hoc Universo corpore admirandæ machinæ nobilem destinatam esse Divinâ providentiâ motricem Mentem, quæ ipsa suo sic imperio ei præsit, ut absque ea nihil possit moles per se iners atque omni actuositate destituta.

Quin, propius expensâ Mentis nostræ cum Corpore Unio prorsus infert necessariam motuum corporeorum à mente dependentiam. Consistere illam volunt Recentiores in hoc, quod ad varios corporis motus anima nostra variè cogitet, & vicissim ad varias animæ volitiones varii sequantur motus in corpore. Scire autem lubet, an volitiones illæ mentis, quibuscum connexi sunt motus nostri corporis, se habeant ut veræ horum causæ, an verò ut aliquod duntaxat concomitans, quod quidem cum eis existat simul, ita tamen ut hi ab efficientia & influxu causali alterius non pendeant? Si prius, habemus utiquè quod intendimus, quatenus evidens existit, effectum nullum dari sine causa; consequenter neque motus in corpore sine influxu animæ rationalis. Neque excipere juvabit, sic tantum evinci, motus corporeos ipso quidem facto à mente dependere tanquam à causa, at non hinc sequi, eos in corpore sine mente dari planè non posse. Nam, præter-

*animæ rationalis in corporis motus imperium.*

V.  
*Deleturque prorsus efficiax mentis, tanquam veræ causæ, in motus corporeos influxus.*



quam quod ista adferre nequeant, qui vitam nostram à mente dependere corpusque hominis ab ea moveri negant, etiam superflua fuerit mentis illa causalitas, quâ de facto corpus movet, quod etiam sine ea hoc modo moveri potuisset: quod & Deo, & homine, & mente indignum est. Itaque eligendum posterius, Mentem videlicet nullam veram exercere causalitatem in producendis corporis motibus: quod ipsum hodiè velle videntur plerorumque Recentiorum phrasés, atque hùc etiam aurigantur omnes eorundem hac parte assertiones. Atqui non uno absurdo premittitur hæc sententia. Nimirum, sequetur hinc, Mentem à corpore quopiam absentem, cum eo nihilominus re verâ posse esse unitam; quin & eam unam eandemque unitam posse esse eodem tempore pluribus corporibus loco & spatio longè dissitis. Sume (itâ dispensante Divinâ Providentiâ) ad animæ meæ voluntatem moveri corpus quodpiam existens Romæ, aliud etiam Parisiis, idque eodem tempore. An ergò eadem mea mens, hùc unita existens meo corpori, simul unita fuerit corpori alteri Romæ existenti, & simul alteri, quod est Parisiis? Si non; reddatur, obsecro, ratio! Sufficit etenim ad unionem, ex hac opinione, cogitationum & motuum corporeorum simultanea existentia, citra realem influxum & causalitatem: at illam hùc habemus. Si sic; vide sis, nemeritò stupidior habearis stipite, quicum mentem tuam uniri posse in idem suppositum credis. Et tamen ista profiteri non metuunt Neoterici; idque hypothesis suis convenienter. Sic enim ajunt: *Quoniam mens cum corpore unio decreto Divino determinata hæret, non est absolvi necessarium, ut hæc unio localis sit, sive ut mens præsentialiter parti alicui corporis præsideat: cum, tamen si v. gr. esset in cælis, non eo minus hæc cogitatio & hæc glandula, spirituum, aut actionum determinatio, se invicem immediate exciperent, unirenturque in unico durationis nunc.* Stupeat oportet mecum, qui hæc audit: simul autem notet, quò abducat de motibus nostri corporis à mentis influxu & causalitate non dependentibus, conceptus. Istis adde, si motus nostri corporis à mente, tanquam à vero principio & propriè dicta causa, non pendeant, etiam animam rationalem nullius actionis externæ, consequenter neque ullius operis corporei peccaminosi, causam propriè dictam haberi posse. Neque enim unquam, ex hac sententia,



rea esse poterit Anima nostra, quod quicquam per corpus suo influxu & causalitate effecerit, sed duntaxat, quod tale quid fieri voluerit; quæ voluntas. ex hac hypothefi, non tanquam facti istius peccaminosi causa spectanda erit, sed tantum tanquam conditio sine qua non, ut loquuntur, sive prærequisitum. Per quæ concidit trita peccati in cogitatum, dictum, factum, divisio: ne plura accumulæm, quæ in re Sacra hinc fluunt, absurda.

Experientiam porrò si consulamus, dicat ea non uno modo, motus corporcos ab impulsu & præsidio animæ rationalis prorsus esse dependentes. Impediri eosdem & turbari videmus, quoties mens ægritudine confecta est, vel aliis modis affligitur; quatenus scilicet iis nimium detenta minus in regendo corpore occupatur: quum contrà, mente existente vegetâ, prompti atque agiles in corpore nostro exercentur motus. Quin, absque debita Animæ nostræ attentione nullus existit in nobis usus organorum sensationi, consequenter & motui animali, inservientium. Quis nostrum non expertus est sapius, quandò mens altius immersa fuit conceptibus profundioribus circa res à sensibus remotas, etiam tunc corpus obriguisse, neque motum aut affectum fuisse ab objectis externis, oblati etiam satis clarè organis coporeis undiquaque benè habentibus? Certo argumento, non instar machinæ alicujus automaticæ corpus nostrum moveri & impelli unicè à rebus extra nos positis; quod volunt, & sentire debent, qui motus corporis à mentependere negant. Et quid in morte hominis eveniat, attendamus! Nempe, simulac Anima corpus focium deferit, quiescunt quoque operationes corporis & motus ejusdem animales. Cur quædò? nisi motus illi, omnisque corporis activitas, ab Animæ præsentia, ejusque impulsu, sic pendeant, ut citra eam produci planè non possint. Nec moror objectiunculam, quam quidam movent, desumptam à qualicunque membrorum contractione, aut partium vibratione, quæ ad tempus etiam in cadavere superesse observatur: neque enim ordinatus iste motus est, neque diutinus aded, quin referrì facile possit ad spiritus animales, ante mortis articulum ab anima impulsos, & in isto suo motu aliquamdiu perseverantes. Non parum confirmabitur nostra ratiocinatio, si, quid ipsa hominis mors sit, cogitemus. Consistit ea in separatione seu disunione Animæ rationalis à corpore, quicum

## VI.

*Obstat eadem impeditus corporis motus ad mentis ægritudinem, abstractam meditationem, & separationem ejus à corpore in morte.*

unita antè fuerat in eandem personam. Id docet Scriptura, confirmat ratio, clamat quorumvis eruditorum cujusvis seculi & sectæ consensus. Jam verò morti vitam opponi privativè, notum est. Itaque ut in disunione mentis à corpore mors, ita ex opposito in eorundem inter sese unione vita hominis consistit. Illà igitur sublatà, etiam hæc tollitur. At ipsà vità sublatà, quis actiones vitales superstites manere posse, affirmet? Non ignoro distinctionem adversariorum inter vitam hominis animalem & rationalem: verùm, quamvis negandum neutiquam sit, toto cœlo distinctas esse actiones mentis cogitativas à motibus corporis, hoc tamen loco inane esse hoc effugium, patet, quia hos ab illis dependere ex ipsa unionis natura, prout eà Recentioribus explicatur, jam demonstravimus.

## VII.

Opinio de  
Homine  
Automatico  
suos patros  
nos incertos  
reddit, nūm  
bona homi-  
num pars  
animā ra-  
tionali gaudi-  
deat.

Præter ista, militat contra motum hominis automaticum generale argumentum, quo evincitur, nullas operationes à sola partium dispositione & motu, aliisve accidentibus aut modis, citra principii substantialis influxum, oriri posse, ex eo quod accidentia operativa non sint, nisi virtute alicujus substantiæ, cujus beneficio ut existunt ità operentur; quandoquidem modus operandi sequitur eum qui est essendi: nedum, ut actiones tam variæ & elegantes, quales plurimas, etiam præter loquelam, in humano corpore observare datur, ab iisdem proficisci queant. Verùm non lubet actum agere: videatur nostra *Dissertatiuncula de Operationibus Brutorum*. Unum præterire hic nequeo, eoque absolvam. Obtestor universos qui hîc dissentiant à nobis, dicant mihi, si operationes in corpore humano obviæ mentis influxu absolute non indigeant, sed absque eo excitari queant, dicant mihi, inquam, bonâ fide, qui sciant, aut undè certi sint, sætui humano in lucem hanc prodeunti inexistere mentem? Nunquam, fat scio, se hîc expedient: nullam enim adferre poterunt obviam in eâ operationem, præter motus quos ipsi automaticos esse contendunt. Si dicant, ineptum esse, qui indè concludat, Animam rationalem in illis non dari; nihil dicunt quoad rem faciat. Nec enim ego infero, mentem in iis non existere; sed ab iis peto, ut ipsi inferant ullo firmo ratiocinio, eam omninò in iis dari: quod quamdiu non præstitum, temeritatis videtur, Philosopho imprimis, credere sine ratione, mentem iis inesse. Si hominem adferas

adferas dormientem, in quo mens sit, quamvis nihil ejus deprehendi possit; respondeo, me facile credere, mentem ei inesse, quippe qui sic habeo, ne quidem actiones istas animales in dormiente superstitis citra activitatem principii substantialis dari posse: at tu illam ei inesse in æternum non probabis, nisi infirmâ conjecturâ, quodd & ante & post somnum corpori illi adsit. Neque evades, urgendo, mentem parvulorum actuosum esse, nihil repugnare, licet nihil tale nobis appareat. Etenim, dato, nihil repugnare. An quicquid nihil repugnat, Philosopho credendum est actu esse? Etiam certè nihil repugnat, ex tua hypothesi, parvulorum corpora vivere sine mente. Primo itaque biennio aut triennio à nativitate, priusquam sese rationis usus gestu & loquelâ prodere incipit, infantulo mentem inesse, demonstrare Cartesiano homini fuerit impossibile: quod ipsum volebam. Ne addam, per omnem vitam quosdam rationis usu ab ipsa infantia destitui, nec ullo cum signo unquam prodere; de quibus ergò per omnem vitam liceat dubitare, nùm mente gaudeant? Per quæ stant inconcussa, quæ quondam alibi de hoc ipso argumento huc in modum dissereram: „Non mirabimur amplius (si absque Animâ „rationalis præsentia vivere possumus) homines Arimaspos, Scia- „podas, Strutiocæphalos, Fanefios, Satyros, Cynocephalos, „Pygmæos, aliaque hominum portenta, quæ nobis delineat Pli- „nius; cum non jam quibusdam corporis partibus, sed & Anima „carere possit corpus humanum, & nihilominus, imò fortè „commodius, vivere. Impii Paracelsi homunculum artificia- „lem, qui istud admittit, non pariter admittat? Quin si hoc ità „sit, quis novit, an non frequenter (etiam dum hæc scribimus) „res nobis sit cum larvatis hominibus, specietenus talibus, cæcè- „rùm omni Mente prorsus destitutis? Et si fortè in plenisque, „quibuscum quotidie agimus, aliquid occurrat, quod nos su- „spicari facit, inesse iis quoddam ratiocinandi principium, nihil „tamen ejusmodi (ex hypothesi adversâ) deprehendere poterimus „in puero paucos menses nato, phrenetico, similibusque aliis, „idoneis signis, se aliquid rationaliter agere, indicare non valen- „tibus. Quare cum in iis nullæ nobis observandæ occurrant ope- „rationes, præterquam tales, quales hi Philosophi, citra ullius „Animæ substantialis adjumentum, à sola partium dispositione ac  
motu

„motu proficisci posse asserunt, meritò dubitabimus, an quidem  
 „ii, quos enumeravimus, Mente gaudeant. Quæ si semel obti-  
 „neat insania, actum est de charitatis officiis, omnisque dissoluta  
 „sunt societatis ac humanitatis vincula. Ista quidem tunc. Nunc,  
 si cum Theologo, cui nova placet opinio, res foret, monerem  
 ferio, caveat ipse sedulo, ne ad ægrotos mentis & linguæ usu alie-  
 natos vocatus, incautus preces sapius fundat pro defunctis; si-  
 quidem ex novellis hypothefibus, nihil fieri poterit & facilius &  
 frequentius, quam ut anima rationalis jam dudum absit à corpo-  
 re, in quo conspici adhuc sunt motus, quos in agonizantibus  
 passim observamus. Ità non uno modo sine mente philosophari  
 necesse habent, qui corpus suum sine mente regi posse contem-  
 dunt.

VIII.  
*Operationes  
 Brutorum  
 pro automa-  
 ticiis homi-  
 nis motibus  
 nihil con-  
 cludunt.*

Quæ tamen pro sua quoque sententia adducant ipsi, examine-  
 mus? Primarium novæ assertionis fundamentum est similitudo  
 simillima, quæ datur inter plerasque, si non omnes (loquela  
 imprimis si exceperis) hominum & brutorum operationes exter-  
 nas. Quumque has supponant oriri à sola partium dispositione,  
 & sanguinis spirituumque motu, absque ullius animæ substan-  
 tialis moderamine, facili indè inferunt sequelâ, absurdum haberi  
 non debere, si eodem quo corpus bruti movetur modo hominis  
 quoque corpus moveri existimemus. Fateor, satis consequen-  
 tem videri hanc consequentiam. Neutiquam enim repugnat,  
 quin potius summè probabile est, duas machinas, aded quod ad  
 ossa, nervos, musculos, sanguinem, spiritus, omnemque or-  
 ganorum apparatus & structuram similes, simili quoque modo  
 impelli & moveri. Ast verò antecedens illud, de Brutis operan-  
 tibus ad instar horologii, vel ob hanc ipsam consequentiam, falsum  
 esse ac neutiquam admittendum, censeo: de quo & ab initio  
 dixi. Neque in præsens id agam, ut ostendam multis, opera-  
 tiones brutorum motus ejusmodi automaticos non esse. Satis fu-  
 è hæc de re disserui, allegatâ jam de *Operationibus Brutorum Exer-  
 citatione*: quæ si hîc conferatur, suffecerit ad superandum quic-  
 quid hæc parte hæc ere potest difficultatis.

IX.  
*Operationes  
 hominis  
 multæ ra-*

Verum neque Brutis fortè indigent, qui in homine ipso sat  
 multa inveniunt, ad stabiliendam suam thesin. Ipsum audiamus  
 Cartesium! „Fit plerumque, ait, ut ambulemus aut comeda-  
 „mus,

„mus, neutiquam cogitantes de eo quod agimus; quin imò ea  
 „quæ nobis noxia sunt repellimus, aut etiam ictus quibus peti-  
 „mur declinamus tam inconsultâ ratione, ut quamvis dedita  
 „opera vellemus manus nostrâs capiti non prætere cum cadi-  
 „mus, tamen non esset penes nos id non facere. Credo etiam  
 „nos brutorum instar manducatu-<sup>tionem ha-</sup>  
 „ros, sine prævia institutione, <sup>bent cau-</sup>  
 „si cogitatione nulla essemus præditi: & certè, dicunt eos, qui <sup>sam, et si in-</sup>  
 „per somnum obambulant, ejusmodi fluvios nonnunquam tra- <sup>consultâ eâ</sup>  
 „nare, ex quibus experecti nunquam emerfuri essent. *Epist. Parr.*  
*1. p. 107.* Quibus ut satisfiat, cum plurimis Philosophis eruditis-  
 simis, distinguendum venit, inter actiones hominis animales &  
 rationales; seu, ut alii loquuntur, inter actiones hominis & hu-  
 manas; quarum illæ ab homine fluunt, quatenus est animal, hæ  
 ab ipso profisciscuntur, quatenus præcisè homo est. Posterioris  
 generis actiones ab homine nunquam quidem eliciuntur, fateor,  
 citra præviam mentis cogitationem & imperium, attamen & hoc  
 certum est, frequenti usu & exercitio tantam sæpè promptitudi-  
 nem & facilitatem earum acquiri, ut peragantur animæ attentione  
 tam exiguâ, ut singula minus expendenti ea videri possit nulla.  
 Quis nostrum sibi conscius est distinctæ cogitationis & imperii  
 mentis circa singula verba quæ proferimus, quoties ex tempore  
 dissertationem sæpè satis prolixam de re quapiam instituimus? In-  
 dubium tamen existit, multiplicem hîc requiri Animæ attentio-  
 nem, & ad res singulas, & ad rerum notiones, & ad unumquod-  
 que verbum quo notionem efferimus, & ad totam orationis tex-  
 turam ac verborum connexionem logicam simul & grammaticam.  
 Atque vel hoc unum evincit satis, non absque mentis cogitatione  
 & præsentia fieri, quæcunque nonnunquam primo intuitu absque  
 ea fieri videntur. Sit v. c. (ut aliud addam frequens & obvium)  
 Studiosus, qui meditabundus Academiam adit lectionem auditu-  
 rus. Non rarò evenit, eum, dum altius meditationibus immer-  
 sus est, videri sibi venisse ad auditorium, absque ulla cogitatione  
 de via, quâ eundem fuit. Interim certum, non absque aliqua  
 mentis attentione & imperio motum progressivum pedum & totius  
 corporis, per varias platearum ambages & longos viarum circui-  
 tus, directum fuisse præcisè ad Academiam; uti vel indè evinci-  
 tur, quod à via & præstituto loco aberret, si nimia fuerit animi

per alias cogitationes distractio. Quæ omnia docent abundè, plurimas nostras actiones, quæ citra fixam, statam, & morosam, ut ità dicam, cogitationem à nobis peraguntur, non tamen care imperio incidentis alicujus & fugacis cogitationis; quæ semper adeò omnes nostras actiones comitatur, ut verum nequaquam sit, quod hìc dicitur, *nos neuiquam cogitantes de eo quod agimus, plerumque ambulare, comedere, istius repellere, &c.* Noctambulones quod attinet, tantum abest, ut credendum sit, eos idem acturos quod agunt, etiamsi nulla cogitatione essent præditi, ut experientia contrà doceat, eos vigilantes sapissimè sibi probè confcios esse ejus, quod fecerunt somniantes; certo indicio, non sine voluntatis imperio eos fecisse, quod fecerunt. Negandum tamen non est, minus distinctè eos affici ab objectis per organa minus rectè disposita confusè & inordinatè oblati; undè &, dum singulas rerum circumstantias minus percipiunt, sine timore agunt, atque ità in tranandis fluminibus, &c. pericula quæ ignorant, felicius evadunt.

## X.

*Etiam actiones purè animales à rationali anima proficisci possunt.*

Ut autem omnis, qui hæere adhuc posset scrupulus, eximatur penitus, cogitemus in nobis aliud quod genus actionum occurrere, scilicet merè animalium. Eas plurimas etiam citra ullam vel minimam cogitationem fieri, quid si dederim? Ab anima hominis idcirco non proficisci, neque hanc indigere, demonstratum hactenus non vidi. Quin contrarium ejus probant Infantes, Lethargici, Apoplectici, aliiquæ qui neque per cogitationem agunt quæ agunt, neque tamen absque animæ præsentia & influxu operantur; uti jam pluribus evicimus. Nec obstat, quòd anima, quippe spiritus, tantum cogitando dicatur esse actuosa: undè inferunt, eas quæ sine cogitatione sunt operationes animam cogitantem non habere principium. Non, inquam, id obstat; antecedens enim verum est de anima secundum se considerata, & quatenus merus existit spiritus, idque in ordine ad actiones immanentes: minimè tamen id admittendum quod ad actiones transcurrentes, quæ ab eadem proficiscuntur quatenus cum corpore unita hujus existit forma; quales plurimas, præter cognitivas, ex mero naturæ instinctu à Deo primùm indito profluere posse ab eadem, quis negaverit? Atque ità animam humanam per gradus in corpore quicum unitur esse actuosam, ab omni ævo, experientia



rientiæ convenienter, admifere eruditi cum Philofopho, eleganter id innuente, quandò ait, *hominem primum vivere vitam plantæ*, tantum per nutritionem crefcendo; *mox beftiæ*, fentiendo etiam, appetendo, & fe loco movendo; *denum hominis*, intelligendo, volendo, &c. Nequè multum hic alicui difficultatis hæere poteft, cui non infixæ fedet opinio de mente humana quæ nil fit nifi cogitatio. Quæ de re alibi.

Minimè verò *paſſionum noſtrarum motus* evincunt, operationes noſtri corporis ab anima non procedere; quaſi *clariffimum fit, illos à cogitandi facultate non pendere, quandoquidem invitis nobis ſæpenumero exoriuntur. Cartef. Ibid. p. 108.* Non hæc faciunt pro Homine Automatico. Ut enim nunc taceam quæ modò dicta ſunt de actionibus ab anima orientibus ex mero naturæ inſtinctu (quales eſſe noſtros affectus contendunt, qui eoſdem in facultate animæ ſenſitiva, ſeu inferiori, uti vocant collocant; quibuſque facile exiſtit hic reſpondere, Affectus ab anima oriri, licet non præciſè ab ea proficiſcantur, quatenus cogitandi facultate prædita eſt) iſta, inquam, taceo: nobis enim videtur, motus corporeos, qui paſſiones animi comitantur, non magis *nobis invitæ exoriri*, quam nobis invitæ exoriuntur ipſæ illæ paſſiones. Videlicet, & hæ ſæpenumero invitæ ſunt, quod ad actus noſtræ voluntatis qui eaſdem vel antecedunt vel ſequentur. Mens enim noſtra objecti, cujus bonitas vel malitia animi perturbationem in nobis excitavit, prædicata omnia & ſingula, poſtquam deſæviit non nihil affectus, expendens accuratius, errorem iudicii deprehendit, indeque ortum inordinatum animi motum, ſicque prænitentiâ ducit affectus, quo non ita pridem laborabat. Atque hætenus uti affectus ipſe, ita motus corporis cum eo conjunctus, invitæ cenſeri poteſt. At verò, uti nemo aliquâ animi paſſione laborat, niſi, quo tempore eâ laborat, ſic affectus eſſe velit (eſt enim paſſio animi in homine re verâ nihil aliud, quam intenſior eiſdem volitio aut noſtitio; at nemo invitus unquam vult, aut velle poteſt) ita quoque nemo afficitur motu corporis inordinato, quatenus is paſſionem animi voluntariam comitatur, niſi ſic affectus eſſe hæcenus velit. Dico, eum hæcenus velle, in quantum nimirum ſimpliciter iſe eſt motus corporeus; non quatenus hæc aut illa effecta aut conſequentia ſecum trahit. Ità nemo voluerit febrim, quam

## XI.

*Motus corporis qui paſſiones animi comitantur mentem habens principium ſui, & voluntarii ſunt.*

ex vehementiori ira, eaque voluntaria, sibi fortè contraxit. Qui igitur nostras Passiones animi comitantur corporis motus non minus in suo exortu ab anima nostra pendunt, quam ipsæ passiones: quamobrem & nequicquam nobis hîc adversantur.

XII.  
*Convulsio-*  
*num motus*  
*ipse ab ani-*  
*ma est; in-*  
*ordinatio*  
*ejus à per-*  
*turbata cor-*  
*poris dispo-*  
*sitione.*

Neque convulsiones demonstrant, corpus humanum posse vivere & moveri sine mente, qua de re ità Cartesius: „Certum est „in corporibus animalium, ut etiam in nostris, esse ossa, nervos, „musculos, sanguinem, spiritus animales, & reliqua organa ita „disposita, ut se solis, absque ulla cogitatione, omnes motus „quos in brutis observamus ciere possint. Quod patet in convul- „sionibus, cum mente invita machinamentum corporis vehemen- „tius sæpè & magis diversis modis solum se movet, quam ope vo- „luntatis soleat moveri. *Rag.* 89. De organis brutorum quæ se solis motus ciunt nunc nihil dicere attinet; quùm de iis & antè, & alibi. Quod ad *Convulsiones*, eas nihil facere pro Homine Automatico facile intelligimus, si in iis distinguamus inter motum simpliciter animalem qua talem, & motus istius inordinationem. Illum ab anima postea excitari dicimus, vel ex cogitatione & voluntate præviâ, vel ex instinctu merè naturali; de quibus suprâ. Quantum ad *αἰσχίαν* & inordinationem motûs, quam in convulsionibus observamus, agnoscimus eam omnem oriri à sola partium dispositione perturbata & non-naturali; atque hætenus mente invitâ accidere, non est negandum. Sed ista nihil nobis obest; quatenus in motibus ejusmodi ciendis anima, tanquam *αἶσθησις corporis organici*, uti benè eam vocat Philosophus, prorsus est organica, atque omni modo à bona machinæ corporeæ dispositione dependens. Tamergò elegans atque efficax est hoc argumentum à convulsionibus desumptum, ad demonstrandum motus animales absque ulla anima ciere posse, ac si quis inferat, organum pneumaticum se solo, absque ulla cogitatione organistæ, edere posse sonum musicum; quia scilicet, quandò tubi obstructi sunt, aut rimosi, aut aliquo alio modo non rectè dispositi, invito artifice, machinamentum organi vehementius sæpè & magis diversis modis movetur, edendo bombum vel alium quem confusum sonum, quam voluntate musici moveri solet.

XIII.  
*Automata*  
*artefacta*

Pergit Cartesius: „Rationi consentaneum videtur, cum ars „sit naturæ imitatrix, possintque homines varia fabricare auto- „mata,

„mata, in quibus sine ulla cogitatione est motus, ut natura etiam  
 „sua automata, sed artefactis longè præstantiora, nempe bruta  
 „omnia, producat, præsertim cum nullam cognoscamus ratio-  
 „nem propter quam, ubi est talis membrorum conformatio, qua-  
 „lem in animalibus videmus, cogitatio etiam debeat adesse; atque  
 „ided majori admiratione dignum sit, quod mens aliqua reperia-  
 „tur in unoquoque humano corpore, quam quod nulla sit in ul-  
 „lis brutis. Vis omnis hujus argumenti, in quantum hùc perti-  
 „net, sita est in collatione automati alicujus artefacti cum re natura-  
 „li. Facile foret ejus inefficiam monstrare, & ostendendo, hâc  
 „ratione nullum tandem admittendum fore specificum & essentiale  
 „discrimen inter res naturales atque artefactas, cum magis & minus  
 „non varient speciem; & docendo artem, quamvis naturam imite-  
 „tur, nunquam tamen eò usque perfectionem hujus assequi, ut  
 „non immensum ab ea deficiat, tum ratione ipsarum operationum,  
 „tum ratione earundem principii. Brevitatis causa ista similiaque  
 „nunc mittam; daboque, admittendam esse sequelam ab artefactis  
 „ad naturalia: tantum nùm æqua sit, quæ hîc instituitur comparatio,  
 „nunc videamus! Profectò automata artefacta nequaquam moven-  
 „tur à sola partium dispositione, sed ab adjuncto ab artifice, appli-  
 „cante naturale activum passivæ machinæ, principio motus quali-  
 „cunque; quale in horologio v. c. est pondus appensum, vel quid  
 „huic analogum. Ex quo concludo: Quemadmodum horolo-  
 „gium etiam optimè dispositum se solo nullis motibus movetur,  
 „verum hi omnes proficiuntur ab addito motus principio, tan-  
 „quam à causa sui; ita quoque corpus animalis, quantumvis benè  
 „habens, se solo nullos motus exercet, verum eos omnes debet  
 „addito alicui motus principio; quod hic nobis est anima. Neque  
 „evades, excipiendo, corpus animalis, etiam sine anima vivens,  
 „non carere suo motore, etsi non interno, externo tamen,  
 „quatenus ab objectis per radios luminis, aliisque modis, hùc illuc  
 „impellitur, uti v. c. mola circumagitur à vento: talem namque  
 „explicationem refutat abundè, tum experientia in nobis ipsis, qui  
 „deprehendimus corpus nostrum moveri, non ab extrinseco aliquo  
 „motore, sed ab animæ nostræ, tanquam principii interni, im-  
 „pulsu & directione; tum, quòd, licet daretur sufficere motio-  
 „nem factam ab extrinseco ad operationem qualemcunque, nequa-

*pro rerum  
 naturalium  
 motibus au-  
 tomaticis  
 concluden-  
 dis nihil  
 profuit.*

quam tamen ad illud referri queant operationes tam variæ & admirandæ, quales in animalium corporibus obviæ sunt; tùm denique, quod sic re ipsa omnia animalia verâ causalitate atque activitate priventur, quoniam arte facta, ab extrinseco mota, non tam agunt, quam potius aguntur: cujus theseos periculum, ut & alia hûc pertinentia, plenius excutere, alterius loci est, nimiumque ab Homine nostro Automatico recederet. Sufficiunt hæcenus allata: quæ talia putamus, ut Homo Automaticus meritò habendus videatur, quicumque, ista non capiens, pugnare amplius pro Homine Automatico ausit.

## DISQUISITIO

DE

CONTRADICTIONIIS  
DEO POSSIBILIBUS.

## SUMMARIUM.

- I. *Contradictoria Deum posse, præter Weigelium, vix quisquam ante Cartesium contendit.*
- II. *Hujus in hanc rem allegati textus, qui mentem ejusdem plenius explicant.*
- III. *Contradictoriorum possibilitas cum primæ causæ sapientia nequaquam consistit.*
- IV. *Non nostræ mentis finitudo, sed ipsa rei contradictoriæ repugnantia causa existit, cur ejus idea formari nequeat.*
- V. *Omnipotentia Divina in veram rem terminatur, non in nihilum; adeoque nec in*

*in contradictoria. VI. Si contradictoria Deo possible sint, nihil fingi tam absolum potest, quod non efficere possit Deus. VII. Si facere queat Deus ut contradictoria sint simul, etiam res contradictorias credendas proponere potest. VIII. Admissa contradictoriorum possibilitate, nullius momenti existunt quaecunque ab absurdo consequenti petita argumenta. IX. Quin, subvertuntur omnia omnium disciplinarum atque universae quam unquam habere potest homo certitudinis fundamenta. X. Potentiae Dei cum Voluntate ejusdem confusio praecipua novae assertionis basis. XI. Objectionum diversitas evidens distinguenda Divinae Potentiae à Voluntate fundamentum. XII. Eandem distinctionem evincit habens sese aliter Potentia aliter Voluntatis. Divinae exercitium. XIII. Neque, quando Potentia Dei à Voluntate distinguitur, idè minus efficax aut perfecta hac agnoscitur. XIV. Productio rerum cur ad Voluntatem Dei saepe referatur, nullà factà mentione Potentiae? XV. Rerum possibilitat fundanda sola sufficit Dei Sufficientia, citra ullam de Voluntate ejus cogitationem. XVI. Nihil perfectionis divinae libertati detrahatur, si contradictoria Deum efficere posse, negetur. XVII. Possibilia, tametsi ad indifferentem primae causae voluntatem non reducantur, à Deo nihilominus dependent. XVIII. Quae aliae esse potuissent naturae rerum contradictoriorum possibilitatem minimè probant. XIX. Nullà parte immodestiae reus existit, qui contradictoria infinitae potentiae subducit. XX. Propositae quaestionis decisionem Philosopho minimè subterfugiendam esse, ostenditur.*

*ditur. XXI. Absurdè dicitur Deus per Potentiam posse, quod idem efficere nequeat per Bonitatem.*

I.  
Contradi-  
ctoria Deum  
posse, prae-  
ter Weige-  
lium, vix  
quisquam  
ante Carte-  
sium con-  
tendit.



Remendum quid omnique nostrâ cogitatione majus existit Divina Potentia, cujus tam immensa est summa cum perfectione conjuncta amplitudo, ut nulla de re circumspectâ magis cautelâ atque attentiore attentione quam hic philosophari oporteat. Nusquam æquè facîle ac hoc loco impingitur, ubi inter duo præcipitia tenere medium prudentiæ est planè non-vulgaris: adeò Dei virtutem hinc quidam absque causâ restringunt arctius quam decet; indè alii temerè eandem extendunt latius quam fas est. Displacuerunt eo nomine modestioribus ingeniis jam dudum illæ maximâ sui parte inutiles, periculose plerumquè, etiam non rarò profanæ, de eo quod possit Deus, quæstiones ac determinationes, decise non minus temerè quam motæ à Scholasticis Doctoribus, hominibus otiosè laboriosis & inaniter subtilibus, nimiumque hac parte negligentibus metum istum ac venerationem, quâ sacra hæc tractare jubet & Divini Numinis supereminentia, & humanæ mentis imbecillitas. Atquæ horum parùm memores adeò audaci scrutinio universa hæc mysteria contaminarunt, ut nihil à vanis suis speculationibus intactum reliquerint, neque quicquam tam absurdum hic unquam à quoquam fuerit excogitatum, quod non in hoc hominum genere suum invenerit patronum. Vix tamen, quod sciam, omnium unus eo processit ineptiarum, qui contradictoria Deo possibile esse contenderit. Ut omninò licuerit sperare, reperirundum fore deinceps neminem, qui suum faceret dogma, cui illorum nullus suum commodare ausus fuit patrocini-um. Imprimis tale nihil expectandum videri poterat, postquam risu & contemptu omnium explosus fuit sanaticus & plus quam transcendentaliter ineptus homo Valentinus Weigelius, inter alia ridicula suæ stultitiæ mysteria, nulli sanæ mentis homini intelligibilia, nescio quid garriens de possibili Contradictoriorum combinatione. Atquæ eo vivimus seculo, quo illa quoque fieri vide-



videmus passim, quæ fieri potuisse negassent avi. Hi quidem prudenter sic habebant (& nos cum illis) multa Deum posse, quæ nos non intelligimus: ideòque nullâ demonstratâ repugantiâ, pro evitanda temeritate, ad quæstionem, An istud vel illud Deus possit, aiebant ferè lubentius quam negabant; sæpè iudicium suspendebant potius quam ut definirent temerè; dum semper subibat cogitatio, hoc vel istud, de quo quærebatur, forsitan esse ex illorum numero, quæ quidem existunt in classe possibilitum, superant tamen nostrum captum, quo minus ea possibilita esse putemus. Ità piè atque modestè in tuto collocabant Divinæ Omnipotentia ad sui ingenioli captum comparatæ incomprehensibilitatem. Non hoc interim erat impedimento, quo minus nihil ad dubitantes rotundè simul pronunciarent, à perfectissima causa nequaquam ista fieri posse, quæ veram involvere contradictionem, evidenter & certò demonstrari potest. Et profectò ne fidem quidem adhibere potuissent vaticinanti, extituros brevi inter nepotes benè multos, qui affirmarent, nos determinare non posse, an Deus ea possit quæ contradictionem implicant: quin Deum facere potuisse, ut bis duo non quatuor sint, sed quinque forsitan vel septem, ut trianguli tres anguli non æquipolleant duobus rectis, &c. Et tamen, etiam in medio orbe Reformato, nunc ista defendi audimus. Tam nihil amplius absurdum videtur quicquid assertionis enixum est cerebellum Cartesii, postquam eo usque invaluit apud plurimos, quo usque nostro tempore invaluit, ejus auctoritas. Hic scilicet opinionis absurdissimæ, quatenus hodiè inter suos viget, est architectus. Et si verò ad *Johannis Crocii Anti-Weigelium*, ubi *Quæst. II. Luminari* hoc commentum confutatur abundè, amandandus Vir cum sequacibus videri queat; quâ tamen ejus sectæ Philosophi illum venerantur existimatio operæ pretium faciet, ut in hanc assertionem paulò diligentius inquiramus, ostendamusque, posse nos, quin debere affirmare, Deum contradictoria producere non posse.

Verùm audiendus est antè Cartesius. Sic is, *Respons. Sext. §. 6.* *II.*  
*Repugnans Dei voluntatem non fuisse ab æterno indifferentem ad omnia* Hujus in  
*que facta sunt, aut nunquam fieri, quia nullum bonum, vel verum, hanc rem al-*  
*vel faciendum, vel omittendum fingi potest, cujus idea in intellectu legati sex-*  
*Divino prius fuerit, quam ejus voluntas se determinavit ad efficiendum mentem* tus, qui

eiusdem explicant plenius.

ut idiale esset. Neque hic loquor de prioritate temporis, sed ne quidem prius fuit ordine, vel natura, vel ratione ratiocinata, ut vocant, ita scilicet ut ista boni idea impulerit Deum ad unum potius quam aliud eligendum. Nempe, exempli causa, non ideo voluit mundum creare in tempore, quia vixit melius sic fore, quam si creasset ab aeterno: nec voluit tres angulos trianguli aequales esse duobus rectis, quia cognovit aliter fieri non posse, &c. Sed contra, quia voluit mundum creare in tempore, ideo sic melius est, quam si creatus fuisset ab aeterno: & quia voluit tres angulo trianguli necessario aequales esse duobus rectis, idcirco jam hoc verum est, & fieri aliter non potest, atque ita de reliquis. Ibid. §. 8. Nec opus etiam est querere, quâ ratione Deus potuisset ab aeterno facere, ut non fuisset verum bis 4 esse 8, &c. Fateor enim id a nobis intelligi non posse; atqui, &c. Quibus principiis convenienter ita alibi instituit. *Part. II. Epist. VI.* *Asi-* hi non videtur de illâ natura esse dicendum, ipsam à Deo fieri non posse; cum enim omnis ratio veri & boni ab ejus omnipotentia dependeat, nequidem dicere ausim, Deum facere non posse, ut mons sit sine valle, vel ut unum & duo non sint tria; sed tantum dico, illum talem mentem mihi indidisse, ut à me concipi non possit mons sine valle, vel aggregatum ex uno & duobus quod non sit tria, &c. atque talia implicare contradictionem in meo conceptu, &c. *Clarius verò, Part. I. Epist. CXV.* Quantum ad difficultatem concipiendi, qui Liberum & indifferens fuit Deo efficere, ut non sit verum, quod tres anguli trianguli sint duobus rectis aequales, aut universim quod contradictoria nequeamus esse simul vera; id facile solvi potest, considerando, potentia divina limites nullos esse posse, deinde etiam, advertendo, mentem nostram esse finitam, atque ita creatam, ut possit concipere tanquam possibilia ea quæ Deus vere voluit esse possibilia; sed non ita, ut possit etiam concipere tanquam possibilia, ea quæ Deus potuisset quidem possibilia reddere, sed quæ tamen ipse voluit reddere impossibilia. Ex priore enim consideratione liquet, Deum non potuisse determinari seu cogi ad faciendum ut verum foret, quod contradictoria nequeamus esse simul; ac proinde potuisse illum statuere contrarium. Deinde vero altera nos movet, quod licet id verum sit, non tamen debemus laborare, ut id comprehendamus, quia natura nostra huic comprehendendo impar est. Quanquam autem Deus voluerit nonnullas veritates esse necessarias, minimè tamen sequitur id illius necessario voluisse, aliud enim prorsus est

est velle illas esse necessarias, aliud velle necessario, seu ad id volendum cogi. Unde exertum & rotundè, *Ibid. Epist. cx. Dico fuisse Deo æque liberum facere, ne verum foret, omnes lineas ductas a centro circuli ad peripheriam esse æquales, æque creare mundum.* Ne quis de Cartesii mente ambigat, istæ verbotum exhibuisse visum fuit. Nunc recta propero ad examen thesæos principalis, puta, *possisse Deum statuerè, ut contradictoria sint simul.*

Primum quidem extra controversiæ alcæ positum est, Divinam potentiam non esse vim brutam, aut merum impetum rationis moderamine destitutum. Minimè quadrat talis cogitatio in absolutam omnibus numeris primi entis perfectionem; quæ non finit id gaudere potentiâ, nisi absolutè perfectâ, atque ideò summè rationali, quæque adeò nihil agat vel agere possit, nisi ex rationis præscripto. Evincitque abundè rerum omnium in hoc universo stupenda concatenatio, atque in suos fines directio, principium sui non minus rationale quam potens. Atquè nemo sapientem æquè agnoscere potest causam primam ac potentem, qui non fateatur, nihil à summa ratione produci posse, quod non ipsa, uti loquitur Philosophus & Poëta Christianus,

*Superno*

*Ducat ab exemplo, similique in imagine formet.*

Jam verò contradictoriorum, qua talium, ideam nullam dari posse, operosâ demonstratione minimè indiget. Scilicet, quæcunque contradictoria sunt, hoc ipso contradictoria sunt, quod secundum unionem illorum prædicatorum, quorum respectu contradictoria existunt, concipi planè nequeant. Etenim, cum rei contradictio consistat in ipsa prædicatorum, ut ità dicam, incompatibilitate, quâ per unum eorum positum alterum prorsus evertitur, & contrâ, manifestum est, rem omnem contradictoriam necessario sui ipsius esse everсивam, quippe quæ tantum ob hoc ipsum contradictoria existit. Quumque rei conformis sit ejusdem idea, etiam, si rei contradictoriæ daretur idea, ipsa sui everсивa foret; id est, nulla omninò dari potest. Quæcunque ergò res verè contradictoria est, hoc ipso quod talis est, etiam absolutè inconceptibilis est: ut inconceptibile & contradictorium sint re verâ voces æquipollentes. Vel itaque rerum contradictoriarum ideas Deum non habere; vel si habeat, eo ipso quia earum

III.

*Contradictoriarum possibilitas cum primæ causæ sapientia nequaquam consistit.*

ideas habet, res illas contradictorias non esse, dicendum erit. Posterius contra hypothefin est. Prius apertâ sequelâ infert, Deum res contradictorias producere non posse. Neque enim, ut jam diximus, quicquam cujus non habeat in sua mente ideam producere is potest, qui non nisi summa cum ratione atque ex consilio sapientissimo producere potest, quodcunque producere potest.

IV.  
Non nostræ  
mentis fini-  
sûdo, sed  
ipsa rei con-  
tradictoriæ  
repugnantia  
causa exti-  
sit, cur  
ejus idea  
formari ne-  
queat.

Non autem hîc evades (ut ab initio viam præcludamus exceptioni, quâ & hanc, & alias nostras, quas adducemus rationes, enervare nituntur) distinguendo inter id quod à nobis, atque id quod à Deo possit concipi. Posse nimirum fieri, ut rei cujuscumque, v. c. contradictoriæ, idea à nobis quidem formari nequeat, quæ tamen formetur à mente divina; cujus ratione incomprehensibilis sapientiæ infinitus est præ nostro intellectu excessus. Verum nihil ista habent, quo quem adstrinximus nodum quicquam solvatur. Non enim hîc quæritur, quid nos concipere possimus, & an non ampliora Deus queat concipere quam nos, quæ nihil ad rhombum: sed quæstio præcisè est, an quæ prædicata nos in eodem conceptu unire non possimus, quia intelligimus, ex introspecta ipsa eorum intrinseca natura, omnem omnino unionem illa respicere, an, inquam, eadem hæc Deus in sua mente unire, si voluisset, potuisset, consequenter & eorundem inter se unitorum ideas nobis indidisse? Ubi notandum, aliquâ specie hæc dici posse, si supponeretur, mentem nostram, tantum ob sui imperfectiorem & finitatem, rem quampiam contradictoriam, v. c. Circulum triangularem, concipere non posse: sic enim cogitare liceret, forsitan perfectiorem intellectum, puta divinum, omnino eam concipere posse. Atqui quoties rem contradictoriam esse intelligimus, clarè distinctèque percipimus eam idcirco nobis judicari contradictoriam, quia ipsa prædicatorum contradictoriorum natura propius introspecta talis deprehenditur, ut, hoc ipso quod talia sint, omnem mutuam unionem à parte sui respuant. Ità quoties cogitamus, vel rei conformis est conceptus, vel non est. Si non sit, res verè contradictoria non erit, sed per errorem mentis talis tantum nobis videbitur. Atqui Deum posse ea quæ falsò contradictoria putantur, neque tamen verè talia sunt, uti indubium est, ità ad præsentem controversiam nihil id attinet. Si verò talis conceptus rei omnino sit conformis, rogare lubet, quo pacto mens

mea

mea verè intelligat duo prædicata ob ipsam sui naturam uniri non posse, si tamen Deus ea & in sua mente unire, & unitorum ideam nobis indere, & unita in eodem subjecto producere quoque queat? Profectò, si ea conjungere possit Deus, vel mens mea prædicatorum illorum naturam non verè concipit, cum cogitat ea uniri non posse; vel eorundem naturam priusquam cum altero alterum conjungat, mutare debet Deus. Utrumque à præsentì quæstione alienum, quando de unionè eorum disputamus, quæ verè contradictoria sunt, & talia manent. Ut absolvam, tentemus in exemplo jam allegato Circuli triangularis quid ipsa rei natura patiat, aut non possit. Posito Circulo, ponitur certè figura, in qua omnes circumferentiæ partes ab eodem centro æqualiter distant: posito Triangulo, ponitur figura, in qua omnes circumferentiæ partes ab eodem centro inæqualiter distant. Distantia hæc partium æqualis in circulo, inæqualis in triangulo, est non nostræ mentis, neque ideæ in nostra mente, sed utriusque tum circuli tum trianguli ipsius verum ac reale, quin essentialè, prædicatum, ab utroque, donec erunt circulus & triangulus, per naturam suam inseparabile. Uniantur nunc ista, si ita lubet! Numquid unitæ figuræ partes omnes à centro distabunt æqualiter? Si distent, circulus quidem erit, sed non triangulus; si non distent, triangulus quidem erit, sed non circulus. Vides, ut utrumque, manens id quod est, cum altero, ratione prædicatorum in quibus pugnant, uniri absolute nequeat? Ineptum itaque est quicquid pro palliando hoc absurdorum absurdissimo in medium adfertur de finitate nostri, infinitate Divini intellectus; quæ neutra rerum naturæ quicquam vel addit vel detrahit. Atque hæc simul & semel, per omnem hanc nostram Dissertationem perpetuò deinceps observanda, monui suffecerit.

Cæterum, non duntaxat in causæ supereminētissimæ absolute omnibus numeris sapientiam gravissimè impingit thesis, asserens, *Deum potuisse efficere, ut contradictoria sint simul*; verum & ipsam Ejus Omnipotentiam penitus evertit: tantum abest, ut infinitati illius ritè agnoscendæ ac stabiliendæ inserviat. Id facile demonstravero, si planum fecerò, eos, qui ad Omnipotentiam pertinere autumant posse contradictoriâ, talem Enti Omnipotenti

V.  
Omnipotentia Divina  
in veram  
rem terminatur,  
non in nihilum; adeo-

quæ nec in  
contradictio-  
ria.

tribuere vim, quæ re verâ *Potentia Nihili* est: quod oppidò absurdum esse, ac Divinâ Majestate prorsus indignum, nemo negaverit, nisi nimium ab omni ratione alienus. Nimirum jam antè ostendimus, rem contradictoriam sui esse everfivam, dum prædicata involvit, quorum alterum tollit alterum; indèque, eam ne concipi quidem posse, confecimus. Quid autem aliud Nihil est, quam quod nec est, nec concipi potest? *Potentia* ergò nihili est, quæ contradictoria potest. Atquæ quæ potentia nihili est, nulla est revera. Omnis enim potentia, omnisque potentiaæ exercitium, cum sit quid reale, realem etiam terminum, in quem terminetur, requirit. Quamobrem potentiaæ alicujus terminum statuere Nihil, aliud nihil est, quam quicquid realis perfectionis in potentia quapiam continetur, reipsâ tollere & abnegare. Dic ergò Deum producere posse contradictoria, dices simul, Deum producere posse nihil: quod ut Omnipotentiam arguat tantùm abest, ut eleganter alibi & acutè concludat ex adverso Augustinus, Deum, *quia nihil non potest, posse omnia*. Labet adjicere, quæ non absimilia urget, *Loc. cit.* Crocius, ubi inter alia disserit hunc in modum: „Quæ combinari possunt, ea possunt habere „rationem objecti, quod cadat sub Dei omnipotentiam. At „contradictoria non possunt rationem objecti habere, quod sub „Dei omnipotentiam cadat. Ratio: quia quod sub Dei omni- „potentiam cadit, id potest entis rationem habere. Est argu- „mentum Thomæ sic scribentis: *Est autem considerandum, quod, „cum unumquodque agens agat sibi simile, unicuique potentia activæ „correspondet possibile, ut objectum proprium, secundum rationem „illius actus, in quo fundatur potentia activæ: sicut potentia calefa- „ctiva refertur, ut ad proprium subiectum, adesse calefactibile. Esse „autem Divinum, super quod ratio Divinae potentiaæ fundatur, est esse „infinium, non limitatum ad aliquod genus entis, sed præhabens in se „totius esse perfectionem. Unde quicquid habere potest rationem entis, „continetur sub possibilibus absolutis; quorum respectu Deus dicitur „Omnipotens. Nihil autem opponitur rationi entis, nisi non-ens. „Hoc igitur repugnat rationi possibilis absoluti quod subditur Divinae „omnipotentia, quod implicat in se esse & non-esse simul. Hoc enim „omnipotentia non subditur: non propter defectum Divinae potentiaæ; „sed quia non potest habere rationem factibilis, neque possibilis. Qua- „*

„cunque



„*conque igitur contradictionem non implicant, sub illis possibilibus continentur, respectu quorum Deus dicitur omnipotens. Ea vero que contradictionem implicant, sub Divina omnipotentia non continentur, quia non possunt habere possibilem rationem* 1. p. q. 25. art. 3. Optime sic, cum Thoma, Vir doctus, qui pergit *ibidem* sexdecim aliis rationibus impugnare dogma Weigelianum. Nos ad nostra revertimur.

Quod si sit admittendum, Deum statuere posse, ut contradictionaria sint simul, utique nihil tam absurdum, atque ab omni ratione alienum dici poterit aut cogitari à quoquam, quod non sub Divinam potentiam cadat, ceu idoneum ejusdem objectum. Etenim, cum contradictionis ratio in hoc sita sit, quod rei cujuscumque prædicata incompatibilia existant & sese tollant, etiam in omnibus eadem illa erit atque uniformis. Itaque, admissio, Deum suâ virtute efficere posse rem contradictoriam unam, admittendum erit pariter, eundem efficere posse quamlibet. Si, V. C. ita potuerit Deus instituire naturam, ut *his ter non sint sex*, aut *tres anguli trianguli rectilinei non sint aequales duobus rectis*, quid nî, obsecro, quâ ista potuit virtute etiam possit sic instituire naturam, ut Possibilia nunquam possint existere, aut, ut Homo non sit rationalis, aut, ut Materia non sit extensa, aut denique, ut Universa natura rerum talis existat qualis existit nunc, & tamen simul existat prorsus alia, quam qualis nunc existit? Hæc, similiaque sexcenta, fieri à Deo posse, numquis sibi persuadere possit, miror. Quod si quis nihilominus conetur, metuendum meritò, ne infinita hæc insania abeat tandem in purum putum Atheismum. Scilicet, si indiscriminatim quidvis possit Deus, faxit itaque (absit dicto profana cogitatio! absit blasphemia!) ut Ipse non sit Independent, adeoque non-Deus. Quid nî cuim hoc possit istiusmodi potentia? Imprimis, si (quod contendunt Novatores) credendum sit ita Deum à se esse posuisse, ut ejus existentia potentie subiciatur in tantum, ut hæc plane sit causa, cur Deus esse perseveret, sicque Ipse se Ipsum suâ propriâ potentia conservet. Quid nî quoque independentem esse faciat creaturam, eamque absolvat ab omni subjectione & reverentia erga sese? Et quis absurditatum finis, si quævis contradictoria Deo statuantur esse possibilia?

## VI.

*Si contradictoria Deo possibilia sint, nihil fingit tam absonum potest, quod non efficere possit, Deus.*

Porro

## VII.

*Si facere  
queat Deus  
ut contradi-  
ctoria sint  
simul, etiam  
res contra-  
dictorias  
credendas  
proponere  
potest.*

Porro, cum verba duntaxat signa rerum sint, nulla major absurditas est in contradictione logica, quæ notat repugnantiam in verbis, quam quæ est in contradictione metaphysica, quæ dicit repugnantiam rei, ratione prædicatorum essentialium. Imò, illa tota huic innititur, cum modus prædicandi eum qui essendi est necessario sequatur. Consequenter, qui Deus facere potest, ut contradictoria simul sint, idem ille de eadem re prædicata contradictoria enunciare quoque poterit. Quod qui absurdum non autumat, viderit, quæ salvari queat, ut non omnis penitus è medio tollatur, oraculorum Divinorum indubitata Auctoritas; cuius fulcrum unicum est immutabilis illa Dei & constans veracitas, quæ in dictis & factis sibi semper similis adversari sibi nequit. Quanto rectius cum Apostolo credimus, oracula Dei esse non posse *vanæ* & ; firmiterque tenemus cum eodem, *adûrator* *ἰσχυρὸς* *θεὸς*: quippe qui, contradictoria revelando, non magis abnegare potest testimonii sui certitudinem, quam *ἀπὸ* *ἑαυτοῦ* *ἰσχυρὸς* *ὑπάρχει*. Verum ista aliud imprimis spectant Novæ Scholæ mysterium (quamvis ab hoc ipso quod præ manibus est procul dubio oriundum) *Deum posse fallere, si velit*: quod Viris pluribus doctissimis confutatum est jam dudum. Unum addo. Frustrâ, si Nostri hominibus credimus, sudarunt, quotquot unquam laborarunt Theologi maximi in conciliandis sacræ Paginæ locis in speciem repugnantibus, ac vindicandis à contradictionibus Fidei Christianæ Mysteriis. Quanto facilius nodos istos uno ictu rescidissent, si sic habuissent, *Deum facere posse, ut contradictoria sint simul*? At tantum non sapuerunt, quibus nondum, uti alibi loquitur profanus Philosophus S. Scripturæ Interpres, *Cartesiana Philosophia lux affulserat*. Quæ etiam destituti in tenebris palparunt haud dubiè quotquot unquam eruditi Divinam Auctoritatem derogarunt Apocryphis Christianorum, Talmudi Judæorum, Korano Muhammedanorum, hoc, inter alia, usi argumento, quod contradictiones in iis reperiantur, cuius omnis vis enervata atque tota acies vitrea est, si stet assertio Cartesiana.

## VIII.

*Admissâ  
contradictio-  
riorum possi-  
bilitate,*

Quin per hanc thesin simul & semel rejiciuntur atque exploduntur quotquot unquam à Theologis & Philosophis quibuscunque adducta fuerunt argumenta ab absurdo consequenti & manifesta contradictione petita. Etenim omnis iste argumentandi modus in

eo fundatur & ex hoc uno robur habet, quod contradictoria nequeant simul esse vera. Facessant igitur Orthodoxi, qui passim rationibus indè desumptis Pontificiorum transsubstantiationem & Lutheranorum consubstantiationem, tanquam argumentis omnium captui manifestissimis, & cuius rectâ ratione utenti indubiis, impugnarunt. Quam enim facilè ex hac philosophatione didicerint ad illa omnia regerere, mentem suam finitam haud debere definire, nùm Deusea, etsi contradictoria sint, facere possit. Habent profectò isti de quo sibi gratulentur, quod ex ipsis nostris quidam tantam dent stragem rationum benè solidarum, quibus constringebantur nimium. Certè virorum prudentium jam olim hæc conjectura fuit, præcipuum Cartesio in asserenda contradictoriorum possibilitate scopum fuisse, ut viam pararet, ad se coram suæ fidei hominibus liberandum facilius ab hæreseos suspitione in negotio de Missa. Quandoquidem enim secundum suæ philosophiæ fundamenta panem verum istuc esse negare non poterat, ubi est extensio modificata omnibus modis quibus extensio panis modificari solet; contrarium tamen ejus credere juberet Romana fides, non aliud restabat effugium, quam tandem fateri, contradictoria quidem hæc esse, atquè non idèò impossibilia Deo, quippe qui contradictoria quoque ut sint vera facere possit. Hac scilicet viâ incedere cum Cartesio Reformatis Doctoribus egregia laus est! Atquè, quæ minus attenditur sua religio, suum saltem eis cordi esse deberet dogma. Si enim contradictoria possint esse simul, quid fiet de pulcherrimis illis Neotericorum argumentis, à contradictione petitis, quibus passim impugnare solent possibilem plurium Mundorum existentiam, duorum corporum nullo tertio interposito distantiam, Telluris quietem, &c. Omnia certè illa aliud nihil erunt quam plumbei pugiones, quibus umbonem Divinæ omnipotentiae, ad contradictoria etiam se extendentis, objicere facillimum fuit cui libet dissentienti. Neque præsidium hic esse potest in ideis innatis, quas alias indere debuerit nobis tali in casu Deus: quid nî namque qui contradictoria potest, possit id quoque quod ideis adversatur?

Deniquè, absurdissimum commentum funditè evertit scientiarum omnium principia & fundamenta, qualia sunt, *Non-entis non sunt affectiones, Agere supponit esse; Totum est majus sua parte,*

X x

IX.  
Quin, subvertitur omnia  
&c.

nullius momenti existunt quæcunque ab absurdo consequenti petita argumenta;

omnium  
disciplina-  
rum atque  
universæ  
quam un-  
quam habere  
potest homo  
certitudinis  
fundamenta.

etc. Nominatim illud primo-primum, *Impossibile est idem simul esse & non esse*; cujus contrarium verissimum est, si contradictoria simul queant esse vera. Id verò si detur, mira sese offert oculis nostris rerum facies. Ineluctabilis nimirum introducitur Scepticismus; dùm, perempto penitus omni certitudinis fundamento, nihil certi relinquitur, præter unum hoc, *Contradictoria possunt simul esse vera*. Atqui per hoc ipsum sic omnia alia ponuntur incerta, ut podem nusquam figere liceat ad emergendum ex vortice, cujus centrum necessariò tandem fuerit stultissima illa persuasio, quæ quondam cujusdam Rhetorii fuisse dicitur, *Benè sentire omnes, errare neminem*. Quæ cogitatio cui allubescit, planè ei motum esse cerebrum oportet. Et quid, obsecrò, statuendum fuerit signatè de binis illis, quibus inædificata existit omnis Novæ sapientiæ moles, columnis, *Quod clarè & distinctè percipio est verum*, &, *Cogito ergò sum*? Nihil certè repugnabit, falsa esse quæ clarè percipiuntur, aut, Cogitantem non existere, si *Idem possit simul esse & non esse*, sive, quodeodem redit, si contradictoria possint esse simul vera. Viderint itaque Recentiores, quantum ità philosophantes arcu suæ ipsi eripiant Palladium. Excipies forsitan, etsi statuatur Deum absolute facere potuisse, ut neque hæc principia vera forent, non tamen eum id facere voluisse. Verùm undè sis certus, non etiam voluisse, si possit? quæro ego. Justissima enim de re qualibet, etsi verissima videatur, manebit dubitandi ratio, quamdiu stat thesis, Deum facere posse ut contradictoria sint simul vera. Sed jam dudum nimius sum in convellendo absurdorum omnium absurdissimo: etenim (benè alibi Aristoteles) *possibile non est, quempiam putare, Idem esse ac non esse*. Plura qui cupit, præter Crocii Anii-Weigelium, conferre poterit doctissimi Herbornii *Disput. Select.* xl. Vol. II. *Meletemar*.

X.  
Potentiæ  
Dei cum  
Voluntate  
ejusdem con-  
fusio præci-  
pua novæ  
assertionis  
basis.

Præcipuum, quo nititur opinio de Contradictoriis Deo possibili-  
bilibus, fundamentum est, quod ejus patroni nullam aliam possi-  
bilitatis radicem agnoscant, præter Divinam volitionem. Nem-  
pè, ajunt, liberrima hæc est, &, uti ad alia omnia extra se, ità  
quoque ad contradictoria, prorsus indifferens; adeò ut per illam  
oppositum ejus, quod nunc per voluntatis actum definitum est,  
si lubitum fuisset Deo, definiri potuisset. Sic V. G. Triangulum  
ideò tres angulos habere volunt duobus rectis æquales, ejusque  
tal

talis ideam nobis indidisse Deum, quia decreto liberrimo definiverat, triangulum tres tantum, non plures, eosque tales & tantos, non alios, angulos habiturum. At si voluisset Deus, addunt, eadem, quâ nunc hoc constituit, libertatis indifferentiâ oppositum ejus potuisset constituere; triangulum scilicet habiturum angulos, qui simul sumpti duobus rectis minores sint, majoresve; iis convenienter, aliam quoque menti nostræ indere trianguli ideam, quam nunc indidit; alium denique de facto, quam nunc produxit, producere potuisset. Hæc omnis philosophatio quid habeat solidi, omnium optime apparebit, ubi inquisiverimus in hypothesin, quam, ceu *ἡ πρώτη ἰδέα*, præsens assertio subternit, quâque contendunt Omnipotentiam Divinam eandem omnino esse cum efficaci Numinis Voluntate. Suffodiendum paucis est hoc fundamentum, quo minori labore diruatur ei inædificata controversa thesis.

Itaque (ut hinc ad ista respondere ordiar) falsum est, Omnipotentiam Dei à Voluntate Ejusdem nullo pacto distingui. Si quod enim inter alia Dei Attributa existat distinctionis rationis ratiocinata, ut vocant, fundamentum, hoc loco certè existit. Nimirum, non quæcunque Deus potest ea aliquando existunt. At quæcunque Deus vult efficaci Voluntate, omnino vi ejusdem aliquandò existunt. Quamobrem non frustrà Potentia à Voluntate in Deo distinguitur pro modo concipiendi nostro. Existere aliquandò omnia, quæ Deus vult voluntate efficaci, per se clarum est; neque enim efficax dici potest Voluntas, quæ non pariter sic sit efficiens, ut reipsâ quæ vult ponantur. Quod imprimis admittendum iis, qui, cum Recentioribus, nullum operum Divinorum principium agnoscunt præter Voluntatem Dei efficacem, indeque Dei ipsam Creationem & Providentiam nihil aliud ab ea esse dicunt. Restat ergò, ut demonstremus, non ea omnia aliquandò existere, quæ Deus potest. Id manifestum evadet, si attendamus, ab una parte solius Dei prærogativam esse, ut, quemadmodum absolutissimè independens est & omnisufficiens, sic quoque perfectiones ipse possideat nullo numero nullo gradu definitas; cum tamen ab altera parte nihil unquam creatum existat, extiterit, aut extitutum sit, quod non sit finitæ perfectionis; quandoquidem de natura rei dependentis est certis perfectionum

XI.  
*Objectionum  
diversitas  
evidens di-  
stinguenda.  
Divina Po-  
tentia à Vo-  
luntate fun-  
damentum.*

limitibus, ex arbitrio causæ à qua pendet atque esse suum accepit, circumscriptum esse. Nunc si conferamus Dei perfectiones infinitas cum perfectionibus rei creatæ finitis, clarissimum est, nullam prorsus harum ad illas esse aut unquam esse posse proportionem. Undè sponte sua sequitur, Deum infinitum, propter ipsam perfectionum suarum infinitatem, nunquam ita creaturæ finitæ has communicare posse, quin modis & gradibus infinitis pluribus & majoribus eas communicare adhuc queat. Viden, nunquam existere posse, quæcunque Deus absolutè potest; posse tamen quin debere existere, quæcunque efficaciter vult? Atqui tam diversa objectorum latitudo nisi sit sufficiens & idoneum inter Potentiam Dei & Voluntatem distinguendî fundamentum, quid erit tandem?

## XII.

*Eandem distinctionem evincit habens sese aliter Potentiæ aliter Voluntatis Divinæ exercitium.*

Adde, exercitium Potentiæ esse actionem transeuntem, quæ per se ponit veram rei, hætenus merè possibilis, existentiam extra Deum; quum actio Voluntatis immanens sit, nullamque talem rei coexistentiam ex sese inferat. Ab æterno nimirum rectè concipias Deum actuosum volendo, i. e. decernendo de futura rerum existentia: at non rectè (loquor de modo concipiendi nostro) actuosum concipis efficaci potentiâ; quippe cujus exercitium connotat actualement rei possibilis extra Deum existentiam, quam æternam concipere nec possumus nec debemus. Atque istis convenienter Theologi & Philosophi passim benè dixerunt Voluntatem Dei in rerum productione se habere ad instar principii imperantis, Potentiam ad instar exequentis. Eodemque fundamento iidem distinxerunt rectè inter Potentiam Absolutam, quâ Deus, sepositâ omni cogitatione de Decreto, attendendo duntaxat ad absolutissimam Ejusdem Sufficienciam, ea posse dicitur, quæcunque velle potest; & inter Ordinâtam, quâ, æternum Decretum supponente, ea potest Deus, quæ pro liberrimo beneplacito ipso facto aliquandò extitura voluit. Undè &, præeunte quoque ipsâ S. Scripturâ, plura semper iisdem habita possibilia, quam quæ Deus aut fecit unquam, aut facturus est. Neque, ut verum fatear, video, quòtueant, salvis suis hypothesibus, hanc Potentiæ Divinæ divisionem, & per consequens ejus à Voluntate distinctionem, rejicere, qui tuentur, Deum *potuisse* statuere, ut contradictoria sint simul, *non* tamen id *posse*, posito quod has non alias nobis indere



*voluerit* rerum ideas. Ecce ! *potuit* Deus absolute, quod idem *non potest*, ex hypothese quod sic *voluerit*, non aliter. Saltem, si Potentia Dei à Voluntate neutiquam sit distinguenda, peribit plane elegantissimus ille Cartesii conceptus, quem dicitur *Part. I. Epist. cxv. Menscm nostram esse finitam, atque ita creatam, ut possit concipere tanquam possibilia ea quæ Deus REVERA VOLUIT esse possibilia; sed non ita, ut possit etiam concipere tanquam possibilia, ea quæ Deus POTUISSET QUIDEM possibilia reddere, sed quæ TAMEN IPSE VOLUIT reddere impossibilia.* Capiat mysterium qui potest ! Sed simul absolvat, obsecro, à crassa contradictione, si nulla inter Potentiam, quâ talia *potuisset quidem* Deus, & Voluntatem, quâ eadem *non tamen reverâ voluit*, intercedat distinctio.

Neque pro confundenda Divina Potentia cum Voluntate quicquam facit, quod contendat, plurimum perfectionis Voluntati Divinæ detrahi, nisi ea per sese sufficiens agnoscatur ad ea producenda, quæ existere vult Deus : qualis procul dubio non agnoscitur, quando indigere statuitur Potentiâ exequente. Speciem enim aliquam ista habere videri possent, si Voluntas in productione rerum penderet à Potentia, ut à principio quopiam reverâ à se distincto. Verum, quandoquidem omnis hæc Potentiam inter & Voluntatem distinctio, consequenter & ordo inter easdem, tantum rationis est, & pro modo concipiendi nostro (quamvis conceptu in re fundato, respectu objectorum & effectorum, uti demonstratum dedimus) nulla utique metui hinc potest vel umbra imperfectionis ; quum aliud nihil sic indicetur, quam Deum res ipso facto extra se existentes producere, non præcisè qua Volentem, sed qua Potentem. Certè, & ipsi dissidentes non illubenter agnoscunt, res creari à Deo formaliter, non per Intellectum, sed per efficacem Voluntatem. An verò & ipsi idè multum perfectioni Intellectus Divini detrahère dicendi erunt, quod Deum, non qua intelligentem præcisè, sed qua volentem res producere statuant ? Nimirum, perfectio cujusque Attributi Divini æstimanda est in suo genere ; non ex collatione eorum prædicatorum quæ aliis Attributis, non huic, formaliter conveniunt. Quis v. G. Visum perfectum dici non debere autumat, si non sonos percipiat ; aut Auditum, si non videat colores. Itaque, quemadmodum perfectissimus est Intellectus Divinus, eo quod perfe-

XIII.  
Neque,  
quando Potentia Dei à voluntate distinguitur, idè minus efficax aut perfecta hæc agnoscitur.

etissimo modo intelligat omnia omninò quæ intelligi possunt, etsi interim tantùm sit principium operum Divinorum dirigens, non formaliter imperans, uti est Voluntas; ità quoque Voluntas Divina perfectissima fuerit, eo quod liberrimè & independenter velit quæcunque vult, etsi rerum creatarum tantùm sit principium imperans, non exequens formaliter, quale est Potentia.

XIV.  
Productio  
rerum cur  
ad Volunta-  
tem Dei se-  
pè refera-  
tur, nullâ  
factâ men-  
sione Po-  
tentia?

Affine isti est aliud, quod pro tollenda inter Voluntatem & Potentiam Dei distinctione adferunt. Passim, inquit, quibusvis Auctoribus, Philosophis & Theologis, ipsisque imprimis Sacris Scriptoribus frequens est & solenne dicere, omnia *esse & creata esse per Voluntatem Dei*, sic ut *Ipsò jubente res existat*. Undè superfluum esse concludunt, in operationibus Dei transeuntibus Potentiam concipere tanquam principium earundem proximum, à Voluntate per nos distinguendum. Sed frustrà sunt, quandò sic arguunt: neque enim ea pugnant, quæ ordinem aliquem inter sese dicunt. Sunt omninò res conditæ, ut jam dixi, per Divinam Voluntatem, tanquam per principium imperans; at non id obstat, quo minus eædem creatæ sint per Potentiam, tanquam per principium exequens. Etiam in Sacris non semel Deus dicitur *extendisse cælos*, aut *formasse terram*, per *Intellectum*. Quid ni ergò, si ista consequentia firma sit, abundet etiam atque expungatur ipsa Voluntas. Possunt igitur creata omnia referri jure merito, & ad Intellectum Divinum, quatenus ex amussi æternarum in mente Divina idearum ea efformantur; & ad Voluntatem, quatenus operatur Deus omnia secundum immutabilis consilii seu decreti propositum; & ad Potentiam, quatenus suam sic exerit sufficientiam, ut ipso facto res existant. Quod interim res Deo *jubente acesse* dicantur, haud caret suâ emphasi. Non quasi jussu Dei sint immediatum existentia rerum, nullâ intercedente ejusdem Potentiâ, principium; sed quod absque mora res existat, ità Volente Deo, quoniam Volitio talis comitem habet Potentiam planè irresistibilem, ac vim insuperabilem, quæ sic operatur absque omni labore & conatu, ut nihil ei obicem ponere queat, quo minus, simulac vult Deus, res existat, qualem vult: quo sensu itè inter Antiquos, *Velle Dei, posse est*. Cæterum tamen non frustrà in Sacris *Mannus Dei cum Consilio* ejusdem conjungitur; sic ut *Mannus sua implere* dicatur, quæ, juxta prædictiones *operatur so-*

*cumdem consilium Voluntatis.* Quæ ipsissimam nostram sententiam hac parte exprimunt. Nunc ista evincendæ distinctioni rationis ratiocinata inter Potentiam Dei & Voluntatem sufficiant.

Eâ verò admissâ, quæcunque adversâ hypothesi nituntur, mole ruunt suâ. Nominatim, quandoquidem possibilia quævis sunt possibilia, & talia denominantur, propter dependentiam à potentia alicujus causæ agentis, patet etiam quæ Deo possibilia dicuntur referenda esse ad Divinam Potentiam tanquam ad radicem suam: non autem ad Voluntatem; undè volibilia seu volita rectius dixeris, qualia sunt ea, de quorum futuritione ab æterno per decretum definitum est penes Deum. Clariora hæc evadent, si, quid per Divinam Potentiam intelligi debeat, verbo explicuerimus. Nimirum, Deus, tanquam Ens perfectissimum, omni perfectionis genere abundans, hoc ipso Omnisufficiens est. Neque sibi tantum existit talis, sed & quibusvis quæ extra Ipsum concipi queunt alia. Attendentes igitur duntaxat ad meram hanc Dei sufficientiam, tam eam sine mensura superabundantem intelligimus, ut hinc facili viâ ducamur, ad cogitandum, ex inexhausta plenitudine entis infinitè boni scaturire posse hos istos participatæ bonitatis rivulos; juxta tritum illud, Omne bonum communicativum sui. Sic ut Potentia Divina aliud nihil sit, quam infinita ejusdem perfectio, seu sufficientia, quatenus ab ea perfectiones quædam finitæ & participatæ fluere aptæ sunt. Quæ eadem perfectiones, spectatæ ut dependentes à prima perfectione, sunt ipsa possibilia. His itaque concipiendis nullà opus esse de Divina Voluntate cogitatione, res ipsa monstrat; nisi indè pergas meditari, Deum, tanquam summam rationem, etiam sibi in suis perfectionibus placere; quin & placere in hoc, quod quædam suarum perfectionum, quæ antè erant merè expressibiles, ipso factò quoque aliquandò sint exprimendæ. At cum illa voluntas approbans sit, hæc decernens, neutra ad ipsam rerum possibilitatem sese extendit, verùm utraque hanc supponit; nempe non per indifferentem Voluntatis determinationem Deus omnisufficiens est, sed ipsâ suâ naturâ. Quid ergò? Uti Deus antecederet ad omnem suæ liberæ Voluntatis actum (loquor de modo concipiendi, quo nos ordinem inter Attributa Dei constituere solemus) Omnisufficiens est, sic & antecederet ad eundem est Omnipotens, seque Ipsum tanquam talem re ve-

XV.  
*Rerum possibi-  
litati  
fundandæ  
sola sufficit  
Dei suffi-  
cientia, ci-  
tram ullam  
de Volunta-  
te ejus co-  
gitationem.*

râ intelligit. Quumque cum Potentia immediatè atque indivisim cohæreant Possibilia, tanquam correlatum cum suo relato, luce meridianâ clarius est, etiam antecederet ad omnem actum Divinæ Voluntatis Possibilia esse taliâ, & tanquam taliâ à Deo cognosci. Falsum igitur est, rem hanc, v.c. triangulum, esse possibilem, aliam, sume circulum triangularem, esse impossibilem, tantum quia liberrimâ volitione sic præfinivit Deus. Consequenter, non jam quæcunque Deus reddere potuit possibilia, sed ea, tanquam possibilia, producere duntaxat potest, quæ cum Omnisufficiencia nexum habent indissolubilem. Tale quid non est Contradictorium; quippe quod, si detur, uti est sui eversivum, sic quoque eversivum foret sufficientiæ Divinæ, à qua flueret, & in qua, ceu causa, contineretur. Quæ omnia tam sunt certa & manifesta, omnemque adeò hic tollunt difficultatem, ut entia citra necessitatem multiplicarem, si dictis quicquam adderem. Quid si verò liberalis quoque sim, demque, (præter ullam necessitatem, contra omnem veritatem) radicem possibilitatis esse ipsam Dei Voluntatem, ne sic quidem conficietur, etiam ad contradictoria eam extendi debere, vel posse. Certè omnis Voluntas rationalem complacentiam connotat; rationaliter autem nemo sibi placere potest in re quam non intelligit. Quare, cum voluntas tendens in rem quæ non cognoscitur etiam sapiente homine indigna sit, ipsa citra controversiam à Deo removenda est; fixumque adeò manet, nihil Deum velle, nihil velle posse, quam quod intelligat. At jam antè demonstratum dedi, rei contradictoriæ prædicata ipsâ suâ naturâ sese ita evertere, ut concipi prorsus nequeant. Nequit ergò Deus velle contradictoria, si quod vult vult rationaliter, i.e. non nisi præviâ intellectûs perceptione.

XVI.  
*Nihil perfectionis divinæ libertati detrabitur, si contradictoria Deum efficere posse, negitur.*

Nihil autem roboris objectioni accedit ex eo quod assumitur, de Actionibus Dei ad extra indifferenter liberis; quasi hinc conficiatur, indifferenti voluntate Deum definire potuisse oppositum ejus quod nunc definivit, atque ideò facere potuisse ut contradictoria fuissent possibilia, æquè ac constituit ea fore impossibilia. Notandum enim est (ne quicquid huc pertinet adducam) receptam hanc regulam, de Deo in actionibus ad extra indifferenti, respicere illorum, quæ possibilia supponuntur, tum futuritionem, venia sit voci, atque existentiam, tum etiam prædicata quælibet  
 corum

eorum extra-essentialia, quæ in rem quamque plura aut pauciora conferre aut non-conferre, pro mero voluntatis placito, potuit Deus. Atqui non eo innui indifferentem esse causam primam ad qualibet attributa, etiam contradictoria, in re qualibet ponenda, vel id satis evincit, quod dici nequaquam possit, citra divinæ perfectionis abnegationem, Deum creaturam, quam voluit producere finitam, dependentem, veram, bonam, &c. producere potuisse infinitam, independentem, falsam, malam, &c. Scilicet nulla est in ente perfectissimo cogitanda libertas, quæ indifferens existat ad ea quæ perfectissimæ suæ naturæ repugnant. Ex quibus signatè liquet, quam sit absurda illatio Cartesii, concludentis *loc. cit.*, etiam ad contradictoria Potentiam Divinam extendi debere, quoniam *liquet, Deum non potuisse determinari, seu cogi, ad faciendum, ut verum foret, quod contradictoria nequeunt esse simul; ac proinde potuisse illum statuere contrarium.* Crassior profectò philosophatio, quam quæ subtilibus Viri meditantis digna sit! Quid enim? Putandumne, Deum cogi, ut sit talis, qualis est vi suæ naturæ? An verò etiam cogitur Deus esse Immutabilis, Æternus, Bonus, Justus, Verax; ut uno verbo dicam, an cogitur esse perfectissimus, ipseque Deus? Certè non magis congruè dici potest, eum cogi, ut sit Omnisufficiens; ex quo prædicato possibilia proximè & immediatè pendere, jam est ostensum. Necessitas aliqua, fateor, hic occurrit, quatenus Deus absolute nequit non is esse qui est: sed non ea est coactio; quippe quæ adjunctam habet complacentiam maximè rationalem, & sic liberrima existens tantum à coactione (quæ notat vim extrinsecam majorem quæ invito infertur) distat, ut huic è diametro adversetur. Cum ergò sint multa quæ Deo vi infinitæ perfectionis conveniunt necessariò, & ad quæ neuti-quam existit indifferens, quamvis interim nihil sit ad quod summa ratio ullatenus dici possit cogi, absurdè infertur, *Deus non potuit ad hoc cogi, potuit ergò statuere contrarium*: cum tantundem id sit, ac si dicam ego, Deus non potuit cogi ad producendam creaturam dependentem, ergò producere potuit independentem; &c. Quod si per coactionem intelligat Cartesius necessitatem ejusmodi, quæ, cum libertate consistens, indifferentiam duntaxat tollit ad oppositum, phrasi quidem utitur durà adeò & impropria, ut tolerari

hîc non debeat; rem tamen ipsam quod attinet, verissimè dicitur, *Deum determinari* (non ab extrinseco, per vim & coactionem; sed ab ipsa perfectissima sua natura, concomitante spontaneâ voluntatis complacentiâ) *ad faciendum ut verum sit, quod contradictoria nequeant esse simul; ac proinde, non potuisse illum statuere contrarium: quod jam fusè demonstravimus.*

**XVII.**  
*Possibilia, tamen si ad indifferentem primæ causæ voluntatem non reducantur, à Deo nihilominus dependent.*

Quemadmodum autem nostra sententia nullam ponit in Deo coactionem, ita neque inducit res possibles à Deo independentes. Potest enim aliquid pendere ab Ente primo, etiamsi non præcisè ab indifferenti Voluntatis determinatione fluat. Quare, quamvis verum sit ex nostra hypothese, rerum possibilitatem, pro modo concipiendi, Voluntatem Dei antecedere, non tamen idcirco ea independentens habetur. Scilicet, quod & antè monuimus, Omnisufficiens est Deus, etiam citrà cogitationem de ejusdem Voluntate: at cum Omnisufficientia immediatè cohærent possibilia, quatenus accuratè loquendo hæc dicunt denominationem in illa fundatam. Dependent itaque possibilia omninò à Deo, tanquam ab Omnisufficiente causa, perfectiones eorum virtualiter includente, quanquam non formaliter tanquam ab indifferenter illa volente. Volente, inquam, indifferenter; Voluntatem enim quam vocant approbantem neutiquam excludimus. Nam quemadmodum Omnisufficiens existit, se id maximè volente, non tamen formaliter talis est, idèò quia se talem esse vult; ità quoque possibilia (quæ ex Omnisufficientia Divina tanquam ex fonte proximè scaturiunt) talia sunt, Deo volente & probante, non tamen propriè idcirco talia sunt, quia Deus ea talia esse voluit. De quo pluribus §. xv. Per nostram ergò sententiam salva stat Deo sua Primitas, creaturis Possibilibus sua dependentia; quatenus denominationis istius, quâ ex possibiles dicuntur, quæque nullam includit earundem existentiam, sive præsentem, sive præteritam, sive futuram, fundamentum primum est ipsa perfectissimæ naturæ Divinæ Omnisufficientia.

**XVIII.**  
*Quæ aliæ esse possunt sensu naturæ rerum contradictorio.*

Amplius ajunt: Potuisset Deus alias planè fecisse rerum naturas, quam nunc easdem fecit; atque adeò alia rebus quibusvis tribuere potuisset prædicata, etiam contradictoria eorum quæ nunc res habent: consequenter, contradictoria quoque objectum esse potentia divina, non videtur negandum. Ad quod observandum venit,



venit, potuisse omnino Deum, loco rerum nunc existentium, *rum possibili-  
tatem mi-  
nime pro-  
bant.*  
produxisse alias, naturæ prorsus ab his quæ nunc dantur diversæ: at tali casu, vel non has produxisset; vel, si & has & illas, non tamen idcirco contradictoria prædicata produxisset unita in eodem subiecto, sed in subiectis etiam contradictoriè hæcenus oppositis. Neque interim & istud negandum est, potuisse res plurimas recipere, Deo ita volente, prædicata quædam contradictoria illis quæ nunc possident. v. c. Sol, qui nunc existit rotundus, produci potuisset non-rotundus, sed triangularis vel quadrangularis. Verum id accipiendum his cautionibus: Primum, ut non eodem tempore eidem rei in fuissent contradictoria prædicata; quo sensu impossibile est, Solem rotundum, existentem talem, simul esse quadratum. Deinde, ut prædicata illa, quorum ratione subiectum fuisset illi quod nunc est oppositum, talia intelligantur, quæ neque rem evertant ab una parte, neque ex essentia ejusdem necessario fluant ab altera parte: quo pacto impossibile est, ex. gr. Solem esse non-extensum, vel non-figuratum. Alterutro modo si rem quampiam prædicata contradictoria recipere posse demonstraretur, verum demum foret, Deum posse producere contradictoria.

Sed, nos modestiæ terminos excedere vociferamur, ac nihil nostro ingeniolo tribuere, qui ausimus finito intellectu Potentiæ Divinæ infinitæ limites ponere, subducendo illi Contradictoria. Verum inanis est affectatæ modestiæ prætextus, quæ sitis duntaxat pro absurda opinione pallianda. Nequicquam etenim is peccat contra modestiam, quicumque ea de Deo & attributis Divinis definit, quæ definienda esse, docet recta ratio. An verò & is violatæ modestiæ accusandus venit, qui negat Dei Intellectum intelligere posse absolute inconceptibilia, aut Voluntatem approbare posse mala turpia, &c. Equidem, quum Intellectus Dei & Voluntas non minus infinita sint quam Potentia, eisque nihilominus finito nostro ingenio per modestiam liceat subducere quædam, quæ infinitæ perfectioni eorum non respondent; scire lubet, quidni pari ratione, citra ullam temeritatem aut immodestiam, liceat negare, Deum posse impossibilia, sive contradictoria? Infinitam, uti oportet, & infinitè perfectam potentiam Divinam agnoscit, qui per eam infinito operandi modo

XIX.

*Nulla parte  
immodestiae  
reus est, qui  
contradictoria  
infinitae  
potentiae  
subducit.*

produci posse fatetur infinita possibilia. Quin contrà parum verècundè de Divina virtute sentire & loqui eos jam ostendimus, qui ad Contradictoria quoque eam extendunt; quandò sic re ipsà Divinæ potentix perfectionem everti, non uno modo ostendimus suo loco. Id verò mirum est, hos modestiæ patronos adeò in totum tum ejus tum sui oblivisci, quoties tam anxie inculcant, potentix Divinæ subduci debere Vacuum, plures Mundos, &c. utpote contradictoria. Haud parvi interim momenti fuerit hoc loco, ante omnia modestiæ rationem habere, ac pro certissima regula menti infigere, ingenio nostro finito infinitam potentiam circumscribi non debere; quippe quæ potest supra id omne quod cogitare possumus: etsi non idèd possit, quod ipsa summa ratio cogitare absolute nequit. Verùm quæ modestiæ regula in hoc negotio præprimis observanda veniat, in ipso hujus Disquisitionis limine jam monuimus satis.

XX.  
*Propositiæ  
questionis  
decisionem  
Philosopho  
minimè sub-  
terfugien-  
dam esse,  
ostenditur.*

Minimè gentium autem hæcenus disputatis satisfaciunt quidam, qui excipiunt & protestantur, non se affirmare, Deum contradictoria posse; sed tantum, non audere se negare, etiam ea quæ contradictionem implicant Deo esse possibilia. Verùm inane hoc effugium est. Nam audivimus Cartesium totidem verbis expressè asserere, quin & adductâ ratione probare, *Deum potuisse statuerè contrarium*; ejus nimirum, *quod contradictoria nequeant esse simul*: quod totò cælo distat ab ista judicii in hoc negotio suspensione, in qua hi sese subsistere prætendunt. Adde, ut non uno argumento jam evicimus, non tantum non vel minimam esse causam, ob quam quis meritò non ausit negare, Contradictoria esse Deo possibilia; sed urgentissimas etiam ex adverso esse rationes, ob quas id negare, & possumus, & debeamus. Deniquè, quicumque negare non audet, ea quæ contradictionem implicant Deo possibilia esse, nihil iste ex lumine rationis de re quacunque determinare unquam poterit firmo fundamento. Quùm enim discursus nostri ac ratiocinia quævis certis quibusdam principiis sic innitantur, ut omnem suam veritatem & certitudinem ab iis mutuentur, & quidem nominatim ab illo, *Impossibile est idem simul esse & non esse*; manifestum est, nihil certi de re quapiam per rationis lumen unquam ab ullo definiri posse, nisi supponatur, per absolutam potentiam Divinam fieri non posse, ut quicquam simul sit & non sit: uti de-

mon-

monstratum dedimus, §. IX. Concludimus ex omnibus hætenus hanc in rem allatis, nihil à quopiam dici ac statui posse absurdum, quam, *Deum potuisse statimere; ut contradictoria queant esse simul.* Quod ipsum demonstrandum proposueramus.

**L**ibet, Corollari loco, ob Quæstionis cum materia quam tractavimus affinitatem, tribus verbis expendere: An rectè dicatur Deus per immensitatem suæ Potentiæ facere quædam posse, quæ eadem facere non possit ob infinitatem suæ bonitatis? Nobis qui sic definiunt Divinæ perfectioni parum convenienter & loqui & cogitare videntur. Quidenim id aliud est, quam Deum ipsum sibi opponere? quandoquidem in ente simplicissimo & Potentia & Bonitas unum idemque sunt; ipsa nimirum natura Divina perfectissima, quæ sibi met ipsi contraria esse nequit. Quin, sepositâ quoquæ Divinâ simplicitate, conceptisque Potentiæ & Bonitatis Divinæ attributis, tanquam distinctis pro modo concipiendi nostro, manet nihilominus, Potentiam Divinam cogitandam esse tanquam perfectissimam, adedque non instar brutæ alicujus vis, sed talem, quæ comites habeat summam sapientiam, justitiam, bonitatem, veracitatem, & quæ sunt similes virtutes. Atqui has omnes à Potentia se jungere necesse habent, qui aliquid Deum posse per potentiam asserunt, quod idem nequeat efficere per bonitatem; consequenter re ipsâ concipiunt potentiam absque illis perfectionibus, absque quibus cogitari à mente nequit virtus Deo digna. Crudum itaque & absolum assertum est, ac minimè Potentiæ perfectissimæ Majestati congruum, Deum fallere posse si velit; ut scilicet satis virium habeat ad fallendum, sed non sinere ejus bonitatem ut fallat. Verùm in præsens manum de hæc tabula!

XXI.  
*Absurdè  
dicitur Deum  
per Potentiam  
posse,  
quod efficere  
nequeat per  
Bonitatem.*

. D I S S E R T A T I O .  
 D E  
 S E N S U U M U S U  
 I N P H I L O S O P H A N D O .

S U M M A R I U M .

- I. *Difficultatis in cognoscendo vero causa est adminiculorum tum defectus tum abusus.* II. *Manifestum id in sensuum perceptionibus, quibus nimium adherent, cum plebeis, Epicurei; III. Parum verò tribuunt Sceptici & Platonici: Medium inter utroque tenent Peripatetici.* IV. *Illorum atque istorum errorem confutare haud operæ pretium existit.* V. *Cartesius hac parte Scepticismi suspensionem apud multos incurrit:* VI. *Dum ad innatas ideas, non sensationes, in cognitione veri, attendere jubet.* VII. *Ejus, quibus id inculcat, adducuntur loca:* VIII. *Et Claubergiana in illa paraphrasis.* IX. *In ea quæ mitigandæ assertionis gratiâ ab utroque admiscuntur observatio.* X. *Status quæstionis fixus, proposito paucis Cartesianæ assertionis sensu genuino:* XI. *Eique oppositâ antithesi, sensus non ad vivendum tantum, etiam ad sapiendum, esse datos.* XII. *Impingit Cartesii assertio in legem propriam, quâ amplissima Dei opera cogitare jubet.* XIII. *Item in aliam, quâ de rerum naturalium fine definire quicquam prohibet.*

hibet. XIV. *Sensus à philosophando remoti, ut major sit innatarum idearum necessitas.* XV. *Quoque amplior esset in fingendis vorticosi mundi elementis libertas.* XVI. *Ad ipsam veri cognitionem acquirendam Sensibus uti jubet Sensuum Opifex.* XVII. *Imò & ad confirmandam Fidei Divinæ certitudinem subjektivam.* XVIII. *Undè efficax, pro Sensu ultra animalis vitæ regimen extendendo, argumentum.* XIX. *Modus cognoscendi statum unionis consequens, Sensus ultra vitæ animalis regimen patere, evincit.* XX. *Maximè, cum in hoc moderando Sensationum cum cogitationibus connexio nullum habeat, juxta novam hypothesin, usum.* XXI. *Rerum materialium existentiam Sceptici negare coacti, tantum quod sensui nullum facerent in philosophando usum.* XXII. *Citra Sensuum opem de plurimis corporum adjunctis accurratè philosophari non licet.* XXIII. *Confirmantibus id suâ praxi ipsis diffidentibus.* XXIV. *Negato Sensibus usu in philosophando, etiam experientiæ nullus manet locus.* XXV. *Non existentia tantum sed & natura corporum adjumento Sensuum intelligitur.* XXVI. *Caendum, ne sensus sumatur adequatum cognitionis Philosophicæ principium.* XXVII. *Discernendæ quoque sensationes veræ à fallacibus, ex debitæ attentionis conscientia.* XXVIII. *Nec non, ex explorata recta organorum dispositione.* XXIX. *Etiam, ex requisita objecti ad organum comparati proportionē.* XXX. *Deniquè, ex constitutione mediū legitimæ.* XXXI. *Neque difficilius hæc attenduntur, quam regulæ quibus intellectus perceptiones reguntur.* XXXII. *Ex sensatione repetita de bonæ sensationis*

tionis requisitis facilius constat. XXXIII. Item, ex plurium sensuum de eadem re consentiente testimonio. XXXIV. Sensuum fallaciæ nil obstant, quo minus eis mens utatur in cognoscendo vero: XXXV. Haud magis quam errores intellectûs hujus usum in philosophando prohibent. XXXVI. Sensuum erroribus, non minus quam intellectûs, corrigendis ad manum sunt remedia. XXXVII. Fallaciæ Sensuum, si philosophationi, etiam vitæ moderamini hos ineptos faciunt. XXXVIII. Innatæ rerum idæ, si vel maximè dentur, absque Sensibus philosophationi non sufficiunt. XXXIX. Quamvis toti composito Sensus convenient, non idè tamen ad vitæ usum præcisè sunt restringendi. XL. Sensus sapientiæ adminicula sunt, etsi sapientes non sint qui eos semper sequuntur duces. XLI. Acumen Sensuum in brutis, eos homini ad philosophandum esse inutiles, nequaquam arguit. XLII. Cum non Deo & Angelis, homini tamen ad intelligendum cur sensu opus sit? XLIII. Quæcunque Sensui clara sunt, eadem quæ talia menti existunt evidentia. XLIV. Contrà, quæ nullo modo sentimus, omnium difficillimè intelligimus. XLV. Intellectûs humani à Sensu dependentis explicatio & demonstratio paucis theorematibus comprehensa.

I.  
Difficultatis  
in cognos-  
cendo vero  
causa est ad-  
miniculo-  
rum tum de-  
fectus tum  
abusus.



I quanta humanis animis naturâ infinita est sciendi cupiditas, tanta quoque iisdem necessariorum ad acquirendam rerum notitiam adminiculorum copia subministrata foret, simulque concessa prudentia ipsis illis, quæ ad manum sunt ritè utendi, nullo equidem negotio ad sapientiam grassari daretur, neque obstaret quicquam quo minus facili labore omnia, quæ



quæ hoc Universo comprehenduntur, intimè perspecta habemus. Verum ista est mentis in hoc rerum statu imbecillitas ac conditio infelix, ut plerumque vel illi non satis opituletur hac parte natura idoneis mediis, vel si ea largita fuerit abundè, non tamen pariter addiderit peritiam eadem dextrè satis ac circumspèctè applicandi ad usum. Atque indè quidem existit in mente hominis crassa ignorantia ac profunda veritatum naturalium inscitia; hinc verò multiplex ac infinitus oritur in indagando vero error. Quoties enim vel instrumentis ad sapiendum necessariò requisitis, vel genuino ac legitimo eorundem usu, destituitur intellectus scire avidus, vix potest evenire aliter, quin tanto majori impetu præceps ruat in falsitatem, quanto flagrantiori desiderio ad sciendum festinat.

Luculentum eorum quæ dixi specimen dant Sensus: quibus quo quis vel minus perfectis gaudet, vel minus prudenter novit uti, eo ferè plus reperit in veri indagine impedimenti. Atquè, quum ut plurimum integri satis plerisque obtingant, laborandum imprimis videtur de genuino ac recto eorundem Usu; de quo jam olim gravissimæ fuerunt agitatae controversiæ. Speciatim (ut alia nunc taceam) disceptatum est jam olim acriter, An, & quis, Sensibus in Philosophando concedendus sit locus? Epicurei cujusvis veri & falsi judicium sic totum in Sensibus collocarunt, tantumque iis tribuerunt, ut nusquam nos per eos falli putarent; quin omnia, quæ discuntur, sensuum regulis metienda esse censerent. Quam eorum sententiam ità exponit Lucretius:

*Quid referemus enim, quod nobis certius ipsis  
Sensibus esse queat, quo vera & falsa notentur?  
Ex sensu namque omnia quæ sunt credita pendet:  
Cui nisi prima fides rectè fundata valebit,  
Haud eris occultis de rebus quo referentes  
Confirmare animos quicquam ratione queamus.*

Cui opinioni eo usquè indulgisse dicuntur, ut credantur hoc fundamento contendisse, solem cæterasque stellas majores non esse quam oculo apparent. Quæ eadem sententia, in plerisque saltem, etiam plebeorum ferè hominum est; qui, dum usu rationis ac judicio parum valent, vix admittunt aliud, quam quod Sensibus usurparunt, atque iis, quæ sic quocunque modo perceperunt, firmissimè omnium adhærere consueverunt.

## II.

*Manifestum  
id in Sen-  
sum percep-  
tionibus,  
quibus ni-  
mium adhæ-  
rent, cum  
plebeis, Epi-  
curei;*

III.  
Parum verò  
tribuunt  
Sceptici &  
Platonici :  
Medium  
inter utro-  
que tenent  
Peripate-  
tici.

In alterum extremum abeuntes Sceptici atque Academici, quòd aliquandò Sensus fallaces & errori obnoxios deprehendissent, eosdem, ceu testes infidos, in totum rejecerunt, omnemque omnino fidem sic iis abrogarunt, ut inde potissimum (quoniam in hoc statu unionis mens humana occasione sensationum res fere cognoscit) natum sit ipsorum *intéresser*, seu assensus de omnium rerum veritate inhibitiò. Et quamvis Socrates ac Plato, ex duriorum quarundam phrasium interpretatione, fortè minus æqua, iis immerito à quibusdam accenseri videantur (majora quippe ista nomina sunt, quam ut stultæ opinioni cum aliqua veri specie prætendi possint) negandum tamen non est, ipsos justo minus Sensibus tribuisse in philosophando, iis penè neglectis, totam veri perceptionem in sola mente collocantes. Quo tendunt versus Parmenidis :

*Nec tibi communis Sensus persuadeat unquam  
Quicquam; ut fallaces oculi, aut ut iudices auris,  
Aut lingua: at ratio dirimat discrimina rerum.*

Inter istos medium tenentes Peripatetici, sic suas Menti partes in judicando vero & falso assignarunt, ut & Sensus suas concesserint: asserentes, primorum quidem principiorum, aliorumque quæ nullam cum Sensibus cognitionem habent, à naturali mentis lumine pendere notitiam; rerum interim singularium ac sensibilibus evidentem ac certam cognitionem à Sensibus etiam petendam esse. Cui sententiæ & nos maxima ex parte subscribimus.

IV.  
Illorum at-  
que istorum  
errorem  
confutare  
haud operæ  
pretium  
existit.

Opinionem quod attinet, & Epicureorum fatuissimam, & Scepticorum perniciosissimam, haud operæ pretium videtur multis eam refellere, quoniam tam manifestè illi experientia multiplex & quotidiana, huic ipsa uniuscujusque conscientia reclamat, ut quisquis evidentissimâ illâ certitudine non fuerit convictus, sperari haud debeat ullis rationibus convinci posse quantumvis validis: conscientiam enim, testem quâvis ratione efficaciorum, ejurasse atque exuisse talis censendus est. Etiam toties ista deliria absurditatis convicta sunt solidissimè à quam plurimis & doctissimis veræ ac certæ sapientiæ assertoribus ac vindicibus, ut refodiendi non videantur errores jam dudum sepulti; quandò ità quibusvis hodiè sordent istæ ineptiæ, ut vix reperiatur, qui prorsus cum istis Philosophis (si Philosophi appellandi sint isti omnis Philosophiæ

genuinæ everfores ac hostes deterrimi) sentiat, saltem se sentire profiteri aufit. Quam ob causam maluerunt deinceps quidam crudam sententiam nonnihil interpolare, atque aliam illi speciem induere, siquo fortè modo nova ei gratia conciliari posset.

In talium, si non Scepticorum, saltem quodammodo Sceptizantium, album multi doctissimi viri non semel, ægrè licet ferentem, retulerunt jam olim Renatum Cartesium; autumantes, tam parùm ejus methodum philosophandi abesse à Scepticorum castris, ut istuc per se tendere videatur, ac viam sternere, si non necessariam, facillimam saltem ac maximè pronam. Quo jure, quâ injuriâ tales censores expertus sit Nobilis Auctor? non hîc dicam; qui prudentioribus id ex sequentibus judicandum relinquere malo. Quicquid ejus sit, displicent vehementer Viri de sensibilibus omnibus (alia, quæ pari in sensu ei habentur, hûc minus pertinent) dubitationes illæ, quibus in ipso philosophiæ suæ limine tantum indulget, ut faciliè supponat, genium aliquem malignum summè potentem & callidum omnem industriam in eo ponere, ut ipsum fallat: sic quidem ut det, cœlum, terram, cunctaque externa nihil esse aliud quam ludificationes; seque ipsum consideret, tanquam manus non habentem, non oculos, non carnem, non aliquem sensum, sed hæc omnia se habere, falsò opinantem. Displicent, inquam, ista vel idèò, quod, si ea Sceptico largiamur, necessariò supponatur ac sequatur, Sensuum nullum esse in philosophando usum; quo asserto nimium Scepticis herbam porrigi judicamus.

Asserit hoc nihilominus totidem verbis Cartesius. Tam est difficile medium tenere! Præconceptas ab infantia erroneas opiniones, ex fallaci Sensuum dictamine majori ex parte oriundas, feliciter philosophaturo abdicandas esse, merito inculcaverat; Sensusque omnes non semper fidos esse testes rectè demonstraverat vulgari experientiâ turris, cominus quadratæ, eminus conspectæ rotundæ. Si, quod indè sequebatur, conclusisset, semper & ubique in indiganda rei veritate unicè quibusvis Sensationibus standum non esse, sed adhibendam, in discernendis iis veris à fallacibus, debitam prudentiam; si, inquam, sic conclusisset, neque universam Sensuum in sapiendo fidem unâ liturâ delevisset, promiscuè eam omnem annumerando infantia præjudiciis, tam sibi feliciter

V.  
*Cartesius  
hac parte  
Scepticis  
suspicionem  
apud multos  
incurrit:*

VI.  
*Dum ad innatas ideas, non sensationes, in cognitione veri, attendere jubet.*

cavisset à tristi Scepticismi periculo, quam ab Epicureismo totus rectè recesserat, neque adeò, quod ajunt, dum vitabat scyllam, in charybdein incidisset. Nunc verò perperam inferit (ut alibi sæpius ita hìc quoque Platonem nimium secutus) in philosophando sic unicè attendendum esse ad ideas omnium rerum unicuique innatas, ut Sensus habeantur in super; quippe quorum genuinus usus non alius sit, quam in moderanda hac vita; adeò ut, si ad veritatis contemplationem Sensationem nostras extenderimus, merus sit iste futurus earundem abusus.

## VII.

*Ejus, quibus  
id inculcat,  
adducuntur  
loci:*

Sed ne, quod solent, conquerantur ejus affectæ, minus rectè nos mentem ejus vel capere, vel proponere, ipsum se explicantem audiamus! *Princip. Part. II. Art. III.* hunc in modum disserit.

„ Satis erit, si advertamus, sensuum perceptiones *non referri, nisi*  
 „ ad istam corporis humani cum mente conjunctionem, & nobis  
 „ quidem ordinariè exhibere, quid ad illam externa corpora pro-  
 „ desse possint, aut nocere; *non autem, nisi interdum & ex acci-*  
 „ *dentis*, nos docere, qualia *in se ipsis* existant. Ita enim sensuum  
 „ præjudicia faciliè deponemus, & *solo intellectu*, ad ideas sibi à  
 „ natura inditas diligenter attendente, hic utemur. Atque ibi-  
 „ dem in lemmate marginali: „ Sensuum perceptiones, *non quid*  
 „ *revera sit* in rebus; sed quid humano composito profit vel obis-  
 „ docere. Hisce parallela occurrunt, *Medis. vi. p. 42.* „ Natu-  
 „ ra docet quidem ea refugere, quæ sensum doloris inferunt, &  
 „ ea prosequi quæ sensum voluptatis, & talia: sed *non apparet il-*  
 „ *lam præterea nos docere ut quicquam ex istis sensuum perceptio-*  
 „ *nibus*, sine prævio intellectus examine, *de rebus extra nos positis*  
 „ *concludamus*, quia de iis verum scire ad *mentem solam*, non au-  
 „ tem ad compositum videtur pertinere. Ac porrò post pauca,  
 „ Sed video me in his aliisque permultis *ordinem naturæ pervertere*  
 „ esse assuetum, *quia nempe sensuum perceptionibus* (quæ propriè  
 „ *tantum* à natura datæ sunt, ad menti significandum, *quantum*  
 „ *composito*, cujus pars est, *commoda sint vel incommoda*, & cate-  
 „ nus sunt satis claræ & distinctæ) *utror* tanquam regulis certis, *ad*  
 „ *immediatè dignoscendum*, quænam sit corporum extra nos posi-  
 „ torum essentia, de quâ tamen *nihil*, nisi vakde obscurè & confu-  
 „ sè, *significant.*

## VIII.

*Et Jan.*

Quem textum hoc modo interpretatur, qui fidus habetur præ aliis

aliis Cartesii Paraphrastes, Claubergius, *Leß.* IX. §. 172. „Sed non video hanc naturam nos insuper docere, ut ex istis sensuum externorum perceptionibus, sine prævio maturæ rationis examine, de rebus extra nos constitutis certi aliquid concludamus: quoniam veri investigatio ac scientia ad solum animum nostrum, non autem ad totum hominem, quatenus animo & corpore constat, videtur pertinere. Ac porro, §. 177. & seqq. „Sed animadverto, nos in his modo commemoratis, aliisque id genus plurimis in rebus, solere vires à Deo nobis datas in alium usum convertere, quam datas esse cognoscimus; quod est naturæ ordinem pervertere. Nam istæ sensuum perceptiones quia ad totum compositum spectant, concessæ utique nobis non fuerunt aliâ de causâ, quam ut indicarent animo, quænam res conveniant aut noceant toti composito, cujus ipsa pars existit. Atque in eum usum si referantur, claræ satis ac distinctæ sunt, adeo ut vitæ totius animalis regimen ab iis pendeat, &c. Hic sensuum genuinus usus cum sit, nos iis utimur tanquam puræ veritatis magistris, quasi regulas nobis certas suppeditarent, quarum beneficio, absque ulla longiore rationis deliberatione, dijudicare liceat, quæ sit rerum extra nos positarum natura atque inhærentes proprietates, de quibus tamen nihil, nisi confusè & obscurè admodum, ipsi queunt docere. Quod dum facimus, quis non videt nos naturæ ordinem sapientissimum pervertere?

Immixta sunt, fateor, his Locis verba nonnulla, quæ emolliendæ thesi inservire primo intuitu videri possunt; qualia sunt illa, absque ulla longiore rationis deliberatione, pro quo dixerat Cartesius, sine prævio intellectus examine, sive immediatè, &c. Atquæ minimè tollendæ hic difficultati ea sufficere, vel ex ipso constat Cartesio. Quis enim eorum qui posterioribus hisce seculis Philosophi esse voluerunt, asseruit unquam, sic certas regulas sapiendi nobis suppeditare Sensus, ut rationis deliberatione opus non sit! Quis extitit quin imò eorum, qui non iterùm iterùmque inculcaverit, circumspicè attendendum semper esse ad Sensus Objectum, Medium, Organum; nec quicquam de re sensibili judicandum, nisi post mentis examen plene constet de eorundem integritate? Estne id immediatè, sine prævio intellectus examine, secundum Sensem judicare? Licet verò ista ignorare non potuerit Cartesius, carpit nihilominus

bergiana in  
illa para-  
phrasia.

## IX.

In ea qua  
mitigandæ  
assertionis  
gratiâ ad-  
miserantur  
ab utroque  
observatio.

omnes qui ante se extiterunt, quique fidem prorsus sensibus adhibuerunt, quod error eorum quidem emendatus fuerit aliquantulum, ubi Sensus in quamplurimis nos fallere agnoverunt (qui autem agnoverunt, nisi prævio intellectûs examine?) sed radicitus sublatum non fuerit; ostendendo videlicet, non Sensibus, sed intellectui soli, res distinctè percipienti, rectitudinem inesse. Aded quidem ut hoc imprimis fundamento, incredibili cum confidentia perstringere non dubitet omnes, qui ab antiqua Philosophia initium fecerunt, quod quo plus in ea defudarunt, tanto soleant ad veram percipiendam esse ineptiores. *In Epist. Principiis præfixa.* Ne addam, ne quidem de rebus extra nos positis, in ordine ad totum compositum cui profint aut noceant quicquam ex Sensuum perceptionibus concludendum esse, *sine prævio intellectûs examine:* nisi probanda sit infantium imprudens præcipitancia, ex hoc solo, quod res oculis arridet, acutum cultrum, flammam, aliaque noxia avidè apprehendentium. Undè manifestum est, frustrà, & tantùm ad colorem obducendum regulæ, de Sensibus in dignoscendo vero non fidendo, addi istud de prævio intellectûs examine; vel ut Claubergerius explicat, *longiore rationis deliberatione.*

## X.

*Status questionis fixationis si-  
xus, proposito paucis  
Cartesiana  
assertionis  
sensu genui-  
no:*

Ut genuina Neotericorum de Sensuum Usu sententia sit, hos non alio fine ac scopo nobis esse concessos, quam ad hoc unum, ut, cum brutis animantibus, per eos discernamus objecta quæ nos tanquam prosequenda si sint utilia, tanquam evitanda si sint nocitura, discernere ipsa naturæ necessitas, ad vitæ animalis conservationem, cogit. Tantum verò abesse, ut sensationes extendere quoque debeamus ad examinandam earum ope ipsam rerum extra nos positarum veritatem, ut potius is sit purus earundem abusus, ac sapientissimi naturæ ordinis perversio, ut imprudens, ita erroris fecundissima mater. Atque istis convenienter doctiorum consueti alibi publicatam vidimus hanc thesin, uncialibus literis, nequid hæreat scrupuli, sic expressam. *Philosophi Scholastici &c. non tam sæpius hallucinantur quam semel: neque enim Sensibus desinunt fidere, quorum natura est, NUNQUAM NON FALLERE ET SEMPER ERRARE. Nam ne oculos semel aperire, manus extendere, os diducere & contrahere, &c. quimus, quin innumerabilium errorum exercitus ac integra plaustra iis se insinuent. Ut nec dici possit, infallibilem sensum, qui nec menti imponas, nec foris circumveniasur,*



veniantur, dari. Hinc intellectui cum sensibus, quos in certis tene-  
mur ejurare, *lucta ἀφραδίῃς* & sempiterna est: Cujus ARBITRUM  
VERE SAPIENTEM, ΣΟΦΟΝ ΦΙΛΟΣΟΦΟΝ, dicimus. Ipse  
Pyrrho, si ad nos redeat redivivus, dubito, mentem suam ex-  
primere an possit efficacious, an ausit clarius?

Has nos assertiones, aliasque his affines atque ex his ortas,  
prorsus rejicimus ac in totum repudiamus, tanquam falsissimas  
non tantum, sed & periculosissimas, quin tales, quæ per se com-  
paratæ sunt, ad omnem rerum sensibilem certam ac indubitatam  
notitiam omninò evertendam ac penitus extirpandam, ac genui-  
nam Scepticorum de sensibilibus *ἡμετέριον* iterum inducendam. Non  
quidem negamus, salutare animalis vitæ moderamen ita in solidum  
à Sensuum directione pendere, ut absque ea nullâ ratione consistere  
queat (quamobrem quoque hætenus brutis per æquè ac homini-  
bus eorundem usum à natura concessum esse videmus; de quo  
deinceps plura): non tamen istâ vitæ gubernatione Sensus in ho-  
mine omni suo munere defungi autumamus, sed & nobiliori eos  
fini destinatos esse asserimus; statuimusque, eundem rectum  
ac genuinum esse Sensuum in homine usum, quando mens eos  
legitimo modo (quis iste sit? exponemus infra) adhibet tan-  
quam organa à Deo sibi concessa, non tantum ad percipienda ea,  
quæ toti composito commoda sint aut incommoda, quâ talia;  
sed imprimis quoque ad indagandam rerum extra nos positarum  
certam veritatem, cum earum quæ sub sensum directe cadunt, tum  
aliarum per se insensibilem, quibus cognoscendis, interveniente  
rationis discursu, sensationes præbent saltem occasionem. Verbo,  
Sensus non tantum ad vivendum, sed & ad sapiendum, nobis à  
Deo esse indultos.

Miror verò vehementer (ut id præmittam, priusquam ad ipsa  
rationum momenta excutienda accedo) miror, inquam, qui tam  
confidenter ausit determinare Cartesius, Sensuum perceptiones  
tantum datas esse à Natura (quo nomine Deum intelligi, ma-  
nifestum est) ad menti significandum, quænam composito com-  
moda sint vel incommoda; cum hac assertionem in utramque regu-  
lam, quam, ut rectè philosophemur, imprimis observandam  
inculcat, *Princip. III. Art. I. II.* tam incurrat directè, ut non  
possit magis. Prius est, *Ut attendentes ad infinitam Dei poten-*

## XI.

*Eique oppo-  
sitâ anishe-  
si, sensus  
non ad vi-  
vendum tan-  
tum, etiam  
ad sapien-  
dum, esse  
datos.*

## XII.

*Impingit  
Cartesii as-  
sertio in le-  
gem pro-  
priam, quâ  
amplissima  
Dei opera  
cogitare ju-  
bet.*

*riam*

tiam & bonitatem, ne vereamur nimis ampla, & pulchra, & absoluta ejus opera imaginari. At, cum Sensationum Usus tantum ad vitæ hujus regimen restringis, nonne vereris nimis ampla, & pulchra, & absoluta opera Dei imaginari? Quidni potius Sensus eorumque Usus tam amplum, pulchrum, absolutum, tibi imaginari quam potes, ne fortè minus magnificè de Creatoris potentia sentire videaris? prout hoc argumento compulsus imaginariis tibi mundum, nullos extensionis suæ fines habentem. Imprimis autem non hîc limitanda videbantur opera Dei, cum non repugnet, plurima rerum corporearum attributa à Sensu nostro menti offerri prout in se sunt: undè hæc saltem hunc idoneum esse posse, non tantum ad discernenda noxia ab utilibus, sed & ad dignoscendas ipsas quarundam rerum veritates, juxta hanc regulam, in præjudicium absolutæ divini operis amplitudinis, negandum non videtur. Frigidæ quædam allatas hûc ratiunculas quod attinet, eas suo loco diluemus.

## XIII.

Item in aliam, quâ de rerum naturalium sine definire quicquam prohibet.

Alter canon, quem, ad rectè philosophandum, præscribit Auctor, est, *Ut etiam caveamus, ne nimis superbè de nobis ipsis sentiamus; quod fieret maxime, si fines quos sibi Deus proposuit in creando Universo, ingenii nostri vi comprehendi posse putarem.* Quodque hîc de toto Mundo asserit, idem alibi extendit ad quævis hoc Universo comprehensâ. Ità enim Princip. I. Art. XXVIII. ait, *Causas finales rerum non esse examinandas, quia non tantum nobis debemus arrogare, ut ejus (Dei) consiliorum participes esse putemus.* Atque iterum in Respons. ad Gassendum, disertè affirmat, *Par non esse, quo sine Deus quidque fecerit divinare; Considerare quem finem Deus sibi in regendo Universo proposuerit, in Physicis esse ineptum; Nec fingi posse, aliquos Dei fines, magis quam alios, in propriis esse, cum omnes in imperferutabili ejus sapientiæ abisso sint eodem modo reconditi.* Quam istæ omnia sint falsa, hoc loco demonstrare nil attinet. Præstitit id fusè Cartesianarum Meditationum Triumphator Gassendus, *Disquisit. sua Metaphys. p. 201. & seqq.* At nunc demus ea esse verissima! Si sic, quid ergo tam audes de te ipso sentire superbè, ut non divinare tantum præsumas, sed & rotundè pronunciare, Sensuum perceptiones (quæ res procul dubio physica est) à Natura tantum datas esse, hoc sine, ut significant menti, quænam homo ceu

com-

compósito incommoda refugere, ceu commoda prosequi debeat?

Quod nisi nefas quoque sit inquirere in fines, ob quos, etiam contra regulas quas ipse ad rectè philosophandum præscribit, tam diligenter inculcare voluerit Cartesius, sic solius intellectus esse verum indagare, ut nullo modo pertineat ad Sensum, operæ pretium videtur diligentius eos examinare, cum haud leve id sit allaturum ad intelligentiam sequentium momentum. Est verò ad Novæ Philosophiæ tum fundamenta tum methodum perscullatius attendenti non valdè difficile de assertionis hujus scopo divinare, conjecturâ etiam plus quam conjecturali. Nempè, ante omnia id sollicitè agendum erat, ut in tuto foret præcipuus hujus Philosophiæ thesaurus, innatæ illæ menti, à primo ejus ortu, omnium rerum ideæ. Neque enim absque earum apparatu salvari potest Nova Sapientia, imprimis Metaphysica, ubi omnis summa eorum, quæ in ea observanda præcipiuntur, hùc unicè redit, ut, depositis præjudiciis, ordine attendamus ad notiones quas ipsimet habemus in nobis; ex quibus claris & distinctis facile deducemus, citra ulla alia adminicula, existentiam & mentis nostræ cogitantis, & Dei cæterarum rerum causæ, & propositionum æternæ veritatis, & naturæ corporeæ, & Sensuum nos afficientium. *Princip. 1. Artic. penult.* At verò periculum non leve imminabat istis notionibus ingenitis, tanquam supellectili otiosæ, si scientiam rerum etiam per Sensationes acquiri posse, admitteretur. Quùm ergò quantum Sensibus eorumque perceptioni in cognitione veri tribuitur, tantum decedat Cartesianis ideis, ad has, & quæ ab his pendet Novam methodum totam salvandam, necessarium erat prorsus Sensuum in Philosophando adjumentum remove, nullumque eis alium in homine relinquere Usus, quam quem habent in brutis, uti ratione, sic ideis istis, destitutis.

At neque minor necessitas erat in Recentiori Physica, ob quam mens à Sensibus abducenda videbatur. Ea quippe imprimis in summo versabatur discrimine, si examini Sensuum subjecta fuisset. Scilicet, haud erat exiguum quod Cartesius moliebat opus. Animus erat lectoribus depingere Universum, quod sit infinita ingentium ac innumerabilium vorticum compages; in qua dominantur elementa invisibilia, materia subtilis, particule striatæ,

XIV.  
Sensus à  
philosophan-  
do remotus, ut  
major sit  
idearum in-  
natarum ne-  
cessitas.

XV.  
Quoque am-  
plior esset in-  
surgendis  
vorticosis  
mundi ele-  
mentis liber-  
tas. •

globuli ætherei, quæque indè fluunt id genus sexcenta. Machinam ejusmodi idealem & in mente confictam pro vero Mundi systemate difficulter obtrudi posse hominibus sanà mente per integros sensus utentibus, facile eierat prævidere; ut qui ignorare non poterat, defuturos nequaquam, qui, obstupefcentes ad tam longam figmentorum catenam, non sine causa urgerent idem, quod quondam Leucippo objiciebat Lactantius, disputans contra Epicureos, *Lib. de Ira Dei, Cap. x.* Minuta illa semina, inquit, quorum concursu sortuito totum coisse mundum loquuntur, ubi aut unde sint? quæro. Quis illa vidit unquam? quis sensit? quis audivit? An solus Leucippus oculos habuit? solus mentem? qui profectò solus omnium cæcus & excors fuit, qui ea loqueretur, quæ nec ager quisquam delirare, nec dormiens possit somniare. Quatuor elementis constare omnia Philosophi veteres asserébant: ille noluit, ne alienis vestigiis videretur insistere; sed ipsorum elementorum alia voluit esse primordia, quæ nec videri possint nec tangi, nec ulla corporis parte feriri. Exauktorandi ergo erant in ipso Novæ Physicæ limine Sensus, eorumque in Philosophando Usus: sic enim difficultates hîc moturis promptum erat os obturare, increpando eos ceu crassos ac sensuales nimium Philosophos, qui imperiti sapientissimum naturæ ordinem pervertant, dum Sensationes ultra vitæ regimen extendunt ad veritates etiam Philosophicas, in quibus cognoscendis solo intellectu, non Sensibus sit utendum. Nempe, facilè nigrum pro albo obtrudes alicui, si semel id impetaveris, ut oculos sibi effodi patiatur: neque unquam tutius fingitur, quam cum media, quibus solis res detegi poterat, surripiuntur. Rursus nequeo præterire literatissimum, ex quo modò quædam allegavi, Lactantium, in casu non multùm absimili, pro Socrate contra Dogmaticos, sic disserentem, *Lib. 11. De Falsa Sapientia, Cap. 111.* Age, opinemur, quid nunc in foro geratur, quid in curia? Longum est id quoque, dicamus, interposito uno pariete quid fiat? Nemo potest id scire, nisi qui audiverit, aut viderit. Nullus nimirum audeat id dicere: quia statim, non verbis, sed re ipsa presenti refutabitur. Atqui hoc idem faciunt Philosophi, qui disputant in cælo quid agatur? Sed eo se id impune facere arbitrantur, quia nullus existit, qui errores eorum coarguat. Quod si existimarent descensurum esse aliquem, qui eos delirare ac mentiri doceret,

ceret, nunquam quicquam de iis rebus, quas scire non possunt, disputarent. Nec tamen ideo felicior putanda est eorum impudentia & audacia, quia non redarguuntur, &c. Itaque minime horum ignarus Cartesius (absolvam hæc verbis doctissimi H. Vossii, disputantis contra ipsum, de *Natura Lucis*) in eo præcipuè callidus fuit, quod cum à paucis postulatis & communibus valde notionibus Philosophiam suam aucticatus sit, in progressu tamen operis nemo plura assumpsit, & quidem talia, quæ nec ab ipso demonstrata sint, nec demonstrari à quoquam possint, etiamsi vim intellectui inferamus: quodque, cum tam plana & perspicua præmittat principia, max tamen iis relictis alia promat, quæ neque visu neque sensu percipi possunt, globulos scilicet, particulas striatas, & elementa invisibilia. Illis positis, non probatis, incipit Philosophari; Quia nempe ubi oculi & sensus deficiunt, illic fingendi incipit libertas.

Intenderit verò quodcunque Cartesius! Nos, an rectè à cognitione veri Sensus secluserit, videamus! Ac primò quidem (quod argumentum unum potest esse instar omnium) ipse de Sensuum Ufu legitimo pronunciet eorundem Conditor Deus! Aliud quid præter discretionem commodi & incommodi in ordine ad totum hominis compositum, huic cum brutis communem, se hic intendisse tam Is inculcat disertè in Sacris, ut nequeat magis. Quid illud est, quod jubemur oculos attollere in altum, ac videre quis creaverit ista; sic ut ex sensibilibus creaturarum existentia, per Sensum certò cognita, ducendi simus ad contemplandam & agnoscendam æterni Numinis Divinitatem & potentiam? An verò & ista veritas, ope Sensus ex sensibilibus à mente hausta, ad animalis hujus vitæ regimen, ad discernenda noxia à toti composito profuturis, tantum pertinet? An verò & hic solo intellectu, contradistinctè ad Sensus, utendum? Equidem si Sensui in investiganda scientia veritatis omnium primæ ac maximè fundamentalis sit Usus, & quidem tam necessarius, indubitatus, ac evidens; ut notitia illa Dei per Sensum ex Sensibilibus hausta etiam sufficiens sit ad Gentium ἀναπολογισίαν, nescio, in qua alia veritate cognoscenda ei concedi non debeat locus? Nescio, quo colore, Sensuum perceptiones non alia de causa nobis esse concessas, quam ut indicarent animo quæ sint convenientia ac nocitura toti composito, affirmetur? Quod ipsum Cartesium & Claubergium rotundè affirmantes audivimus.

XVI.  
Ad ipsam  
vericogni-  
tionem æ-  
quirendam  
Sensibus uti  
jubet Sen-  
suum Opi-  
sex.

XVII.  
Imò & ad  
confirman-  
dam Fidei  
Divinæ cer-  
titudinem  
subjectivam.

Quin, parùm videbatur Spiritui S. ad veritatem naturalem & Philosophicam cognoscendam Usum Sensuum præscribere; in ipsis etiam rebus Fide Divinâ credendis Sensu, tanquam puræ veritatis magistro, nos uti voluit ad earundem in mente nostra confirmationem. Hinc in fidei vacillantibus sæpè nimium indubitatam obsignationem, ac certiorum gratiæ spiritualis insensibilis persuasionem, sensibilia quædam signa ac sigilla, Sacramenta putata, instituit. Hinc Servator D. Jesus ad corporis sui, crucifixi nuper ac mortui, nunc redivivi, contrectationem, tanquam ad testem, qui *immediatè dignoscere* doceat resurrectionis *veritatem*, incredulum Apostolum invitavit. Hinc & ipsi Apostoli auditores suos ad fidem hortantes, plenissimam iis quæ annunciabant certitudinem conciliaturi, ad Sensum recurrunt, affirmantes se quæ persuasa esse cupiebant illis, auribus audivisse, oculis vidisse, manu contrectasse. *Falsantiquè*, inquit gravissimus Patrum Tertullianus, disputans contra Academicos, *Lib. de Anima, Cap. de Quinque Sensibus, testatio, si oculorum & aurium & manuum Sensus natura mentiuntur*. Perversissima utiquè, dicamus nos (absit blasphemia!) sapientissimi naturæ ordinis perversio, si Sensuum perceptiones tantum à natura date sunt ad significanda in vitæ animalis regimine composito commoda & incommoda, non verò ut iis utamur tanquam *puræ veritatis magistris*, ad aliquid certi concludendum de rebus extra nos constitutis! Ineptissima methodus demonstrandi certitudinem rei, *si Sensus in certis tenemur ejurare!* Quin, fallacissima fallacia! si *Sensuum natura sui nunquam non fallere, & semper errare!*

XVIII.  
Unde effi-  
cax, pro  
Sensu ultra  
animalis  
vitæ regi-  
men exten-  
dendo, ar-  
gumentum.

Extra oleas nos hic vagari & à scopo planè aberrare, regeres procul dubio cum in istis non agatur de veritate quapiam Philosophica per Sensum cognoscenda, de qua hoc loco erat controversia; sed de rebus fide divinâ recipiendis, quæ Sacra naturalibus permiscenda neutiquam sunt. Verùm, præterquam quod jam assignaverim veritatem etiam Philosophicam (naturalem scil. Dei notitiam) secundum methodum Spiritus S. ex sensibilibus beneficio Sensuum certò cognoscendam, etiam cætera firmissimum nobis suppeditant argumentum, ut vocant, à majori ad minus. Nempe, si rebus fide divinâ, omnis falsitatis ac erroris periculi prorsus experte, firmiter credendis earumque indubitatæ certitudini firmandæ impri-



imprimis serviat Sensuum testimonium, multò magis rebus naturalibus, quarum æqua cum istis certitudo neque est, neque esse potest, certò cognoscendis idem potest esse adjumento. Undè invictà sequelâ fluit, Sensus à natura, i.e. Deo, non *tantum* homini esse *datos*, ad discernendum quid vitæ hominis animali profit aut noceat, sed & alium esse genuinum eorundem Usus, atque excellentiorem præ illo quem cum brutis habet communem, docere scilicet etiam quid re verâ sit in rebus: neque idèò quicquam nos peccaturos, si iis utamur tanquam puræ veritatis magistris, ad judicandum secundum eos de rebus extra nos positis. Nec potuimus istud hoc loco præterire, quandoquidem nemo accuratius operum Dei finem ac usum edocere potest, quam ipse opifex, cujus hîc vox argumentum est quavis ratione efficacius. Nihil verò sic committi Philosopho Christiano indignum, ostendimus alias & alibi in *Exercit. de Auctoritatum in Philosophia Usu & Abusu*.

Et consentit cum isto Dei, de Sensuum Usu etiam latius quam ad vitæ animalis regimen extendendo, testimonio ipsa rerum natura; sive modum cognoscendi à parte mentis, sive veritates cognoscendas à parte rei, sive deniquè ipsum vitæ nostræ regimen, prout id explicat nova hypothesis, spectemus. Naturam & constitutionem Animæ nostræ, quatenus in statu Unionis cum hoc corpore organico in eandem personam juncta est, si attendamus, deprehendimus inter actiones cogitativas illius & sensationes hujus nexum tam arctum & concatenationem tam insolubilem, ut vix ulla in corpore benè disposito fiat organorum Sensui inservientium motio, quin ilicò mens occultâ quâdam quasi vi trahatur ad judicium ferendum de re sensibili, secundum illam Sensûs perceptionem: atque iterùm vicissim vix unquam anima rationalis judicat, quin ne quidem de re quapiam cogitat, nisi conceptui formando facta fuerit per aliquam sensationem occasio. Undè & peculiaris quædam in mente nostra deprehenditur promptitudo & facilitas percipiendi res corporeas præ spiritualibus. Quæ omnia (tam evidens atque explorata existit hæc veritas) ipsemet Cartesius agnoscere cogitur, quandò *Princip. 1. Art. LXXIII.* fatetur, *Mentem nostram omnium difficillimè ad illa attendere, quæ nec sensibus, nec quidem imaginationi presentia sunt.* Cujus rei causas ibidem investigans verissimè ait, id contingere, *sive quia mens talem*

## XIX.

*Modus cognoscendi statum unionis consequens, Sensus ultra vitæ animalis regimen patere, evincit.*

ex eo quod corpori conjuncta sit, habet naturam; sive quis in primis annis, cum tantum circa sensus & imaginationes occuparetur, majorem de ipsis quam de ceteris rebus cogitandi usum & facilitatem acquisivit. Accuratissimè equidem, si ratio utraque non disjuncta ab eo fuisset, sed copulata potius! Priorem enim, unionem puta, posterioris causam esse, arguit evidentissimè experientià in phreneticis, infantibus, senibus, aliisque recto rationis usu nullam aliam ob causam destitutis, quam ob denegatum integrum, per vitiata organa, Sensuum tum internorum tum externorum Usus. Accedit ipsa unionis, prout ab his Auctoribus explicatur, natura; quippe quæ, si iis credimus, in nullo alio consistit, quam quod ad varias cogitationes mentis varii sequantur motus in corpore; & reciprocè ad varios corporis motus (qui illis sunt ipsæ Sensationes) variæ cogitationes in mente. Certè, si mens nostra talem, ex eo quod corpori conjuncta sit, habet naturam, ut difficillimè ad illa attendat, quæ sensibus non sunt præsentia, adeò ut propter unionem motus corporis cum cogitationibus animæ & vicissim cogitationes animæ cum motibus corporis firmissimè cohæreant, utiquè manifestum evadit, Sensationes homini concessas esse ad usum longè ampliorem, quam tantum ad vitæ hujus regimen. Nisi quis statuere malit, idè Deum mentem cum corpore conjungere voluisse, ut ipsa res difficillimè cognoscat, ac nunquam non erret: quod alienissimum esse à conditoris sapientia & bonitate, nemo negabit, attendens, quam Ipse voluerit, hominem, præ cæteris omnibus creaturis in ipso rationis usu, existere organum pulcherrimum divinæ gloriæ, atque elaboratissimum naturæ opus.

XX.  
Maximè,  
cum in hoc  
moderando  
Sensationum cum  
cogitationibus con-  
nexio nul-  
lum habeat,  
juxta no-  
vam hypo-

Imprimis verò efficacissimè hoc argumento evincitur, etiam alium esse Sensuum Usus, præterquam in vitâ hac animali moderandâ, si, secundo loco, expendamus, quid ad vitam hanc, ejusque integritatem, ex sententia Neotericorum requiratur? Ii, postquam jam dudum bruta, instar machinarum artificialium, non tam agere & movere quam agi potius & moveri statuerunt, motibus purè automaticis, per solam partium idoneam dispositionem, & spirituum animalium per nervos & musculos variam ab extrinseco solum factam versus hæc & illa objecta determinationem, absque ullo principio substantiali intrinseco movente aut dirigente,

rigente, idem deinceps de homine quoque affirmare cœperunt; ita quidem ut negent, vitam hominis consistere in mentis cum corpore unione, aut mortem in partis utriusque ab invicem separatione: quin contendant, vitæ nostræ animalis actiones tam parum à mente dependere, ut etiam absque ejus præsentia & adjumento possint peragi in corpore rectè disposito, accuratè non minus, quam cum anima copori adest præsens. At verò, si humanum corpus, quoad actiones animales attinet, absque ullo principio substantiali, multo magis absque mente humana, instar bruti, æquè queat discernere objecta corpori commoda ab incommodis, atque adeò vivere possit nihilo infelicius, quam cum hæc corpori existit copulata, qua ergo de causa asseremus, Sensuum perceptiones propriè tantum à natura datas esse, ad *menti significandum*, quænam composito commoda sint vel incommoda; aut, non alia de causa easdem nobis esse concessas, quam ut *indicarent animo*, quænam res conveniant aut noceant toti composito; ita ut Sensuum *genuinus usus* consistat in eo, ut *vitæ* totius animalis regimen ab iis pendeat, quod affirmare Cartesium, cum suo Paraphrasæ Claubergio, audivimus? Profectò, si unicus sit ac genuinus Sensuum Usus, *menti indicare* res in ordine ad vitæ regimen, nullus revera istandem erit; quoniam, ex hac sententia, nudus motus, absque tali indicio per sensationem menti factò, sufficit ad vitæ regimen. Scire itaque lubet ex Recentioribus, quamobrem (si Sensibus opus sit neque ad vitæ animalis regimen, neque ad id ut iis mediantibus mens quicquam certò cognoscat) quamobrem, inquam, Deus à sensationum motibus corporeis mentem affici voluerit, & quidem ita, ut inter sensationes nostras in corpore & cogitationes in animâ istam voluerit esse perennem connexionem, quâ sit, ut illæ sine his, vel nunquam, vel valdè rarè, habeant locum? Detur huic negotio exitus! Nos, ne sensationis cum cogitatione connexionem frustrà à Deo factam esse concedere cum adversariis cogamur, Sensibus Usum suum tribuimus utrobiquè, & in moderanda vita, & in contemplatione rerum.

Quod si, tertio, res ipsas cognoscendas spectemus, eadem plurimæ naturâ suâ tales existunt, ut absque sensationum ministerio cognosci prorsus nequeant; quare etiam in philosophando his locum facere omnino est necessarium, nisi multarum veritatum noti-

*absq̃m  
usum.*

XXI.  
*Rerum materialium  
existentiam  
Sceptici ne-*  
titiâ

*gare concli-  
tantum  
quod Sensui  
nullum face-  
rent in phi-  
losophando  
usum.*

titiâ nostrâ culpâ ac destinato consilio carere velimus. Non jam ostendam, omnem nostram cognitionem à sensibilibus quodammodo originem primitùs ducere, sic ut animam nostram, uti ante Sensuum, itâ & Rationis, Usum, optimè Philosophus comparaverit tabulæ rasæ, cui nil est inscriptum, sed quidvis inscribi potest; asserueritque non immeritò, oportere intelligentem phantasmata speculari. Ista, inquam, non jam ostendam, quod sponte fluant & clarè satis innotescant ex iis quæ de naturali cogitationum nostrarum cum sensationibus connexionem dicta sunt ac demonstrata, etiam ex ipso Cartesio, in præcedentibus. Iis in præsentiarum missis, solas nunc res sensibiles hic attendi velim, quas si cognoscere desideremus, ad Sensus recurrendum est; quoniam, uti benè non-nemo, *Sensibilem alius iudex esse nequit, quam Sensus*. Certè, nisi solo Sensuum testimonio stare velimus, de ipsa rerum materialium existentia quis nos unquam certò persuasos reddet? Notum, quò Sceptici, postquam de Sensuum fide dubitare cœperunt, eadem operâ etiam res Sensibus perceptas, adeòque corporum imprimis existentiam ac veritatem dubiam & incertam dare debuerint. Neque id mirum est, quoniam de ea convinci nequimus, nisi solâ ac immediatâ Sensationis fide: quam etiam ob causam hæc veritas omni tempore habita fuit res per se ac citra ullum diffusum aut ratiocinationem notissima, & propter sensationis evidentissimam certitudinem, aliis quibusvis veritatibus maximè indubitatis annumeranda. Undè non immeritò prudentiores jam olim judicarunt, Cartesio in congressu cum Scepticis, quandò hyperbolicis suis dubitationibus tantùm indulget ut supponat nullos se sensus habere corporaque esse meras chimæras, nimia ac parùm circumspectâ liberalitate necessariò fuisse succumbendum: cum impossibile sit, unquam aliquem convincere de veritate, cujus cognoscendæ adminicula ipsi abjecimus. Neque Sensuum fidei denuò adstruendæ vel minimùm inservit Auctoris methodus, quâ, investigatâ primùm suæ mentis tanquam rei cogitantis, indeque adstructâ, ex clara quadam quam innatam sibi supponit Dei idea, ejusdem existentia, per multas demùm ambages rerum materialium certam existentiam probat: Falsas enim in hoc toto processu suppositiones multas, principii petitiones ac circulos frequentes, similiaque argumentandi vitia copiosè jam dudum in eo ostendit

ostendit laudatus suprâ Gassendus. Verum non jam id agebam. Si quid sensuum ope tandem de rerum materialium existentia constet, liquet, citò serò in veritatis inquisitione admittendum esse sensum; perperam ergò hinc in totum removeri, & ad solum vitæ animalis regimen restringi: quæ est ipsa conclusio nobis probanda.

Atque uti in rerum materialium existentie indubitata notitiam nemo absque Sensuum ope pervenerit; ita neque naturam earundem neque effecta & adjuncta ( quibus tamen indagandis universa occupatur scientia Phytologica ) quisquam concipere accuratè, aut certi quid de iis concludere poterit, nisi Sensationibus usus, tanquam *pura veritatis magistris*. Ad hujus rei confirmationem alio non videor indigere argumento, quam quod validissimum nobis suppeditat quotidie frequens & obvia cuivis experientia, cum eos, qui nati sunt cæci, surdi, alteriusve Sensûs vel usu omni vel integritate privati, deprehendimus vel nullo modo, vel valdè imperfectè, obscurè, & confusè objecta intelligere, quæ eadem alii sano Sensu utentes concipiunt facillimè ac clarissimè. Quapropter de Anima nostra, dum corpori unita existit, verissimè, saltem quod ad objecta sensibilia, Palingenius, in *Libra*:

*Sunt quinque ipsius comites, fideique ministri,  
Per quos cognoscit res omnes: queis sine prorsus  
Inscia, leihæo torpebit pressa sopore. Et post quædam:  
Nam contemplatur mens omnia, & omnia cauto  
Judicio expendit, quacunque à Sensibus hiansit.  
Mens igitur sol est anima, sunt sydera Sensus.*

Inculces licet homini visu destituto vel millies globulorum tuorum æthereorum, secundum certam proportionem, in motu suo celeritatem ac circumvolutionem, haud tamen unquam id imptabis, ut clarè & distinctè nobiscum concipiat colorum discrimina: nisi fortè ( novo ausu, omnibusque hætenus ita ridiculo, ut in proverbium abierit ) etiam cæco committendum sit judicium de coloribus. Idemque in aliis qualitatibus sensibilibus obtinet. Et profectò, quis nostrum plurimarum hujus mundi partium configurationem ac dispositionem; quismotuum cælestium periodos; quis corporum mixtorum ortum & inter-

XXII.  
*Citra Sensuum opem  
de plurimis  
corporum  
adjunctis  
accuratè  
philosophari  
non licet.*

ritum; quis admirandas plurimarum rerum vires; quis viventium generationem ac nutritionem; quis sexcenta ejusdem commatis alia, homini Philosopho inquirenda, concipiat clarè ac rebus convenienter, nisi Sensibus usus, tanquam puræ veritatis magistris? Quisve ullus adeò existit rerum imperitus, qui, in re Anatomica & Botanica immediatam Sensationem utramque facere paginam, ac nudam *Au&liar* quibusvis rationibus potiozem habendam esse, ignoret?

XXIII.  
*Confirmantibus id suâ  
praxi ipsi  
dissentientibus.*

Sed desino accumulare plura, ne nimius videar in confirmanda re tam omnibus evidente ac ingenita quasi, ut neque ipsi adversarii, hypothesium suarum quasi obliti, ad Sensem provocare metuant quoties ita usus exigat. Idque faciunt non tantum in rebus propinquis, ac Sensu facile discernendis, verum in iis quoque, de quibus, ob distantiam nimiam, aliamve ad organum ac vim perceptivam disproportionem, Sensus nihil distinctum dicere queunt. Exemplo sit globus Lunaris! Maculas illas & lucidiores partes, quas, biduo imprimis aut triduo ante plenilunium, sole occidente, in ejus disco observamus, asserunt Recentiores, solâ oculorum tubo speculâri adjutorum fide nixi, totidem esse maria, montes ac valles. Quin & eodem stantes argumento visûs, in peculiari Selenographia, tanquam in altera Geographia, omnes illas Lunæ regiones tam delineant accuratè, ut insulas & continentes, promontoria & sinus, maria & freta, certâ figurâ, magnitudine, situ, distantia determinata, nominibus quoque Geographicis discreta, in tabella exhibeant non solum, sed & ulterius provecti eidem etiam, ceu Terræ habitatæ, suas tribuant plantas atque incolas, homines & feras. Fabulas si quis hæc habuerit, confictas, ne quid videatur Nova sapientia concedere Veterum, Orphei, Thaletis, Anaxagoræ, Democriti, de Luna, quæ sit Tellus habitabilis, traditionibus, ad oculorum & optici tubi fidem provocant. Egregium verò! Scilicet, de constitutione corporis à nobis tam remoti, ut Sensem nostrum hebetem & obtusum vix afficiat nisi fallaci instrumento adjutum, aliquid certi concludendum est Philosopho ex solâ Sensûs perceptione; interim tamen, in rebus propinquis ac pluribus Sensibus obviis judicandis, iisdem uti tanquam veritatis magistris res erit illita, quin sapientissimi naturæ ordinis perversio!

Deniquè,



Denique, si in indagandis veritatibus Philosophicis *solo intellectu* utendum sit, nec *aliquid certi* ex Sensuum perceptionibus de rebus extra nos constitutis concludendum, citra eorundem abusum & *naturæ ordinis perversionem*, quis in Philosophia restabit Experimentiæ locus? Nullus profecto; sed ipsa in totum hinc proscribenda. Quandoquidem enim ea omnis nihil aliud est, quam crebro repetita rei sensibilis per Sensus facta, & memoriæ ne elaboratur firmiter impressa, observatio, eadem omnes rationes, quæ contra sensuum in philosophando Usum militant, eodem jure contra Experimentiam militabunt. Verissimè ergo illa amplius erit magistra, non Sapientum ac Philosophorum, sed stultorum; quippe quæ, uti ipsi Sensus, non alium habebit usum, quam ut unicè inserviat stupidis hominibus ex variis vitæ antea actæ casibus erudiendis, ut discant cautius posthac discernere ea quæ ad vitæ animalis conservationem aut destructionem faciunt; ista appetere prudentius, hæc evitare circumspectius. Mirabuntur procul dubio, quotquot hæc sedulo expendent frequentes Cartesii querelas de experimentorum defectu, in quem Physicæ suæ imperfectæ causas transfert. Quid enim attinet infinita expetere *experimenta*, quibus nec manus ejus nec fortune, etiamsi millecuplo majores essent, possent sufficere? Quid necesse est, majores aut minores in natura cognitione progressus suspendere à copia ea plura aut pauciora faciendi? siquidem *solo intellectu* in Philosophia utendum sit; neque Sensibus, adeoque nec Experimentiâ, uti liceat, tanquam *veritatis magistris*, ad dijudicandum quæ sit rerum extra nos positarum natura ac proprietates. Nec mirabuntur minus extra partes constituti promissa ingentia quorundam Neotericorum, qui jaçant, se brevi per experimenta evidentissima tam clarè ad oculum comprobaturos principiorum Cartesianorum veritatem, & ad solvenda quævis phænomena sufficientiam, ut nemo sit exiturus ista capere idoneus, qui non iis sit acquieturus: undè & spem concipiunt ac gloriantur, jamjam futurum, ut quivis certatim ad disciplinam Cartesii, novi profectus, sint transituri. Talia promittunt, qui iidem Sensibus tanquam veritatis magistris utendum non esse, sed eos in certis ejurandos, tanquam infidos testes, quorum natura sit nunquam non fallere & semper errare, vociferantur. Certè hisce quamdiu adherent assertionibus, frustra planè naturam rerum aperire satagunt

XXIV.  
Negato Sensibus usu in philosophando, etiam experimentiæ nullus manet locus.

clave non alium in finem à Deo destinata quam ad referendam earum rerum bonitatem & malitiam, quarum discretio ad vitæ animalis regimen spectat. Præstiterit itaque haud profuturo labore, igne, fumo, flatibus, ætatem non absumere; parcere præstiterit operæ, sumptibus, omnique ad experimenta capiendâ apparatu. Verum non hæc prosequor latius, quandò jam dudum sufficiunt adductæ rationes, ad conficiendum, tantum abesse, ut prudens Philosophus teneatur in certis Sensus ejurare, tanquam datos unicè ad vitæ animalis regimen, non ad sapiendum, ut contra possit non solum non uno in casu, sed & debeat, Sensuum dictamini ita adhærere, ut eos tanquam puræ veritatis magistros, tutò sequatur in dijudicanda rerum extra nos positarum naturâ & proprietatibus, citra ullum eorundem abusum, aut sapientissimi naturæ ordinis perversiorem.

## XXV.

Non existens tantum sed & natura corporum adjuvamento Sensus intelligitur.

Minimè verò omnibus hætenus allatis satisfacit Claubergius hunc in modum differens, *De Cognit. Dei & Nostri, Exercit. LXXXIII. §. 19. 20.* Opponitur: *Si sensus non haberemus, quomodo sciremus esse solem, &c. Resp. Non negamus, sensus nos docere, quod res sint, sive existentiam corporum (nam hoc requiritur, ut compositio prodesse aut nocere intelligatur): sed, non quid sint, sive essentiam & intimam naturam rerum, quia hoc non requiritur ad conservationem compositi, &c.* Nam primùm, ineptè restringitur existentie rerum cognitio tantùm ad compositi benè-esse, cum etiàm quod res sint scire debeat, quicumque ritè est philosophaturus: nisi frustra tam anxie tanto Meditationum & Dubitationum apparatu laboraverit Cartesius in demonstranda rerum existentia; cui Tractatui ipse tribuere non dubitavit, titulum *Prime Philosophie*. Verùm deinceps, falsum quoque est, Sensus tantùm docere quod res sit, & non etiàm quid sit. Exemplo sit cæcus, qui constanti omnium videntium consentiente testimonio persuasus esse poterit & debebit de Solis aut Lucis existentia; an autem is, absque Sensus ope, solo intellectu indagare poterit essentiam atque intimam naturam alterutrius? Utiquè non poterit, si quicquam credendum sit experientiæ. Ipse Cartesius undenàm didicit lucis naturam intelligere, nisi ex hoc, quod observavit ad pressionem in oculo factam ab obvio corpore, scintillas quasi conspici? Quin hic ipse non uno textu clare edisserit, sui quasi oblitus, Sensus etiam docere,

docere, quid res sint & quales. Princip. 1. Artic. LXIX. Quamvis enim videntes aliquod corpus, non magis certissimus illud existere, quatenus apparet figuratum, quam quatenus apparet coloratum; longè tamen evidentius agnoscimus, quid sit in eo esse figuratum, quam quid sit esse coloratum. Et, Artic. seq. Multa alia sunt, ut Magnitudo, Figura, Numerus, &c. quæ clarè percipimus non alià nobis sentiri vel intelligi, quam ut sunt, aut saltem esse possunt in objectis, &c. Iterum, Princ. III. Art. VI. Agnoscimus etiam visu ratione adjuvo, Mercurium plus ducentis terræ diametris à Sole distare, &c. Rursus, Diopr. Cap. 1. Art. 1. Miranda illa specilla in cælo nova sidera detexere, &c. adeo ut, promota luminis acie ultra terminos, quibus imaginatio majorum sistebatur, viam simul nobis videantur aperuisse ad maiorem & magis absolutam naturæ cognitionem. Viderint quibus omnis Philosophiæ prora & puppis hic Auctor est, qui ista cohæreant cum iis, quæ antè audivimus asserere Cartesium, Solo intellectu utendum esse; Sensus autem datos esse ad composito comoda & incommoda indicanda; nec referri nisi ad corporis cum mente conjunctionem.

Quæcunque verò de Sensuum in philosophando usu hucusque disputavimus non sic accipienda veniunt, ac si contendamus, sensationem quamvis veritatis esse magistram, eique omni semper & ubiquè stare debere Philosophum. Nequaquam. Ut in re quavis alia sic & in hac sunt certi limites, quos ultra citraque rectum non consistit, quosque idèò hîc assignare operæ pretium fuerit, priusquam ad Objectiones descendimus; maximè cum harum solutio multo sit futura & brevior & facilior, si hac de re aliquid antè dixerimus. Summa eorum, quæ observare necesse habet, quisquis Sensationes duces suæ Scientiæ ritè sumet, iisque iudicium rebus conforme superstruet, hûc ferè redit. Caveat primo loco philosophaturus, ne Sensus assumat tanquam immediatum atque æquatum cognitionis suæ principium. Id namquè si fecerit, vel infelicitèr mentis suæ vim nimium coarctabit, vel Sensationes ultra proprium objectum imprudenter extendet. Utroque modo errabit gravissimè. Quemadmodum enim multæ veritates Philosopho occurrunt nullâ aliâ ratione indagandæ quam Sensationum adjumento, sicuti ostendimus; ita quoque inficiandum non est, res plurimas alias naturali rationis lumine cognoscendas

XXVI.  
Cavendum,  
ne Sensus sumatur ad æquatum cognitionis Philosophiæ principium.

esse, quæ Sensum directè & per se vel nullo modo vel non nisi valdè debilitè afficiunt, quæque adeò ex immediata ejus perceptione simpliciter metienda nequaquam sunt. In istis uti sæpè solus Sensus sufficit, absque multa rationis indagine, ità in his contrà sola suffecerit ratio, etiam Sensûs testimonio destituta. Putandum semper non est (verbis iterùm utar Lactantii. *Instit. Lib. VII. Cap. XIII.*) *omnino non esse, quicquid oculis non apparet; cum mentis acies multo clarior debeat esse quam corporis, ad ea perspicienda, quorum vis ac ratio sentitur potius, quam videtur.* Sensationibus qui ità assuefacit cogitationes suas ut has ab illis nunquam divertere sinat, is parùm idoneus existit Dei rerumque Divinarum; Mentis item ejusque facultatum ac operationum; omniumque demùm veritatum spiritualium ac metaphysicarum contemplator. Ideoque (elegantè Baco *Lib. I. de Augm. Scient.*) sciissimè dixit quidam Platonius, *Sensus humanos solem referre qui quidem revelat terrestrem globum, cælestem verò & stellas obsignat: Sic Sensus referant Naturalia, Divina occcludunt.* Atque hinc evenit, nonnullos è doctiorum manipulo in hæresin lapsos esse, quum ceratis Sensuum alis innixi, ad Divina evolare contenderent. Quid Antropomorphitis eveniret, notum. Neque alio argumento Democritus, Epicurus, Dicaearchus animam interire dixerunt, quam quia (teste Lactantio, *loc. cit.*) *non pervidebant animæ rationem, quæ tam subtilis est, ut oculos effugiat.* Confer. §. II. Non tamen hæc sic accipienda sunt, quasi iis Philosophum omni Sensationis Ufu circa res Divinas & spirituales prohiberemus (nam & in iis ipsis quodammodo Sensus prodesse, jam antè §. XVI. XVII. indicatum fuit) sed id volumus, nemini ità Sensibus adhærendum, ut in nuda eorum perceptione planè subsistat, atque altius non ascendat ratiocinando, quam quo usquè Sensus directè pertinent.

XXVII.  
Discernenda quoque  
sensationes veræ à fallacibus, ex  
debitæ attentionis  
conscientia.

Deindè, id Philosopho Sensibus legitimè usuro agendum diligenter, ut cautè Sensationes veras, quas tutè in judicando sequatur, à fallacibus discernere norit. Discernet autem satis feliciter & haud difficili negotio, si in omni Sensûs operatione sedulò rationem habuerit Facultatis, Organi, Objecti, Mediû. Neque enim, nisi accuratè expensis istis atque examinatis, nùm undequaque bonè se habeant, ex Sensûs indicio unquam judicabit prudens

sapientiæ studiosus. Facultatem sentiendi, sive, ut clarius dicam, ipsam suam mentem sensu quid percipientem attendet imprimis, an ea intensè satis circa oblatum objectum Sensibile fuerit actuosa, hoc unum agendo? Si non fuerit, ipseque nihilominus negligenti Sensationi stare velit, Sensibus abutetur; quippe qui dati sunt ad indicium veri, tunc tantum, cum debitâ diligentia & attentione vis sentiendi intenditur. Atque ita nemo prudens, si sibi profundè meditabundo acciderit per Sensum aliqua objecti oblatio, v. c. si cāmpānam aliquoties pulsari audiat, vel nummos alium numerantem videat, quicquam determinati statuet de numero pulsuum aut nummorum, etsi fortè eum determinatum se observasse autumet: faciliè enim animadvertit, animam suam seriò duabus diversis rebus accuratè simul observandis intentam esse minimè posse; adeoque neque hoc in casu vim perceptivam, aliis occupatam, idoneam esse ad certò cognoscendum objectum minus attendenti oblatum.

Organum quoque observabit, tum internum, puta, & notarium sensibile commune receptaculum cerebrum], & carundem vehiculum spiritus animales, & meatus per quos spiritus ad cerebrum notas deferunt, nempe nervos; tum externum, unicuique Sensui proprium, oculum, aurem, &c. Id si sentiat compressum, constipatum, convulsus, distortum, disruptum, resolutum, inordinatè motum, aut alio quo modo vitiatum, Sensationi ejusmodi haud confidet; ut qui multâ experienciâ didicit, vitium organi inficere frequenter ipsam sensationem. Ità, ex. gr. Ictericus aut Leucophlegmaticus, quamdiu talis, Visu abutetur, si eum sibi constituat ducem, ad judicandum de colorum discriminibus, dum omnia in oculo, alieno colore suffuso, pinguntur flava, aut pallida & tristiora. Sensu abutetur ebrius aut vertiginosus, si, circulatis in cerebro spiritibus animalibus, ac cum iis imaginibus impressis, pronunciet secundum eum de corporum extra se positorum motu aut quiete. Sensu abutetur strabo, si, dum, ob convulsos & distractos ex spasmo vel paralyxi oculos, utramque axim visuale præcisè ad idem objecti punctum dirigere nequit, omniaque adeò apparent gemina, quid certi statuatur de corporum numero, secundum visum. Sensu abutetur quicunque perplexis digitis globulum contrectans, dum, ob præ-

XXVIII.  
*Nec non,  
ex explorata recta organorum  
dispositione.*

præposterrum nervorum situm perturbatumque spirituum fluxum gemina ejus imago ad sensorium defertur, secundum tactum, eundem esse affirmat : &c.

## XXIX.

*Etiam, ex  
requisita ob-  
jecti ad or-  
ganum com-  
parati pro-  
portione.*

A parte Objecti expendendum diligenter, an sit organo & facultati debite appropportionatum, ratione distantiae, sitûs, magnitudinis, motûs, numeri, figuræ, aliorumque adjunctorum. Quæ si quis attendere negligat, ipse sibi erroris per Sensus existet causa, quoniam ignorare non poterat, usu edoctus, Sensem hebetiorem esse, quam ut à quovis objecto sufficienter & distinctè possit affici, suamque idcirco habere activitatis sphaeram, extra quam eum extendere nefas sit. Sic v. G. Sensus abutetur, quicumque de longinquo videns animal humi reptans, forte hominem, judicat esse feram; aut turrim quadrilateram esse planam vel rotundam; aut solem & stellas fixas (forte angulosas) esse præcisè orbiculares, aut non majores, quam apparent: scire enim potuisset & debuisset, nihil determinandum esse ex solo Visu de re tam procul à conspectu remota, ut radiare sufficienter nequeat, ad afficiendum satis distinctè oculum per omnes & singulos sui angulos & partes. Simili modo Sensus abutetur, quicumque, visui fidens circa objecta situ suo & distantia in ordine ad oculum diversissima, autumat, series arborum secundum parallelas distantes, tandem coire; aut quadratum nec æquilaterum nec æquiangulum esse, sed rhombum aut rhomboidem; aut unum idemque triangulum, nunc orthogonium, nunc oxygonium, nunc amblygonium esse; cum cogitandum fuisset mutato situ & distantia mutari angulum visionis ac apparentem partium corporis figurationem & posituram. Similiter, ex non observata hac conditione à parte Objecti, Sensus abutitur, qui affirmat, titiorem flammantem ocysimè circumactum integrum circulum ardentem post se relinquere: cum cogitandum sit, celerrimam circulationem ardentis puncti non permittere, ut distincta ejus per singulas spatii quod pertransit partes in oculo fiat impressio.

## XXX.

*Denique,  
ex constitu-  
tione medii  
legitima.*

Medium denique, per quod species sensibilis ad organum deferatur, examinandum, an non id sit variè tinctum? an non diversæ raritatis aut densitatis? an non motu irregulari agitatum? &c. Ex quibus causis non rarò evenit, ut res appareant prorsus aliâ figurâ, magnitudine, loco, colore, numero, motu, &c. quam à parte



te rei existunt. Quod si ejus periculum sit, Sensationi tali fidem non planè adhibebit vir prudens, cum non unà vice expertus sit, pro diversitate medii etiam diversis modis idem objectum agere in organum. Sensu itaque abutetur v. c. quisquis viridi perspicillo usus res conspectas judicat esse viridis coloris, aut, quos de longinquo intuetur montes, albos re verà, esse ceruleos; quùm mutata sit, priusquam radii oculum afficiunt, per intermedii vitri aut aëris dispositionem, luminis cum umbra commixtio, quæ est præcipua colorationis causa. Sensu eadem ratione abutetur, qui judicat, remum aquæ immissum sub fluctu esse fractum; nummum in urna, aqua superfusâ, propiorem esse oculo quam idem erat nudus; pisciculos in flumine natantes esse grandiores, quam sunt alii ejusdem magnitudinis hamo ex aqua extracti; solem ad horizontem majorem esse quam est sub meridiano. In his enim omnibus medium diversum, majori suâ aut minori raritate, faciliorem aut difficiliorem radiis transitum præbens, eosdem etiam variè, modo à perpendiculo, modo ad perpendiculum, reflectit & refringit, consequenter angulum visionis auget vel minuit magis aut minus, pro re nata; sicque res easdem aliter atque aliter spectandas offert. Sensu similiter abutetur, qui per halitum tremulo motu ascendentem, aut per aërem crassiorem vento agitatam intuitus corpora, trepidare eadem putat; quùm non alia quam trepidans species per tremulum medium ad sensorium deferri possit: &c.

At fortasse omnibus hætenus allatis nihil prorsus effecisse videbimur quibusdam, qui regerent: Papæ! Tanto ad Sensibus utendum opus est apparatu! tantâ attentione! Quis demùm, istæc omnia observanda si sint, se quicquam rectè sentire, certus erit? Et cur non potius Sensuum Usus, in veritatibus Philosophicis inquirendis, tam iis redditur onerosus, intricatus, ac periculi plenus, ut cum vel omnino istic negligere præstiterit? Quibus suffecerit respondisse, eadem difficultate nos absterri posse ab ipso rationis, judicii, ac discursus usu. Quis enim existit, cui unquam institutiones Logicæ perfectæ sunt, qui ignoret, plurimis, iisque observatu difficillimis regulis ac legibus ratiocinia nostra adstringi sic, ut eas non ad amissum secuti certi existere nequeamus, nos nostrâ ratione benè usos fuisse. Ne quis verò, dùm præceptorum Logicorum memini, innui tantum hîc à me putet antiquorum Philosopho-

XXXI.  
*Neque difficilior hæc attenduntur, quam regulæ quibus intellectus præceptiones reguntur.*

rum Logicam, quam Neoterici per contemptum Vulgarem, Scholasticam, ac Pedanticam (itâ loquuntur) appellant, & totam tanquam ineptam, propterea quod innumeris inutilibus præceptis ipsorum iudicio abundat, rejiciunt ac traducunt, ad ipsas Recentiorum artes dirigendi cogitationes, Tractatus de Ratiocinatione legitima, vel si quo alio existent titulo ipsorum rectè ratiocinandi regulæ, ad ipsas illas, inquam, provocho, ne exceptâ quidem Cartesii ipsius quatuor duntaxat canonum Logicâ, quam proponit, *Dissert. de Methd. p. 11. 12.* & quidvis ausim deponere, si intelligere ac pravi applicare præcepta in usu rationis legitimo inibi præfixa minus arduum sit, quam est observare in Sensationibus regulas modò à nobis enumeratas. Quum itaque nulla ratio reddi possit, ob quam difficilius sit Sensu in philosophando legitime uti, quam ratione, cum utrobique cautiones, etsi difficiles satis, necessariò observandæ occurrant, hætenus non est, cur solus intellectus, non etiam Sensus, in Philosophia usurpandus præscribatur.

XXXII.  
*Ex sensatione repetita de bonæ sensationis requisitis facilius constat.*

Interim nequè adeò existit difficile notare, utrum condiciones recensitæ adsint in nostra Sensatione, nec ne, quam fortè primâ fronte videtur, dummodò, priusquam de re sensibili ex Sensuum fide pronunciamus, hisce duobus attendendis nosmet assueverimus: quibus suâ sponte quasi fallax si quis fuerit nobis detegitur Sensus. Primum, & antefactas frequenter Sensationes revocabimus in memoriam, ac cum iis præsentibus conferemus, & ipsas præsentibus variis quibuscunque licuerit modis repetemus. Si contingat prorsus aliâ ratione objecta Sensibus offerri, neque tamen ulla subitæ mutationis in iis deprehendatur causa; vel etiam, si recordemur in similibus circumstantiis Sensuum testimonio nos aliquandò delusos fuisse, meritò suspicabimur, quin certi satis erimus, aliquid deesse Sensus perceptioni, vel à parte Facultatis, vel Organi, vel Objecti, vel Medii; nihilque adeò, vel parùm, Sensationi tali fidemus. Videat, ut antè dixi, Ictericus omnia, quæ obversantur Visui, flava; non tamen, si prudens sit, flava esse credet. Dùm enim recordatur, nuper admodum eadem illa corpora, quæ nunc uniformi colore tincta apparent, constanter ac sæpissimè debita cum animi attentione se conspexisse multiplici colorum varietate interstincta, dumque simul circumstantias expendens

pendens nullam invenit à parte rei insoliti coloris causam, olfacit facile, nisi sit extremè ineptus, non objecta, sed vel Organum, vel Medium Sentiendi, pravam aliquam subiisse mutationem, cuius vitio flava offeruntur visui, quæ talia re verà non sunt. Turrim quadratam (ut & veterem hanc contra Sensus certitudinem allatam ab Academicis objectionem verbo tollam) qui de longinquo intuetur rotundam, eam talem esse non affirmabit; quoniam, mente repetitâ objectorum remotorum quæ antehac obtigit visione, meminit, sapius quam semel aliâ figurâ ea se ingessisse oculis, quam quâ à parte sui existerant: Objectum ergò hoc visui, ratione distantie, appropinquatum non esse, per se liquet. Idemque similibus in casibus hac methodo explorare unicuique proprium est.

Deindè, in subsidium vocandi sunt, quantum fieri potest, plures Sensus: quippe qui mirum in modum à natura in mutuum auxilium ordinati observantur. Ità ut vel hinc innotescat ac firmiter concludatur, divinitus sic constitutum esse, ut ad Sensus recurramus etiam in discernendo vero à falso. Nempe plenam fidem & indubitatam persuasionem facit duorum aut trium testium in rem eandem consensus. Jucundissimum foret, providam hanc sapientissimi Dei curam paulò plenius demonstrare in admirandâ Sensuum omnium inter sese concatenatione: at ne sim in hisce prolixior justo, solum Visum & Tactum ex cæteris obiter attendamus; quique hi sibi mutuo succurrant, ad docendum, quid verum sit quod sentitur, quid apparens, exemplo uno aut altero illustremus! Sit, cui omnia trepidare aut in gyrum agi videntur; manum si admovert, illicdò vitio turbati organi, vel tremuli medii, se errasse deprehendet. Pictum Parrhasii velum removeri jubeat imprudenter Zeuxis; at applicato digito visus fallaciam nullo negotio castigare poterit. Multiplicet vel millies objectum superficibus variè distinctis & inclinatis expolitur vitrum; rem unam esse ac simplicem ità manifestè palpabit manus, ut mox appareat perspicilli fraus. Contrà, perplexis digitis pilam quis, oculis clausis, tam distinctè contrectet, ut juret geminam esse; facillimè uno oculi ictu oriundum ex distorto organo errorem corriget visus. Quæ pauca, ex millenis aliis speciminibus ausa allata, docent abundè, quam sit facile, levi labore discernere, utrum Orga-

XXXIII.

*Item, ex  
plurium sensuum  
de eadem re  
sentiente  
testimonio.*

num, Objectum, Medium, se habeant in Sensatione uti decet, nec ne?

XXXIV. Verùm, missis illis, ratiunculas nunc examinemus, quæ contra Sensum in philosophando usum proferuntur! Earum primaria, quam ceu formidabile Gorgonis caput obijciunt semper, petita est à fallacis vulgò Sensibus tribui solitis. Quum enim fundamentum, cui cognitio nostra Philosophica innitetur, certum esse oporteat & errori nequaquam obnoxium, tale verò non sit testimonium Sensuum, perperam hoc inter indubitatæ scientiæ principia numerari concludunt. Scilicet, ut alibi Cicero, ubi quis semel pejerarit, ei credi postea, etiam si per plures Deos juret, non convenit; & secundum Juris regulam, *Qui semel malus deprehenditur, semper malus presumitur.* Quæ eadem ratio Epicurum movit ad statuendum, *Nunquam Sensus mentiri, sed omnes veros esse, in iisque judicia rerum posita; quorum si unus semel in vita mentitus sit, sublatum esse omne judicium veri & falsi:* teste Cicerone, 1. de Finib. Pari acumine ex opposito hic infertur, Sensus interdum fallere deprehendi, ac prudentiæ esse, nunquam illis planè confidere, qui nos vel semel deceperunt. Quasi & ego dicam, eandem consequentiâ, ac totidem ferè verbis: Ideas nostras interdum fallere deprehendimus, ac prudentiæ est, nunquam illis plane confidere, qui nos vel semel deceperunt. Exulent ergò jam ex Philosophia cum Sensationibus, Antiquæ Philosophiæ inter cætera fulcro non minimo, Ideæ, Novæ Sapientiæ palladium! Quin exulet in inquirenda certa rei veritate omnis in universum Memorix, Judicii ac Discursus Usus! Nemo enim mortalium tantum sibi arrogaverit, ut nunquam ab iis omnibus se deceptum fuisse affirmare aufit.

XXXV. Quin quanto frequentiores sunt & graviore errores Intellectus quam Sensus, tanto quoque major erit caussa illi magis quam huic diffidendi in cognoscenda rerum veritate. Nempe id observandum obiter, errorem, propriè loquendo, non nisi ad mentem pertinere; quæ fallitur, quoties copulat aut disjungit notiones prædicatorum, quæ à parte rei copulata aut disjuncta non sunt. Sensus cum errare dicitur, denominatio duntaxat externa est; quatenus per Sensationes menti sunt occasiones judicium ferendi rebus Sensu perceptis disforme, adeoque erroneum. Errat quapropter Sensus

Sensus nunquam sine Intellectu; imò errat re verà solus Intellectus, imprudenti præcipitantia Sensu abutens, eumque ultralimites suos extendens. Quumque propter quod unumquodque est tale id ipsum sit magis tale, evidentissimum erit, in philosophando mirus esse tribuendum Intellectui quam Sensui, siquidem verum sit, prudentiæ esse, nunquam illis planè confidere, qui nos vel semel deceperunt. Quis ergò non videat, admittendam neuti quam esse rationationem, quæ, unà cum Sensuum in indagando vero ministerio, evertit alia quævis, quæ homini ad manum esse possunt, philosophandi adminicula; nihilque ei reliquum facit, quam ut in Scepticorum castra aut Erratrum ignorantiz societatem transeat?

Inquires, mentis nostræ perceptionibus tutò sæpè credimus, quia de harum veritate certò possumus existere persuasi; cum, *si que in iis reperiatur falsitas, aliqua etiam nobis à Deo facultas tributa sit, ad illam emendandam.* Rectè equidem, & opportunè! Non minus scilicet ad manum sunt adminicula, quorum beneficio haud magis difficulter detegatur, quid veri falsive unicuique Sensationi subsit; uti manifestum est ex illis, quæ de Sensuum deceptionibus cavendis retrò disputavimus. Limitandus itaque canon, de non fidendo ei qui semel nos decepit; & res omnis salva est. Videlicet, ei qui semel decepit, iisdem in circumstantiis, quarum occasione decepit, quoties in potestate nostra non est explorare verumne testetur an falsum, fidendum planè non est. Sed nil jam ex Sensuum fallaciis conficitur amplius, quam, quemadmodum cuivis promiscuè mentis perceptioni, ità neque omni Sensationi, semper & ubiquè fidendum esse; sed ei tantum, quæ, adhibito tempore & cura, vera esse ac certa deprehenditur. Quibus verò indè elici queat fiducialis, ex Sensuum perceptionibus de rebus extra nos positis nil certè concludendum esse; neque iis utendum, tanquam veritatis magistris, cura naturæ ordinis perversionem, quod concludendum erat, audire lubet? Alia, eaque elegantissima notat Cassendus ad hoc argumentum de Sensuum fallaciis, quæ apud ipsum vide, *Instit. p. 20.*

Mirum verò, ut & hoc addam, si omninò prudentiæ sit, iis non confidere, qui vel semel deceperunt, mirum, inquam, qui imprudentiæ notam effugere queat Cartesius, quandò totius vitæ animæ

XXXVI.  
Sensuum erroribus, non minus quam intellectus, corrigendis ad manum sunt remedia.

XXXVII.  
Fallaciæ Sensuum, si phil. op. a-

*tionem, etiam  
vita moderamini  
hos inceptos facit.*

malis regimini duces præficit Sensus. Certè sapius quam semel Sensus nos decepisse, etiam in iis quæ ad res hujus vitæ pertinent, experimur quotidie adeò multoties, ut nec diffiteri videatur ipse Auctor, *Medit. VI. Sensus, ait, circa ea quæ ad corporis commodum spectant multo frequentius verum indicant, quam falsum.* Nec juvant quæ proxime sequuntur, de homine qui possit uti fere semper pluribus sensibus ad eandem rem examinandam; & insuper memoriâ, quæ presentia cum præcedentibus connectitur; & intellectu, qui jam omnes errandi causas perspicit; quique ideo non amplius vereri debeat, ne illa, quæ ei quotidie à Sensibus exhibentur, sint falsa. Non ista juvant, aut si juvant, etiam ab imprudentia & naturæ ordinis pervertitione excusant Philosophum, quandò Sensibus utitur in inquirenda rerum veritate; cum non minus hic, quam in iis quæ ad corporis commodum spectant, ipse circa eandem rem & sensibus pluribus, & memoriâ insuper & intellectu, uti possit; quare neque hic amplius vereri debebit, si ista cura sufficit, ne illa, quæ ei quotidie à Sensibus exhibentur cognoscenda, sint falsa. Vel ergò æquè fidus sensus est ad promovendas cogitationes philosophicas quam ad vitæ moderamen: vel, si, ob suas fallacias illis juvandis sit impar, etiam hujus imperio parum idoneus existit.

### XXXVIII

*Inmate rerum idæ, si vel maxime datur, absque sensibus philosophationi non sufficiunt.*

Profligatâ sic primâ acie, quæ instrui solet ex Sensuum erroribus, satis exaggeratis, quo evincatur, eos, ceu errorum matres, atque infantilium præjudiciorum obstetrices, Philosophaturo esse ab indagine veri ceu noxios removendos, alteri nunc est occurrendum, quæ Sensuum perceptiones inutiles eidem reddere allaborat. Non minus autem hæc priore illâ terribilis est & specie & numero; itâ benè est coagmentata ex innumerabilium clarissimarum ac distinctissimarum idearum innatarum (quas fatua mens, dum in sinu circumfert, excutere tamen plerumquæ ignara est) apparatu absolutissimo. Nimirum, cum mens, quæ se ipsam novit, undique circumspicit, ut cognitionem suam ulterius extendat, invenit apud se multarum rerum idæis. Princip. 1. Art. XIII. Inquæ ad serio philosophandum, veritatemque omnium rerum cognoscibilem indagandum, ordine tantum attendendum ad notiones, quas ipsemet in nobis habemus. Ibid. Art. LXXV. Atque ita solo intellectu, ad ideas sibi à natura inditus diligenter attendente, hic memur. Princip. 11. Art. III. Nec lubet, nec opus est, hoc loco anxie inquirere,



quirere, quid ista sibi velit innatarum idearum supellex, quâ instructa mens nascatur. Eas solas (quodcunque tandem earum nomine intellectum velint) rerum cognitioni acquirendæ non sufficere, infantes & fatui abundè docent; qui, etsi non minus quam alii iis abundant, nihil tamen inde habent, ne micam quidem, intelligentiæ rerum. Nempe sensuum legitimo usu destituuntur, qui requiritur, datis etiam innatis ideis, ad excitandas saltem illas: aded sine sensu ideis uti nulli in hoc statu unionis est possibile. Scitè quadrat in istos, qui ex solis ideis, remoto sensu, sapere instituunt, quod alibi, quem & sæpius citavi, Laëtantius, *Instr. lib. 3. Cap. 3. Scientiæ ab ingenio venire non potest; nec cogitatione comprehendi: quia in se ipso habere propriam scientiam, non hominis, sed Dei est. Mortalis autem natura non capit scientiam, nisi quæ venit extrinsecus. Idcirco enim oculos, & aures, & ceteros Sensus præfecit in corpore Divina solertia, ut per eos aditus scientia perveniret ad mentem.*

Quæ aliæ adferri possunt rationes, quibus sensus in philosophando inutiles demonstrantur, eas accuratè aded congestit Claubergius, citatâ *Exercitat. LXXXIII. de Cognit. Dei & Nostri*, ut vix amplius quid quod alieujus sit momenti objici posse videatur: quapropter breviter examinatis quæ apud hunc occurrunt, meritò finem huic Dissertationi imponemus. Post alia, quæ *loc. cit.* apud eum legi possunt, quæque exhibere prolixius foret, sic arguit: *Quæ ratione corporis & animæ simul homini tributa sunt, illa non nisi ad compositum ipsum, quæ tale, referenda. Quæcum de fame & siti, & talibus, facile quis dederit, cur non dabit de Sensibus?* Resp. Nullæ actiones hominis, ne quidem rationales, v. c. judicium, discursus, &c. ita in solidum menti, dum & quatenus est in statu unionis (casus extraordinarios, qualis obtinet v. c. in ecstasi, &c. excipio) tribuendæ sunt, ut nullam sibi in iis partem vendicet corpus; suppeditando saltem occasiones, aliisve modis operationes mentis promovendo. Neque id mirum est: cum enim actiones suppositorum sint, operandique modus sequatur modum subsistendi, mens autem corpori hypostaticè existat unita, omninò rationi consonum est, & experientiâ in sensibus, melancholicis, aliisque comprobatum, non sine corpore cogitare mentem, uti non sine mente movetur corpus. Igitur, cum nullæ sint actiones ho-

XXXIX.  
*Quamvis  
 toti compo-  
 sito Sensus  
 conveniant,  
 non idcirco  
 tamen ad  
 vitam usum  
 præcisè sint  
 restringen-  
 di.*

hominis, quæ non aliquatenus & ad mentem spectent & ad corpus, sequetur, vel omnes illas ad compositum qua tale esse referendas, nullas prorsus ad contemplationem veritatis; vel falsum esse, quod asserit Claubergius, ea quæ ratione corporis & animæ simul homini sunt tributa, non nisi ad compositum qua tale esse referenda. Facillimum foret etiam huic dubio occurrere ex tribus sentiendi gradibus, quos statuit Claubergius; sed ista nunc missa facere cogor, brevitati studens. Famem quantum attinet & sitim, cum nil pro objecto habeant præter alimenta, præcisè quatenus pertinent ad nutritionem, facile quis dederit, eas non nisi ad compositum, qua tale, esse referendas. At Sensuum dispar longè ratio est; quippe qui ad ea quoque sese extendunt, quæ cum vitæ animalis regimine nullam habent connexionem: dum viam aperiunt, ut loquar cum Cartesio ad magis absolutam naturæ cognitionem, docentes, quid sit magnitudo, numerus, figura; quantum Planetæ distent à Sole; quæ & quot sint sydera Medicæ, &c. Hisce paria cum revelaverint menti sitis & fames, nil repugno, quo minus pari loco habeantur cum Sensibus, cognitionisque humanæ instrumentis annumerentur.

XL.  
Sensus sapiendi ad-  
minicula  
sunt, etsi  
sapientes  
non sint qui  
eos semper  
sequuntur  
duces.

*Non semel, ait Claubergius, admiratus fui, tot ac tanta corporeis adscribi Sensibus, ut Philosophi & humanæ cognitionis omnis primi quasi magistri habeantur. Nam ita mecum ratiocinabar: Si omnis cognitio peritur à Sensibus, &c. mirum est, quod non sapientissimi, qui suos perpetuò Sensus sequuntur duces. Resp. Si verum sit, uti est verissimum, quod alibi Aristoteles, existimandum esse ignorasse, quicunque miratur, nil miri est, mirari hîc Claubergium; ita se in toto hoc ratiocinio ignorare prodit, aut saltem ignorare vult videri, quæ sit mens eorum qui stant pro Sensuum in philosophando Usu. Ecquis enim unquam extitit, qui quamvis Sensationem veritatis magistratam dixerit? Si non, quò colore infert Claubergius, sapientis fore, ex nostrâ sententiâ, Sensus perpetuò duces sequi? Sed si de isto Sensu sit sermo, qui circa proprium objectum occupatur, atque undiquaque benè se habet (ex conditionum, quas supra recensuimus, requisito) immò verò, qui Sensum talem circa rem sensibilem perpetuò sequitur ducem, sapientior habendus est decies & amplius eo, qui imaginarias & in mente fabricatas temerè ideas sectatur. Atque ita meritò Aristoteles*

teles VIII. *Phys.* *ἡ ἁπλοῦς ἀπὸ τῆς φύσεως* laborare pronunciat eos, qui sensum dimittunt in iis, quæ Sensibus manifesta sunt, & rationes quærent. Quicum eleganter consentit Cicero, *Acad.* II. *Sensuum ita clara judicia & certa sunt, ut si optio naturæ nostræ detur, & ab ea Deus aliquis requiratur, contentane sit suis integris incorruptisque Sensibus: an postulet melius aliquid, non videam quid quærat amplius.* Restringebam hanc sensibus haustam sapientiam ad proprium sensuum objectum. Nam & sensationum occasione de insensibilibus quomodo philosophandum sit sapienti, jam plus satis suo loco exposuimus. Unde quo pacto sapiens & idiota aliter & aliter sensus sequatur duces, facile intelligitur: illi sensationes sapientiæ argumentum suppeditant, huic obijciunt impedimentum.

Sed pergit mirari Claubergius. *Imo mirum, quod intellectu & sapientiā omni carentia animantia facultate sentiendi hominem superent; secundum versus: Nos aper audiri, &c.* Quasi in nuda Sensatione sapientia consisteret; & non potius ejus acquirendæ medium foret prudens ejusdem usus! Cujus arbitro, mente scilicet quoniam destituuntur bruta, nulla quoque, vel propter acutissimos Sensus, iis tribui potest sapientia. Liceat verò & mihi mirari! Mirum, inquam ego, si Sensus tantum dati sint ad vitæ animalis regimen, cur non illi æquè acuti concessi sint hominibus ac brutis; quasi illi minus necesse habeant commoda hujus vitæ discernere ab incommotis, quam hæc. Mihi si respondeat Claubergius (quem admodum aliud responderi hic nequit; nisi fortè dicat saginandæ v.c. Sui conducere auditus acumen) voluisse potentissimum Deum multiplicem suam manifestare sapientiam in tanta constructionis organorum varietate in variis subjectis, hoc idem sibi à me responsum putet. Quin & id mirum, si tantum ad vitæ animalis regimen dati sint sensus, cur in homine se aliter habeant quam in bruto: in illo scilicet cum cogitatione mentis conjunctæ existunt, in hoc minimè. Atquæ, quid ad vitæ animalis regimen cogitatio; citra quam omnem animale vitam vivunt commodissimè bruta? Sed & hac de re loco plura.

*Mirum, ait porro, quod qui maxime intellectu & scientiâ pollent, Deus & Angeli, omni Sensu corporeo destituantur.* Resp. Quasi quis unquam asserere somniasset, absolute semper & ubique Sen-

XLI.

*Acumen  
Sensuum in  
brutis, eos  
homini ad  
philosophan-  
dum esse in-  
utiles, ne-  
quaquam  
arguit.*

XLII.

*Cum non  
Deo & An-  
gelis, cur*

tamen homini ad intelligendum Sensu opus fit?

sationem requiri, ad quemvis intellectum & scientiam. De homine id tantum affirmatur, in quo intellectus à Sensu dependet; sive, ut Cartesius rectè philosophari audivimus; quod mens talem, ex eo quod corpori conjuncta sit, habet naturam, sive, quia in primis annis majorem de sensibilibus cogitandi usum & facilitatem sibi acquisivit. Hic ergo cum sermo omnis sit de cognitione spiritus cum corpore in eandem personam uniti, qua talis, quæ incititia est, adducere exempla suppositorum merè spiritualium, Dei, Angeli? Vin, æquam ego faciam comparisonem, & mirer? Mirum, si solo intellectu utendum sit, Sensus nil nisi obscure & confusè menti offerant, mirum, inquam, quod qui Sensuum usu destituunt homines, quales sunt, infantes, apoplectici, &c. non maximè intellectu & scientiâ polleant, ac subtilissimi sint Philosophi.

XLIII.  
Quæcumque Sensui clara sunt, eadem quæ talia menti existunt evidensia.

Mirum, addit, quod quæ clarissimè sentimus, ex. gr. lucem & colorem, obscurissimè tamen intelligamus. Resp. Mirum, non occurrisse hîc Auctori distinctionem, quâ ipse paulò post utitur inter rei τὸ ὄν & τὸ διότι. Certè ut lucem clarè sentimus, ita & clarè eandem intelligimus; nempe τὸ ὄν. Quòd vero τὸ διότι ejus tam obscure intelligimus, non aliundè fit, quam quia ipsum τὸ διότι Sensum non afficit. Si enim adedò clarè visu perciperemus, quid sit lux aut color, quam quidem eo percipimus, quid sit magnitudo, figura, motus, situs, non minus etiam clarè, illa quid sint, intelligeremus, quam hæc. Atque hoc ipsum Cartesius quoque asserit, & prolixè satis profequitur, Princip. 1. Art. XIX. LXX. Adedò ut, quod argumentum Claubergius contra Sensum militare autumat, ipsum multo magis eorundem confirmet necessitatem. Accedit hæc, nos, si quid nobis de luce aut coloribus innotescat, quid sint, etiam id omninò sensationibus debere, quandoquidem ex earum observationibus de lucis proprietatibus & effectibus hausta sunt quæ in Dioptrica de illis tradit ipse Cartesius: qui si illum tractatum scribere potuisset, nisi visu adjunctus, mirum foret omnium maximum, & res solùm non prodigiòsa.

XLIV.  
Contrà, quæ nullo modo sentiuntur omnium

Ultimum miratur Claubergius: Mirum, quod quæ nullo modo sentimus, optimè tamen & facillimè intelligamus, uti cogitationes quæque suas, quas habet in animo, dum affirmat, negat, vult, non vult, licet nullis interim verbis externis nuntiet, neque audiat, aut legat

*legat quicquam.* Reſp. Neſcio, quâ confidentiâ tam rotundè pronunciet Claubergius, optimè & facillimè intelligi cogitationes, etiam ab eo, qui nec audivit nec legit quicquam. Falſitatis hanc theſin convincunt quotquot unquam extiterunt deliri, apoplectici, lethargici, infantes, alijque, quia Senſuum, ideò & rationis uſu, conſequenter & ſuæ cogitationis intelligentiâ, deſtituti. Neque longum abeamus. Mirum, ſi quis unquam expertus fuerit, hominem idiotam & ruſticum melius & facilius intelligere, *quid ſint* (nam de eo *quod ſint* non eſt quæſtio) cogitationes ſuæ mentis, affirmatio, negatio, volitio, nolitio, de quibus rectè concipiendis ipſi inter ſeſe digladiantur cruditiſſimi quique, quam quid ſit magnitudo, ſitus, aut figura corporis. Sed cum iſta pertineant ad aliam controverſiam, de ſpiritualibus utrùm ea nobis in hoc rerum ſtatu facilius cognoscantur quam res corporeæ, hic ſubſiſto. Oſtendiſſe nunc ſuffecerit, nullas fuiſſe Clauberigio rationes, ob quas neceſſe habuerit mirari, tantum corporeis adſcribi Senſibus, ut Philoſophiæ & humanæ eruditionis magiſtri habeantur. Concludo tandem: *Senſus non tantum datos eſſe ad vitæ animalis regimen, verum etiam ad dijudicandum, quæ ſit verum extra nos poſitarum natura, & inherentes proprietates; per conſequeſ: In vero indagando non ſolo intellectu, ſed & Senſibus utendum eſſe, tanquam veritatis magiſtris, citra ullam naturæ ordinis perverſionem.* Quod ipſum demonſtrandum erat.

Cæterùm, quandoquidem ad manum hoc loco erant poſitiones quædam, quibus intellectûs noſtri à Senſu dependentiam breviter aliquandò explicabam, eaſque jam dictis confirmandis atque illuſtrandis conducere non nihil judicabam, viſum eſt hanc de Senſuum in philoſophando Uſu Diſſertationem eiſdem claudere. Atque hunc quidem in modum iſtic philoſophabar:

1. Quotquot aut expoſita Platoniorum deliria, aut damnatam Epicureorum impietatem inſtaurare nölunt, eis certum eſſe debet, neque mente ſolâ conſtare hominem, neque ſolo corpore; ſed utroque illo hypſtaticâ unionem in eandem perſonam conjuncto. Quumque actiones non partis alicujus ſint, ſed totius ſuppoſiti, etiam non mens ſolâ cognoscit, non corpus ſolum, ſed homo ex utroque compoſitus; conferente unaquâque parte quod ſuum eſt. Quid verò, tanquam ſuum, quælibet pars hüc conferat? videntum eſt propius.

*difficillimè  
intelligi-  
mus.*

XLV.  
*Intellectûs  
humani à  
Senſu de-  
pendentis  
explicatio  
& demonſ-  
tratio pau-  
cis theore-  
matibus  
comprehen-  
ſa.*

II. Proprium intelligendi principium corpus nec esse, nec esse posse, evincit abundè illa sui quæ in omni intelligente est conscientia; cujus rem extensam atque impenetrabilem minimè esse capacem facillè est demonstrare. Imò, ex eodem fonte deducitur nullo negotio, quodcunque corporeum ex se & sua natura nullam habere cognationem aut affinitatem cum actu intelligendi spirituali.

III. Non itaque ex ipsa mentis intrinseca essentia, in quantum purus spiritus est, id fluit, quod actiones ejus comitetur aliquod corporeum (uti neque in rebus merè spiritualibus, Angelis nimirum, & Animabus separatis, tale quid obtinet) sed ex mera ordinatione primæ causæ; quæ, uti mentem in hoc statu unionis non subsistere absque corpore, ita neque eandem sine corporis societate operari, voluit: quatenus modus operandi eum qui est subsistendi sequitur.

IV. Quoties ergò quicquam intelligit homo, hominis ea actio est, non solius mentis: concurrente videlicet ad eam etiam suo modo corpore. Non quòd hoc ipsas rerum notiones formet (id enim jam à corpore removimus, & mentis opus esse diximus) sed quod harum istarumve idearum formandarum idoneam saltem ansam suppeditet: idque adeò semper & ubique, ut nullam planè putemus esse in homine actualem perceptionem, cui excitandæ non aliquam; seu proximam seu remotam, sensus fecerit occasionem.

V. Dico, omnibus nostris cogitationibus per sensus aliquam saltem præberi occasionem; quatenus scilicet sensibilia rei adjuncta, causæ, effecta, opposita, similiaque, mentem cogitare faciunt de re ipsa cujus sunt affectiones. Quod diligenter notandum; ne quis istam nos insanire insaniam autumat, ut contendamus, omnes, quæ ab intellectu nostro producuntur, cogitandi formas expressæ eætypæ esse aliquorum phantasmatum.

VI. Remotissimum id est à mente quemadmodum nostra, sic & antiquorum Philosophorum: quippe qui eodem spiritu, & *Nihil esse in intellectu quod non antè fuerit in sensu*, dixerunt, & simul tanquam axioma celebrarunt istud, *Substantia non invenitur in sensus*. Neque millena esse diffitemur, quorum omni notitia mens nostra haud caret, etsi phantasmata eorum nec sint, nec esse possint. Ut  
qui



qui hoc sensu Veterum sententiam impugnant cum umbra sua luctentur.

VII. Summa ergo rei hæc est. Quemadmodum Geometra ex paucis quibusdam principiis elicit mirandam seriem demonstrationum, in principiis istis fundatarum quidem, plurimum tamen ab iisdem distantium; ita intellectus hominis ex occasionibus quibusdam cogitandi à sensu suppeditatis, ratiocinando (scil. discurrendo, abstrahendo, &c.) notiones format omnes, etiam rerum à sensu remotissimarum. Id nùm ita se habeat? videamus per partes.

VIII. Si quid à sensibus absit, absunt omnium longissimè Metaphysicæ veritates; quales sunt Deus, Anima rationalis, Principia prima, similiaque. Verùm, ne illa quidem sine sensuum auxilio actu sciri, asserimus. De quo qui dubitat, ablegandus tantùm videtur ad cunas infantium, & gyrgathos mente emotorum; quales nullam actualem habere harum rerum notitiam, ex hoc solo quod vel ipsa sensuum activitate, vel eorundem in rectè ratiocinando legitimo usu destituuntur, clarum est.

IX. Quantum juvent in acquirenda notitia dianoëtica & existentia & attributorum Dei sensus nostri, ut alia sileam, omnium optimè docet Doctor Gentium Paulus, assertor ille Naturalis Theologiæ egregius, quando Ethnicos in hoc inexcusabiles pronunciat, quod animum non ritè adjecerint ad τὸ πρῶτον ἔστιν, quod ipsis manifestaverat Deus. Sed quo pacto? Quatenus puta invisibilia sua, æternam potentiam ac divinitatem, conspicienda dedit & intelligenda ex creati mundi structura.

X. Neque alia Animæ humanæ ratio est. Non enim ejus notitiam haberi per directum aliquem sui ipsius intuitum, evincit ipsa suæ mentis in hominibus plerisque, etiam non indoctis, ignorantia. Hanc eo magis tolli in nobis experimur, quo diligentius ad operationes attendimus quibus ipsa sese manifestat; quas inter primæ nobis observabiles sunt risus, loquela, & si quæ tales plures in sensum incurrant: hæ enim primùm de rationali principio nos cogitare faciunt.

XI. Quod ad Principia Metaphysica, quorum nobis innata dicitur veritas, qualia sunt, v. c. *Nihili nulla sunt affectiones; &c.* etiam experientia dicat, nullam actualem eorum haberi in-

telligentiam à quoquam, cui non per sensus factæ fuerint occasiones res quasdam cogitandi, quibus ista principia applicantur, quorumque occurſu ipsa quasi in intellectu nostro excitantur. Quæ eadem intellecta velim de veritatibus quibusvis aliis, tum Metaphysicis, tum etiam Moralibus.

XII. Circa Mathematica alicui hîc dubium esse posse, oppidò mirum est. Etenim neminem in iis percipiendis excellere, qui non plurimum polleat viribus imaginationis, notissimum est. Et quis in triangulo rectilineo tres angulos internos duobus rectis æquales esse percipiat, cui non per sensum nota sit trianguli configuratio? Quamobrem etiam sensibus, visu imprimis, destitutis perceptu difficillimæ sunt hæ disciplinæ.

XIII. Omnium maximè dominantur Sensus in Physica, quippe quæ objectum proprium habet res materiales, suis se qualitatibus, tum etiam causis atque effectis, in sensum immediatè ut plurimum ingredientes. Adde Botanicam atque Anatomen, in quibus omne punctum fert, omni que ratione potior est, nuda autopsia. Ut mirandum merito videatur, si cui haberi queat pulchrior imago coloris, quam ex sola innata idea, scilicet! haurit cæcus, quam quæ se offert oculis alicujus benè videntis.

XIV. Neque obstat, quod Sensus rerum existentiam & effecta tantum docere videantur, non causas, non effectorum cum causis connexionem; in quo tamen philosophica rei notitia propriè consistit. Præterquam enim quod sensibus manifestari etiam causas cum effectis connexas pluribus instantiis, à Meteoris, &c. desumptis, demonstretur facilè; etiam qui Sensuum tuentur necessitatem, hoc ipso contenti sunt, si agnoscantur tanquam requisitæ philosophandi occasiones; quales agnoscuntur, cum per oblata effecta mentem moveri, ad ratiocinandum de eorundem causis, admittitur.

xv. Ipse profectò Cartesius ex principiis suis de Mundo hoc aspectabili philosophari minimè fuit ausus, nisi enarratâ primum phænomenon sensibilem historiâ. Hanc nisi normam sumsisset suarum idearum, ex hypothesebus istis suis mundum ei qui de facto datur similem euidisset nequaquam; adeò mens ejus in vortibus oberrans, absque sensuum auxilio determinata nunquam fuisset, ad exitum ex iis inveniendum effectibus rerum respon-

respondentem. Vide hæc fatentem *Princip. Part. III. §. IV. XVI.* Quandoquidem itaque eo quo explicuimus modo universi hominis cognitio in hoc nostræ mentis statu à sensibilibus rerum perceptione ducit originem, verissimè intellectum nostrum ab ortu suo similem dixit Philosophus tabulæ rasæ, cui actu inscribatur nihil, donec crescente ætate phantasmata speculando idoneas nanciscatur anima humana notiones quaslibet formandi occasionem. Quo sensu, etiam vulgò recepto, quam trita tam certa existit regula, *Nihil est in intellectu quod non antè fuerit in sensu.*

## E X E R C I T A T I O

*Expendens*

Confectaria Ideæ, quâ absolvitur

MENS HUMANA  
SOLA COGITATIONE.

S U M M A R I U M.

- I. Nullum prudenti Philosopho recipiendum dogma novum, cujus non cautè animo prospexerit consequentias.
- II. Confectariorum quæ post se trahit novella idea de humana mente, quæ mera cogitatio sit, syllabus.
- III. Assertionis, Dei omnem essentiam in cogitatione constituentis, cum ea quæ mentem humanam solâ cogitatione absolvit, demonstrata connexio: Eiusdemque paucis detecta falsitas.
- IV. Sententiæ, non nisi duo in Deo attributa admittentis, cum eadem hypothesis ostensus nexus:  
*Ejus-*

*Ejusdemque patefacta breviter absurditas. V. Deum ratione essentiae nuspiam esse, eadem hypothesis necessarium infert: Dogmatis hujus addita confutatio. VI. Definitio Divinae Immensitatis, tantum per denominationem externam ab operatione desumptam, ex eadem hypothesis fluit: Ejus notata periculosa absurditas. VII. Utriusque Naturae in Christo unionem sola operatione absolvere jubet eadem hypothesis: Reclamante orthodoxa Christianorum fide. VIII. Angelos esse nuspiam docere cogit eadem hypothesis: Dogmatis hujus Weigeliani confutatio. IX. Angelos de spatio in spatium non moveri, eadem hypothesis infert: Ejus assertionis ostensa paucis falsitas.*

I.

Nullum prudenti Philosopho recipiendum dogma novum, cuius non caute animo prospexerit consequentias.



Armen nullum edendum praecipit Poeta, quod non novum prematur in annum, quodque non ad unguem saepius fuerit castigatum; ne scilicet auctorem sorte suum, si minus limatum prodeat, det in ruborem. Saluberrimi moniti ante alios probe memores esse oportet, quibus volupe est ad nova dogmata fabricanda ac divulganda animum adjicere: adeo, si quae, haec certe plena periculi res est. Etenim, quemadmodum rerum, ita conceptuum quoque, mira longissimaque est concatenatio; cujus principium facile finem vix reperias. Nec falsarum opinionum minor est fertilitas quam ipsarum veritatum: ut fieri non possit, quin, juxta illud πολυσπύλλος Philosophi, *Uno absurdo posito sequantur plura.* Hanc itaque vir prudens immotam sibi recte figat legem, ne ullas unquam novellas admittat ideas, multo minus tanquam certas propugnet, quarum consequentias non animo prospexerit ac probe probeque secum examinaverit. Id si observatum fuisset ab omni aetate, nunquam eruditorum orbis tot laborasset controversiis; quippe quae maximam sui parte non tam sunt destinato consilio excogitatae theses, quam confectariae potius quarundam hypothe-

pothesium, quibus tuendis dum plus justo studuerunt earundem auctores, salvandæ præconceptæ opinionis amore in istas, sæpè fortuitò magis quam consulto, inciderunt. Quumque & attentissimi quique non rarò sese hìc deceptos deprehendant, dum primo intuitu elegantissimâ specie multi sese novi conceptus commendant, qui tamen penitus inspecti posse trahunt immanium absurdorum syrma longissimum, merito quicquid novum est, tanquam nondum satis exploratum, suspectum habetur, & jure creditur via antiqua tanto tutior, quanto est magis trita. Atque utinam nostris quoque temporibus non reperiantur, qui, ne Cartesii sui ideis vel hilum deccadat, quæ ipsi horruissent antè consecraria, quandò jacta est alea, propugnant pertinacissimè, & quicquid ex iisdem nascitur monstri, quantumvis id & horrendum & informe & ingens fuerit, ceu pulcrum sapientiæ sæctum sinu excipiunt avidissimè, sovent tenebrimè.

Ex pluribus unum idque luculentissimum hujus rei specimen exhibet nupera mentis humanæ, quæ nihil aliud sit quam mera cogitatio, idea: ex qua quæ sequuntur porismata tam late patent, ut nullum fermè receptæ Theologiæ & Philosophiæ caput relinquunt intactum; adeò utriusque per ea immutatur, etiam in rebus gravissimis, facies. Dogmatis ipsius falsitatem detectam dedimus abundè peculiari Tractatu, qui prodiit Titulo *Narratoris Confutati*; sive, *Animadversionum in Narrationem de Controversiis nuperius in Academia Ultrajectina motis*; invitante ad plenissimum rei examen Celebrerrimo Antagonista. Inter cætera *Tract. cit. pag. 186. 187.* texebam brevem syllabum præcipuarum quarundam consequentiarum, ex nova de mente humana sententia fluentium, & præ aliis tunc temporis fortè occurrentium. Nimirum: *i.* Essentiam Dei in cogitatione consistere. *ii.* Duo propriè loquendo tantum dari Dei attributa interna, Intellectum & Voluntatem. *iii.* Deum ratione essentiæ nullibi esse. *iv.* Omnipræsentiam ergò Ejusdem nihil aliud esse, quam denominationem extrinsecam, natam ex operatione in rebus corporeis. *v.* Quin & naturam divinam in Christo mediatore aliter humanæ naturæ uniri non potuisse, quam per operationes. *vi.* Angelos bonos aut malos ratione essentiæ nusquam esse. *vii.* Neque moveri de spatio in spatium. *viii.* Posse nihilominus unum eorum in duobus dis-

## II.

*Consecrarium quæ post se trahit novella idea de humanamente, quæ mera cogitatio sit, syllabus.*

sitis spatiis plures operationes ad extra simul producere. ix. Ita  
 tamen ut nullam veram exerceat causalitatem, sed Deus efficiat ali-  
 quid in creaturis, ad nudam angeli voluntatem. x. Animam  
 humanam non esse hominis formam. xi. Corpori unitam esse  
 non ratione essentiae, sed duntaxat ratione operationum. xii. Sic  
 tamen ut tanquam causa proprie dicta nullas actiones transeuntes in  
 corpore producat. xiii. Verum motus hujus ab influxu mentis  
 non pendeant. xiv. Quin & corpus humanum vivere possit &  
 moveri citra ejus praesentiam. xv. Animam rationalem in morte  
 hominis non mutare suum ubi. xvi. Neque ullam post mortem  
 ratione ubi posse illi tribui differentiam. xvii. Sed caelum  
 & infernum nihil aliud notare quam mutationem cogitationum.  
 xviii. Ceterum, Animae actionem potentia agendi esse priorem,  
 atque hanc ab illa fluere. xix. Habitum mentis sine actu con-  
 cipi non posse. xx. Nec ullum omnino habitum dari, etiam  
 infusum aut innatum, qui non actibus comparetur. xxi. Tal-  
 em consequenter quoque esse habitum congenitae vitiositatis;  
 sicque hominem prius actu quam habitu peccatorem esse. xxii.  
 Infantem ergo in matris utero actu peccare. xxiii. Ex adverso,  
 embryonem regnitum credere fide actuali. xxiv. Quin, Spiri-  
 tum S. in regeneratione nullam bonam inclinationem menti implan-  
 tare posse, absque actu nostrae voluntatis. xxv. Itaque & rege-  
 nitum prius actu quam habitu credentem fieri. Obtestabar istic  
 unumquemque partem in his dissidiis nondum facientem, judica-  
 ret, tantine fieri debeat novella humanae mentis, ceu merae cogi-  
 tationis idea, ut cum illa in orbem Reformatum intromittenda  
 putet haec quae exhibuimus inaudita pleraque in hunc usque diem  
*Euphrasiam*; quae ipsa singula suas iterum habent sequelas extenden-  
 tes sese latissime. Etsi vero tum in illo nostro Tractatu tum passim  
 in hisce Exercitationibus docuerim abunde, has omnes assertiones,  
 & connexas esse suam naturam cum novo dogmate, & simul falsitatis  
 atque periculi esse plenissimas, nequis tamen maneat calumniae  
 locus, pressius non nihil agere visum fuit, hujusque rei in priori-  
 bus saltem quibusdam eo quo sequuntur se ordine breve dare expe-  
 rimentum. Ceterum, ex ungue Leonem! Ajebam itaque ex  
 opinione, quae mentis humanae essentiam solo cogitandi actu absol-  
 vit, sequi:



## I.

Ipsam totam Dei essentiam in hoc uno consistere, quod sit cogitatio.

Nimirum, quandoquidem ex novella hypothesi conceptus cogitationis intimant naturam nostræ animæ spiritualement secundum se exhibet; & quoniam illis auctoribus Deum eandem essentiam spiritualement cum mente humana habet communem (reclamante licet alibi D. Coccejo, cujus iudicio *spiritualitas anima & Dei non magis conveniunt, quam essentia anime & corporis*, *Summ. Theol. Cap. XVII. §. 12.*) non potest non hac parte de Deo statui idem, quod affirmatur de humano spiritu. Disertè Poiretus, *Cogit. Rat. Lib. III. Cap. III. §. 3.* In Deo, cum ad illum attendo ex hac occasione (scil. quod completa notio rei qua cogitatione absolvitur spiritualitas dicenda sit, ob quam assero mentem meam spiritum esse, §. 1.) ita etiam cogitationem esse animadverto, ut tota ejus natura in illa sola consistat, exclusis cæteris omnibus, qua præter cogitationem possunt concipi .... Notetur idcirco, omnia qua in sequentibus Deo attribuentur, nil esse præter meram cogitationem. *Ibid. §. 4.* Ex hisce facile est concipere, quid sit Dei spiritualitas, nimirum quod non tantum cogitet Deus, sed quod omnia qua in ejus natura sunt, cogitatio mera sint.

Crudum profectò hoc dogma est non minus quam novum. Cartesius ipse, *Medit. III.* contentus fuit Deum describere, *Ens summè perfectum & infinitum*; ut Dei nomine intelligat substantiam quandam infinitam, independentem, summè intelligentem, summè potentem, &c. Mirum certè, de cogitatione, præter quam meram nil in Deo sit, verbum facere planè nullum; quum illud prædicatum, quo tota Dei natura absolvitur, minimè fuerit prætereundum istic loci, ubi tanto conatu clarissimam ac distinctissimam Dei ideam urget. Sed lambendo hic fœtus, uti plures, perficiendus erat paulatim. Rem ipsam quod attinet, plurima in Deo esse, qua præter cogitationem possunt concipi, docebunt evidenter ea, quæ de Æternitate, Simplicitate, &c. adferemus sequenti proximè Thesi. Nunc, quid causæ sit, scire velim, cur Deus ipse in Sacris, propius sese manifestaturus Mosi aliisque, Justitiæ quidem suæ, Longanimitatis, similitumque prædicatorum sæpius meminerit, nunquam cogitationis? quam, si tota Dei natura in illa sola consistat, alto adeò silentio involvere minimè omnino convenit. Fri-

## III.

*Affertio-  
ni, Dei  
omnem es-  
sentiam in  
cogitatione  
constituen-  
tis, cum ea  
que men-  
tem huma-  
nam solâ co-  
gitatione ab-  
solvit, de-  
monstrata  
connexio:*

*Ejusdemque  
paucis de-  
scripta falsi-  
tas.*

volum est quod regerunt, præteriri cogitationem, quod supponatur ejus idea naturâ nota: nam etiam plurima illic recensentur passim attributa, quæ ex naturâ sunt maximè obvia, ac longè notiora quam conceptus cogitationis, *in qua sola tota Dei natura consistat*: quem istius temporis hominibus receptum fuisse & familiarum, miror si quis ausit asserere. Id saltem non dederit Cartesius, qui hanc sibi laudem vendicat, quod *sit primus, qui cogitationem tanquam præcipuum attributum substantiæ incorporeæ* (qualis quoque Deus est) *consideravit*. Nor. ad Progr. Artic. Secund. Primus ergò quoque Cartesius erit, qui quod in Deo præcipuum est attributum ritè concipere docuerit? O pectora ante hanc lucem exortam in re tanti momenti nimium cæca! Et quid nî jam olim Deus ipse, si tantæ perfectionis prædicatum sit cogitatio, ut *in illa sola, exclusis cæteris omnibus, tota Dei natura consistat*, nomen suum memoriale, quod voluit esse יהוה, sumserit convenientius (absit blasphemia!) à cogitando, quippe quod unum, si Nostris credimus, omnia quæ in ejus natura sunt comprehendisset? Ista similiaque si cogitemus, nemini non nota esse poterit conceptus hujus absurditas. Nullum verò opinioni novæ præsidium est in Simplicitate Divina. Ea enim evincit solummodò, uti à parte rei quæcunque in Deo sunt sunt ipse Deus, ità quoque cogitationem in sensu identico, uti loquuntur, cum Dei essentia esse eandem: haud aliter ac Justitia, Misericordia, &c. re verâ cum natura divina identificantur; etiamsi, pro nostra cogitandi ratione, primum ac radicale essentia divinæ prædicatum non sint. Atque hoc sensu Amesius, alique nostri cum ipso Theologi passim docent, *Actiorem vitalem Dei esse ejusdem essentiam*. At quemadmodum ex Simplicitate Dei non licet inferre, Ens primum nihil aliud esse in sensu formali, quam meram Justitiam, aut solam Misericordiam, &c. ità quoque minime ex eadem conficitur, primum ac quidditativum Dei conceptum notione cogitationis eo usquè absolvi, ut nihil in ipso præter eam concipi possit. Certè D. Amesius (cui cum plurimis nostris accedit ipse D. Coccejus *Summ. Cap. x. §. 5.*) *Vitam Dei annumerat Divinis Attributis*, contradistinctè ad Essentiam consideratis. Confer. §. 35. cum §. 19. 31. *Cap. IV. Lib. I. Ase dult.* Tantum verò abest, ut Attributum, in sensu formali spectatum, idem planè illi dicat cum Essentia Dei, ut expressè doceat, *Attributa*

*buta divina Deo inesse quasi in esse secundo, quia non sunt de formali ratione essentia divina; sed ab essentia distinguuntur ratione rationis.* Ibid. §. 27. 28. Ut mirer nonnunquam huc adduci Amesium, qui aded è diametro novo Philosophemati adversatur. Sed de hoc, pro instituta brevitate, jam satis.

## I I.

Duo propriè loquendo esse duntaxat Dei attributa, Intellectum & Voluntatem.

Nempè, in Mente Humana nihil agnoscit Cartesius præter ipsam cogitationem, & varios cogitationis modos. Omnes verò cogitandi modos ad duos generales referri posse, ait: quorum unus est perceptio sive operatio intellectus; alius vero volitio sive operatio voluntatis. Princ. 1. §. 32. Quicumque ergò, uti mentis nostræ, ità quoque Dei naturam totam in sola cogitatione consistere autumat cum Poireto, exclusis cæteris omnibus, quæ præter cogitationem possunt concipi, is necesse habet pariter, uti in mente, ità in Deo, nihil admittere præter puræ putæ cogitationis attributa, qualia tantum sunt Intellectus & Voluntas.

Sipaulò diligentius hæc introspeciamus, deprehendemus, re verà omnia omninò Dei Attributa per hunc conceptum è medio tolli. Quandoquidem enim qui Deum nil nisi cogitationem esse volunt, cum Amesio aliisque nostris Theologis ac Philosophis, Intellectum & Voluntatem Divinam sub ratione Facultatum concipere neque volunt, neque per suas hypothesas possunt, id unum restat, ut per modum actionum ea concipiant; scilicet, tanquam cogitationis illius quæ Dei essentiam constituit certam terminationem, ut ità loquar, in hanc vel istam rem intellectam aut volitam. Jam verò actionem quampiam nemo propriè loquendo dixerit attributum illius cuius est actio: actio enim principium respicit, attributum autem subjectum. Atque hinc nullis unquam Philosophis aut Theologis actiones Dei annumeratæ fuerunt strictè dictis Attributis. Itaque, si secundum rei naturam loqui velimus, desinunt ex hac hypothesi ipse quoque Intellectus & Voluntas esse attributa Dei, cujus potius sint actiones. Quumquè in mera cogitatione, qualis his auctoribus Deus est, nulla alia attributa præter hæc duo iisdem sint conceptibilia, utiquè accuratè loquendo

## IV.

*Sententiæ non nisi duo in Deo attributa admittentis, cum eadem hypothesi ostensus nexus:*

*Ejusdemque patet facta breviter absurditas.*

Dei attributa supererunt penitus nulla : quod quam sit absonum, nemo non intelligit. Confirmantur hæc non parùm ex eo, quod solâ efficaci Dei *Voluntate* definiant hi Philosophi Creationem, Conservationem, Concursum, &c. Nisi fortè & hæc dicenda hodiè sint, novâ nomenclaturâ, Attributa Dei. Quin, ut & hoc verbo moncam, quum Recentioribus spiritus tantùm agant volendo, itâ quidem ut Intellectus sit potentia passiva, non video, cur non tandèm una & sola Voluntas super sit, quam Deo tanquam unicum ejus Attributum ( si ullum tale restet ) propriè loquendo tribuere ipsi duntaxat possint. Ad rem ipsam ut redeam, si vel leviter attendamus ad illa quæ in perfectissimo Numine concipiendi menti nostræ sese offerunt, alia certè præter hæc duo deprehendimus. Videlicet, Independentia, Æternitas, Simplicitas, Immutabilitas, similiaque per se & in conceptu suo formali nullam includunt operandi actuositatem, sed simpliciter notant tantummodò modum existendi. Quumque hæc non minus Deo convenientiam quam duo illa de quibus lis est, manifestum existit, quædam Dei attributa posse concipi, præcisâ etiam omni cogitatione : consequenter falsum non minus esse, duo tantum esse propriè loquendo Dei attributa, Intellectum & Voluntatem ; quam, totam Dei naturam solâ cogitatione absolvi. Neque moramur, quod objicitur à Poircto, *alioqui dari in Deo res perceptione destitutas, quas Deus cogitatione ab illis diversa perciperet, res brutas igitur & incogitantes ; quod blasphemum esse ait, & non Deo, sed imperfecto idolo dignum conceptum.* Hæc enim demùm vera forent, si ista supponeremus realiter & ante mentis operam à Deo cogitante esse distincta, ac non potius abstractè à nobis duntaxat concipi. Nec stringit, si istes : Saltem ergò res brutæ & incogitantes in Deo concipiuntur. Id namque ambiguè dictum est. Velenim significat, aliquid hoc pacto à nobis in Deo concipi, quod à parte Dei brutum sit & incogitans ; quod est falsissimum, cum noster modus concipiendi nihil omnino detrahat divinæ Simplicitati, per quam, ut antè monui, in sensu identico & à parte rei, vita Dei cum omnibus ejusdem attributis identificatur. Vel notat, aliquod prædicatum in Deo à nobis concipi, quod, prout conceptu nostro substat, notionem cogitationis præcisè non includit : atque hoc ipsum verissimum est, ut jam ostendimus. Sed non rectè

rectè quod ità à nobis concipitur, dicitur concipi *incogitans*, quatenus vox hæc idem sonat quod *brutum*: id enim demum dixeris *brutum*, quod omnem cogitationem tanquam subjectum incapax negat & excludit, qualia sunt v. c. lapis, horologium, sol, &c. non id, cujus aliquod prædicatum abstractè saltem potest concipi absque expressa cogitationis idea. Omnipotentia v. c. (ut rem simili illustrem) in conceptu cujusvis Attributi divini, ex: gr. *Æternitatis*, aut *Simplicitatis*, nequaquam includitur; at non idè qui abstractè concipit *Æternitatem*, non cogitando tunc temporis de Omnipotentia, concipit in Deo rem aliquam *impotentem*, cujus nomine blasphema dicatur hæc idea, atque idolo digna; non Deo. Quin, an non ipsis sibi hic os batuant, qui talia effutiunt, viderint. Agnoscunt enim Novatores, Voluntatem saltem Dei ab ejusdem Intellectu distinctum attributum. Dic nunc, age! qui sic illam concipiunt, an & hi formant notionem rei in Deo *non-intelligentis*, adeoque *brute*. Si sic, etiam conceptus adversariorum, distinguendum Intellectum inter & Voluntatem, tanquam duo propriè dicta attributa, *blasphemus* erit, & *non Deo, sed idolo dignus*. Sin minus, utiquè licet citra ullam in Deum injuriam, aliquid in eo concipere, quod in conceptu suo formali, quatenus in mente est, intellectum præcisè non simul offert. Deniquè, cum plerique omnes ante nostram ætatem Theologi & Philosophi, ipso ne quidem excepto Cl. Coccejo, jam olim communi consensu dividant Dei attributa in primi generis, quæ sint *essentie*, atque incommunicabilia, & secundi generis, quæ sint *vire* (ità hanc ab essentia solent distinguere) & communicabilia; quis ferat, omnem eorum cœtum ita apertè insinulari *blasphemie*, quasi, quamdiu radiis Cartesianæ Philosophiæ non fuerunt collustrati, pro Deo *imperfectum idolon conceperim*. Paria, si luberet, facile esset retorquere majori jure in Novatores; qui quam dignum Deo cudant conceptum, per suam cogitationem, præter quam in Deo concipi possit nihil, nunc aliis instantiis ostendere pergitimus.

## III.

Deum ratione essentia suæ planè nullibi esse.

Hoc necesse habent tueri, qui totam Dei essentiam sola cogitatione

V.

Deum ratione  
essentie

*si nuspiam  
esse, eadem  
hypothesis  
necessario  
infert :*

tione consistere asserunt. Etenim iisdem Cogitatio & Extensio duas constituunt rerum species sic oppositas, ut quæ attributa huic tribui possunt eadem illi convenient nulla. Jam verò aliud Ubi hî non agnoscunt, quam quod idem omnino sit cum loco physico, sive spatio corporeo quod vocant circumscriptivum; atque hoc ipsum ab extensione sive intima corporis natura nullâ parte distinguunt. Quibus convenienter rei intellectuali, ab omni extensione remotæ, qualis est Deus, nullum ratione essentia, quæ his est mera cogitatio, adscribi potest alicubi. Audiamus, si lubet, Claubergium, *De Cognit. Dei & Nostri, Exercit. LXVI.* Is ad quæstionem, *An omne quod est, alicubi sit, adeo ut hoc axioma à Deo & Creatura sit abstractum?* Respondet, §. 1. 2. *Ut intelligatur quo sensu verum sit præscriptum effatum, quamque late se extendat, explicandum est ejus tum subjectum, tum prædicatum. Subjectum de quo dicitur quod sit alicubi, non est res intellectualis seu incorporea, sed corporea tantum sive materialis, quæ in longum, latum & profundum est extensa. Adde Poiretum, Cogit. Rat. Lib. 1. Cap. VI. §. 4. Si quis querat, ubi sit Deus.... quæstio per absurda est. Cum idem sit ac si quereretur... an spatium sit ipsa Divina essentia. Absurdè queritur de subjecto quæstionis prædicatum toto genere diversum. Perinde quæras de mente, in qua sit figura, vel in quo sapore?*

*Dogmatis  
hujus addita  
confutatio.*

Non ero operosus in confutanda thesi, quæ stare nequit, convulso jam ejus præcipuo fulcro, quod est conceptus Essentia divina, tanquam puræ cogitationis. Sed & aliud ei substernitur præjudicium circa conceptum ¶ Alicubi, quod extensionem præcisè involvere opinantur. At perperam, quum re verâ aliud nihil notet quam relationem præsentia, sive coexistentia, vel actualis ad rem actu existentem, vel possibilis ad rem possibilem. Ista autem præsentia vel coexistentia quod concipiatur involvere partium diffusionem, à mero infantia præjudicio est, quod ita à teneris assueti sumus corporum duntaxat præsentiam & ubi concipere, ut mens non nisi summa cum attentione & difficillimè notionem ¶ Alicubi ab idea corporis divellere queat : quod non hîc tantum sed & in aliis nostræ menti in hoc unionis statu versanti accidit frequentissimum. Rem ipsam quantum attinet, quid, obsecrò, vetat, essentiam corporis suo quidem modo, per partium scil. extensionem ac divisibiliter alicubi esse; Deum verò modo sibi convenienter,



te, coëxistendo alicui spatio per essentiam suam indivisum & citra ullam extensionis diffusionem? Adcò hæc sunt evidèntia, ut si lubeat seponere aliquantisper disputationis fervorem, ausim hic obtestari unumquemque, an, uti rem singularem quamcunque, ità quoque Deum, ratione essentia concipere queat, ut non concipiat esse, uti loquuntur, & *Hic & Nunc*? Experiat quilibet, & deprehendet non magis se hic præscindere posse notionem *Ali- cubi*, quam eam quæ est *Aliquando*. Ut meritò quotquot hætenus ex Cartesio philosophati non fuerunt, quemadmodum *Aliquando*, ità quoque *Aliubi*, agnoverint Entis, non qua corporei, sed qua entis, affectionem; quam & idcò admiserunt Deo non minus quam creaturis convenire. Neque melius, quo nexu indiviso ista duo cohæreant, intelligimus, quam si vel solùm attendamus, Vorstium, Socinianos, aliosque qui errarunt in conceptu Divinæ Æternitatis, errasse pariter in doctrinade Immen- sitate; & contrà. Uti ergò Deus negari nequit ratione essen- tia esse Aliquando, ita neque negari potest ratione essentia esse Alicubi. Rationes alias, easque invictissimas, hic suppeditat, & Omnipræsentia divina, & unio naturæ Divinæ hypostatica in Christo mediatore; quæ neutra orthodoxè explicari & defendi potest, si ratione essentia neges Deum Alicubi esse. Verum de iis mox agendum erit verbo. Nihil verò dictis obstat, quòd ab æ- terno Dei essentia fuerit, etiam quùm nulla essent spatia: non enim pugnat essentiam divinam relationem dixisse ad spatia possibi- lia, quibus, si aliquandò dentur, verè foret præsens. Neque enim ab æterno temporalia quoque spatia fuerunt; nostris nihilo- minus quæ jam sunt, essentia divina (modo perfectissimo licet ac se digno; videlicet absque existentia suæ successione aut mutatio- ne) coëxistit præsens. Ex quibus simul liquet, per creationem ex nostra sententia Deo ratione essentia nihil hac parte accidisse no- vi; cum & ante Mundum conditum fuerit Alicubi, licet non præsens, si strictè loquaris. Plura qui cupit conferat & hic & in sequentibus *Disquisitionem* nostram de *Nullitate Spirituum*. Fa- teor, errori de Deo qui ratione essentia nullibi sit prætextuntur quandoque magnorum Virorum nomina, sed non absque ingenti in eos injuria. Etenim quoties Deo Ubi denegant, nullo Eum contineri loco, illocalem eum esse, &c. asserunt, Ubi remo-

vent, non omne penitus, sed prædicamentale duntaxat & finitum, quod circumscriptivum corporum aut definitivum spirituum creatorum vocant. Ità Augustinus *Lib. vii. Confess. Cap. 1.* totus est in deplorando errore juventutis, quo ità conceperat Deum: Alicubi, ut major pars terra majorem ejus partem haberet, & minorem minor, atque ita eo plena essent omnia, ut frustatim partibus mundi, magnis magnas, brevibus breves partes sui faceres presentes. Merito hunc conceptum deindè damnat; at non ideò essentiam Dei alicubi esse negat. *Non sic Deus dicitur complere mundum, velut aqua, velut aer, velut ipsa lux, ut minore sui parte minorem impleat mundi partem & majore majorem. Novit ubique totus esse, & nullo contineri loco. Epist. 111.* Occurrunt quæ hùc pertinent valde præclara in celebri illa ad Dardanum Epistola, quæ ordine est LVII. verùm per ea jam vagari studio brevitatì non licet. Doctissimum Bisterfeldium præterire hìc nequeo, cùm is omnium clarissimè explicet, quo sensu Deus dici possit illocalis, & tamen verè alicubi existere. Sic ille *Philosoph. Prim. Cap. xii.* Hinc jam oritur quarta entis divisio: nempe, quod sit, vel illocalis, vel locale. Illud dicitur, cujus Ubietas est Infinita; hoc, cujus est finita. Egregiè verò de Ubi Dei disserit *Ibid. Reg. vi.* hunc in modum. *Alicubi esse, est universale omnium entium existentium attributum. Quod nusquam est non est. Hic autem, ut ubique in hac disciplina, magna vocum penuria laboramus. Itaque cogimur eas à rebus corporeis mutuari; & quasi sublimare. Quia nihil sensibus percipimus, quin id incerto loco nobis occurrat, ideo ipsimet Deo, Scripturam præcipientem imitati, locum & locorum differentias adscribimus. Secus, nec ejus præsentiam, nec efficientiam, nec eminentiam, exprimere possumus. Interim hinc claret, Deum, nec localiter moveri, nec ullo modo aliquam mutationem in se admittere posse. Alias entis infiniti ubietas foret finita. Etsi vero nos hanc Dei excellentiam ne concipere quidem queamus sine spatiis, tamen ideo Deum nulli spatio includimus. At per omnia spatia, inquis, non solum realia, sed etiam imaginaria intelligis. Omni-  
no, sed merito: id nì faceremus, Deum, contra rectam rationem & Scripturam, huic mundo includeremus. Suprà magnus fuit usus successionis imaginaria, nunc par, si non major, est spatiorum imaginariorum. Hæc qui exagitant vel infirmam vel confusam habent imaginationem: siquidem ipsa Scriptura doceat Deum ne à cælo quidem cœ-*  
lorum

*lorum capi, &c.* Ecce! *Illocalem* Deum statuit vir doctus; quatenus nulli spatio includimus: at simul ejusdem agnoscit *Ubieratem infinitam*; sine qua nec ejus *presentiam*, nec *efficientiam*, nec *eminentiam* exprimere possumus; quâque est Alicubi ratione *spatiorum non solum realium, sed etiam imaginariorum*. Neque ullus qui aliter hîc sentiat alicujus notæ scriptor, quantum opinor, adducetur. Ut Recentiores, qui novum hoc suum dogma suffragiis magnorum Virorum, Augustini nominatim & Bisterfeldii, stabilire laborant, hac in re prodant vel negligentiam in expendenda Auctorum mente supinissimam, vel sophisticen in citandis eorum verbis nimium crassam.

## I V.

Immensitatem Divinam esse nihil aliud, quam denominationem extrinsecam, natam ex operatione in rebus corporeis.

Eruditissimi Viri hunc in modum ex novis principiis de Dei Omnipræsentia differentis verba alibi exhibuimus. Neque aliter possunt quicunque essentiam Divinam solâ cogitatione definiunt, camque planè nullibi esse contendunt. Hoc enim posito, nihil restat quam ut omne Dei Ubi, si quod omnino ex hac sententia ei tribuendum sit, restringatur ad puram denominationem desumptam ab operationibus ejus in rebus corporeis, quæ ex nova hypothese cum ipso Ubi sunt idem. Cartesius quidem expressè instanti Moro, *Qui autem Deum positivè infinitum agnoscit, i. e. ubique existentem, quod tu merito facis, &c. regerit, Epist. LXIX. Lib. I. Hoc ubique non admitto. Videris enim hic infinitatem Dei in eo ponere, quod ubique existat; cui opinioni non assentior: sed puto Deum ratione suæ potentie ubique esse, ratione autem suæ essentia nullam planè habere relationem ad locum.* Omnium verò, uti clarissimè, ita candidissimè secundum nova principia absolventia Divinam naturam purâ cogitatione, de hisce ratiocinatur Poiretus, qui hîc Cartesium rectè philosophantem se sequi profiteatur. Plurima notatu digna quæ hujus loci sunt occurrunt, *Cogit. Rat. Lib. I. Cap. VI. Adscribam pauca ex §. 6. At quid argumento, ait, suprâ allato respondendum est, Cum Deus potentia sua Creaturis sit præsens, sequi & propriæ essentia, quæ ipsa potentia est, præsentem eis esse dicen-*

VI.  
Definitio  
Divinæ Im-  
mensitatis,  
tantum per  
denominati-  
onem ex-  
ternam ab  
operatione  
desumptam,  
fluit ex ea-  
dem hypo-  
thesi:

dum? Negandum est, exactè dici, Deum esse creatis præsentem ratione essentialis potentia; sive, quod idem est, essentialem Dei potentiam in creaturis esse, &c. Adest Deus, sed effectus & operatione potentia illius, quæ in ipso solo est, & cujus nomen si ipsis operationibus deus, ad rhetoricum tropum satius est recurrere, quam concludere, præsentiam operationis, quæ est in creatura, esse ipsam Dei potentiam, &c. Imo, quod verbo sit dictum, quæcumque de pluribus modis præsentia divina dicuntur, ea in operationem ejus debent resolvi, &c. Quin pergit, §. 4. Ergo abeant dicta de præsentia Dei ratione essentialis totius in toto mundo, & totius in qualibet parte, & similes perab-surdæ voces, &c. Credibile est homines, si quid Deus sit rectè nos-sent, non ausuros, ne Deum de decore afficerent, talia proponere: at illi in cognoscendo numine summo ita sunt securi & supini, ut eis nosse suffecerit ipsum esse id (ut cum Philosopho loquar) qui Latinis Deus, Gallice Dieu dicitur, & ab hominibus colitur: nil multum curantes, an quæ ejus summam deceant majestatem ipsi attribuantur.

Ejus notata  
periculosa  
absurditas.

Ità non satis erat renovare lites, jam olim orthodoxis à Vorstio & Sociis motas, de essentiali Dei Omnipræsentia, nisi quoque sententia recepta non Reformatis duntaxat, sed quibusvis Christianis, si sectæ Polonicæ fratres excipias, traducatur, tanquam Deum de decore afficiens, nec multum curans, an quæ Dei summam decent Majestatem ipsi attribuantur. Audiat ista Christianus orbis! Audiat, inquam, & evigilet tandem! Quò non zelus pro Cartesii dogmatibus abducit hodiè viros? Nequem autem malè urat, Vorstii mentionem me fecisse hoc loco; quasi nimium id ad invdiam comparatum sit. Fateor, nec corporeum Deum, nec cælo inclusum, cum Vorstio, statuunt Novatores; at non istis capitibus absolvitur quicquid hac parte Catholicis cum Vorstio inter-cel-litum. Quamvis & id nesciam, an multo tolerabilius sit, Deum planè nullibi ponere, quam cælo cum includere. Missis autem hisce in præsens, fuit nostris cum Vorstio gravis imprimis controversia de vera Dei *paræxusia* in omnibus partibus hujus Universi: atque hanc negant Cartesiani perindè ac Vorstius; licet ex alia & alia hypothefi. Nullas quæ propter causas habent querendi de injuria quæ sibi hac in parte fiat. Quin potius vel errorem agnoscant ingenuè, linguam simul cum mente corrigentes, vel prostratas dudum Vorstii copias inslaurent tandem generosè. No-bis

bis placet istud Walæi : *Omnes orthodoxi, Deum ubique per essentialiam, tam in celo quam in terra, præsentem esse, recte contendunt; & contrariam sententiam blasphemiam condemnant.* Non est hujus loci urgere efficacissima Scripturæ loca, à Theologis nostris pro Essentiali Dei Omnipræsentia adducta, quæ novis & violentis ac plusquam Vorstianis interpretamentis eludere Novatores, conquiritur Cl. Maresius, *System. Noviss. Loc. 11. §. 32. Lit. b.* Ista fileo. Tantum, si Immenitas sit nihil aliud, quam denominatio extrinseca ab operationibus transeuntibus sumita, quæ tandem restat distinctio Immenstatem Divinam inter & Providentiam? quæ tamen duo distinxerunt ab omni ævo Philosophi & Theologi. Quin, si attendas, ne ullâ quidem ratione illis Deus alicubi erit, sed ejus duntaxat effecta; quæ à Deo totâ essentiâ distinctâ esse notum est. Dei enim operatio, cujus ratione ipse alicubi diceretur, vel activè spectatur à parte Dei operantis, vel passivè a parte rei productæ; tertium non datur. A parte Dei si spectetur, nihil est, si Recentioribus credas, præter ipsam cogitationem, quæ essentialis Dei absolvit, quamque nullam planè relationem ad locum dicere, exercitum pronunciant. A parte rei productæ, est ipsa hæc res; quæ etsi alicubi sit, non ideò Deus produciens alicubi est, cum toto celo hæc duo sint diversa. Ad metonymicam ergò locutionem claris his & distinctis Philosophis confugiendum fuit, ut ejus involucris sententiam quam profiteri pudet palliarent atque ità orbi imponerent. Optimè hæc omnia observavit ipse Poiretus, cujus & hic laudandus est candor, quando *loc. cit.* ingenuè fatetur, Cartesium, Forgeum, Wittichium, cum dixerunt, *Deum essentialiâ, essentialiter, ratione essentie omnibus esse præsentem, difficultatum quarundam causa, usos fuisse vocibus maxime impropriis & deceptricibus; quæ aliud ex instituto communi significant, adeoque obscuritatem conceptuum fovendi; quibus, si ex ordinario usu interpretentur, non significatur verum; quarumque sensus quem substituant, ipsi verborum significationi reluctetur.* Egregie! Credant vocibus deceptricibus, qui, quid monstri ex alant, ignorant. Non sibi iis imponi unquam patientur qui intelligunt, quam sit meritò suspectum, quam veritati exitiale, quam viro bono & candido indignum, deceptricibus vocibus & non significantibus verum ludete in re adeò seria, de qua & vera dicere periculosum est.

Certè nec Vorstio in eadem materia *deceptrices voces* defuere. Terrent vestigia. Et quis obsecro, licet vel vim intellectui inferat, conceperit, Deum hic vel istic *per essentiam operari* (talisenim operandi modus, utpote absolutissimus & ente perfectissimo dignissimus, Deo est tribuendus) neque tamen per essentiam hic vel istic existere. Utiquè, si verum sit, *Agere* supponit *esse*, etiam *hic agere per essentiam*, supponit (remotis *vocibus* omnibus *impropriis & deceptricibus*) *hic esse per essentiam*. Ut re verà conceptus Dei per operationem præsentis formari, queat nullus qui non supponat conceptum Dei per essentiam præsentis. Absolvam verbis Claubergii, quæ occurrunt *Exercit. LXVI. §. 15. Ut unumquodque est, ita & alicubi est; sive, qualis existentia rei, talis etiam ejus est presentia. Ratio est, quoniam per entitatem suam alicubi est, sive præsens est per suam existentiam*. Sit ista major. Subsumo nunc ego: Atqui verè & propriè, *remotis vocibus impropriis & deceptricibus*, per essentiam suam Deus est. Ergò & verè ac propriè, *remotis vocibus impropriis ac deceptricibus*, per essentiam suam Deus alicubi est. Consequenter falsa & periculosa est Immenstatitis explicatio per nihil aliud, quam denominationem externam ab operatione Dei in re corporea desumptam. Atqui hoc ipsum demonstrandum erat. Est autem refutatione indignum quod urgetur, per receptam Reformatis opinionem extensionem Dei tribui. Scilicet eum à Deo removendam esse ex Cartesio discere debebat orbis Christianus, qui jam olim cum Augustino intellexit, Deum esse *magnum sine quantitate & ideo Immensum*. Neque potui sæpius mirari satis, toties à Novatoribus hic vapulasse Cel. Marefium, quòd dixerit, Omnipræsentiam Dei *extendi* ad omne ubi. Quicumque enim inspicere voluerit quæ hac de re tradit, *System. Noviss. Loc. 11. §. 32. lit. a.* clarè is videbit, nihil aliud contendisse Virum, quam in conceptu Omnipræsentia divina extensionem involvi; non à parte Dei, quam vocat *extensionem subjectivam*, Deoque expresse denegat; sed à parte rei cui Deus coexistit, quam vocat *extensionem objectivam*, quamque tribuit Deo *inextenso & indivisibili*. Quod totum adèd verum est & accuratum, ut ne quidem *extensionis objectiva*, uti vocat D. Marefius, conceptum ipsi Novatores hic excludere queant, dum contendunt, concipiendam esse Immenstatem per denominationem ab operatione *in rebus*



*rebus corporeis* : quæ profectò absque extensione concipi non possunt.

## V.

Naturam Divinam in Christo Mediatore naturæ humanæ uniri aliter non potuisse, quam per operationes.

Theologi propriè fori est plena hujus propositionis discussio : quapropter, ne falcem in alienam messem mittam, duntaxat monstrabo dogma hoc reverà connexum esse cum opinione asserente, uti mentis humanæ, ità Spirituum quorumvis essentiam in mera cogitatione consistere ; verboque, quid de eo statuant Theologi, tantùm narrabo. Audivimus thesi præcedente exertim pronunciaré Cartesium, ex hypothesi quâ Deus est nil nisi cogitatio, eundem ratione potentiæ ubiquè esse, ratione autem suæ essentie nullam planè habere relationem ad locum ; id est, ad rem quampiam corpoream, quæ Cartesio cum loco eadem est. Huic consonum habuimus Poiretum profitentem, *vocibus, maxime impropriis ac decepticibus, nec significantibus verum, uti Cartesianos, qui Deum essentiâ, essentialiter, ratione essentie esse præsentem alicubi dixerunt.* Jam verò, non aliâ ratione spiritum cum re quampiam uniri posse, quam quâ ei est præsens, per sese clarissimum est. Ex quibus sponte suâ sequitur, naturam Divinam, utpote spirituales, id est, juxta illos, meram cogitationem, cum nulla re alia, adeoque nec cum humana natura Christi Domini, aliter conjungi potuisse, quam per operationes, & ratione effectuum ; omnesque, qui aliter loquuntur Cartesiani, *diffultatam quarundam causâ, uti vocibus maxime decepticibus & ex ordinario usu non significantibus verum.* Et quamvis hæc enus ferè metuant, liberè profiteri genuinam hac de re animi sententiam, non tamen abstinere ea tradere de unione personali duarum naturarum in Christo Mediatore, quæ quid sentiant, satis produnt. Huc nimirum aurigantur quæ docent de Personalitate in divinis, quæ sit mera negatio ; de hac ipsa unione, quæ tantùm sit relatio quædam conjunctionis ; ut nulla sit, qualis Theologis passim traditur, sustentatio personalis ; &c. Ad quæ omnia jam sæpius à Clarissimis Theologis objecta vel silent, vel frigidè satis respondent. Certè in universum Poiretus ; *Quacunque de pluribus modis præsentia divine dicuntur, ea in operationem ejus debent resolvi.* Cogit.

Rat.

## VII.

*Utriusque naturæ in Christo unionem solâ operatione absol- vere jubet eadem hypothesi.*

*Rat. Lib. 1. Cap. vi. §. 6. Et speciatim de unione cujusvis mentis cum corpore, Forgeus : Oportet ergo unionem in omnibus quæ ununtur, querere in attributis relativis; nulla autem alia invenio, ... quam primo & in genere actionem & passionem, &c. Præterea invenio.. voluntatem pro unione quæ inter mentem est & corpus, quatenus hæc voluntas extra suum subiectum procedit per suas operationes. Neque puto quemquam alia posse invenire attributa, quam hæc, quæ duas substantias simul unire possent. Tract. de Ment. Cap. xiii. §. 8.*

*Reclamante  
orthodoxâ  
Christiano-  
rum fide.*

Scholasticos passim perstringunt nostri, & merito, quòd mysteriorum profunditatem rationis acumine pervestigare laborarint, indèque tantis rebus minus opportunâ philosophatione tenebras intulerint. Quis verò neget imitari re verâ eorum mores, quorum vel nomen tantopere horrent, qui in arduo negotio ex idea Dei tanquam meræ cogitationis, adeò periculose hîc sapere non verentur? Periculose, inquam; quatenus sic omnis *Ενωσις ὑποστατικὴ* duarum naturarum in Christo *Θεανδρώπου* in *ὑνέχειαν* meram *καὶ παράστασιν* resolvitur. Quod qui sentiunt, an non, contra adverbia Ephesina *ἀδιαίρετος καὶ ἀχωρίστως*, salivam Nestorii lambant? viderint Theologi. Certè, qui jam dudum ante novam sapientiam docuerunt (quorum, tanquam extra partes constitutorum, efficax imprimis est hîc testimonium) contra eandem exertim pronunciant. Nestoriani veteres statuebant, hæc duas naturas non aliter fuisse unitas, quam quia Divina natura humane adflesbat in omnibus suis Operibus, & favore suo singulari eam amplecteretur. Sed hæc sententia hæretica judicata fuit in concilio Ephesino. *Waleus in Enchirid. p. 177. Modus hujus unionis non explicandus est καὶ ὁμοῦσασιν*, aut simplicem inhabitationem, sicut nauta est in navi; vel *καὶ ὁχίειν*, qualis est unio conjunctioque amicorum, &c. vel *καὶ ταυτοκυλίαν*, sive, ut alii vocant, καὶ ἀρρυτίαν, respectu consensionis inter voluntatem humanam & divinam in Christo, &c. Atque hæc erant Nestorii σοφὰ φάρμακα. Tilen. Syntagm. Part. 2. Disp. 1. Definiverat nimirum vetus Ecclesia: Si quis dicat, secundum gratiam, vel secundum operationem; vel secundum dignitatem, vel secundum honoris equalitatem, aut relationem, aut affectum, aut virtutem, &c. & non secundum compositionem, id est secundum subsistentiam, unionem Verbi ad Carnem factam esse, anathema sit. Sed nos manum de hac tabula; queis

queis sufficit observasse, quæ orthodoxorum hac parte sit sententia? quod novæ assertionis ab ea divortium? Ei an mitioribus quibusdam phrasæologiis satisfiat, viderint Theologi! Sed viderint pariter, ne sibi & causæ fraus fiat *vocibus deceptivicibus, nec significanibus verum*; quibus *difficultatum quarundem causa* uti suos focos in ejusmodi rebus, apertè monentem audivimus Poiretum.

## V I.

Angelos, sive bonos sive malos, ratione essentia nuspiam esse.

Cohæret necessariò hæc assertio cum dogmate principali, unicam cogitationem agnoscente prædicatum essentiale quorumvis spirituum; adeòque Mentium Angelicarum non minus, quam humanarum. Philosophis eisdem, ut jam diximus, omne ubi sive spatium cum re corporea planè idem est. Res verò corporea eorundem judicio Spirituali non opponitur, nisi quatenus hæc cogitatio est, non illa. Ergò superest, ut à cogitatione mera, qualis etiam eis Angelus, omne ubi longissimè removeatur. Videlicet, *Omnia verè perfecta & realia (etiam mentes omnes, quo spatio non egent) in spatiis ponere, querere, nec ultra spaciòsa omnia scandere, quasi nil præterea esset, mentis est in materia demersa, diviniòisque mundi multum nescire.* Poiret. Cogit. Rat. lib. I. Cap. v. §. 8. Nam extra statum unionis (extra quem subsistunt Angelicæ mentes) sive corpora sint in rerum natura, sive non sint, concipi nequit substantiam aliquam, cujus tota essentia consistit in cogitando, esse posse in loco, sive definitivè, sive circumscriptivè, cogitationemque ejus posse facere, ut spatium a'iquid repleat, aut situm aliquem habeat. *Forgaus Tract. de Ment. Cap. XII. §. 4.* Nominatim de Angelis alius haud indoctus horum mysteriorum explanator sic alibi: *Angelorum tota natura consistit in cogitatione, unumquodque autem est præsens per id quod possidet, non autem per id quod non habet: cogitatione autem non potest esse præsens, nisi quando per cogitationem suam aliquid efficit. Item: Angeli in loco quandoque operantur, suntque in loco respectu istius operationis; sed quando non operantur, sed tantum cogitant intra se, opus non habent loco.*

Exercitatione de Spirituum Nullitate docebamur, hoc idem Dogmatis

Ggg

dogma

## VIII.

*Angelos esse nuspiam, docere cogis hypothesis eadem:*

*hujus Weigeliani  
con-  
fusio.*

dogma unum esse ex sublimibus sapientiæ Weigelianæ capitibus. Dedimus istic ipsa fanatici hominis verba, Crocio in Anti-weigelio citata, à nobis ex Germanicis latina facta. Videri inibi merentur; digna enim sunt, quæ cum exhibitis jam novorum Philosophorum verbis conferantur; aded non ovum ovo existit magis simile. Clarissimum ea dant experimentum, quam parum, an cum Weigelio sentiant, an cum Catholicis orthodoxis, attendant, qui Cartesii ideas normam suæ sapientiæ sumserunt? Rem quod attinet, tam manifestæ veritatis est axioma, *Agere supponit esse*, quam est illud Neotericorum, *Cogito, ergo sum*. Indè, uti nemo concipiat, etsi vel sibi cerebrum excutiat, quicquam agere, nec tamen esse; ita pariter nemo cogitet, Angelum hinc agere, nec tamen hic esse. Quapropter, quemadmodum actio ordine naturæ essentiâ posterior est, sic præsentia ratione actionis naturâ suâ posterior est præsentia essentiæ; atque aded hæc ad illam necessariò supponitur. Et si Angelus alicubi non sit, nisi ibidem extra se operetur, quid erit dicendum de Angelorum beatorum Cælo, de damnatorum Inferno; quæ in Sacris tanquam propria loca eisdem passim tribuuntur? An verò Nullibisticum hoc utrumque erit, unâ cum suis incolis? Sic exigit nova thesis. Imprimis, quum excogitare non detur opus quod actione transeunte istic locorum hi spiritus producant: neque enim inibi vel Ægyptiorum primogeniti suffocandi occurrunt, vel Assyriorum exercitus mactandus, vel præcipitandi in mare porci, vel corpora energumenon exagitanda. Ubi, ubi ergò ab opere externo quiescentes exercitus cœlestes? Ubi diabolorum legiones? Nuspiam; si his credimus philosophis. Quid? quod nec ipsæ actiones transeuntes ad definiendum ubi Angelorum quicquam juvare possint eos, qui nullam eis relinquunt activitatem, præter puram cogitationem: non enim illis qui in hac totam Spiritus essentiâ consistere ajunt Angelus creditur verè id agere quod extra sese agere dicitur, sed ipse potius Deus. Si quæ ergò ex operatione concludenda erit præsentia, hujus cujusest actio, non illius inferri debebit. Absurdissimum verò fuerit existimare, aliquid corporeitas sibi contrahere à sua in rebus materialibus præsentia essentiali, quam nos eis asserimus, Angelicas mentes: non enim hæc magis indè metuenda contagio, quam quòd in corporeis rebus operari saltem dicantur. Quid  
ergò

ergò vetat concipere relationem præsentia Angelo competere in ordine ad spatium, etsi nihil in eo operetur? Præjudicium infantile, arbitror, quo connectere solent pueri conceptum præsentia cum conceptu extensionis; quia scilicet sensu observarunt corpora suis extendi spatiis, eorumque præsentiam mutuam dicere & vicinam coextensionem. Atqui eorum quæ corpori conveniunt modo corporeo, spiritui adscribi posse nihil nisi ratione prorsus eadem, quis unquam dedit probatum? Si quæ hac in re difficultas, non ea rei impossibilitatem arguit, sed mentis potius nostræ, materialia concipere à teneris nimium assuetæ, imbecillitatem.

## V I I.

Angelos ratione essentia non moveri de spatio in spatium.

Ita sentire debent, qui Angelicos spiritus ratione essentia, quæ nihil sit nisi mera cogitatio, nusquam esse contendunt. Quæ enim res capax non est alicujus Ubi, eandem neque Ubi suum mutare posse, per sese clarum atque evidens est. Et sic Cartesio non minus absurdè videtur Spiritibus tribui motus localis quam figura aut extensio. *Perस्पiciuè videmus, nullam extensionem, nec figuram, nec motum localem, nec quid simile, quod corpori sit tribuendum, ad naturam nostram (quatenus scil. mentes sumus) pertinere, sed cogitationem solam, Princip. Part. 1. §. 8.* Utergò locum, non ratione essentia, sed tantum respectu operationum, Angelis adscribunt, ita quoque motum. Quam in rem disertè vir doctus: *Sicne locus non competit propriè Angelis, ita nec motus; neque dici potest aliter Angelus moveri, quam quatenus ibi definit operari, hic verò operari incipit.*

Brevis hinc ero. Neque enim ut multa congeram necesse est, ad diruendam thesin, quæ quemadmodum est dogmatis præcedentis indivisum confectarium, ita suffossis illius fundamentis ipsa ruit suâ sponte. Notavimus jam, uniuscujusque rei actionem tam esse ejusdem conditionis cum suo principio à quo fluit, ut quæ causa ratione essentia nusquam est aut esse potest, eadem quoque sese tanquam actionis principium nusquam manifestare possit. Quæcunque ergò res modò in hac modò in alia mundi parte suis sese operationibus præsentem prodit, illa vel statuenda est in omnibus istis

Ggg 2

spatiis

## IX.

*Angelos de spatio in spatium non moveri, eadem hypothesis inferi:*

*Ejus assertionis ostensa paucis falsitas.*

E X E R C I T A T I O  
D E  
O P E R A T I O N I B U S  
B R U T O R U M.

S U M M A R I U M.

- I. *Occasio Exercitationis hujus Apologeticae de operationum in brutis principio substantiali.*
- II. *Controversia totius summa brevi compendio exposita.*
- III. *Præjudicium de mechanica mundi structura animæ substantialis brutis negatæ causa præcipua.*
- IV. *Vera cognitionis brutorum tot existunt testimonia, quot ferè eorundem obviæ sunt operationes.*
- V. *Substantialis operationum in brutis principii admittendi propter non unam rationem necessitas.*
- VI. *Illi cedere coactus Cartesius ipse controversiam hanc in medio ferè relinquit.*
- VII. *Señtatorum ejus alii ad animam mundi Platonice confugiunt, alii etiam hominum animas substantiales expungunt.*
- VIII. *Consentit Auctoritas Sacra cum assertione de vera vitæ & cognitionis in brutis principio substantiali.*
- IX. *Bruta in mera Automata convertit quæ nostræ assertioni opposita est thesis.*
- X. *Afferta brutis vera cognitio nihil eisdem tribuit Rationalitatis.*
- XI. *Cum non omnis cognitio necessariò existat ejusdem ordinis & speciei.*
- XII. *Docente id passim Scholâ Peripatetica, nec ipso dissentiente Car-*



*tesiano Forgeo. XIII. Quæ brutis substantiale veræ cognitionis principium tribuit opinio, Vetus est & maxime trita.*

I.  
Occasio Ex-  
ercitationis  
hujus Apo-  
logeticæ de  
operationum  
in brutis  
principio  
substantiali.



Mnium ad Brutorum tum Animam tum Acti-  
vitatem pertinentium justam pertractationem ne  
hïc expectet, monendus est in ipso limine  
quisquis Exercitatuunculam hanc legere parat.  
Latoris indaginis est hoc nobilissimum thema,  
quam ut paucis adeo pagellis absolvi aut debeat  
aut possit. In præsens brevem tantum Apologiam dare animus  
est, quam parare coactus fui Thesi cuidam meæ Philosophicæ,  
quam olim Lugduni-Batavorum in Illustr. ac Præpotent. DD. Or-  
dinum Hollandiæ West-Frisiæque Collegio Theologico, cujus  
tunc temporis eram Pro-Regens, ventilandam publicè proposui.  
Ea tota de verbo ad verbum ità sonat: „Datur in Brutis aliquod  
„substantiale vitæ, sensationis, ac veræ cognitionis principium;  
„sive Formæ substantialis, sive Animæ sensitivæ, sive Modi cu-  
„jusdam substantialis, sive quocunque alio id appelletur nomine.  
„Atque id non ità dudum, sub nostro præsidio, ab Ornatisf.  
„quodam D. Defendente solidè ac benè demonstratum est ex eo,  
„quod istud Neotericorum ergastulum quinque modorum, Men-  
„suræ, Quietis, Motûs, Posituræ, Figuræ, operationum  
„principium nec sit nec esse possit. Quum enim uti res existit ità  
„quoque eadem operetur; modi verò illi non sint, nisi beneficio  
„substantiæ cui insunt, etiam iidem operari non poterunt, nisi  
„vi alicujus principii substantialis: quod cum non sit materia,  
„utpote purè passiva, restat, ut sit quod aliud in corpore substan-  
„tiale operationum principium. Cui accedit, quod modos istos  
„omnes vel non-entiaesse, vel tantum condiciones ad operandum  
„prærequisitas, non autem causas, sigillatim faciliè probari possit,  
„ac jam probatum sit. Nullo autem modo hisce adversantur au-  
„tomata, v. c. Horologia, &c. multo minus instrumenta fabrilia,  
„Serra, Securis, &c. quum in iis ullam operationem, sume mo-  
„tum vel minimum, ab istis modis partiumque dispositione, tan-  
„quam à principio sui, profluere, quin profluere posse, perne-  
„gemus;

„genus; atque id cuius attendenti certissimum est; si cui non,  
 „petenti tale faciemus. Neque speciatim brutorum cognitioni  
 „obstat, quod omnis cognitio dicatur involvere cogitationem,  
 „adeoque & rationalitatem: id enim falsissimum est, neque hacte-  
 „nus probatum ullâ speciè rationis, quæ non principium pete-  
 „ret. Demonstrandum ergò adversariis, activam oblatæ rei sen-  
 „sibilis perceptionem, dirigentem ex instinctu naturæ omnes bruti  
 „operationes, inferre necessariò conscientiam, uti vocant; aded-  
 „que eam fieri debere mediantibus notionibus spiritualibus; ac  
 „porrò ponere facultatem judicandi, discurrendi, &c. Quæ omnia  
 „posteriora uti bruto deneganda censemus, ità & prius eidem dene-  
 „gabimus, simulac audiverimus vel unicum argumentum, quod  
 „ullâ ratione id evincere poterit. Quod dum fiat (fiet autem  
 „ad Kalendas Græcas) nos acquiescimus in rationibus allatis, ob  
 „quas, suffragante evidente experientiâ ac auctoritate Sacrà, bru-  
 „tis & cognitionem & cognitionis principium adscribendum esse,  
 „sentimus.

Et si verò minimè ignorarem, aliter planè hic instituere eos qui  
 Cartesianis ideis dixerunt sacramentum, quibusque opposita erat  
 nostra hæc thesis, non tamen vel somniabam exiturum mortali-  
 um quemquam, cui insolens videri posset assertio, quâ per secu-  
 la multa continua in medio orbe Christiano, à quo in eo viguit  
 Peripatetica Philosophia, nulla unquam audita fuit frequentior.  
 Præter omnem interim meam opinionem accidit, ut ejus nomipe  
 impetum in me fecerint, non unus, non alter, non tertius, ve-  
 rùm, inito quasi tacito contractu, omnes propemodum quot-  
 quot per ista tempora pro asserendo Cartesianismo calamum exerce-  
 bant in nostra patria Viri; ubiquè gentium tanquam *periculose no-  
 vam* circumferentes à cætero corpore avulsam atque uncialibus  
 typis expressam nostram thesin: DATUR IN BRUTIS ALIQUOD  
 SUBSTANTIALE VITÆ, SENSATIONIS, AC VERÆ COGNIT-  
 IONIS PRINCIPIUM. Ità scilicet qui innovare hodiè sacra quæ-  
 libet ac profana unicè laborant, hoc ipsum objicientes talione re-  
 percussuri, eo utuntur artificio, ut antiquissimas antiquitates  
 novitates audacter dicere audent. Quo agendi modo etsi facile im-  
 ponant eis qui extra Cartesium nihil sapere didicerunt, quique ut  
 plurimum quid vel antiquum vel novum sit æquè ignorant, de-

II.  
*Controver-*  
*sia totius*  
*summa bre-*  
*vi compen-*  
*dia exposi-*  
*ta.*

tecta

tectâ tamen fraude, id lucrabuntur tandem, ut eis, qui æqui existunt & idonei rerum iudices, rei habeantur inexcusabilis prorsus vel imperitiæ vel calumniæ. Placuit nihilominus etiam Celeberrimo Viro publico libro, ob eandem hanc de substantiali Brutorum Anima opinionem, obijcere mihi *Novitatem maximam, monstrificam, periculosam, portentosam, ab omnibus retrò sæculis inauditam, bonis omnibus abominabilem, execrabili denique Spinosisimoproximam.* Et huic quidem satisfecimus abundè *Narratoris nostri Confutari §. LI. & seqq.* quem locum cum eis, quæ jam hac de re in medium sumus allaturi, conferri cupio. Omnem nunc controversiam, nisi fallor, satis plenè comprehendam hac Quæstione: Num *Falsa* sit, aut *Periculosa*, aut *Nova*, hæc positio, *Datur in brutis aliquod substantiale vitæ, sensationis, ac veræ cognitionis principium?* Ad quam respondemus, Negando: siquidem hac assertione Brutis non tribuitur Anima quæ sit ordinis ac speciei ejusdem cum ea quæ hominis est, substantia nimirum rationis particeps, atque omni modo à corpore independens: sed principium duntaxat quoddam eatenus huic analogum, ut sufficiat ad vendicandam Brutis suam quoque activitatem; neque qualemcunque, verum talem quæ dirigatur à rei oblatæ prævia perceptione, non rationali quidem (quæ notionum immaterialium formationem cum conscientia, itemque actus judicandi ac discurrendi involvit) attamen vera, in quantum non improprie aut metaphoricè dicta est hæc cognitio, sed ea cui accuratè loquendo & ex vero generalis veræ cognitionis descriptio convenit, quæ scilicet sit activa objecti obvii perceptio.

## III.

*Præjudici-  
cium de me-  
chanica  
mundi stru-  
ctura animæ  
substantia-  
lis brutis  
negatæ cau-  
sæ præcipua.*

Tantam inefficaciter arbitror huic Thesi *Veritatis* certitudinem atque evidentiam, ut eam latere posse putem neminem, quicumque in philosophando uni Rationi & Experientiæ cedere paratus est. Conqueruntur, fateor, Cartesii nepotes, rem hanc fugere claras suas ac distinctas ideas; at id sibi imputent oportet, qui mordicus adedò adhærere amant præconceptis opinionibus, ut neque velint neque possint, valere jussis præjudiciis, quid sentire oporteat, liberâ mente accertâ Ratione, Sensuum testimonio & sacri Auctoritate suffultâ, ritè expèndere. Ejusmodi ingenia quid mirum, si, ut alia quæcunque in hoc Universo obvia, ità quoque Brutorum operationes reducere nitantur ad imaginaria sua princi-

pia; secundum quæ universa rerum natura, stupendumque hoc Divinæ providentiæ sacrarium, in vilem officinam fabrilem convertitur, in qua occurrat nil præter automata quædam, omni vero propriæ activitatis principio destituta, externoque duntaxat atque ab occurrentibus forte fortuna corpusculis impresso motu impulsâ. Et quid de Brutis solliciti sint, eorumque Anima, qui ne sibi quidem hîc parcant, contententes, præeunte sic Cartesio, & ipsum hominis corpus parili modo vivere posse & moveri absque ullo Mentis fîsidio; quin qui affirmant, esse *majori admiratione dignum, quod mens aliqua reperiatur in unoquoque humano corpore, quam quod nullasit in ullis brutis*: Part. I. Epist. LXVII. Minus mirabimur eos qui talia tuentur paradoxa tantum tumultuari ob nostram hanc assertionem, *Datur in Brutis aliquod substantiale vite, sensationis ac veræ cognitionis principium*: quod quale intellectum voluerim, verbis immediatè sequentibus indicabam satis: *sive Forma substantialis, sive Anima sensitivæ, sive Modicusjisdamsubstantialis, sive quocunque alio id appelletur nomine.*

Equidem pro *Veræ Cognitionis*, qualem jam descripsimus, in Brutis demonstratione, nullo alio indigemus argumento, quam quod invictum suppeditant stupendæ eorundem operationes, ob hoc solum neglectæ, atque ad veritatem hanc adstruendam apud multos minus efficaces, quod sint quotidie obviæ. At qui diligens rerum scrutator animum adjicit ad easdem penitus examinandas, istud in iis deprehendit rationis quasi vestigium & quandam ejus veluti imitationem, ut vix, imò vix, in ipsa sensitiva cognitione acquiescere possit: adeò bestiarum actiones in miraculum usque variæ sunt, adeo ipsi humani operandi modi æmulæ. Ex millenis unum aut alterum verbo tangemus tantum. Quanta est v. c. in prole educandâ Brutorum sollicitudo, illa etiam refundentium, proprio stomacho fraudato, quæ jam devorant? Quanta in eadem adversus hostem tuendâ fortitudo & industria? Conspêcto illo erigunt sese, corpus interponunt, intumescunt, horrent pilis plumisque, ad terrorem arma expediunt, rostrum, dentes, ungues, cornua, calces hosti opponunt: quin &, si vis major ingruat, dolis haud rarè utuntur, ad avertendum à præda vel hac ratione insidiatorem. Surreptâ verò sobole, quanta in multis comploratio, quantis aerem implent questibus, quam

## IV.

*Veræ cognitionis brutorum tot existunt testimonia, quot fere eorundem obviæ sunt operationes.*

insolabilis mœror? Quam provida omnium cûra in sese vel vi vel dolo conservandis, in pabulis noxiis ab innoxiiis discernendis, in morborum vulnèrumque suorum remediis indagandis? Istæ omnia quæ absque vera cognitione fieri queant? explicari velim. Non hîc seriè attexam eorûm quæ narrantur de Apum industria, Formicarum disciplina, Canum sagacitate, Vulpium astutia, Cornicum solertia, Elephantis docilitate, Equi generositate, Ciconiæ pietate, &c. quæ veram cognitionem sensitivam Brutorum tam abundè evincunt, ut eâ quoque datâ, illorum plurima nihilominus vel subtilissimum ingenium haud parùm vexare possint. Copiosam historiolarum hûc pertinentium congeriem habet *Rorarius*, in *Exercitatione Paradoxa*, *Quod animalia bruta ratione utantur melius hominibus*, quæ sola sufficit abundè confutandis iis, quæ *De Carentia Sensus & Cognitionis in Brutis*, nuper scripsere quidam, non absque multa sui in re hac tractanda contradictione. Missis nunc aliis unum sumamus notum atque obvium, in quo explicando vires experiantur velim quòtquot Brutis veram cognitionem denegant: Cur scilicet canis, cum famelicus furtim quid abstulit, clam se surripiat, & diffidenter ad eò incedat ut nemini occurranti gratuletur, sed meticulosè sibi à pœnis cavens, rostro prono & averso suam pergat viam? En Rhodus, en saltus!

V.  
Substantialis operatio-  
num in brutis principii  
admittendi  
propter non  
inam ratio-  
nem necessi-  
tas.

Quum itaque per ista constet satis de *Vera Cognitione* Brutorum facile inde conficitur, necessariò in iis admitti debere *Substantiali* aliquod ejusdem *Principium*. Præterquam enim, quod nobiliores sint istæ operationes, quam ut à sola accidentali materiæ dispositione oriri queant, etiam sic inferebam istoc loco, undè petita est controversa assertio. *Solidè demonstrari potest, istud Neoterico- rum ergastulum quinque Modorum, Mensuræ, Quietis, Motus Posituræ, Figuræ, operationum principium nec esse, nec esse posse. Quum enim vires existit, ita quoque eadem operetur; Modi verò isti non sint, nisi beneficio substantiæ cui insunt, etiam iidem operari non poterunt, nisi vi alienius principii substantialis: quod cum non sit materia, utpote pure passiva, restat ut sit aliquod aliud in corpore substantiale operationum principium. Cui necedit, quod omnes istos modos vel non-entia esse, vel tantum condiciones ad operandum prærequisitas, non autem causas, sigillatim facile probari possit. Ad ista dum planè sint lenti Censores, manet immota vis hujus ratiocinii.* Nunc addo

Cu

Cur obsecrò sensuum organa Brutis concessa, nostris per omnia similia, nisi eorundem similis sit ei qui est nostrorum usus? Atqui instrumentorum sensationi destinatorum & inservientium nullus hic existit in nobis absque Animæ nostræ attentione & præsidio. Hoc vel indè liquet, quòd, quoties mens hærens in profunda meditatione aliud agit, nullatenus corpus afficiatur ab oblati per organa, cæterum omni ex parte benè constituta, rebus externis, etiam maximè terribilibus ac perniciosis; sed immotum aded maneat, ac si eæ neutiquam sensorio objicerentur. Nemo est qui non id experiatur in se sæpius; fidemque ejus facit plenissimam nota cædes Archimedis Syracusani, à milite, dum stricti gladii imago à mente, speculationibus mathematicis nimium immersa, non percipitur, infelicitèr jugulati. Undè sequitur quam evidentissimè, ad operationes istiusmodi producendas, quales & nobis & brutis communes esse observamus, passivam receptionem externi motûs in solo corpore minimè sufficere, sed prorsus requiri Animæ, tanquam *Principii Substantialis*, activam objecti perceptionem, & in spiritus per nervos mittendos imperium. Ut longè sit falsissimum quod asserit Cartesius, *Part. II. Epist. VIII. Bruta tantummodo videre sic nos, dum mente alio advocata, licet objectorum externorum imagines in retina nostra pingantur, & forte etiam illorum impressiones in nervis opticis factæ ad diversos motus membra nostra determinent, nihil tamen prorsus eorum sentimus.* Quin, ut & hoc addam, nisi ex effectis istis in Brutis conspicuis valeat argumentatio ad evincendam alicujus in iisdem *Principii Substantialis* existentiam, velim equidem mihi à Cartesiano homine demonstrari, inesse re verà Animam substantialem infantibus aliisque usu rationis destitutis hominibus; etenim in hisce aliq̃ nullæ obviæ sunt actiones, quam quæ eademprehenduntur in Brutis.

Efficacissimum hujus ratiocinationis robur nec ipse ignoravit Cartesius, dum planè se hic irretitum ostendit; eo usque, ut non tam difficultates illas tollere nitatur, quam urgere alias, quas ipse (licet perperam) ex opposita sententia fluere autumat: quem clarum & distinctum philosophandi modum minimè esse, sed ejus potius qui ad incitas est reductus, norunt quotquot ex Logicis intelligunt, quantum valeat indirecta ejusmodi responsio, scindit nimirum sic nodum, cui solvendo se quis imparem experitur.

Hhh 2

Sed

VI.  
Illi cedere  
còactus Car-  
tesius ipse  
controver-  
siam hanc  
in medio se-  
rè relinquit.



Sed volupe fuerit Viri, cæterum animi confidentissimi, ac mirè crepantis ubique claras & distinctas ideas, hac in parte observasse hæitationes. Sic ipse, *Part. I. Epist. LV.* „Hoc ergo solum dici  
 „possit, quod licet bruta nihil agant, quod probet illa cogitare  
 (notandi in *Cogitare* Cartesio idem esse quod *Cognoscere*; tametsi  
 nobis ista duo distent tanquam species & genus) tamen quia cor-  
 „poris illorum organa à nostris valdè diversa non sunt, *conjectare*  
 „licet, aliquam esse cogitationem hisce organis adjunctam, *quemad-*  
 „modum in nobis experimur, licet ipsorum cogitatio sit imperfectior  
 „nostrâ. Ad quod *nihil est quod respondeam*, nisi quod si illa co-  
 „gitarent, ut nos, animam etiam, ut & nos, immortalem ha-  
 „berent; quod non est verosimile, &c. Iterum, *Epist. LXVII.*  
 „Quamvis autem pro demonstrato habeam, probari non posse,  
 „aliquam esse in brutis cogitationem; *non ideo puto posse demonstra-*  
 „*ri nullam esse*: quia mens humana eorum corda non pervadit.  
 „Sed examinando, quidnam sit hac de re *maximè probabile*, nul-  
 „lam video rationem pro brutorum cogitatione militare, præter  
 „hanc unam, quod cum habeant oculos, aures, linguam, &  
 „reliqua sensuum organa sicut nos, verosimile sit, illa sentire sicut  
 „nos; & quia in nostro sentiendi modo cogitatio includitur, si-  
 „milem etiam illis cogitationem tribuendam, &c. Rursus,  
 „*Epist. CV.* „Quantum ad animalia bruta, videmus quidem in  
 „illis motus quosdam eorum similes, qui imaginationes nostras  
 „sive sensus consequuntur; *imaginationes verò aut sensus mirum illa*  
 „*habeant ignoramus*. E contra vero, cum isti iidem motus possint  
 „absque imaginatione fieri, non sine causa *suspiciari possu-*  
 „*mus*, illos in iis ita produci, quemadmodum spero me osten-  
 „surum, &c.

## VII.

Scitatorum  
 ejus alii ad  
 animam  
 mundi Pla-  
 tonicam  
 confugiunt,  
 alii etiam  
 hominum  
 animas sub-

Videmus totum hîc trepidantem Cartesium, *nihil habentem*  
*quod respondeat*, putantem, probabile ducentem, ignorantem, su-  
 spicantem; quæ quousque satisfaciant rationibus antè à nobis alla-  
 tis, judicium sit penes quemvis extra partes constitutum Philo-  
 sophum! Uti verò ipse dubitanti hîc propior est quam quid certi  
 determinanti, ita inter assecclas ejus non desunt viri cruditi, qui  
 quamvis cæterum cum eo faciant, atque etiam præ se ferant, ex-  
 plicari satis posse bestiarum actiones per solum motum partiumque  
 dispositionem, & in hoc demonstrando multum sint operosi,  
 tandem

tandem tamen re omni accuratius perpensâ , ad eò parum sibi in solis accidentibus & modis possunt satisfacere , ut non obscurè indicent , minimè se alienos esse , pro salvandis brutorum operationibus , ab opinione Platonica , quâ asseritur totam Universi materiam singulasque ejus partes mente instructas esse , eamque mentem pro diversitate dispositionis in materia diversimodè agere ; ut sit

*Inde hominum pecudumque genus animæque volantum ,*

*Et quæ marmoreo fert monstra sub aquore pontus.*

Ex quibus elucet clarissimè vis nostræ veritatis , de Substantiali veræ cognitionis in Brutis principio , quippe quæ etiam pervicacissimos fateri ,

*Esse apibus partem divinæ mentis , & haustus Æthereos ,* sicque in anilia Platonis figmenta de anima mundi concedere cogit potius , quam omne substantiale cognitionis & activitatis principium bestiis denegare . Atque utinam neque hodiè existeret numerosa illorum cohors , qui ex denegata brutis substantiali anima , vitæ ac cognitionis veræ principio , occasionem sumfissent paria philosophandi de mente humana , atque tandem in non-entium classem compingendi pariter pecudumque hominumque animas . Tales nati sunt ex hac Spina flosculi .

Et ista quidem pro assertionis nostræ Veritate confirmanda , tum ex ipsa rei natura , tum ex varia adversariorum philosophatione , paucis adducta sufficiant . Per omnia nunc ire non sinit instituti ratio , quæ intra brevitatis terminos hac vice nos cogit . Quamobrem neque operosus ero in urgenda Auctoritate Sacra , pluribus locis bestiis exertissimè tribuente *Vitam & Cognitionem* , istudque *Spiraculum halitus vitæ* , quod , à corpore distinctum , in morte ab eo separatur , &c . Miror autem hoc loco vehementer Censorum meorum vel ignorantiam vel impudentiam , dum inquirunt , Verbum Dei etiam sic loqui de rebus inanimatis , quibus tamen ideo substantiale principium cognitionis non convenit . Ubi verò sic loquitur Spiritus S. ? Non ignoro , *Vitæ* , itemque *Animæ* , vocabulum improprie nonnunquam usurpari , & per catachresin , ut cum *Aqua* v. c. dicitur *Viva* ; *Cadaver* vocatur *Anima* ; &c . At ubi locorum rei vitæ destitutæ conjunctim tribuitur נפש חיה , רוח חיים , נשמת רוח חיים , *Anima vivens* , *Spiritus vitæ* , *Flatus spiritus vitæ* ?

VIII.  
Consentis  
Auctoritas  
Sacra cum  
assertione  
de veræ vitæ  
& cogniti-  
onis in brutis  
principio  
substantiali.

*vita?* Nuspiam certè. Tantum quandò vel de homine, vel de bestia sermo est, vel de utroque, promiscuè occurrunt istæ voces; claro indicio, aliquid Bestiis inesse Animæ humanæ analogum, quod idem rebus cæteris non competat. Prætereo, ne prolixior sim in hisce, efficacissimas phrascs, quibus brutis tribuitur *Cognitio, Mors eadem cum hominibus, &c.* Ad quæ si sufficiat simpliciter ex Philosophiæ Cartesianæ principiis respondere, ea impròpriè debere accipi, viderint Theologi, an non hac ratione Philosophia reipsâ statuatur S. Scripturæ interpres? Viderint simul, ne tandem eadem viâ enerventur Scripturæ dicta, quæ Animam humanam esse principium substantiale post fata superstes, demonstrant.

IX.  
*Bruta in me-  
ra Automa-  
ta convertit  
quæ nostræ  
assertioni  
opposita est  
thesis.*

Quorsum vero, inquirunt, huiusmodi assertio abit? Eo abit, dicam, ut ne bruta convertantur in horologia & lapides, in quæ illa convertunt reverâ Cartesiani, quandò cognitionem eis dene-  
gant, & sensum, & vitam, & animam, & omnia. Hic autem sese prodit audacia hominum incredibilis. Quis Cartesianorum, regerunt, quando, ubi id asseruit? Nullus. Quid? Non credo ignorare viros Cartesii *Tractatum de Homine*, in quo totus id agit, ut ostendat, Corpus animalis instar machinæ automaticæ moveri. Sed os obstruat Viris ipse Cartesius, qui sic expressè, *Part. I. Epist. LV.* „Bruta per organa agunt, *haud secus quam ho-*  
„*rologium*, quod horam longè melius indicat, quam possumus  
„iudicio assequi. Et sine dubio, quando hirundines verno tem-  
„pore adveniunt, eatenus *agunt horoloziorum instar*. Quicquid  
„etiam agunt apes, ejusdem est naturæ, &c. Iterum, *Part. II. Epist. XLIV.* *Quicquid in irrationalibus animalibus appetitus aut pro-*  
„*pensiones vocamus, per solas Mechanica regulas explico*. Et, *Ibid. Epist. XI.* „Quod ad bruta, adeo assueti sumus credere quod  
„illa, non secus quam homines, sentiant, ut facile non sit opi-  
„nionem hanc deponere. Sed, si æque assueti essemus videre au-  
„tomata, quæ actiones nostras omnes imitarentur, quas quidem  
„imitari possunt, atque illa pro automatis habere, *neutiquam du-*  
„*bitemus quin animalia ratione destituta forent quoque automata*.  
„Quippe inter nos & illa eandem differentiam adverteremus, quam  
„inter nos & automata; sicuti scripsi pag. 56. methodi meæ. In  
„mundo autem meo accuratissimè recensui quo modo organa  
„omnia

„omnia ad has in automatis actiones exercendas requisita in anima-  
 „lium corporibus reperiuntur. Ecce, & quando, & ubi hæc af-  
 „feruerit ipse Cartesius! Quibus convenienter non semel à Cartesia-  
 „nis Philosophis publicè defensum: *Bruta nec cognoscunt, nec sen-  
 „tiant, sed omnia automaticè agunt.* Item: *Eodem riu, quo arte-  
 „facta suas producunt operationes, easdem producunt naturalia, cum  
 „inter hæc & illa nulla nisi forte graduum sit distinctio.* Atqui hæc  
 „non mutat speciem, uti scimus. Absolvam H. Mori verbis, qui-  
 „bus assertionis hujus nostræ scopus lepidè comprehenditur, simul  
 „& Cartesiani dogmatis absurditas facètè perstringitur. Is ad Car-  
 „tesium, *Part. I. Epist. LXVI.* hac de re hunc in modum: „Cæte-  
 „rum à nulla tuarum opinionum animus meus, pro ea qua est mol-  
 „litie ac teneritudine, æque abhorret, ac ab internecina illa jugu-  
 „latrice sententia, quam in Methodo tulisti, brutis omnibus vi-  
 „tam sensumque eripiens, dicam, an potius præripiens? neque  
 „enim vixisse unquam pateris. Hic non tam suspicio rutilantem  
 „tui ingeniî aciem, quam reformido, utpote de animantium fato  
 „sollicitus, acumenque tuum non subtile solum agnosco, sed  
 „chalybis instar rigidum ac crudele, quod uno quasi ictu univer-  
 „sum ferme animantium genus vita ausit sensuque spoliare, in mar-  
 „mora & machinas vertendo.

Ità de assertionis nostræ *Falsitate* vidimus. Inquirendum restat,  
 an non saltem *Periculosa* sit, aut *Nova*? Equidem, ex opinione  
 Cartesiana, derogante Brutis omnem propriè dictam vitam, sen-  
 sum, ac cognitionem, quæ sequuntur absurda, si cum iis con-  
 ferantur, quæ urgeri solent à Recentioribus contra Brutorum co-  
 gnitionem, aded ista præ hisce multa & gravia deprehenduntur, ut  
 meritò hæc nulla præ illis haberi debeant. Quædam eorum jam  
 tetigi, adderemque plura; sed, quod antè monui, constitutum  
 mihi est, non tam rem hanc omnem hùc pertractare, quam excu-  
 tere potius, quæ adferunt hùc mei Censores. Demonstrant illi  
 assertionis nostræ periculum. Habent ergò, inquit, bruta  
 animam rationalem. Itane! Quamobrem obsecro? Illa enim,  
 pergunt, unica est Substantiale Principium, sors, & fundamen-  
 tum Veræ Cognitionis. En argumentum, quod aliud nihil est  
 quam futilis petitio principii. Nempè controvertitur, An, non  
 in hominè tantum, sed & in brutis, detur *Substantiale Veræ Cognitionis*

X.  
*Asserta*  
*Brutis veræ*  
*cognitioni-*  
*bilis eisdem*  
*tribuit Ra-*  
*tionalitatis.*

*tionis Principium* ? Negant hi; idque quia *sola* anima rationalis est Veræ Cognitionis Principium. Atquæ hoc ipsum erat τὸ κριτήριον : quod cum nullâ ratione demonstrent, satis hîc causam tradunt; imprimis cum jam dudum Adversarios ad id agendum invitaverim eo ipso in loco, undè hanc Thesin sibi exagitantam sumptere. Dabam ibidem discrimen satis ingens & manifestum inter Cognitionem Veram *Sensitivam* brutorum, & *Rationalem* spirituum ac hominum; ut mirer, eos petere, assignari sibi essentialem differentiam, quæ hominis inter brutique cognitionem intercedat. Quod si non ista sufficiant, addam quæ in *meis ad Physiologiam. Dan. Voet Notis* sic alibi : „Ex quo videre licet longum „discrimen inter Sensationem Hominis & Bruti. Hujus animæ „directò tantùm imago rei sensibilis imprimitur : illa notionem „spiritualem ipsa format. Consequenter, hæc suæ sensationis sibi „non est conscia : illa se sentire intelligit. Hæc imagines sensibiles „conjungere ipsa non potest; multo minus per consequentiam „unam ex alia formare : illa notiones judicando copulat aut dividit; „quin & sensatione utitur tanquam occasione proferendi per „discursum cognitionem suam etiam ad non-sensibilia. Hæc ex „mero naturæ instinctu ad actiones secundum sensationem instituendas impellitur; illa, intercedente judicio, secundum sensum vivit. Facessant itaque, qui Bruta in Horologia convertunt, omnique sensu exuunt, inani metu, ne si sensus concedatur iisdem, simul concedenda sit cogitatio & rationalitas. Quod si neque illa capere queant quæ clarissima & distinctissima sunt, condonandum veniet animulis altum adedò meditationibus de Deo & Mente humana sepultis, ut desueverint jam dudum concipere quicquam, quod non ad sublimes Cartesii speculationes de Dubitatione, de Mente quæ nil sit nisi Cogitatio, de Ideis innatis clavis & distinctis, &c. pertineat.

## XI.

*Cum non  
omnis Co-  
gnitio neces-  
sario existat  
eiusdem or-  
dinis &  
speciei:*

Instant tamen, Si habeant bruta Substantiale Principium Veræ Cognitionis, nec tamen animâ rationali gaudeant, etiam concludinequit, hanc in homine dari. Quod totum concedendum est illis, quibus inter Cognitionem & Cogitationem nihil intercedi differentiae : non iis, qui alteram ab altera distinctam asserunt, eo quo explicui modo. Itaque ex mera & nuda Cognitione, per se spectatâ, nemo unquam solidè adstruxerit animæ quæ in homine est

est rationalitatem: nihil enim rationalitatis in notione *Verae Cognitionis* involvi, jam docuimus. Merito tamen atque efficacissimè infertur animæ humanæ rationalitas, ex hominis Cognitione; non, uti dixi, quatenus simpliciter est *Vera cognitio*, sed in quantum ea involvit, quibus salvandis qualiscunque *Vera cognitio* non sufficit, sed ea præcisè rationalis requiritur. Sic passim Philosophi Animæ Humanæ, ut Spiritualitatem & Rationalitatem, ita Immortalitatem, demonstrare solent, & rectè quidem, ex eo quòd ipsa percipiat cum conscientia, etiam res spirituales, quæque directè sensum non afficiunt; quòd iudicio spirituales notiones connectat, & secundum illud omnes cæteras actiones dirigat; quòd ex cognita veritate una aliam hætenus ignotam vel dubiam concludat, &c. Neminem verò unquam videre contigit, Cartesii asseclas si excipias, qui ex qualicunque *Vera Cognitione* mox principii cognoscentis rationalitatem inferat; cum nihil magis tritum sit auctoribus, quam dividere *Veram Cognitionem* in *Sensitivam* & *Rationalem*. Adstrui igitur validè potest, animam humanam rationalem esse, etiamsi non id concludatur ex ipsa cognitione, quatenus ea simpliciter est verè talis.

Frustràeris, si urgeas, tametsi major sit cognitio in homine, id rei essentiam minimè mutare; juxta effatum Philosophorum, Magis & minus non variant speciem. Nunquam enim quisquam eorum, quod sciam, qui *Veram Cognitionem* brutis tribuunt, asseruit, cognitionem bruti majorem tantum esse eà quæ est hominum, sic ut duntaxat per gradus, qui rei essentiam non mutant, distinguantur. Nemo certè existit vel tyro in Philosophicis, qui nesciat Peripateticis dividi *Cognitionem*, tanquam genus, in *Sensitivam* & *Rationalem*, ceu duas oppositas species; uti iisdem ipsum quoque Animal, Anima, Vita sic dispescitur? *Facultatum prima* (nimirum animæ Sensitivæ in omni animali) est *Cognoscitiva*, quam *Sensum* vocamus. COGNOSCERE vox est GENERALIS, & significat QUAMCUNQUE cujuscunque rei PERCEPTIONEM, sive fiat mediis & organis corporis, qualis est Sensus, sive fiat absque adminiculo corporis, qualis est Intellectus. Ità hac de re disserit, ex mente Peripateticorum, Colleg. Phys. Disp. XI. §. 8. ipse Hereboordius. Pudeat homines impugnare quæ non intelligunt; traducere opiniones receptas quas ignorant! Sed Doctrinæ

XII.

Docente id  
passim Scho-  
lâ Peripate-  
ticâ, nec  
ipso diffien-  
te Cartesia-  
no Forgeo.



Peripateticæ seu Aristotelicæ mentionem perperam coram illis facio, quibus ipsum hoc nomen vel febrim suo horrore inducat. Potius amandabo ad Philosophum Cartesianum doctissimum De la Forge, longè accuratius, quam hi, hac de re hunc in modum Philosophantem, *Tract. de Mente Hum. Cap. IV.*  
 „Dico, si verum sit, bruta habere aliquem Sensum, aut aliorum perceptionem interioriorem, ab actione objectorum exteriorum super organa sensuum eorum excitatam, & si omnes suas actiones instituant hætenus cum animo ita faciendi; rationes hætenus allatæ, & quæ posthac adferuntur, demonstrant necesse esse, ut principium istius perceptionis ac propositi sit spirituale; id autem si ita esset (quod nos non credimus) [quin nec nos id credimus] minimè foret injuriosum homini: nullam enim video necessitatem statuendi, omne id quod esset spirituale esse ejusdem speciei, & habere easdem perfectiones & prærogativas, quas Spiritus humanus. De cognitione quidem hæc rectè dicuntur: quæ verò de Spiritualitate admiscet, ea suo linquimus loco ac pretio. Arrigant interim ad ista Socii sui verba aures nostri isti blaterones, & discant ex iis sui hujus ratiocinii imperitiam. Si enim iudice Forgæo, ne omnis quidem natura Spiritualis necessario ejusdem sit speciei & perfectionis, quanto minus omnem cognitionem ejusdem speciei & perfectionis esse existit necessarium?

## XIII.

*Quæ brutis substantiale veræ cognitionis principium tribuis opinio, Vetus est & maxime trita.*

Vidimus Menti humanæ nihil imminere periculi à Vera Cognitione brutorum, ejusdemque in his Principio Substantiali. Unum superest, ut nec Novam esse hanc assertionem nostram demonstremus. Et quid multis inhæream probandæ rei quæ adè nota, ut nulla magis? Univerſa schola Peripatetica Sensitivam Cognitionem (quam, uti audivimus, faciunt Veræ Cognitionis speciem, æque ac Rationalem) ut & Appetitum Sensitivum, non minus quam Facultatem Loco-motivam Brutis perindè tribuit ac hominibus. Speciatim communi omnium consensu, docet hæc eadem, Cognitionem Sensitivam non tantum Externos Sensus involvere, sed & Internos; quos numerant, præter Sensum Communem, Phantasiam, Memoriam, nominatim quoque Æstimatoriam. Quid verò Æstimatoria his Auctoribus significet, explicantes audiamus non ex Monasteriis protra-

Act

ctos Scholasticos, sed duos in orbe Reformato, ipsaque nostra patria, illustres nostri seculi Philosophos, Burgerſdicium & Senguerdium ſeniorum, illum in inclita Lugduno-Batava, hunc in noſtra Rheno-Trajectina Academia, Philoſophiæ Profeſſores Clariſſimos. Ille ſic, *Colleg. Phyſ. Diſp. xxvii. Theſ. 6. Aſtimativa munus eſt de rebus, quæ externis ſenſibus percepta, aut phantaſmatibus repræſentata ſuere, FORMARE NOTIONES BONI AUT MALI. Sic cum ovīs videt lupum, &c. format iſtarum rerum primum phantaſmata, & ex iis ſtatim COLLIGIT SPECIEM MALI.* Et hæc *Aſtimatio*, ait poſt pauca, in omnibus reperitur animantibus. Alter ita, *Introuduſt. ad Phyſic. Lib. vi. Cap. v. Aſtimativa munus eſt, aſtimare, hoc eſt, de rebus quæ externis ſenſibus vel phantaſiâ percepta fuerant, FORMARE NOTIONES BONI ET MALI, JUDICARE QUASI, an objecta convenientia, an verò adverſa ſint, & media hac aſtimatione affectus movere; &c.* Hinc a nonnullis dicitur, *Æſtimativam Id Eſſe IN BEſTIIS, QUOD IN HOMINE RATIO Eſt.* Ex dictis apparet, *Æſtimativam* circa ea quæ in ſenſibus externis fuerant, FORMARE etiam NOTIONES, QUÆ IN EXTERNIS SENSORIIS NON FUERANT; rationes enim illæ boni & mali ab *Æſtimativa* formantur, quæ ſenſibus externis non erant apprehenſæ. Ego, ut ingenuè dicam, quamvis omninò ſtem pro *Vera Cognitione* Brutorum quam antè delineavi, non tamen auſim Brutis tribuere, qualem iis tribuunt hi Auctores, cum omnibus ſerè Antiquioribus Philoſophis. Verùm, quid ſi vel huc uſque extendiſſem notionem *veræ cognitionis* (quod non feci) nihil utiquè aſſeruiſſem, quod non in utraque Academia ante me defenderunt magni doctiſſimique Viri. Pudeat itaque vel ipſam calumniam, tritam aſſertionem, ubiquè ac ſemper receptam, *Novam* dicere. De *Subſtantiali Principio* non eſt quod laboremus. Aſſerunt id quotquot aſſerunt Formas Subſtantiales, quas aſſerere Peripateticos omnes, notum eſt unicuique. Abſolvam verbis Doctiſſimi Hebreoordii, qui *Vol. i. Diſp. xxxiv.* controverſiam de Formis huc redire ait, *An Forma in rebus naturalibus ſit SUBſtantia, eaque DIVERſa, AB altero rei naturalis principio, MATERIA? Atque hac DE OMNIBUS, PRÆTER RATIONA-*

LEM ANIMAM, FORMIS *instituitur questio, &c.* Mox subjungit: *Fateor equidem AB ALIQUOT JAM SECLIS AFFIRMANTIUM OPINIONEM INVALUISSE, atque illas egisse radices in multorum animis, ut, qui contra sentiunt, IN IPSA CENSEANTUR PHILOSOPHIÆ PRINCIPIA IMPINGERE, omnisque veritatis fundamenta subruere, &c.* Lubentius Viri hujus hùc adduxi textum, tum quod in eodem Collegio Theologico, in quo ego hæc ventilanda proposui, meus fuerit in ejusdem Pro-Regimine Prædecessor, tum imprimis quod ipse hanc sententiam quam hùc proponit acerrimè impugnaverit; ut minus suspectum esse debeat hoc testimonium. Eant nunc, qui nostram assertionem innoxiam, *Datur in Brutis aliquod substantiale vita, sensationis, ac vera cognitionis principium, accusare audens Novitatis periculose; ac nisi pudorem omnem exuerint, discant posthac intelligere prius, quæ Veteres opiniones sint quæ Novæ, quam suum de eo quod ignorant interponant judicium, uti temerarium ità viro prudente planè indignum.*





EXERCITATIONUM  
RATIONALIUM  
DE DEO  
INDEX.

EXERCITAT. I.

De Theologia Naturali.

- §. I. *Theologia Naturalis studium præ alijs homine dignum.* Pag. 1  
II. *Menti humane in statu unionis difficillimum.* 2  
III. *Periculi quoque plenum; ideoque tractandum reverenter.* 3  
IV. *Naturalis de Deo notitia maxime practica est.* ib.  
V. *Assimè tamen ad æternam beatitudinem sufficiens.* 4  
VI. *Non confundenda cum Fidei revelatione.* 5  
VII. *Interim hujus illi habenda ratio.* ib.

VIII. *Naturalis Theologia Revelata utilissima.* 6

IX. *Ejus certitudo summa, si ritè tractetur.* ib.

EXERCITAT. II.

De Dei Existentia, ejusque cognoscendæ modis.

- §. I. *Artissimus inter notitiam Dei & Nostri nexus.* Pag. 8  
II. *Non, An sit Deus, disputandum; Quod sit, tamen demonstrandum.* ib.  
III. *Demonstratio pro Existentia Numinis à rerum obviarum dependentia sumpta.* 9  
• I i 3  
IV. *Mut-*

- IV. *Multiplex, quæ ex ea finit pro eadem veritate, argumentandi ratio.* 10
- V. *Vis demonstrationis à gemina-Cartefii exceptione vindicata.* 11
- VI. *Famosum Hujus ab Idea Dei petitum argumentum ad examen revocatum.* 12
- VII. *Alterum ab eadem Idea sumptum Argumentum expensum.* 13
- VIII. *Tertia Cartefii demonstratio excussa.* 14
- IX. *Ex origine mentis humane, Deum esse, probatur.* 15
- X. *Solâ admiratione, in quam abripit Univerſi contemplatio, idem animo insinuari, docetur.* 16
- XI. *Innata menti de Existentia Dei persuasio explicatur.* 18
- XII. *Eam dari, ex Legis Naturalis conscientia evincitur.* 20
- XIII. *Demonstrationum omnium summa brevis & utilitas proponitur.* 21

### EXERCITAT. III.

#### De Atheismo Speculativo.

- §. I. *Atheismi summa & pernicioſa absurditas.* Pag. 23
- II. *Controversia de Atheis Speculativis sensus aperitur.* 24
- III. *Ejus negativa compluribus adſtruitur.* ib.
- IV. *Pro affirmativa adductæ rationes diluuntur.* 26
- V. *Dubitatio de Dei Existentia, ut à Cartefio tradita & palliata, propo-*

nitur.

- VI. *Ejus cum summo periculo conjuncta absurditas detegitur.* 27

### EXERCITAT. IV.

#### De Deo Independente.

- §. I. *Primi alicujus & fundamentalis quasi conceptus de Deo formandi necessitas.* Pag. 31
- II. *Perperam ratione Independentia Deum Cartefio dici esse à se positivè.* 32
- III. *Quid tamen positivè Independentia Divina includat?* 33
- IV. *Independentiam Deo competere, & hujus conceptum aliis omnibus in Deo esse præmittendum, ostenditur.* 34
- V. *Illi junctâ Spiritualitas descriptionem quasi Dei conficit.* 35
- VI. *An, & quo sensu, ex natura Verus Deus cognosci dicendus sit?* 36
- VII. *Omnimodæ Dei Independentia agnitio præcipua veræ Religionis basis.* 37
- VIII. *Ex notione Independentia perperam concludi, quam tantum dari substantiam.* 38
- IX. *Sententia hujus Atheismus paucè detegitur.* 39

### EXERCITAT. V.

#### De Dei Attributis, in commun

- §. I. *Pluribus & inadæquatis conceptibus Divina perfectiones nobis apprehendende.* Pag. 4
- II. *At*

II. Absurdè statueretur duo tantum  
Attributa Dei Interna, Intellectus  
& Voluntas. 42

III. Attributorum Divinorum cum  
Accidentibus creaturarum colla-  
tio. 43

IV. Objectionibus eorum, qui Acciden-  
tia esse contendunt, occurruntur. 44

V. Qualis inter esentiam & Attributa  
Dei intercedat distinctio, pressius ex-  
ponitur. 45

VI. Attributa Dei alia Independen-  
tiam, alia Spiritualitatem ejusdem,  
sequuntur. 46

### EXERCITAT. VI.

#### De Deo Infinitè Perfecto.

§. I. Infinitatis Perfectionis explicatio  
ceteris Dei Attributis cur premit-  
tenda? Pag. 48

II. Eam esse Attributum, Essentiam  
Dei consequens, ostenditur. 49

III. Perfectio generalim spectata quid,  
& quomplex. 50

IV. Triplex modus Perfectiones conti-  
nendi Deo applicatus. 51

V. Perfectiones Divinas cognosci, non  
ex Idea innata intuitu, sed ex crea-  
turarum contemplatione, proba-  
tur. 52

VI. Quo pacto huic negotio subserviat  
triplex via, Causalitatis, Negatio-  
nis, & Eminentie. 53

VII. Perfectionis Infinitatem Deo, &  
quidem soli, convenire, demonstra-  
tur. 54

VIII. Perfectionis Divinae ritè cogitato

in studio pietatis utilitas. 55

### EXERCITAT. VII.

#### De Deo Necessario existente.

§. I. Inter Dei Attributa primum est  
Necessitas existendi. Pag. 57

II. Eam perfectionem, Coningentiam  
imperfectionem esse, ostenditur. ib.

III. Deum esse Necessarium in exi-  
stendo, demonstratur. 58

IV. An pariter sit Necessarius in ope-  
rando, & quo sensu, explicatur. 59

V. Præter Deum nil esse in existendo  
absolutè Necessarium, probatur. 60

### EXERCITAT. VIII.

#### De Deo Aeterno.

§. I. Inter Necessitatem existendi &  
Aeternitatem que sit respectu dura-  
tionis distinctio. Pag. 61

II. Aeternitatis à Tempore, ratione  
carentia terminorum, discrimen. 62

III. Altera Aeternitatis, ratione ca-  
rentia successionis, à Tempore diffe-  
rentia. 63

IV. Dei Aeternitatem esse intermina-  
bilem, docetur. 64

V. Eandem esse successionis expertem,  
demonstratur. 65

VI. Neque obstat ejus cum nostris tem-  
poribus successivis coexistencia. 66

VII. Relatio ad temporalia spacia, seu  
vera, seu possibilia, qui juvet no-  
strum Aeternitatis conceptum? 67

VIII. Aeternitatem esse Dei solius  
prærogativam, ex demonstratis con-  
fiscitur. ib.

EXER-



EXERCITAT. IX.

De Deo Immenso.

- §. I. *Immensitas Divina que; & quâ ratione ab Omnipresentia distincta?* Pag. 69
- II. *Spatia Imaginaria quid; & quis eorum in Immensitate Dei concipiendastus?* 70
- III. *Cartesianorum de Omnipresentia Dei philosophatio; & quedam in eam animadversiones.* 71
- IV. *Immensitatis Divine contra Vorstium & Socinianos demonstratio.* 72
- V. *Omnipresentia Divina essentialis contra Cartesianos assertio.* 74
- VI. *Difficultatibus quibusdam horum obviam iur.* 76
- VII. *Immensitatem, non Ubiquitatem strictè dictam, solius Dei esse, probatur.* 77

EXERCITAT. X.

De Deo Uno.

- §. I. *Unitas Dei demonstratur, & illi soli vindicatur.* Pag. 78
- II. *SS. Trinitatis mysterium extrationis naturalis lumine non innotescere, ostenditur.* 80

EXERCITAT. XI.

De Deo Simplici.

- §. I. *Simplicitatis Divinae notitia quid inferat?* Pag. 81
- II. *Divinae Simplicitatis per varias rationes adstructio.* 82

III. *Difficultatum quarundam hie occurrentium amotio.* 83

IV. *Divine Simplicitatis persuasio quam multis modis utilis?* 85

V. *Simplicitatem inter Dei, & quidem solius, Attributa esse numerandam.* ib.

EXERCITAT XII.

De Deo Immutabili.

- §. I. *Immutabilitas Deo adscripta ratione Essentie, Attributorum, & Operationum.* Pag. 86
- II. *Immutabilitatis Divine respectu Attributorum demonstratio.* 87
- III. *Deus solus, in rerum omnium mutationibus, Immutabilis.* 89

EXERCITAT. XIII.

De Deo Omnisufficiente.

- §. I. *Sufficientia Divinae varia consideratio.* Pag. 90
- II. *Omnisufficientia Dei, qua huius est loci, explicatio.* 9
- III. *Ejusdem plenior demonstratio.* ib.
- IV. *Summum bonum nullum, nisi unus Deus Omnisufficiens.* 9

EXERCITAT. XIV.

De Deo Incomprehensibili.

- §. I. *Nullius Sensitiva perceptionis minus quam Deus esse potest objectum.* Pag. 9
- II. *Humana menti Deum, & solius quidem, esse Incomprehensibilem, docetur.* 9

III. *Etiâ*

# I N D E X.

- III. *Etiā beatīs Cœlitibus Deus incomprehensibilis existit.* 97  
 IV. *Perperam in intellectu finito claram ac distinctam Dei ideam statui, ostenditur.* ib.  
 V. *Non nisi modestissimè de Incomprehensibili Numine philosophandum.* 99  
 VI. *Deus, quia Incomprehensibilis, etiam Ineffabilis.* ib.

## EXERCITAT. XV.

### De Deo Admirabili & Amabili.

- §. I. *Animo finito Numen infinitum existit summè Admirabile.* Pag. 101  
 II. *Uterior ejus rei confirmatio & illustratio.* 102  
 III. *Amabilitatis Divina consideratio.* 103  
 IV. *Ea tanta, ut nihil amandum non propter Deum.* 104

## EXERCITAT. XVI.

### De Deo Adorabili.

- §. I. *Cultus cujusvis, ejusque fundamenti, generalis consideratio.* Pag. 105.  
 II. *Deus Adorabilis tantum ob infinitam Sufficientiam excellentiam.* 107  
 III. *Actus & Signa divini cultus paucis notati.* ib.  
 IV. *Deus & solus & semper Adorabilis existit.* 108.  
 V. *Religiosus cultus neque gradus patitur, neque vi Dei irresistibili nititur.* 109

## EXERCITAT. XVII.

### De Deo Vivente.

- §. I. *Vita Dei ipsa ejus essentia rationaliter actiosa.* Pag. 110  
 II. *Esse hoc modo Deum Viventem demonstratur.* 111  
 III. *Vita Dei Independens & Immortalis.* 112  
 IV. *Vita Dei quot modis actiosa?* ib.

## EXERCITAT. XVIII.

### De Deo Intelligente.

- §. I. *Intellectus Dei explicatus & demonstratus.* Pag. 114  
 II. *Modus intelligendi in Deo perfectissimus.* 115  
 III. *Et nominatim quidem, Independentis.* ib.  
 IV. *Imò etiam Simplicissimus, & Immutabilis.* 116  
 V. *Denique, Æternus quoque, Infallibilis, Adequatus.* 117  
 VI. *Modi nostri cognoscendi imperfecti à Numinis Intellectu removendi.* 118  
 VII. *Deus sese intelligit; & quo modo?* ib.  
 VIII. *Res quasvis à se alias Deum perfectè cognitās habere, demonstratur.* 119  
 IX. *Possibilem Scientiam in Deo dari per eorundem Ideas.* 120  
 X. *Idque citra Divine Voluntatis decretum.* 121  
 XI. *Futurorum, etiam contingentium,*  
certa

- certa est in mente Divina Præscientia.* 122
- XII. *Existentia qua libet Deus plenissime cognoscit.* 124
- XIII. *Etiâ minima quæque ac vilissima.* ib.
- XIV. *Scientia Divina in Necessariam & Liberam divisa.* 125
- XV. *Media Scientia quid, & quo fine a suis inventoribus excogitata?* 126
- XVI. *Absurditas ejus pluribus instantiis detecta.* 127
- XVII. *Difficultatum in hoc negotio præcipuarum solutio.* 128
- XVIII. *Sapientie Divina mysteria reverenter agnoscenda.* 129

### EXERCITAT. XIX.

#### De Deo Volente.

- §. I. *Voluntas Dei paucis explicata & asserta.* Pag. 132
- II. *Voluntas Divina non nisi perfectissimo modo actiosa.* 133
- III. *Voluntas Dei agnoscenda prorsus Independent.* ib.
- IV. *Eadem Liberrima est; & quo sensu Indifferens quoque?* 134
- V. *Dei Voluntas Simplicissima, Immutabilis, Æterna.* 135
- VI. *Affectus omnes à perfectissima Voluntate removendi.* 136
- VII. *Deus semet ipsum vult perfectâ quadam complacendi.* 137
- VIII. *Alia quævis à se vult Deus; Possibilia nominatim, & Futura.* 138
- IX. *Præsentia quæque Deus vult; etiam Mala, & quomodo?* 139

- X. *Distributio Voluntatis Divina in Beneficentiam & Signa.* 140
- XI. *Alia ejusdem in Occultam & Revelatam distinctio.* ib.
- XII. *Pro concilianda altera illarum cum altera, monita duo observanda.* 141
- XIII. *Voluntas Dei Decernens vel Approbans; & hæc quæ?* 142
- XIV. *Decretum Divinum quid; & circa quæ versetur?* 143
- XV. *Decreti Divini existentia rationibus adstricta.* 144
- XVI. *Decretum Dei nullum multiplex mutabile, suspensum.* ib.
- XVII. *Difficiles hic occurrentes breviter discussæ.* 145
- XVIII. *Quâ modestie cautela arcana hæc Dei cogitanda.* 146
- XIX. *Problematis, de Decreto Dei positivo etiam circa Non-futura, brevis consideratio.* 147

### EXERCITAT. XX.

#### De Deo Sancto.

- §. I. *Virtutes quo sensu Deo tribuendæ & earum à nostris discrimen.* Pagina
- II. *Sanctitatis Divina notio quid involvat?* 148
- III. *Dei Benignitas, Gratia, Misericordia, Amor.* 149
- IV. *Veracitas Divina explicata & asserta.* 150
- V. *Deum fallere posse, si velit; vel veritale mendacium proferre, absurdum dici, ostenditur.* 151
- VI. *Justitiæ Divine, nominatim Veritatis dicativæ, brevis consideratio.* 152
- VII. *Dei*

- VII. *Deum, vi fustitiae, non posse non punire peccata, monstratur.* 155  
 VIII. *Palmaria difficultati paucis ob-  
 viam itur.* 156

EXERCITAT. XXI.

De Deo Potente.

- §. I. *Potentia cum Intellectu & Vo-  
 luntate Dei connexa demonstra-  
 tio.* Pag. 157  
 II. *Ejus interim à Voluntate Divina  
 distinctio rationibus adstructa.* 158  
 III. *Atque à difficultatibus quibusdam  
 vindicata.* 160  
 IV. *Potentia Deo asserta Simplex, In-  
 dependens, Infinita, Irresistibilis.* 161  
 V. *Divinam Potentiam nulli posse  
 fieri communem.* 162  
 VI. *Objectum Divinae virtutis neque  
 Deus ipse, neque contradictoria.* 163  
 VII. *Possibilitas rei quâ talis nihil reale  
 est, sed denominatio tantum exter-  
 na.* 164  
 VIII. *Radix proxima Possibilium est  
 Dei Potentia; prima, Intellectus  
 ejusdem.* 165  
 IX. *Potentia Divinae in Absolutam &  
 Ordinatam divisio explicata & asser-  
 ta.* 166

EXERCITAT. XXII.

De Dei Majestate & Beati-  
 tudine.

- §. I. *Majestas Dei conspicua in absolu-  
 to & independenti Ejus in quocumque  
 Dominio.* Pag. 168

- II. *Dominium Dei concipiendum non  
 nisi sanctissimum; & in sola Ejus per-  
 fectione fundatum.* 169  
 III. *Dominium Dei Morale per Legis-  
 lationem, ejusdemque Executio-  
 nem.* ib.  
 IV. *Non omnem Legem nobis Mora-  
 lem fluere ex ipsa Dei natura.* 170  
 V. *Majestatem Dei non rite estimari ni-  
 si humillimo venerationis affectu.* 171  
 VI. *Beatitudo Dei tanta quanta in Eo  
 perfectionis plenitudo.* 172

EXERCITAT. XXIII.

De Deo Creante.

- §. I. *Productio rerum à Deo facta non  
 indigentia sed sufficientie argumen-  
 tum.* Pag. 174  
 II. *Creatio quid; & ad quæ sese ex-  
 tendat?* 175  
 III. *Admittenda Creationis necessitas  
 demonstrata.* 176  
 IV. *Difficultatibus præcipuis, in hoc ne-  
 gotio occurrentibus obviatur.* 177  
 V. *Creandi vis in solius Dei est, ut in  
 ejus societatem nulla veniat creatu-  
 ra.* 179  
 VI. *Creandi actio num quid noceat à Deo  
 diversum?* 180  
 VII. *Productio creaturarum Deo, uti  
 liberrima, ita facillima.* 181  
 VIII. *Mundum ab æterno creatum  
 fuisse, repugnat.* ib.  
 IX. *Quando tamen præcisè fuerit pro-  
 ductus, natura non docet.* 182  
 X. *Creationis universæ cum ordo tum  
 modus per naturæ lumen incertus  
 planè.*

planè.	184
XI. Cartesii in eo omni definiendo notata temeritas.	185
XII. Cartesiana mundi Genesis Mosaica quam multis molis adversa.	186
XIII. Frustrà palliata ab Auctore fictionis audacia.	187
XIV. Mundus hic creatus, nobis quidem indefinita, re ipsà tamen finita amplitudinis.	188
XV. Indeque majorem, imò & plures alios, creare potest Deus.	189
XVI. Difficultatum hic moveri solitarum amorio.	190
XVII. Finis creati mundi, ultimus Dei gloria, subordinatus homo, recte statuitur.	191
XVIII. Objecta à Cartesio in oppositum rationes paucis excusse.	193
XIX. Ex visibilibus creaturis majestatem Creatoris invisibilem venerari discit pia mens.	194

## EXERCITAT. XXIV.

### De Deo Providente per Conservationem.

§. I. Providentia Divina circa hoc Universum consideratio generalis.	Pag. 197.
II. Prioris Providentia actus, Conservationis, specialior explicatio.	198
III. Eam positivum in creaturam durantem influxum notare, demonstratur.	199
IV. Imò re ipsà esse quandam continuam Creationem.	200

V. Difficultatum quarundam hic obviarum solutio.	201
VI. Qualescunque creaturas conservat Deus, influxu immediato, ac sibi proprio.	202
VII. Quacunque conservat Numen eadem annihilare, si velit, potest.	ib.
VIII. Annihilatio nil posuisti dicis, sed meram non-conservationem.	203

## EXERCITAT. XXV.

### De Deo Providente per Gubernationem.

§. I. Alter Providentia actus, Gubernatio, meditationis difficillima ac periculose.	Pag. 206
II. Error asserentium, solum Deum omnia, creaturas nihil operari.	207
III. Alter error illi oppositus, nullum Dei inoperantes creaturas influxum agnoscens.	208
IV. Vera Dei efficientia in causarum secularum actionis asserta.	209
V. Atque à difficultatibus quibusdam precipuis vindicata.	210
VI. Utriusque cause, prima & secunda, eadem esse docetur in effectu quopiam producendo actio.	211
VII. Dubiorum in hac sententia occurrentium brevis solutio.	212
VIII. Tres hujus Providentia quasi actus, Præcursor, Concursus, & Gubernatio strictè dicta.	213
IX. Virium ad operandum largitio a hos Providentia actus neque sufficit, neque pertinet.	214

- x. *Præcursor quid, & quo usque actione creature prior?* 215
- xi. *Præcursor Divini actionem creatam prædeterminantis necessitas demonstrata.* 216
- xii. *Influxus Dei generalis & determinabilis aliorum quam sit non uno modo in Deum contumeliosus?* 217
- xiii. *Præmotionis Dei efficacia cum libertate creature concilianda difficultas unde potissimum oriunda?* 218
- xiv. *Duplex in hanc rem prænotanda magni momenti observatio.* 219
- xv. *Creatæ causæ libertas, ut non indifferens, ita nec prorsus indifferens, statui potest.* 220
- xvi. *Alterius causæ veram libertatem cum determinatione alterius consistere, & ex naturæ rei, & ex adversa hypothese ipsa, docetur.* 221
- xvii. *Prædeterminans Providentia neque Deum peccati auctorem statuit, neque peccantem creaturam excusat.* 222
- xviii. *Eadem neque Deum injustitie arguit, neque causarum secundarum potentie actui præjudicat.* 223
- xix. *Concursus Dei agnoscendus tanquam causæ totalis, immediata, & principalis.* 225
- xx. *Concursu Dei continuato indiget creatura quamdiu in operando perseverat.* 226
- xxi. *Gubernantis Providentiæ Divinæ necessitas paucis demonstrata.* 227
- xxii. *Ea ad quasvis creaturarum actiones extendenda; etiam minimas, contingentes, liberas, malas.* 228
- xxiii. *Gubernatio Dei tota sanctissima, independens, irresistibilis, sapientissima, constantissima.* 230
- xxiv. *Providentiæ Divinæ in Ordinariam & Extraordinariam; item, in Realem & Moralem, divisio.* ib.
- xxv. *Moralis Providentiæ consideratio unicum genuinæ Philosophiæ Moralis Fundamentum.* 231
- xxvi. *Tractatus de Deo, ejusque Providentiæ, Epilogus.* 232

## EXERCITATIO

### De Lege Naturæ.

- §. I. *Providentiæ Divinæ subest quicquid existit rerum.* Pag. 235
- II. *Ex quo fluit Numinis in universas creaturas Imperium.* 236
- III. *Quod quatenus circa hominem versatur peculiarem mereatur considerationem.* ib.
- IV. *Regni Dei Moralis instrumentum est Lex Naturæ.* ib.
- V. *Ea est practicum rectæ rationis dictamen:* ib.
- VI. *Innatum, quoad habituales animi in id proclivitatem:* 237
- VII. *Præcipue quidem quod ad generalia honesti principia.* ib.
- VIII. *Lex hæc est, & quidem propriè dicta.* ib.
- IX. *Ejus existentia tam manifesta, quam omnimoda hominis à Deo dependentia.* 238
- X. *Citra eam nulla existere potest rationalis.*



- tionalis creatura.* ib.  
 XI. *Legislatorie potestatis basis Divinae naturae eminentia.* ib.  
 XII. *Obligationis ad eam agnoscendam sensum infert dependentia suae in creatura conscientia.* ib.  
 XIII. *Fus Dei Legislatorium malè ad Ejus beneficia, vel solam potentiam, refertur.* 239  
 XIV. *Innata Legis praecepta quadam sunt Juris Divini Naturalis;* ib.  
 XV. *Ut alia praescribere per ipsam suam naturam Numen nequiverit:* ib.  
 XVI. *Quadam tamen Juris Divini merè Positivi:* ib.  
 XVII. *Quae sententia & Divina Majestati planè congrua est;* 240  
 XVIII. *Et naturali hujus Legis sensui nihil detrahatur.* ib.  
 XIX. *Arbitraria praecepta cadere possunt sub Dei dispensationem.* ib.  
 XX. *Lex Natura lata & omni, & soli creaturae rationali.* 241  
 XXI. *Ut nulla ceterorum animantium*  
*hic haberi debeat ratio.* ib.  
 XXII. *Triplicem, ad promovendum Regnum Dei, imponit hac Lex obligationem:* ib.  
 XXIII. *Cui minimè satisfacit sola Societatis Civiles conservandae consideratio;* 242  
 XXIV. *Cum multorum officiorum antiquior longè sit obligatio:* ib.  
 XXV. *Quam qui non admittit Atheismum Politicum re verà inducit.* ib.  
 XXVI. *Lex Natura necessariò munita Sanctione Penali;* ib.  
 XXVII. *Qua aquissimo jure immorigeros exstirpatio ex hoc Regno manet:* 243  
 XXVIII. *Ut obsequiosos ejus cultores beata Dei, Regis sui, fructio.* ib.  
 XXIX. *Unde ipso naturae lumine Lex hac ut formula Fœderis operum innotesceat.* ib.  
 XXX. *His paucis contineri universa Moralis Philosophia fundamenta.* 244





PHILOSOPHEMATUM  
MISCELLANEORUM  
I N D E X.

DISSERTATIO

De Infinito.

SECTIO PRIOR,

De Conceptu Infiniti.

- §. I. Quacunque existunt humane menti pervestigabilia, præterquam Infinitum. Pag. 248  
II. De Infinito tamen mens nostra, etsi finita, rectè disputat. 249  
III. Neque ideò quicquam quod finitatem suam excedat conari, credendum est. 250  
IV. De Infinito disputari, cur noluerit re verà Cartesius? 251  
V. Triplex circa infiniti in nostra mente conceptum controversia. 252  
VI. Ad cuius intelligentiam præstructæ tres hypotheses. ib.  
VII. Infiniti conceptum esse negativum, evincit ejus ad mentem creatam dis-

proportio:

254

VIII. Nec non Infiniti secundum rem & conceptum indivisibilitas. ib.

IX. Iniqua inter ideam negativam tenebrarum, & eam quæ Infiniti est, comparatio. 255

X. Negativum Infiniti conceptum mens nostra quo modo format? 256

XI. Positivam Infiniti ideam non arguit, quod plus in Infinito esse intelligitur realitatis, quam in finito. 257

XII. Conceptum Infiniti eo qui finiti est in mente nostra priorem non esse, demonstratur. 258

XIII. Neque obstat, defectum finiti intelligi ex comparatione majoris, præta Infiniti. 259

XIV. Si naturæ ordine idea Infiniti in mente nostra sit prior, non sibi constare novam methodum, docetur. 260

XV. Infinitum clarè & distinctè ideà à fini-

- à finita mente concipi, repugnat. 260  
 XVI. Neque satisfacit distinctio inter  
 conceptum totius Infiniti, & singu-  
 larium in eo perfectionum. 261  
 XVII. Non etiam juvat plus realita-  
 tis, quod in idea Infiniti, præ omni  
 alia, contineri dicitur. 262  
 XVIII. Res in quibus minus perfectio-  
 nis est clarus plerumque nobis intel-  
 ligi ostenditur. 263  
 XIX. Errores circa ideam Infiniti per-  
 penium Meditationum Cartesianarum  
 ἀποκρίσεις τοῦ αὐτοῦ. 264

SECTIO POSTERIOR,

De Extensione Infinita.

- §. XX. De Infinita materiae extensione  
 quæstio est longissima consequen-  
 tia. Pag. 267  
 XXI. Infinitam Universi diffusionem  
 agnoscit præ aliis rotunde Epicu-  
 rus. ib.  
 XXII. Cartesianorum in infinita mun-  
 di extensione voracium cum innumeris  
 Epicuri in infinito universo mundis  
 consensus. 269  
 XXIII. Universi extensionem verè infi-  
 nitam statuere, æquè ac Epicurus,  
 necesse habet Cartesius. 270  
 XXIV. Cui difficultati frustra sese hic  
 subducere laborat. ib.  
 XXV. Cartesii dissertatio, quæ suam  
 aperit de Infinito universo senten-  
 tiam. 271  
 XXVI. Alia ejusdem in eandem rem ad-  
 ducta loca præcipua. 272

- XXVII. Philosophationis Cartesiana sum-  
 ma omnis capitibus quibusdam com-  
 prehensa. 274  
 XXVIII. Veram extensionis Infinitatem  
 eis asseri, observatione unâ aque al-  
 terâ ostenditur. 275  
 XXIX. Distinctio Cartesii inter Infini-  
 tum & Indefinitum nil hic aufert  
 difficultatis. 276  
 XXX. Mundi extensio quo sensu affir-  
 manda Infinita, Indefinita, Finita? 277  
 XXXI. Finitas partes nulli Infinitæ ex-  
 tensioni constituendæ sufficere, osten-  
 ditur. 278  
 XXXII. Etiam partes numero infinitas  
 in Infinita extensione admitti non  
 posse, docetur. 280  
 XXXIII. Neque ex partibus extensione  
 infinitis Infinitam extensionem com-  
 poni, evincitur. 281  
 XXXIV. Imò ne alterâ quidem parte infi-  
 nitæ partes extensionem totam Infini-  
 tam conficere posse, demonstra-  
 tur. 282  
 XXXV. Ex quibus omnibus, extensum  
 nullum, ob ipsam sui extensionem,  
 Infinitum dari, aut dari posse, con-  
 cluditur. 283  
 XXXVI. Quod idem ex rei corporea na-  
 tura & attributis quibuslibet pluribus  
 instantis conficitur. 284  
 XXXVII. Essentia solius Dei Infinita  
 extensionis cujusvis Infinitatem ever-  
 tit. 285  
 XXXVIII. Immensitas Divina exten-  
 sionem mundi Infinitam non pati-  
 tur. 287

XXXIX. *Divina Potentia infinitas, & liberrimum in rem creatam dominium, cum Infinita huius extensione non consistit.* 288

XL. *Denique, extensionis Infinitas inimica existit Divina Sapientia, Unitati, Incomprehensibilitati, atque Aternitati.* 289

XLI. *Difficultas de spatiis imaginariis, qua veram in suo conceptu involvant extensionem, auferitur:* 290

XLII. *Quamque ea sit inefficax, ad impugnandam finitam mundi extensionem, duplici instantia ostenditur.* 291

XLIII. *Non qui mundi extensionem finitam cogitat, quicquam sentit de se superbum, de Deo minus magnificum.* 292

XLIV. *Non ad extensionem quamlibet finiendam aliud corpus ambiens cum Epicuro admittere necessum est:* 294

XLV. *Cum id corpori accidat, non qua simpliciter finit, sed qua parti Universi.* 296

XLVI. *Omnipotentia Divina Immensitas pro possibili extensione Infinita nil concludit.* ib.

XLVII. *Detegitur inde petita sophistication, non una in hanc rem allata instantia.* 297

XLVIII. *Demonstrationis de extensione necessario finita Porismata, Cartesianam Physicam subvertentia.* 298

## DISQUISITIO

### De Nullitate Spirituum.

§. I. *Nullitatis nomen merito in hac Disquisitione usurpatum, neque sine exemplo.* Pag. 300

II. *Nullitismi spirituum assertor primarius Cartesius:* 301

III. *Contendens, non nisi operationum respectu spiritus dici posse Alicubi esse.* ib.

IV. *Prævit olim hac sententia Cartesio Valentinus Weigelius.* 302

V. *Opinionis Weigeliana atque Cartesianæ consensus.* 303

VI. *Ex operationibus spirituum in aliquo Ubi essentialis eorundem in illo præsentia inferitur.* ib.

VII. *Frustrâ ad actionem spiritus transcurrentem ejus Alicubi restringi.* 304

VIII. *Is imprimis, qui motus corporis cum actione spiritus nihil habere per se commercii opinatur.* 305

IX. *Arctissima mentis humanæ cum corpore conjunctio præsentiam spiritus essentialem valide adstruit.* 306

X. *Nec non mystica, quam dicat fides, duarum naturarum in eandem Christi personam unio.* 307

XI. *Essentialem Dei Omnipræsentiam Nullibifica sententia palam evertit.* ib.

XII. *Cælumque beatorum inducit reperiendum nuspiam locorum.* 308

XIII. *Nequaquam ex vulgi errore naturæ axiomata, Omne quod est, Alicubi est.* 309

- XIV. Neque spiritum Ubi obstat spatum, quod cum corpore sit idem. 310  
 XV. Quale sit spiritum Alicubi, & quâ ratione nobis concipiendum? 311  
 XVI. Spiritum Alicubi non tollit non-extensa illorum natura. 312  
 XVII. Forgai in hanc rem dictum, & quedam in id observatiuncula. 313  
 XVIII. Corporis, cui spiritus coëxistit, aucta vel diminuta quantitas huius Alicubi nil praedictat. 315  
 XIX. Solo spiritum, nullo corpore, existente, etiam illi suum competit Ubi; & quo modo? ib.  
 XX. Actio spiritus transiens, cum hic aut illic esse non facit, sed tantum indicat. 316  
 XXI. Nullibistis nulla de affectis sibi opinionionibus querelarum causa. 317  
 XXII. H. Mori in Nullibistas dicto Disquisitio clauditur. 318

## EXERCITATIO

### De Homine Automatico.

- §. I. Assumptarum hypothesium falsitas fertilis plerorumque errorum causa. Pag. 320  
 II. Admissi in brutis motus automatici iisdem in hominibus admittendis viam parant. 321  
 III. Hominem Automaticum quem, & quo sensu, admittat Cartesius? ib.  
 IV. Per eum inane reipsâ redditur & superfluum anima rationalis in corporis motus imperium. 322

- V. Deleaturque prorsus efficax mentis, tanquam vera causa, in motus corporis influxus. 323  
 VI. Obstat eidem impeditus corporis motus ad mentis egritudinem, abstractam meditationem, & separationem à corpore in morte. 325  
 VII. Opinio de Homine Automatico patronos suos incertos reddit, nûm bona hominum pars anima rationali gaudeat? 326  
 VIII. Operationes brutorum pro automaticis hominis motibus nihil concludunt. 328  
 IX. Operationes hominis multa rationem habent causam, etsi inconsultâ eâ fieri videantur. ib.  
 X. Etiam purè animales actiones à rationali anima proficisci possunt. 330  
 XI. Motus corporis qui passionibus animi comitantur mentem habent principium sui, & voluntarii sunt. 331  
 XII. Convulsionum motus ipse ab anima est; inordinatio ejus à perturbata corporis dispositione. 333  
 XIII. Automatica artefacta pro rerum naturalium motibus automaticis concludendis nihil prosunt. ib.

## DISQUISITIO

### De Contradictoriis Deo Possibilibus.

- §. I. Contradictoria Deum posse, præter Weigelium, vix quisquam ante Cartesium contendit. Pag. 336  
 II. Hujus in hanc rem allegati textus, qui

- qui mentem ejusdem plenius expli-  
cant. 337
- XII. Contradictoriorum possibilitas cum  
primæ causæ sapientia nequaquam  
consistit. 339
- XIV. Non nostræ mentis finitudo, sed  
ipsa rei contradictoriæ repugnantia  
causa existit, cur ejusdem formari  
nequeat. 340
- V. Omnipotentia Divina in veram rem  
terminatur, non in nihilum; adeo-  
que nec in contradictoria. 341
- VI. Si contradictoria Deo possibilia sint,  
nihil fingi tam absonum potest, quod  
non efficere possit Deus. 343
- VII. Si facere queat Deus ut contradi-  
ctoria sint simul, etiam res contra-  
dictorias credendas proponere po-  
test. 344
- VIII. Admissa contradictoriorum pos-  
sibilitate, nullius momenti existunt  
quecunque ab absurdo consequenti pe-  
tita argumenta. ib.
- IX. Quin, subvertuntur omnia omnium  
disciplinarum atque universæ quam  
unquam habere potest homo certitudi-  
nis fundamenta. 345
- X. Potentie Dei cum Voluntate ejusdem  
confusio præcipua novæ assertionis  
basis. 346
- XI. Objectorum diversitas evidens di-  
stinguenda Divinæ Potentie à Volun-  
tate fundamentum. 347
- XII. Eandem distinctionem evincit ha-  
bens sese aliter Potentia aliter Volun-  
tatis Divinæ exercitium. 348
- XIII. Neque, quando Potentia Dei à

- Voluntate distinguitur, ideo minus  
efficax aut perfecta hæc agnoscitur. 349
- XIV. Productio rerum cur ad Volunta-  
tem Dei sæpe referatur, nullà factà  
mentionem Potentie? 350
- XV. Rerum possibilitati fundanda sola  
sufficit Dei Sufficientia, citra ullam  
de Voluntate ejus cogitationem. 351
- XVI. Nihil perfectionis divinæ libertati  
destrahitur, si contradictoria Deum  
efficere posse, negetur. 352
- XVII. Possibilia, tamen si ad indiffe-  
rentem primæ causæ voluntatem non  
reducantur, à Deo nihilominus de-  
pendent. 354
- XVIII. Quæ alia esse potuissent nature  
rerum contradictoriorum possibilita-  
tem minimè probant. ib.
- XIX. Nullà parte immolestie reus exi-  
sit, qui contradictoria infinite po-  
tentie subducit. 355
- XX. Propositi questionis decisionem Phi-  
losopho minimè subterfugiendam esse,  
ostenditur 356
- XXI. Absurdè dicitur Deus per Poten-  
tiam posse, quod idem efficere nequeat  
per Bonitatem. 357

## DISSERTATIO

### De Sensuum Ufu in Philosophando.

- §. I. Difficultatis in cognoscendo vero  
causa est adminiculorum tum defectus  
tum abusus. Pag. 360
- II. Manifestum id in sensuum perre-  
ptio-



- XIV. Neque spiritum Ubi obstat spatium, quod cum corpore sit idem. 310
- XV. Quale sit spirituum Alicubi, & qua ratione nobis concipiendum? 311
- XVI. Spirituum Alicubi non tollit non-extensa illorum natura. 312
- XVII. Forgai in hanc rem dictum, & quedam in id observaviuncule. 313
- XVIII. Corporis, cui spiritus coexistit, aucta vel diminuta quantitas huius Alicubi nil praedictat. 315
- XIX. Solospiritum, nullo corpore, existente, etiam illi suum competit Ubi; & quo modo? ib.
- XX. Actio spiritus transiens, cum hic aut illic esse non facit, sed tantum indicat. 316
- XXI. Nullibistis nulla de affectis sibi opinionibus querelarum causa. 317
- XXII. H. Mori in Nullibistis dicto Disquisitio clauditur. 318

## EXERCITATIO

### De Homine Automatico.

- §. I. Assumptarum hypothesium falsitas fertilis plerorumque errorum causa. Pag. 320
- II. Admissi in brutis motus automatici iisdem in hominibus admittendis viam parant. 321
- III. Hominem Automaticum quem, & quo sensu, admitat Cartesius? ib.
- IV. Per eum inane reipsa redditur & superfluum anime rationalis in corporis motus imperium. 322

- V. Deleturque prorsus efficax *mentis*; tanquam vere cause, in motus corporeos influxus. 323
- VI. Obstat eidem impeditus corporis motus ad mentis aegritudinem, abstractam mediationem, & separationem à corpore in morte. 325
- VII. Opinio de Homine Automatico patronos suos incertos reddit, num bona hominum pars anima rationali gaudeat? 326
- VIII. Operationes brutorum pro automaticis hominis motibus nihil concludunt. 328
- IX. Operationes hominis multa rationem habent causam, etsi inconsultè ea fieri videantur. ib.
- X. Etiam purè animales actiones à rationali anima proficisci possunt 330
- XI. Motus corporis qui possessiones animi comitantur mentem habent principium sui, & voluntarij sunt. 331
- XII. Convulsionum motus ipse ab animae est; inordinatio ejus à perturbata corporis dispositione. 333
- XIII. Automata artefacta pro rerum naturalium motibus automaticis concludendis nihil prosunt. ib.

## DISQUISITIO

### De Contradictoriis Deo Possibilibus.

- §. I. Contradictoria Deum posse, præter Weigelium, vix quisquam ante Cartesium contendit. Pag. 336
- II. Hujus in hanc rem allegati *sexu*, qui

- qui mentem ejusdem plenius expli-  
cant. 337
- XII. Contradictoriorum possibilitas cum  
prima cause sapientia nequaquam  
confistit. 339
- XV. Non nostramentis finitudo, sed  
ipsa rei contradictorie repugnantia  
causa existit, cur ejusidea formari  
nequeat. 340
- V. Omnipotentia Divina in veram rem  
terminatur, non in nihilum; adeo-  
quē nec in contradictoria. 341
- VI. Si contradictoria Deo possibilisint,  
nihil fingit tam absolum potest, quod  
non efficere possit Deus. 343
- VII. Si facere queat Deus ut contradi-  
ctoria sint simul, etiam res contra-  
dictorias credendas proponere po-  
test. 344
- VIII. Admissa contradictoriorum pos-  
sibilitate, nullius momenti existunt  
quæcunque ab absurdo consequenti pe-  
tita argumenta. ib.
- IX. Quin, subvertuntur omnia omnium  
disciplinarum atque universe quam  
unquam habere potest homo certitudi-  
nis fundamenta. 345
- X. Potentie Dei cum Voluntate ejusdem  
confusio præcipua novæ assertionis  
basis. 346
- XI. Objectorum diversitas evidens di-  
stinguende Divina Potentie à Volun-  
tate fundamentum. 347
- XII. Eandem distinctionem evincit ha-  
bens sese aliter Potentie aliter Volun-  
tatis Divine exercitium. 348
- XIII. Neque, quando Potentia Dei à

- Voluntate distinguitur, ideo minus  
efficax aut perfecta hac agnosci-  
tur. 349
- XIV. Productio rerum cur ad Volunta-  
tem Dei sæpè referatur, nullà factà  
mentionem Potentie? 350
- XV. Rerum possibilitati fundande sola  
sufficit Dei Sufficientia, citra ullam  
de Voluntate ejus cogitationem. 351
- XVI. Nihil perfectionis divine liberati  
detrahitur, si contradictoria Deum  
efficere posse, negetur. 352
- XVII. Possibilia, tametsi ad indiffe-  
rentem primæ cause voluntatem non  
reducantur, à Deo nihilominus de-  
pendent. 354
- XVIII. Quæ alia esse potuissent natura  
rerum contradictoriorum possibilita-  
tem minimè probant. ib.
- XIX. Nulla parte immo læstie reus exi-  
stis, qui contradictoria infinite po-  
tentie subducit. 355
- XX. Propositæ questionis decisionem Phi-  
losopho minimè subterfugiendam esse,  
ostenditur 356
- XXI. Absurde dicitur Deus per Poten-  
tiam posse, quod idem efficere nequeat  
per Bonitatem. 357

## DISSERTATIO

### De Sensuum Ufu in Philosophando.

- §. I. Difficultatis in cognoscendo vero  
causa est adminiculorum defectus  
tum abusus. Pag. 360

- II. Manifestum id in sensuum pree-  
cisio-

- ptionibus, quibus nimium adhaerent, cum plebeis, Epicurei; 361
- III. Parum vero tribuunt Sceptici & Platonici: Medium inter utroque tenens Peripatetici. 362
- IV. Illorum atque istorum errorem confutare haud opera pretium existit. ib.
- V. Cartesius hac parte Scepticismi suspicionem apud multos incurrit: 363
- VI. Dum ad innatas ideas, non sensationes, in cognitione veri, attendere jubet. ib.
- VII. Ejus, quibus id inculcat, adducuntur loca: 364
- VIII. Et Claubergiana in illa paraphrasis. ib.
- IX. In ea quae mitiganda assertionis gratia ab utroque admiscetur observatio. 365
- X. Status questionis fixus, propositio paucis Cartesiana assertionis sensu genitino: 366
- XI. Eique opposita antithesi, sensus non ad vivendum tantum, etiam ad sapiendum, esse duos. 367
- XII. Impingit Cartesii assertio in legem propriam, quae amplissima Dei opera cogitare jubet. ib.
- XIII. Item in aliam, quae de rerum naturalium fine definire quicquam prohibet. 368
- XIV. Sensus à philosophando remoti, ut major sit innatarum idearum necessitas. 369
- XV. Quoque amplior esset in fingendis vnicuique mundi elementis liber-

- tas. ib.
- XVI. Ad ipsam veri cognitionem acquirendum Sensibus uti jubet Sensuum Opifex. 371
- XVII. Imò & ad confirmandum Fidei Divinae certitudinem subiectivam. 372
- XVIII. Unde efficax, pro Sensu ultra animalis vitae regimen extendendo, argumentum. ib.
- XIX. Modus cognoscendi scilicet unio consequens, Sensus ultra vitam animalis regimen patere, evincit. 373
- XX. Maxime, cum in hoc moderando Sensationum cum cogitationibus nexio nullum habeat, juxta novam hypothesein, usum. 374
- XXI. Rerum materialium existentiam Sceptici negare coacti, tantum quod sensui nullum facerent in philosophando usum. 375
- XXII. Cura Sensuum opem de plurimis corporum adjunctis accurate philosophari non licet. 377
- XXIII. Confirmantibus id suam praxi ipsis dissentientibus. 378
- XXIV. Negato Sensibus usu in philosophando, etiam experientia nullus manet locus. 379
- XXV. Non existit tantum sed & natura corporum adjumento Sensuum intelligitur. 380
- XXVI. Cavendum, ne sensus sumatur adequatum cognitionis Philosophica principium. 381
- XXVII. Discernenda quoque sensationes verae

- vera à fallacibus, ex debita attentionis coniectura.* 382
- XXVIII. *Nec non, ex explorata recta organorum dispositione.* 383
- XXIX. *Etiā, ex requisita objecti ad organum comparati proportionē.* 384
- XXX. *Demquē, ex constitutione medii legitima.* ib.
- XXXI. *Neque difficilius hæc attenduntur, quam regulæ quibus intellectus perceptiones reguntur.* 385
- XXXII. *Ex sensatione reperita de bonæ sensationis requisitis facilius constat.* 386
- XXXIII. *Item, ex plurium sensuum de eadem re consentiente testimonio.* 387
- XXXIV. *Sensuum fallacia nil obstant, quo minus eis mens utatur in cognoscendo vero:* 388
- XXXV. *Haud magis quam errores intellectus huius usum in philosophando prohibent.* ib.
- XXXVI. *Sensuum erroribus, non minus quam intellectus, corrigendis ad manus sunt remedia.* 389
- XXXVII. *Fallacia Sensuum, si philosophationi, etiā vitæ moderamini hos inepros faciunt.* ib.
- XXXVIII. *Innata rerum ideæ, si vel maximè dentur, absque Sensibus philosophationi non sufficient.* 390
- XXXIX. *Quamvis toti composito Sensus convenient, non ideo tamen ad vitæ usum præcise sum restringendi.* 391
- XI. *Sensus sapiendi adminicula sunt, nisi sapientes non sint qui eos semper, e-*

- quantur duces.* 392
- XL. *Acumen Sensuum in brutis, eos homini ad philosophandum esse innuiles nequaquam arguit.* 393
- XLI. *Cum non Deo & Angelis, homini tamen ad intelligendum cur sensus opus sit?* ib.
- XLII. *Quæcumque Sensui clara sunt, eadem qua talia menti existunt evidētia.* 394
- XLIV. *Contrà, quæ nullo modo sentimus, omnium difficillimè intelligimus.* ib.
- XLV. *Intellectus humani à Sensu dependentis explicatio & demonstratio paucis theorematibus comprehensa.* 395

# EXERCITATIO

Expēdens Consectariā Ideæ,  
quā absolvitur Mens Hu-  
mana solā Cogitatione.

- §. I. *Nullum prudenti Philosopho recipiendum dogma novum, cuius non caute animo prospexerit consequentias.* Pag. 400
- II. *Consectariorum quæ post se trahit novella idea de humana mente, quæ mera cogitatio sit, syllabus.* 401
- III. *Affertionis, Dei omnem essentiam in cogitatione constituentis, cum ea quæ mentem humanam solā cogitatione absolvit, demonstrata connexio: Eiusdemque paucis detecta falsitas.* 403
- IV. *Sententiæ, non nisi duo in Deo attributa admittentis, cum eadem*  
LII. 3. hypo-

- hypothefi oftensus nexus: Ejusdemque patefacta breuiter absurditas.* 405
- V. *Deum ratione essentie nuppiam esse, eadem hypothefis necessario inferi: Dogmatis hujus addita confutatio.* 407
- VI. *Definitio Divina Immenfitatis, tantum per denominationem externam ab operatione desumptam, ex eadem hypothefi fluit: Ejus notata periculosa absurditas.* 411
- VII. *Utriusque Natura in Christo unionem solâ operatione absolvere jubet eadem hypothefis: Reclamante orthodoxâ Christianorum Fide.* 415
- VIII. *Angelos esse nuppiam docere cogit eadem hypothefis: Dogmatis hujus Weigeliani confutatio.* 417
- IX. *Angelos de spatio in spatium non moveri, eadem hypothefis inferi: Ejus assertionis ostensa paucis falsitas.* 419

EXERCITATIO  
De Operationibus Brutorum.

- §. I. *Occasio Exercitationis hujus Apologetica de operationum in brutis principio substantiali.* Pag. 422
- II. *Contraversia totius summa brevi compendio exposita.* 423

- III. *Prajudicium de mechanica mundi structura animae substantialis brutis negare causa praecipua.* 424
- IV. *Vera cognitionis brutorum tot existunt testimonia, quot fere eorundem obvia sunt operationes.* 425
- V. *Substantialis operationum in brutis principii admittendi propter non unam rationem necessitas.* 426
- VI. *Illis cedere coactus Cartesius ipse controversiam hanc in medio ferè relinquit.* 427
- VII. *Seftatorum ejus alii ad animam mundi Platonice confugiunt, alii e. iam hominum animas substantiales expungunt.* 428
- VIII. *Consentit Auctoritas Sacra cum assertione de vera vita & cognitionis in bruti principio substantiali.* 429
- IX. *Bruta in mera Automata convertit quae nostrae assertioni opposita est thefis.* 430
- X. *Asserta bruti vera cognitio nihil eisdem tribuit Rationalitatis;* 431
- XI. *Cum non omnis cognitio necessaria existat ejusdem ordinis & speciei:* 432
- XII. *Docente id passim Scholâ Peripateticâ, nec ipso dissentiente Cartesiano Forgeo.* 433
- XIII. *Quae brutis substantiale vera cognitionis principium tribuit opinio, Vetus est & maximè trita.* 434

F I N I S.

Ex Typographiâ Academicâ, Anno 1685.

